

ЖАҲОН



АДАБИЁТИ

Адабий-бадиий, ижтимоий-публицистик журнал



Жамоатчилик кенгаши:

Муҳаммад АЛИ
Наим КАРИМОВ
Иброҳим ФАФУРОВ
Низом КОМИЛОВ
Шуҳрат СИРОЖИДДИНОВ
Муҳаммаджон ХОЛБЕКОВ
Хўршид ДЎСТМУҲАММАД
Абдураҳим МАННОНОВ
Муҳаммаджон ҚУРОНОВ
Муҳаббат ТЎЛАХЎЖАЕВА
Баҳодир КАРИМОВ
Муҳиддин ОМОН

МУАССИСЛАР:
РЕСПУБЛИКА МАҶНАВИЯТ
ВА МАҶРИФАТ КЕНГАШИ

ЎЗБЕКИСТОН МАТБУОТ
ВА АҲБОРОТ АГЕНТЛИГИ
ЎЗБЕКИСТОН ЁЗУВЧИЛАР
УЮШМАСИ

Бош мухаррир Шуҳрат РИЗАЕВ

Таҳрир ҳайъати:

Амир ФАЙЗУЛЛА
Назира ЖЎРАЕВА
Алимурод ТОЖИЕВ
Шахноза НАЗАРОВА
Дилдорхон АЛИЕВА
Алишер ОТАБОЕВ
Даёрон РАЖАБОВ
Зилола ЖАЛОЛОВА

МУНДАРИЖА

НАВОИЙ САБОҚЛАРИ

А.НАВОИЙ. Ёр оғиз очмаска... (<i>Рус ва инглиз тилидига А.Кронгауз, А.Бұматова тарж.</i>)	3
И.ҲАҚҚУЛ. Ш.НАЗАРОВА. Шоирлик –илоҳий қисмат. Сүхбат.....	140
С.ОЛИМ. Таржимавийлик ва назариявийлик	146
З.МАМАДАЛИЕВА. Рух манзиллари.	154
К.ҚУРАМБОЕВ. Алишер Навоий ва коракалпоқ адабиёти.	158
Ф.ОЛИМ. Мутолаа мактаби.	166

HACР

Х.МУРАКАМИ. Пинбол –1973. Роман. (<i>Рус тилидан А.Отабоев тарж.</i>)	8
Т.МАНН. Лоттанинг Ваймардаги ҳәти. Роман. (<i>Олмон тилидан Я.Эгамова тарж.</i>) ...	53
С.МОЭМ. Омади чопган мусаввир. Тайпан. Ҳикоялар. (<i>Рус тилидан М.Омон тарж.</i>) ...	121

ҚЎШНИМ – ҚАРДОШИМ

Р.ХИФЗИЙ. Шеърлар. (<i>Турк тилидан Т. Қаҳҳор тарж.</i>)	45
--	----

ШЕЪРИЯТ МИНТАҚАЛАРИ

Үйғур мумтоз шеъриятидан. (<i>Үйғур тилидан О.Жалилов тарж.</i>)	115
--	-----

ЁДНОМА

А.ЎРОЗБОЕВ.Мангулик жамолининг жилvasи.	175
--	-----

АДАБИЁТШУНОСЛИК. ФАЛСАФА.

Ш.ҲАЙИТОВ. Туркий халқлар адабиётида Бобур ижодининг ўрганилиши.	170
А.УЛУФОВ. Арасту англатган адабиёт.	183

САНЪАТДАГИ СИЙМОЛАР

С.РАЖАБОВА. Ён, ёнавер менинг юлдузим.	193
Ф.КАРАЕВА. Казимир Малевич.	196

Тарихда бу кун.	198
Қомус.	203
Журналнинг русча ва инглизча муҳтасар мазмуни.	205

NAVOIY SABOQLARI



Алишер НАВОИЙ

(1441–1501)

ЁР ОГИЗ ОЧМАСҚА...

*Ёр оғиз очмасқа дардим сүргали топтим сабаб,
Күп чучукликтін ёпушмислар магар ул икки лаб.*

*Чайқалиб гүё тушар ҳайвон зулоли ичра мавж,
Изтироб ичра юзунгга солса чин ногаҳ газаб.*

*Күхи дард ичра мени Фарҳод агар қилдинг хитоб,
Чун сени дермен чучук жоним эрур Ширин лақаб.*

*Буки күнглумни итинг тишиларда оғзин қочиур,
Е ўти ёхуд аниңг исланғани эркин сабаб.*

*Ишқи комил элни ё Фарҳод, ё Мажнун қилур,
Гар эрур маъшуқ ёхуд арманий ёхуд араб.*

*Эйки, факр ичра қадам қўйдунг талаф водийсига,
Бўлмаса толиб санга матлуб, суд этмас талаф.*

*Шаҳ ҳаримида, Навоий, неча топсанг эҳтиром,
Билгил ўз ҳаддингнию беҳад риоят қил адаб.*

(“Наводир уш-шабоб”, 45-ғазал)

ЛУҒАТ:

Ҳайвон зулоли – тириклик суви
Кўҳ – тоғ
Чин – ажин, тиришиш, чимирилиш

Факр – йўқсил, бечора; бу ўринда: дунёга беҳожат бўлиб, яъни ундан тамани узиб, ёлғиз Яратганга талабгор бўлиш

Матлуб – талаб қилинган, хоҳланган; севимли, ёқимли

Толиб – изловчи, хоҳловчи, майл қилувчи

Суд – фойда

Ҳарим – хос манзил, маскан, ўрда

Байтларнинг насрый баёни

Дилнавоз ЮСУПОВА шарҳи

1. Ёр менинг дарду ҳолимни сўрамаётганига сабаб топдим: унинг икки лаби жуда ширинлигидан бир-бирига ёпишиб қолган, шундан у оғиз очиб, сўзлай олмаяпти.

2. Агар юзинг ғазабдан чимирилса (ёки унда чизиклар пайдо бўлса), бу худди тиник сув устидаги тўлқинларнинг ногаҳон чайқалиб, мавжла-нишига ўхшайди.

3. Мени дард тоғи ичра бир Фарҳодга нисбат берадиган бўлсанг, мен сени “Ширина лақабли чучук жоним” деб атайман.

4. Сенинг итинг менинг кўнглимни тишламоқчи бўлганда, оғзини олиб қочади. Бу кўнглим оташининг таъсиридан ёки унинг ҳидланганидан бўлса керак.

5. Маъшуқа (ёр) хоҳ армани, хоҳ араб бўлсин, фарки йўқ; камолга етган ишқ инсонни Фарҳод ёки Мажнунга айлантиради.

6. Эй факт, талаб водийсига қадам қўйган кимса, агар сен хоҳлаётган ёр (матлуб) сенга майл кўрсатмаса, талабингдан фойда йўқ.

7. Эй Навоий, шоҳ даргоҳида қанчалик ҳурмат-эҳтиром топсанг ҳам, ўз ҳаддингни билгилу одоб чегарасидан чиқма.

Ғазалнинг умумий маъно-моҳияти

Мазкур ғазал Алишер Навоийнинг ошиқона мазмундаги ғазалларидан бўлиб, унда ҳазиломуз кайфият ва ҳусни таълил (чиройли далиллаш) санъатининг бетакрор намунаси билан бошланган матлаъ шоҳбайт дара-жасига кўтарилган. Ошиқ маъшуқанинг ундан ҳол-аҳвол сўрамаслигига ёрнинг лаблари ширинлигидан бир-бирига ёпишиб қолганлигини сабаб сифатида кўрсатади ва шу билан муайян маънода ўз-ўзига таскин беради:

*Ёр оғиз очмасқа дардим сўргали топтим сабаб,
Кўп чучукликтин ёпушишилар магар ул икки лаб.*

Ошиқнинг бу тавсифидан малолланган чамаси, иккинчи байтда маъшуқа бир оз ғазабнок, чимирилган қиёфада тасвирланади, лекин бу чимирилиш унинг гўзаллигини янада оширади: ёрнинг қошлари ғазабдан чимирилганда, унинг сувдек тиник чехрасида чизиклар пайдо бўлади, бу худди зилол сув ногоҳ чайқалиб юзасида тўлқинлар ёйилишини ёдга солади:

Чайқалиб гүё тушар ҳайвон зулоли ичра мавж,
Изтироб ичра юзунгга солса чин ногаҳ ғазаб.

Ошиқ учун ишқ дарди тоғдек улкан ва оғир. Бу дардни күтариш учун Фарҳоддек кўхкан (тоғ қазувчи) бўлиш керак. Шоир шу ўринда матлаъдаги лаб билан боғлиқ чучукликни энди тўлалигича ёрга нисбат беради ва сўз ўйини воситасида ҳам Фарҳоднинг ёри Ширин эканлигини, ҳам ўз ёрининг “Ширин лақаб чучук” эканлигини таъкидлайди:

*Кўҳи дард ичра мени Фарҳод агар қилдинг хитоб,
Чун сени дермен чучук жоним эрур Ширин лақаб.*

Ошиқ ўз ишқида шунчалик жонфидоки, ҳатто ўз юрагини суғуриб олиб, маъшуқанинг итига ташлайди. Лекин ит уни оғзига олмайди. Бунга сабаб нима? Шоирнинг фикрича, бу ошиқ юрагининг ҳарорати (қайноқлиги) дан итнинг оғзи куйиб, уни тишлай олмаслигидан ёки жон таслим этган юракнинг бир муддат ташқарида қолиб, ҳидланганидан бўлса керак:

*Буки кўнглумни итинг тишларда оғзин қочиур,
Ё ўти ёхуд аниг ислангани эркин сабаб.*

Бешинчи байтда ишқнинг камолотига тавсиф берилади: маъшуқ (ёр) хоҳ армани, хоҳ араб бўлишидан қатъи назар, камолга етган ишқ инсонни Фарҳод ёки Мажнунга айлантиради. Тасаввуф таълимотига кўра, Ҳаққа етишишнинг икки йўли бор. Бири Ҳақдан жазба етиши, яъни Оллоҳ ёди билан ўзидан ва ўзлигидан бехабар бўлиб юриш ва охир-оқибатда жисм – вужуддан кутулиб, Илоҳ вужудига қўшилиш (бошқача айтганда, Мажнуннинг йўли). Иккincinnisi – пирга қўл бериб, унинг иродаси, амри билан “фано даштини кезиб”, мashaққат ва риёзат оқибатида жазба топиб Ҳаққа эришиш (Фарҳод йўли). Улар шаклан бир биридан фарқлансанда, моҳиятан бир мақсадга Оллоҳни танишга – илоҳий маърифатни англашга қаратилган эди. Навоий байтда ана шу икки йўлни назарда тутар экан, Фарҳод учун армани (Ширин), Мажнун учун араб (Лайли) илоҳий мазхар (Ҳақ нури порлаган хилқат) бўлғанликларини таъкидлайди:

*Ишқи комил элни ё Фарҳод, ё Мажнун қилур,
Гар эрур маъшуқ ёхуд арманий ёхуд араб.*

Мақтаъдан аввалги байт “мавъизатангиз байт” бўлиб, унда Навоийнинг факру фано билан боғлиқ концепцияси баён қилинган. Маълумки, “факр” тасаввуфда дунёга беҳожат бўлиб, яъни ундан тамани узиб, ёлғиз Яратганга талабгор бўлишни англатади. Шунингдек, бу тариқат йўлига кирган солик босиб ўтадиган рухий-маънавий мақомлардан (тавба, зухд, вараъдан кейин келадиган) биридир. Сайид Жаъфар Сажжодий факрга таъриф бериб, шундай ёзади: “Мол-мулки бўлмаган ёинки бўлса ҳам, унинг учун бўлмаган кишига факир дейилади ва фақир деб Ҳаққа талабгор бўлган, ўз муродини Ҳақ остонасидан излайдиган кишига айтилади”. Шу ўринда таъкидлаш керакки, бу мақомларни босиб ўтиш мураккаб

жараён бўлиб, Ҳақдан жазба етмаса, яъни майл бўлмаса, унга эришиш беҳуда бўлган.

Демак, байтдан келиб чиқадиган хулоса: Эй толиб, агар сен фақр мақомига эришиш учун талаб водийсига қадам қўйсанг-да, бу йўлда сенга Ҳақнинг ўзи ёр бўлмас экан, қанчалик талабгор бўлма, бундан фойда йўқ.

Мактаъда Навоий яна бир маърифий фикрни китобхонга уқтиради: шоҳ даргоҳида қанчалик ҳурмат-эҳтиромга сазовор бўлсанг ҳам, ўз ҳаддингни бил ва одоб чегарасидан чиқма:

*Шаҳ ҳаримида, Навоий, неча топсанг эҳтиром,
Билгил ўз ҳаддингию беҳад риоят қил адаб.*

Фазал рус тилига А.Кронгауз томонидан ўгирилган. Таржимада аслият ҳажми (7 байт) ва маснавийга хос қофияланиш тизими (аа-бб-вв...) сақланганлиги унинг шаклий муваффакиятини таъминлаган. Мазмунда ҳам мутаржим, асосан, муаллиф фикрларига ҳамоҳангликни беришга интилган. Баъзи ўринларда, хусусан, 2-байтда маъшуқанинг ғазабдан чимрилиши билан боғлиқ ўринларнинг лирик қаҳрамонга нисбат берилганлиги (Будто я разбил случайно гладь кристальную пруда) аслият мазмунидан бир оз четга чиқишига олиб келган бўлса-да, умумий ҳолатда таржимон рус китобхонининг буюк мутафаккир ғазалидаги мазмун-моҳиятдан муайян маънода баҳраманд бўлишига эриша олган.

Ғазалнинг русча таржимаси

Таржимон – Анисим КРОНГАУЗ

*Оттого, когда я в горе, ты не раскрываешь рта,
Что от сладости безмерной склеились твои уста.*

*Услыхав упрек, печально, гордо покраснеешь ты,
Будто я разбил случайно гладь кристальную пруда.*

*Я прижат горою горя, прошептала ты: «Фархад!»
Сладкая! — таким прозваньем славилась Ширин всегда.*

*Бросилась твоя собака на меня, но обожглась
Иль, услышав запах тленья, испугалась неспроста.*

*И в Меджнуна и Фархада может превратить любовь,
Если дочери Востока нас коснется красота.*

*Жаждущий! Любовь в разлуке не пытайся обмануть:
Если рядом нет желанной, то желание – тщета.*

Навои, в гареме шахском пышным почестям не верь,
Знай свои права, приличья не теряя никогда.

Ғазалнинг инглизча таржимаси

Таржимон – Аида БУМАТОВА

*Never does open the beloved her mouth to ask after me,
The reason for this – her luscious lips of sweetness may sealed be.*

*Ripple appeared on water of life is so much alike to –
Crease of anger to the reproach, on the countenance of thee.*

*Should you ever call me Farhod in the mountain of sadness,
Would I reply – thee art my sweet soul named Shirin – the only.*


*Reason why thy hound turns up its nose at my poor thrown heart,
Of the latter's being either too hot or gone off may be.*

*Ultimate love turns people to either Farhad or Majnun,
Should beloved be either Armenian or of Araby.*

*Hey, should you step on the path of seeker in austerity,
If beloved does not seek you – no use of seek there is to be.*

*Whatever privileges you are to have at court – retain,
Know your place, behave yourself minding manners of attendee.*





Харуки МУРАКАМИ

(1949 йили туғилған)

ПИНБОЛ-1973

Роман

*Рус тилидан
Алишер ОТАБОЕВ
таржимаси*

“Мен қадриятларга эътибор сусайған шароитда ноаниқ мақсад қетидан юрган одамлар ҳақидаги воқеаларни ёзмандан”.

2016 йили Нобель мукофотига номзоди кўрсатилган, замонавий япон насрининг энг таникли вакили Харуки Муракамининг ўз ижоди ҳақидаги ушбу фикри унинг “Пинбол-1973” романыда ўзини тўла оқлагандек бўлади. Жиддий ҳаётга қадам қўйиш остонасида ёшликтан кўнгил узолмай аросатда қолган Каламуш ва унинг дўсти бошидан кечирган воқеалар журнالхонни мулоҳазага чорлайди. Камталарап оламига сингиб кетолмаган бу икки йигит улкан шаҳарда худди ўрмонда адашгандек бемақсад тентираш билан бақт ўтказиб, хотиралар, узук-юлуқ ҳаёллар, шарпасиғат кимсалар ҳамда майдо-чуйда эрмакларга андармон кун кечиради. Тийиксиз умргузаронлик оқибатида ҳаётдан кўнгли совиб, ҳатто ҳис-туйгулариям музлаб қолган Каламуш юрагини босаётган зулматдан ичкилигу тамаки ёрдамидаям халос бўйламай, охири шаҳардан бош олиб кетишга қарор қиласди. Асарда номи келтирилмаган унинг шериги эса маъшуқасидан айрилгач, бўзчининг мокисидек ишдан уйга, уйдан ишга қатнайвериб, одамдан кўра кўпроқ роботгами, жониворгами ўхшайдиган эгизак қизлар билан бирга туриб, якунда ўтмишда овунгандан алмисоқдан қолган ўйин автоматини қидириб, узоқларга изғиб кетади.

Персонажлар кечинмаларидағи тарқоқлик асар матнига ҳам кўчган. Муаллиф кийим-кечак, ичкилик билан сон-саноқсиз ашқол-дашқолларни эринмай таърифлаб, узук-юлуқ диалоглар воситасида пароканда замон манзарасини чизишига, қайта тиклашга тутинади.

Улкан мегаполиснинг сершовкин, олатасир муҳитида ўзлигини йўқотаёзган ёш қалбларнинг мунгли изтироби Муракамининг ўйноқи ва жилвакор тасвирида алланечук сурурли туюлади. Ўзига хос услубда битилиб, кўп тилларга ўгирилган бу асар ўзбек ёшларини ҳам бефарқ қолдирмаслигига ишонамиз.

Таржимон

* Манба: Харуки Мураками. Пинбол-1973. – Москва. Эксмо-пресс. 2006 г.

Нотаниш маконлар ҳақида ҳикоя эшитишга ишқибоз эдим.

Үн йиллар илгари дуч келган одамга ёпишиб олиб туғилиб ўсган шахри ҳақида гапириб беришини талаб қилишим ҳеч гап эмасди. У пайтларда бироннинг нутқини ўз ихтиёри билан тинглайдиганлар кам учрар – шу боис қўлимга тушган киши ҳафсала билан, берилиб ҳикоя қиласди. Баъзан ҳатто мутлақо бегона кимсалар ҳам аломат тингловчи тўғрисида қаёқдандир хабар топиб, бирор нима гапириб бергани атайлаб келарди.

Улар худди қуриган қудуққа майда тош ташлагандек менга ҳар хил нарсалар тўғрисида ҳикоя қилиб, димоғлари чоғ бўлиб кетишарди. Кимдир бамайлихотир сўзласа, бошқа бирор куйиб-пишиб гапирав, баъзилар мавзудан четлашмас, гапининг тайини йўқлар ҳам учрарди. Зерикарли, қайғули, кўз ёш билан айтилган воқеаларни – гоҳо ахмоқона уйдирмаларни ҳам эшитганман. Лекин барига иложи борича диққат билан қулок тутишга уринардим.

Сабабини билмадим-у, лекин ҳар ким бошқа бирорвга ёки ҳар ким бутун оламга жон-жаҳди билан ниманидир етказмоқчи бўлади. Бу менга қалин картон қутига қамалган маймунлар тўдасини эслатади. Шу маймунларни қутидан чиқариб олиб, чангни артаман-да, кетига шапатилаб, ойдалага қўйиб юбораман. Бу ёғига уларнинг ҳоли не кечиши менга номаълум. Қирилиб битгунча қаёқдадир чўчқаёнгоқ кемириб ётишар. Нима фарқи бор, уларнинг қисмати шунақа.

Очиги, бу ишнинг меҳнати кўпу, нафи кам эди. Ҳозир ўйлаб қоламан: ўша пайтлар кимдир ўзгаларнинг нутқини берилиб тинглаш бўйича умумжаҳон танловини ташкил қилганда, мен, албатта, ғолиб чиқардим. Кейин мукофот беришарди. Дейлик, ошхонага тўшаладиган шолчами.

Ҳамсуҳбатларимдан бири Сатурнда, яна бири Венерада туғилганди. Уларнинг ҳикоялари менда катта таассурот қолдирган. Гапни Сатурндан бошлайман.

– У ёқ... у ёқ ҳаддан ташқари совуқ! – дерди сұхбатдошим дудуқланиб.
– Бу изғирин ҳа... ҳақида ҳатто ўйласанг ҳам т-томинг кетиб қолади!

У университетнинг тўққизинчи биносида яккаҳокимлик қиласидиган сиёсий гуруҳ аъзоси эди. “Ҳаракат ғояни белгилайди, аксинча бўлиши мумкин эмас”, – уларнинг шиори шунақа эди. Ҳаракатни нима белгилашини эса ҳеч кимга айтишмасди. Дарвое, тўққизинчи бинода сув совутгич, телефон ва қайнок сув, иккинчи қаватда ҳатто икки мингта пластинка тўпланган мусиқа хонаси ҳам бор эди. Қаёқдаги велодромнинг ҳожатхонасиdek мудом сасийдиган саккизинчи бинога таққослагандан бу жаннатнинг ўзгинаси. Улар ҳар тонг иссиқ сув билан қиртишлаб соқол олишар, текин телефонда хоҳлаганча гап сотишар, кечкурунлари эса йиғилиб пластинка тинглашарди – шундай экан, кузнинг охирига бориб ҳаммалари классика шинавандасига айланиши.

Айтишларича, тўққизинчи бинога учинчи илғор бўлинма бостириб кирган ноябрнинг ўша фавқулодда баҳаво кунида ичкарида Вивальдининг “L'Estro Armonico”си баланд товушда жаранглаётган экан. Бу гап ҳақиқатга қанчалик яқин, билиб бўлмайди. Олтмиш тўққизинчи йилнинг таъсирли афсоналаридан бири.

Мен диванлардан пала партиш тикланган ғов остидан эмаклаб ўтаяётганимда қулогимга Гайднинг фортелияно сонатаси чалингандай бўлувди. Ўшанда чойгул босган илонизи сўқмоқ бўйлаб бориладиган та-

ниш бир қизнинг уйи ёдимга тушган. Фовнинг ортида энг шинам курси ва тибиёт мактабидан ўмарилган шишадаги илиқ пиво каминага мунтазир эди.

– Тортиш кучи ҳам жуда баланд, – Сатурн ҳақидаги ҳикоя давом этарди. – Биттаси сақич туфлаганди, ўзининг оёғига тегиб, суюгини ўпириб юборди. Д-даҳшат!

– Ўх-хў-ў-ў... – дедим товушимни бир-икки сония чўзиб. – Ўша пайтга келиб бошқаларнинг гапини маъқуллашнинг уч юзга яқин турли-туман усулини ўзлаштиргандим.

– К-кейин... Қуёш кичкина. Худди бейсбол коптоқчасининг ўрнига иргитилган мандариндек. Шунинг учун доим қоронфи. – Сухбатдошим хўрсинди.

– Нега у ёқдан учиб кетмайсизлар? – деб сўрадим. – Тузукроқ сайёralар ҳам бордир?

– Ўзим ҳам билмайман. Ватан бўлгани учундир-да. Шунаقا гаплар... Дипломимни оливолай, мен ҳам уйга, Сатурнга қайтаман. Ҳаммасини д-дўндириб, и-и-инқилобни бошлайман.

Нима деб ўйласангиз ўйлайверинг-у, олис шаҳарлар ҳақидаги ҳикояларни яхши кўраман. Қишки уйқудан аввал ёғ йигаётган айиқдек, ўша шаҳарларни йигаман. Кўзимни юмиш имонотни кўчалар қалқиб чиқиб, уйлар қурилиб, одамларнинг ғовур-ғувурига тўлади. Олисдаги бу одамлар билан ҳеч қаҷон йўлимиз кесишмаса ҳам мен улардаги эгри-буғри, лекин мустаҳкам ҳаёт илдизларини ҳис эта оламан.

Наоко ҳам бир неча бор шунаقا ҳикоялар билан ўртоқлашганди. Ўша ҳикояларнинг ҳар бир сўзи ёдимда.

– Буни нима деб аташни ҳам билмайман...

Университет даҳлизи қуёш нурига чўмган, сабр билан ҳикоянинг давомини кутарканман, Наоко ёноғини кафтига тираб, ўнғайсизланганча жилмайиб турарди. У доим мос сўзларни қидириб секин гапиради.

Биз устига тамаки қолдигига тўла қофоз стаканча қўйилган қизил пластик столда юзма-юз ўтирадик. Баланд деразага урилаётган офтоб худди Рубенснинг расмидагидек столдаги нур ва соя орасига чизиқ тортган, ўнг қўлим ёруғда, чапи эса соядга қолганди.

1969 йилги кўкламни биз – йигирма ёшлилар шундай қарши олдик. Даҳлиз биринчи курс талабаларига тўлган – ҳаммасининг оёғида янги пойабзал, кучоғида дафтар, барининг мияси бутун. Ёнимизда нуқул кимлардир бир-бирига тўқнашиб кетиб аччиқланар, узр сўпар – бу томошанинг охири йўқдек эди.

– Хуллас, нима бўлганда ҳам бу шаҳар эмас, – Наоко яна тилга кирди.
– Шарти кетиб, парти қолган темир йўл бекати десам, мени бирор уришармиди. Ёмғир ёққанда ўтсанг, бунаقا бекатни пайқамайсан ҳам.

Бош иргадим. Кейин иккимиз нур ва соя чегарасида сузаётган тамаки тутунини ярим дақиқача томоша қилдик.

– Платформасининг у бошидан бу бошига итлар санғийди. Шунаقا бекатлар ҳам бор, биласанми?

Яна бош иргадим.

– Бекатдан ўтгач, айланма йўлли чоғроқ майдонга чиқиб борасан. Автобус бекати ва бир нечта дўкон кўринади. Ҳалигидака мудроқ дўконлар

бўлади-ку. Тўғрига юрсанг, истироҳат боғининг рўпарасидан чиқасан. Боққа сирпанадиган тепача ҳамда учта аргимчоқ ўрнатилган.

– Қумдон-чи?

– Қумдон? – У бироз ўйлади-да, маъқуллаб бош силкиди. – Қумдон ҳам бор.

Яна жимиб қолдик. Тамаки қолдигини стаканчанинг четига босиб ўчиридим.

– У ер ўлгудек зерикарли. Бунақа шаҳарларни нега қуришади, ҳайронман.

– Тангри турфа шамойилда намоён бўлади, – оғзимга келган гапни айтиб юбордим.

Наоко бош чайқаб, жилмайди. Намунали, аълочи талаба қизларга хос бу табассум кўнглимга шунчалик узок вақт ўтириб қолгани ғалати. Худди “Алиса”даги Чешир Мушугидек – ўзи ғойиб бўлади-ю, табассуми қолади.

Негадир платформада дайдийдиган итларни ҳам жуда кўргим келиб кетди.

Тўрт йилдан сўнг, 1973 йилнинг майида ўша темир йўл бекатига ёлғиз етиб бордим. Итларни томоша қилмоқчи эдим. Шу муносабат билан соқол олиб, ярим йилдан бери тақилмаган бўйинбоғимни тақиб, от терисидан тикилган пойабзалимни кийдим.

Тақдирга тан бериб занглаб ётган бир жуфт вагондан иборат шаҳар чеккасига қатнайдиган поезддан тушганингда дастлаб димоғингга майсанинг ўтмишни ёдга соловчи хиди урилади. Бу вақтнинг нариги томонидан май шамоли учириб келган сайр хиди. Бошни кўтариб, диққат билан қулоқ тутилса, тўргайларнинг товуши қулоққа чалинади.

Оғзимни катта очиб эснадим-да, бекатнинг ўринидига ўтириб, зерикиб тамаки тутатдим. Уйимдан чиқаётганимда менга ҳамроҳ бўлган тетиклик ҳисси бу пайтга келиб узил-кесил йўқолди. Борликдаги жамики нарсаларнинг моҳиятида ўтмишнинг такрори ётади – мен энди мана шуни ҳис қилмоқдайдим. Ўтмишнинг узлуксиз қайтарилиши – ҳар бир янги такрор аввалгисидан баттарроқ.

Бир замонлар уч-тўртта дўстим билан бирга яшардим – ҳаммамиз қаторлашиб ухлардик. Эрта тонгда кимdir бошингни босиб ўтади. “Вой, кечирасан”, деган гапни эшиласан. Кейин пешобнинг шилдирагани эшитилади. Энди пинакка кетганингда яна ҳаммаси такрорланади.

Бўйинбоғимни бўшатиб, тамакини лабимнинг четига қистирдим-да, оёғимни сиқмаслиги учун ҳали кўп кийилмаган пойабзалимнинг тагини бетон полга ишқадим. Оғриқ унчалик сезилмаётган бўлса-да, вужудим гўёки парчаланиб кетаётгандек эди.

Итлар кўринмасди.

Иш пачава.

Мен тез-тез мана шунақа парокандаликка юз тутаман. Худди бир жойга уолган парчалардан бирваракайига икки хил қурама нақш ишлаётгандек бўласан. Шундай ҳолга тушганимда виски ичиб, ётиб ухлайман. Аммо эрталаб аҳвол бундан ҳам баттар бўлади. Бари такрорланади.

Уйғонганимда икки ёнимда иккита эгизак қиз ётарди. Эгизакларни аввал ҳам кўргандим-у, лекин уларни икки тарафимда ётган ахволда учратмагандим. Кизлар бурунларини елкамга тираб, мириқиб ухлашар, якшанба тонгидা ҳаво очиқ эди.

Кўп ўтмай улар деярли бир вақтда уйғонишиди ва шоша-пиша шу атрофга ташланган жинси шим ва кўйлакларини кийиб, бир сўз демай, ошхонада қаҳва дамлашди-да, нон ёпиб, музлаткичдан сариёғ олиб, барини столга келтириб кўйишиди. Улар жуда чаққон ҳаракат қилишарди. Деразадан гольф майдонини ўраган тўр кўринар, унга кўнган номи менга номаълум қуш пулемётдай тариллаб сайради.

- Исмингиз нима? – деб сўрадим ичкиликдан бошим лўқиллаб.
- Нима фарқи бор? – деди ўнг томондагиси.
- Нима бўлса, ўша-да, – гап қўшди чапдагиси. – Тушундингми?
- Тушундим.

Учаламиз столга ўтириб, чавати нон еб, қаҳва ичдик. Қаҳва жуда мазали эди.

- Нима, исмиз гаплашиш қийинми? – деб сўради бирови.

– Ҳа, энди...

Иккови ҳам бирпас ўйланиб қолди.

– Агар исмимизни айтиб чақиришинг шарт бўлса, ўзинг бирор исм ўйлаб топақол, – деди бири.

– Ҳа, ўзингга ёққанини танлайвер.

Улар доим навбат билан гапиравди. Радиоэшилтиришларда стереотувшни одатда шунаقا созлашади. Бундан бошим баттар лўқиллади.

– Қанақа исм кўяй? – деб сўрадим.

– Масалан, Ўнг ва Сўл, – деди бири.

– Узун ва Кўндаланг, – гап қўшди наригиси.

– Тепа ва Паст.

– Олд ва Орқа.

– Шарқ ва Ғарб.

– Кириш ва Чиқиш, – улардан ортда қолмаслик учун мен ҳам бир амаллаб гап қўшдим. Эгизаклар кўз уриштириб, шодланиб қулиб юборишиди.

Кириш бор жойда чиқиш бор. Дунёда ҳамма нарса шу асосга қурилган. Хат солинадиган қути, чангютгич, ҳайвонот боғи, чойнак... Бошқачароқ ишланган нарсалар ҳам бор, албатта. Масалан, қопқон.

Бир куни уйимдаги қўл ювгичнинг остига қопқон кўйиб, хўракка ялпизли сақич ёпиштиридим. Роса қидирсам ҳам хонада егуликка арзийдиган бошқа ҳеч вақо топилмади. Сақич яримта кино чиптаси билан қишки пальтомнинг чўнтағидан чиқди.

Учинчи куни эрталаб қопқон иш берди. Божсиз савдо қилувчи Лондон дўйконларида тиқилиб ётган кашмири кўйлак рангидаги ёш бир каламуш қопқонга тушди. Одамнинг ёши билан ўлчаганда бу чамаси ўн беш-ўн олтиларга кирган каламуш эди. Оғир палла. Панжасига сақич қолдиклари ёпишган.

Тутишга тутдиму, энди уни нима қиласман, деб бошим қотди. Каламуш орқа панжасини қисиб қолган симдан чиқаролмай, тўртингчи куни тонгда жон берди. Унга қараб ўзим учун бир хулоса чиқардим.

Ҳамма нарсанинг кириш ва чиқиш йўли бўлиши керак. Бу жуда муҳим.

Тепаликлар ёқалаб ўтган темир йўл худди чизғич билан чизилгандек тўппа-тўғри эди. Йирокда коғоз парчаларидан ясалган шарчаларга ўхшаш омухта дараҳтзор кўкариб кўринар, офтобда ярқираган темир йўл излари олиса туташиб дов-дараҳтга сингиб кетарди. Қанча юрсанг ҳам шу манзара сира ўзгармайдигандек туюлар, бу ҳол одамни зериктиради. Аҳвол шу бўлса, бундан кўра метрода юрган яхши.

Тамаки тутатдим-да, керишиб, осмонга қарадим. Анчадан бери осмонга қарамовдим. Бирор нимани шошмасдан қузатиш одатини ташлаганимга кўп бўлган.

Хира парда қоплаган булатсиз баҳор осмонининг у ер-бу еридан мөвийранг ёғду ўзига йўл очмоқчи бўлар, ҳавога губордек сочилаётган қуёш нури кимни ажаблантиришни билмай аста ерга қўнарди.

Ёруғлик илиқ шамолда титраб, ҳаво дараҳтдан-дараҳтга учиб ўтаётган қушлар галасидек оҳиста сузар, ям-яшил нишабликдан пастга сирғалаётган шамол темир йўлдан ошиб, биронта япроқни тебратмай дараҳтзор оралаб эсади. “Ку-ку” деган товуш янграб, қуёшнинг майнин нурлари оралаб, йироқдаги тоғ ёнбағрига сингиб кетарди.

Ястанган тоғ тизмалари офтобда тобланганча чўнқайиб мизғиётган улкан мушукларни эслатарди.

Оёғим янама қаттиқроқ зирқиради.

* * *

Қудуклар ҳақида.

Наоко бу ерга ўн икки ёшида келган. Ғарб тақвими бўйича 1961 йили. Рики Нельсон “Ҳеллоу, Мэри Лу”ни қуилаган йили. Ўшанда бу ям-яшил сокин водийда кўзга ташланадиган ҳеч вақо йўқ эди. Дехқонларнинг учтўртта уйи, бир нечта томорқа, қисқичбақага тўла анҳор, темир йўл тармоғи ва ўтирганда одамни эсноқ босадиган бекат. Ҳар бир уйнинг олдида одатда хурмоли боғ, боғнинг бир четида ёмғирда ивийвериб, кўл теккизса тўкилиб тушай деб турган омборхона бўларди. Омборхонанинг темир йўл бекатига қараган деворига ҳожатхона қофози ёки совуннинг беўхшов рекламаси илинганд тунука лавҳа қоқиларди. Ҳамма нарса шунаقا аҳволда эди. Ҳатто ит ҳам боқилмасди, дерди Наоко.

У кўчиб кирган уй Кореядаги уруш вақтида курилганди. Ғарб услубидаги бу иморат унчалик катта бўлмаса-да, олий навли ёғочдан ясалган йўғон ва мустаҳкам устунларга тиранганча савлат тўкиб турарди. Бинонинг сирти яшил рангнинг уч хил тусиға бўялган, офтоб, шамол ва ёмғир таъсирида бўёқ хиралашиб, уй атрофидаги манзарага сингиб кетганди. Каттагина боғда беш-олтида дараҳт ва сув ҳавзаси бор эди. Дараҳтларнинг орасидаги саккиз қиррали шинам шийпон рассомчилик устахонаси вазифасини ҳам ўтар, унинг ойнабанд туйнукларига аллақандай олачипор тўр пардалар илинганди. Ҳавза бўйида наргис гуллари кийғос очилган, тонгда чўмилгани қушчалар учиб келарди.

Уйнинг меъмори ва илк хўжайини ғарбона услубда ижод қилувчи бир мўйсафид мусаввир эди. Наоко кўчиб келишидан сал аввалроқ, қишида у сил касалидан қазо қилган. Демак, бу воқеа Бобби Ви “Резина коптокча”ни қуилаган 1960 йили бўлган. Ўша йили қишида роса ёмғир ёққанди. Бу ерларда қор камдан-кам ёғарди. Тупроқ намиқиб, зах тортиб кетса-да, тупроқ тотли сувга тўйинарди.

Темир йўл бекатидан қудукчининг уйигача беш дақиқалик йўл бўлиб, анҳор бўйидаги ботқоқка айланган пастқам жойга курилган бу кулба ёзда пашша ва қурбақалар қуршовида қоларди. Қудукчи элликка кирган феъли чатоқ бир киши эди. Унинг фақат шу ишга лаёқати етар, буюртма олгач, бу

кимса қудук қазиладиган жойда уч-тўрт кун айланиб, ўзича бир нималарни минғирлар, у ер-бу ердан тупроқ олиб, ҳидларди... Ниҳоят, маъқул жойни топгач, шерикларини чақирап ва ҳаммалари ерни тиккасига кемиришга тушарди.

Шундай экан, ён-атрофда яшайдиганлар муздек, мазали ва ҳатто стаканни ушлаган қўл ҳам шаффоффек кўринадиган даражада тиниқ қудук сувидан истаганча ичиш имконига эга эди. Фудзида қор эриганда суви шу ерга оқиб келади, дейдиганлар ҳам йўқ эмасди. Лекин бу фирт сафсата, албатта. Фудзи жуда олисда.

Наоко ўн еттига тўлган кузда қудуқчи поезд тагида қолиб ўлди. Маст ҳолида жалада поездни илғамаган, қулоғи ҳам оғир эди, дейишди. Еттита полциячи қоксуяқ дайди итларни илгакли узун таёқ билан ҳайдаганча унинг бурдаланиб ҳар ёққа сочилиб кетган танасини бешта челакка йиғди. Яна бир челакча қолдиқ етишмасди – анҳорга тушиб ҳавзага оқиб кетган бўлса керак. Балиқларга ем бўлади.

Қудуқчининг икки ўғли бу ерлардан дом-дараксиз кетгач, уларнинг уйига ҳеч зоф яқин йўламай қўйди, кулба аста-секин нураб, қаровсиз ҳолга келиб қолди. Ўшандан бери яқин-атрофда суви тоза қудук топиш амримаҳол бўлиб қолди.

Қудуқларни яхши кўраман. Қудуққа кўзим тушди дегунча, унга майда тош ташлайвераман. Ҳеч нима кўнгилни чукур қудук тубидаги сувга тушган тош товушидек тинчлантиромайди.

* * *

1961 йили Наоколар оиласининг бу ерларга кўчиб келишига отасининг қатъий қарори сабаб бўлди. Биринчидан, мархум рассом отасининг яқин дўсти эди. Иккинчидан, Наоконинг отасига бу макон жуда ёқарди.

Унинг отаси француз филологияси бўйича мутахассис – чамаси, ўз даврасида анча таникли олим эди. Аммо Наоко мактабда ўқий бошлагач, у университетдаги ишини йиғишириб, ўзи ёқтирган ғаройиб қадимги китоблар таржимасига ўйнаганди. Бу қонхўр мурдалар, ёвуз арвоҳлар, гуноҳкор роҳибу инс-жинсни ҳайдовчи фолбинлар ҳақидаги китоблар эди. Уларни бошқача таърифлай олмайман. Аллақайси журналда отасининг суратига бир мартагина кўзим тушган. Наоконинг айтишича, у ёшлигида ғалатироқ одам деб ном чиқарган экан – суратга қарагандан сўнг бунга ишонмай бўлмасди. Бошида овчилар қалпоғи, бурнига қора кўзойнак кўндириб, фотоаппаратдан бир метр юқорига термулиб турибди. Бирор нимани илғаган, шекилли...

Наоко оиласи билан кўчиб келганида бу ерга шунақа ғалатироқ кўчманчи зиёлиларнинг ажабтовур жамоаси йиғилганди. Худди чор Россияси сургун қилган хурфикрлиларнинг Сибирдаги тўдаси дейсиз.

Сибир сургуни ҳақида Троцкийнинг биографиясида оз-моз ўқигандим. Ҳозир сувараклару шимол буғуларидан бошқа ҳеч вақо ёдимда қолмаган. Буғулар ҳақида хикоя қила қолай.

Троцкий тун қоронғисида чанага кўшилган буғуларни ўғирлаб, сургундан қочади. Тўртта буғу елдек учиб, уни кумушранг саҳро бўйлаб олиб ўтарди. Жониворларнинг нафаси оппоқ буғга айланар, туёқлари эса гард

юқмаган қорни ҳар ёққа сачратарди. Икки кунлик йўлдан сўнг улар поезд бекатига етиб келганда ҳолдан тойиб бир йикилганча, қайтиб турмади. Троцкий жони узилган буғуларни кўлига олди ва кўзи ёшга тўлиб кўнглида онт ичди: “Бу мамлакатдаadolat ва тартиб ўрнатмагунимча тинчимайман, инқилоб ҳам қиласман”. Бронздан қуйилган ўша тўрт буғ Қизил майдонда ҳозир ҳам қад ростлаб турибди. Бири шарққа, иккинчиси шимолга, учинчиси гарбга, тўртинчиси жанубга қараган. Ҳатто Сталин ҳам уларни йўқ қиломади. Агар Москвага бориб, шанба куни эрталаб Қизил майдонга чиқсангиз, кўнгилга тетиклик баҳш этувчи манзарага гувоҳ бўлишингиз тайин: қизил юзли мактаб болалари оғзидан оппок буғ чиқариб, буғуларни супурги билан тозалашаётган бўлади.

* * *

Кўчманчилар жамоаси ҳақида.

Улар бекат ёнидаги қулай, текис ялангликлар қолиб, атайлаб тоғ ёнбағридан ўзларига мос уйлар қуриб олишиди. Ҳар бир иморатнинг ёнида турфа хил дараҳтлар, сув ҳавзалари ва текисланмаган тепаликлари бор ҳайҳотдек боғ ястанганди. Айрим боғлардан ҳатто ичидан чинакам хонбаликлар сузуб юрган кўркам сойлар оқиб ўтарди.

Улар тоғ капитарининг хонишидан уйғонишар ва қорақайиннинг эзилган меваларини ғирчиллатиб, барглар орасидан тушаётган куёш нурини томоша қилиш учун тўхтаб-тўхтаб боғларини айланиб чиқишаради.

Токиода Олимпиада бўлган пайтлар пойтахт марказидан кўчганларнинг шиддатли оқими анча сусайиб бу ерларга ҳам етиб келди. Тоғ чўққисидан қаралса, денгиздек бепоён туюловчи тутзорларни бульдозерлар билан текислашгач, темир йўл бекатининг атрофида аста-секин қатор-қатор уй ва дўконлар қад ростлай бошлади. Янги кўчиб келганларнинг кўпчилиги шаҳар марказидаги фирмаларда ишлашар, улар тонгги соат олтида ўринларидан сапчиб туриб, юзларини апил-тапил ювишарди-да, уйга тун коронгисида chalажон аҳволда қайтиш учун поездга шошилишарди.

Шундай экан, улар ўзлари яшайдиган шаҳарга, уйига фақат якшанбанинг иккинчи ярмидагина бафуржা нигоҳ ташлаш имконига эга эди. Худди ўзаро келишиб олишгандек ҳаммаси уйида ит боқар, кўпраклар тинимсиз урчиб, кучукваччалар дайди итларга айланарди. Наоко авваллари бу атрофда бирорта ҳам ит йўқ эди, деганда айнан шуни назарда тутган.

Бир соатча кутдим, итлардан дарак бўлавермади. Ўнинчи тамакини ёқдим-да, кейин фикримдан қайтиб, уни ўчирдим. Бекатнинг ўртасидаги жўмракни бураб, тишни зирқиратадиган муздек ширин сувдан ичдим. Кўпракларнинг ҳалиям кораси кўринмасди.

Бекатнинг биқинида худди анхордек буралиб оқувчи катта энсиз сув ҳавзаси бор эди. Уни узун ва қалин қамишзор ўраб турар, сув сатҳида баъзан балиқ шалопларди. Қирғонинг ҳар ер-ҳар ерида қармоқ ушлаган камгап кишилар ўтирар, ҳеч бирининг қармоғидаги ип қилт этмас, хира сиртга қадалган кумуш игнага ўхшарди. Баҳор офтобининг эринчоқ нурлари остида балиқчилар билан келган йирик бир оқ ит бедани исқаб гир айланиб югуради.

Ит менга ўн қадамча яқинлашгач, панжара оша эгилиб уни чақирдим. Жонивор тумшуғини кўтарди-да, оч жигарранг маъюс кўзларини менга

қадаб думини бир-икки марта ликиллатди. Бармоғимни шиқиллатувдим, ёнимга югуриб келиб, тумшуғини панжара орасидан тиқди ва узун тили билан қўлимни ялади.

– Бери кел! – дедим бир қадам ортга тисарилиб. Ит худди иккиланаёт-гандек атрофга аланглаб, нима хоҳлаётганимни тушунмай думини ликиллатиб тураверди.

– Буёқка кел, дедим!

Чўнтағимдан сақич чиқариб, қофозини очдим-да, итга кўрсатдим. У бироз ўйлаб, ниҳоят, панжаранинг остидан ўтишга жазм этди. Бошини силадим ва сақичдан шарча ясаб, қулочкашлаб темир йўл томонга улоқтиридим. Ит шитоб билан ўша ёққа югорди.

Қилган ишимдан кўнглим тўлиб, уйга йўл олдим.

Поездда ортга қайтаётганимда бир неча бор ўзимга ўзим, ҳаммаси тамом, энди унутсанг бўлади, дедим. Шунинг учун ҳам бу ерга келдинг ахир. Лекин унудишилнинг иложи йўқ эди. Наокони яхши кўрганимни, унинг ўзини қандай унуттай?! Аслида хеч нима тугамаганди.

Венера – атрофини булут қоплаган жазирама сайёра. Қизиган ҳаво ва намгарчилик сабаб у ерда яшовчиларнинг кўпчилиги ёшлигидәк қазо қиласди. Ўттизга етганларнинг исми ривоятларга кўчади. Шу боис венераликларнинг қалби меҳрга тўла. Ҳамма венераликлар бир-бирини яхши кўради. Уларда нафрат, нифоқ, ҳасад йўқ. Фийбат қилиш хаёлига ҳам келмас, муштлашишу қотиллик эса уларга мутлақо бегона. Меҳр-муҳаббат билан ҳамдардлик бор, холос.

– Ҳатто кимdir ўлсаям ғам-ғуссага ботмаймиз, – деди менга ювош бир венералик. – Тирик эканмиз, яхши кўришга шошиламиз. Кейин хеч нимадан афсусланмаслик учун.

– Меҳрни олдиндан ғамлаб қўярканлизлар-да?

– Буни сизларнинг тилингизда ифодалаш қийин.

– У ерда ростдан ҳам ҳаммаси шунаقا силлиқ кечадими? – дея қизиқиб кетдим.

– Агар шундай бўлмаганда, Венера қайғудан бўғилиб қоларди, – деди у.

Уйимга кирсам эгизаклар консерва идишдаги балиқчалардек кўрпага бурканиб бир нималарни айтиб қиқирлашашапти.

– Хуш кўрдик! – деди бири.

– Қаёққа бординг? – сўради наригиси.

– Бекатга, – дедим бўйинбоғимни бўшшатарканман, сўнг кўрпа тагидаги қизлар орасига шўнғидим. Роса уйқум келаётувди.

– Қанақа бекатга?

– У ёққа нега бординг ўзи?

– Итларни томоша қилгани бордим.

– Қанақа итларни?

– Итларни ёқтирасанми?

– Катта ва оппоқларини. Аммо у ерга борганим, уларни ёқтираман деганим эмас.

Тамаки тутатдим, то чекиб тугатгунимча улар гапиришмади.

– Кайфиятинг йўқми? – деб сўради бири.

Индамай бош иргадим.

– Ухлайқол, – деди наригиси.

Кейин эса ухлаб қолдим.

* * *

Бу ҳикоя фақат мен ҳақимда эмас. Унинг иккинчи қаҳрамонини “Каламуш” деб аташарди. Ўша йили қузда биз бир-биридан етти юз километр йироқдаги шаҳарларда яшардик.

Китоб шу ердан, 1973 йилнинг қузидан бошланади. Кириш қисми бор. Бироқ чиқиши ҳам зарур. Агар чиқиши бўлмаса, китоб ёзишдан маъно йўқ.

* * *

Пинболнинг туғилиши.

Раймонд Морони исмли киши ҳақида эшитган одамни топиш игна билан қудук қазишдай иш.

Бир замонлар шунаقا арбоб ҳам яшаб ўтган. Тамом, вассалом. Унинг ҳаёти ҳақида бошқа ҳеч нима билишмайди. Чуқур қудук тубидаги сув кўнғизига ҳам шунчагина сўз айтиш мумкин, холос.

Лекин айнан Раймонд Морони 1934 йили технология осмонидаги зарҳал булутлардан бизнинг гунохга ботган заминимизга пинбол ўйналадиган илк автоматни олиб тушди. Бу Адольф Гитлер “Атлантика океани” номли улкан кўлмакни тақсимлаб, Веймар зинасининг биринчи тўсифига қўлини кўйган йили содир бўлди.

Аммо Моронининг шахси ака-ука Райт ва Александр Белл ҳаётидек ҳаёлий тафсилотларга бўялмаган. Ёшлик йилларидағи таъсирли воқеа ҳам, ҳаяжонли “эврика” ҳам эмас. Қизиқувчан муаллиф қизиқувчан ўқувчиларга ёзган илмий мақоланинг биринчи бетидаги исм-шарифдан бўлак ҳеч вақо йўқ. Ўқиймиз: “1934 йили жаноб Раймонд Морони томонидан пинбол ўйналадиган илк автомат ихтиро қилинди”. Ҳатто фотосурати йўқ-ку, ҳайкал ҳақида гапириш ортиқча!

Балки ўша жаноб Морони бўлмаганида пинбол автоматининг тарихи мутлақо ўзгача кечарди, деб ўйларсиз. Ёки ҳеч қандай тарихга ҳожат қолмасди. Шундай экан, жаноб Моронининг хизматига бунчалик паст баҳо беришимиз фирт ношукурлик! Аммо унинг қўл остидан чиқкан “Ballyhoo” номли илк автоматга кўзингиз тушса, қадр топмаган меҳнат ҳақидағи шубҳа-гумонингиз тарқаб кетарди. Чунки бу автоматда тасаввурни уйғотовувчи тузук-қуруқ нарса кўринмайди.

Пинбол автомати ва Адольф Гитлер босиб ўтган йўллар бир-бирига анча ўхшаш. Иккенинг ҳам қаёқдандир қалқиб чиқкан давр кўпиги, куйқаси эди – фақат ўз-ўзича мавжудлиги боис эмас, тараққиёт шиддати сабаб ҳаёлий киёфа касб этишганди. Маълумки, тараққиёт уч омилга асосланади: технология, сармоя ҳамда инсонларнинг ҳадсиз эҳтиёжи.

Одамлар турфа истеъоддларини рўёбга чиқариш илинжида лойдан ясалган кўғирчоқдек жўн машинага важоҳат билан тармашишди. “Чирок ёнсин!” – ҳайқирди кимлардир. “Электр қуввати улансин!” – ҳайқирди бошқалар. “Флиппер ўрнатилсан!” – хитоб қилди яна бирорлар. Натижада, ўйин майдони ёришиб, электр оҳанрабо шарчани иргита бошлади, флиппер эса уни бирварақайига ҳар иккала панжаси билан қайтаришга ўрганди.

Ўйинчи учун ҳар бир босқичда ўнлик кўрсаткич белгиланиб, ҳисоб шунга кўра саналди. Машинани қаттиқ силкитадиганларни жазолаш

учун “Қоидабузарлик” чироғини ўйлаб топишиди. Сўнгра “сиквенс” деган мавҳум тушунча, унинг ортидан “бонус лайт”, “экстра бол” ва “риплэй” даражалари келиб чиқди. Фақат шундан кейингина пинбол автоматига хос сехр-жоду дунёга келди.

Бу китоб пинболга бағишлиланади.

Пинбол ҳақидаги “Бонус лайт” номли илмий рисола муқаддимасида шундай ёзилган:

“Пинбол автоматидан рақамлар алмашишидан ғуурланишдан бўлак ҳеч вақо ундиrolмайсиз. Лекин кўп нарса йўқотасиз. Сарфлаган мис чақаларингиздан ҳамма президентларга ҳайкал ясаш мумкин (Ричард М. Никсонга ҳайкал ўрнатгингиз келадими-йўқми, бу энди бошқа масала), – орта қайтмайдиган қимматли вақт ҳақида-ку гапирмасаям бўлади.

Пинбол автоматининг ёнида ёлғиз ўзингиз мук тушиб ўтирганингизда, балки кимдир Прустни ўқиётгандир. Бошқа бирор машиналар кинотеатрида севган қизини силаб-сийраб, “Довюрак таъқибчилар”ни томоша қилаётгандир. Бири ҳаёт мазмунига чуқур кириб борган ёзувчига, наригиси баҳтиёр оила бошлиғига айланиши эҳтимолдан холи эмас.

Пинбол автомати қаёққа борсангиз ортингиздан изма-из эргашиб юрмайди. У шунчаки қайта ўйин чироги “риплэй”ни ёқади. “Риплэй”, “риплэй”, “риплэй”... Бу машинанинг ўйинни мангу давом эттиришдан ўзга мақсади йўқдек таассурот уйғотади.

Мангулик ҳақида биз кўп нарса билмаймиз. Аммо унинг қандай акс этишини фараз қилишимиз мумкин.

Пинболнинг мақсади ўзини ифодалаш эмас, қайта қуришда, “эго”ни кенгайтириш эмас, торайтиришда, таҳлил эмас, қамровда қўринади.

Агар сиз ўзлигингизни ифодалаш, “эго”ни кенгайтириш ёки таҳлил қилиш ниятида бўлсангиз, “Қоидабузарлик” чироғининг муқаррар қасосидан қочиб қутулолмайсиз.

Ўйинингиз мароқли ўтсин!”

1

Опа-сингил эгизакларни бир-биридан фарқлашнинг кўп усуллари бордир, – лекин, афсуски, мен бирортасини ҳам билмасдим. Юз тузилиши, овози, соч турмаги ва ҳоказолари ўхшаса майли-я, уларни бир-биридан ажратадиган холи ҳам, жимитдеккина доги ҳам йўқ эди – ваҳимали ўхашашлик. Иккита мукаммал нусха. Улар ҳар хил нарсалардан бирдек таъсирланар, ейдиган овқати, ичадиган ичимлиги, айтадиган қўшиғи ҳам – ҳатто ухлаш ва ҳайз қўриш вақти ҳам бир.

Эгизаги бор одам қандай яшаркан? Буни тасаввуримга сифоролмайман. Менимча, ўзимга қуйиб қўйгандек ўхшаш эгизагим бўлганда дарҳол эсим оғиб қоларди-ёв. Шундоғам муаммоларим қалашиб ётибди-ку, бош қотирмай қўя қолай.

Эгизак опа-сингиллар эса жуда ахил эди – уларни ажратолмаётганимни пайқаб қолишса, ажабланиб, ҳатто аччиқланишарди ҳам.

– Биз бир-биримизга сира ўхшамаймиз ахир!

– Мутлақо бошқачамиз!

Елка қисишдан ўзга чорам қолмасди.

Улар хонамда пайдо бўлгандан бери қанча вақт ўтгани номаълум. Эги-заклар билан яшай бошлагач, вақтни элас-элас ҳис этадиган бўлиб қолдим. Менимча, хужайрадан урчийдиган организмлар ҳам вақтни шундай ҳис этишса керак.

Бир шеригим билан Сибуя туманидан жанубга қараб ястанган нишабликдан ижарага тураржой олиб, таржимонлик идорачасини очдик. Ўша шеригимнинг отаси берган маблағ кам эди. Ижара ҳақидан ортгани учта темир стол, ўнтача луғат, телефон аппарати ва олти шиша бурбон¹га сарфланди. Қолган пулга тунука лавҳа буюриб, тузукроқ ном топиб ёздирикда, кўринарли жойга илиб қўйдик. Кейин газетага реклама бериб, оёқни столга ташлаганча вискидан хўплаб, мижозларни кута бошладик. Етмиш иккинчи йилнинг баҳори эди.

Бир неча ойдан сўнг даромаднинг конига йўлиққанимизни англадик. Кичкинагина идорамиз буюртмага қўмилиб қолди. Тушган пулга ҳаво со-вутгич, музлаткич ҳамда бар сотиб олдик.

– Биз ғолиблармиз! – дерди шеригим.

Мен ҳам жуда мамнун эдим. Ҳали бирор марта каминанинг шарафига бунақа илиқ гап айтишмовди.

Шеригим машинкада ҳарф терувчилар идораси билан алоқа ўрнатгач, ҳамма таржималаримизни чегирма билан ўшалар терадиган бўлишди. Мен эса хорижий тиллар олийгоҳида ўқийдиган, уч-тўртта аълочи талабани жалб қилиб, ўзимиз улгуролмайдиган тагламаларни ўшаларга ишониб топширдим. Майда-чуйда ишлар, телефонга кўз-кулоқ бўлиш ва ҳисоб-китоб учун котиба ёлладик. У “Penny Lane” қўшигини кунига йигирма марта (факат нақоратсиз) хиргойи қилишдан бошқа камчилиги йўқ, оёқлари узун, зийраккина бизнес курслар битирувчиси эди. “Айнан бизбоп!” – деди шеригим. Котибага одатдагидан бир ярим баравар кўп иш ҳақи белгиладик. Ҳар беш ойда мукофот пули ёзиб, қишиш ва ёзда ўн кунлик таътилга чикардик. Учаламиз мамнун ҳам баҳтиёр эдик.

Офисимиз иккита хона ва ошхонадан иборат эди – қизифи, ошхона хоналарнинг ўртасида жойлашганди. Хоналарни гугурт чўпида қуръа ташлаб бўлиб олдик. Менга тўрдагиси, шеригимга кираверишдаги хона тушди. Котиба ўртамиздаги ошхонада “Penny Lane”ни хиргойи қилганча, ҳисоб варакаларини титкилар, вискига муз солиб, суваракларга тузоқ қўярди.

Фирма ҳисобидан иккита жавон сотиб олдим-да, иш столимниг икки четига маҳкамлаб, чап томондагисига келиб тушган буюртмаларни, ўнгига тайёр таржималарни тердим.

Буюртма ҳам, буюртмачилар ҳам ҳар хил эди. “Америкэн Сайэнс”дан олинган шарикли подшипниклар ҳақидаги мақола, 1972 йилги “Умумамерика Коктейллар Китоби”, Уильям Стайрон эссеси ёки хавфсиз устарадан фойдаланиш бўйича қўлланма – барининг четига “фалон санага” деган ёрлик қистирилиб, чап тарафдаги жавонга тахланар, вақти келгач, ўнгга кўчарди. Тугалланган ҳар бир таржима йўғонлиги бош бармоқдай кела-диган бир қултум виски билан нишонланарди.

Ўзингдан ҳеч нима қўшмайсан – бу тоифа таржимонларнинг ишида шуниси қулай. Тангани чап кафтингда тутасан-да, ўнги билан “қарс” этиб урсанг, карабсанки, танга ўнг қўлингда.

¹ Бурбон – ичимлик тури.

Ишга соат ўнда келиб, тўртда кетардик. Шанба кунлари учовимиз яқинроқдаги дискотекага бориб, “J&B” ичиб, ўша ердаги қўшиқчилар ижросидаги Сантанага рақс тушардик.

Ҳарқалай тушум дурустгина эди. Ижара ҳаки, майдо-чуйда харажатлар, қизимиз ва талабалар маоши ҳамда соликқа сарфланган пулдан қолганини ўнга бўлардик. Ўндан бири фирманинг ҳисоб рақамига ўтказилар, беш қисми шеригимга, тўрт қисми менга тегарди. Бу алмисоқдан қолган тақсимот усули бўлса-да, бизга пулни столга териб тақсимлаш жуда ёқарди. Бу “Cincinnati Kid” фильмидаги покер ўйини сахнасини эслатар, ўзимизни Стив Маккуин ва Эдвард Робинсондек ҳис қиласадик.

Шеригимдан бир ҳисса кам пул олишимни ўзим тўғри деб ҳисоблардим. Ишни юритиш деярли тўлалигича унинг зиммасида эди, ичкиликка берилганимда ҳам у сира нолимасди. Бунинг устига касалманд хотини, уч яшар ўғли ва радиаторидан нуқул мой томадиган “фольксваген”ига қараш ҳам унинг бўйнида эди. Худди эскилари камдек шеригимнинг бошига янги-янги ташвишлар ёғиларди.

– Айтмоқчи, мен ҳам икки қизни боқаяпман, – дедим унга бир сафар. Турган гапки, сўзларим ишонч уйғотмади ва ҳар доимгидек унга беш, менга тўрт ҳисса пул ажратилаверди.

Мени йигирмадан ўттизга яқинлаштирган кунлар ана шундай шовуллаб ўтаверди. Улар пешинги офтобдек сокин эди.

“Инсон қўли билан ёзилганлар ичida бошқа бир инсон тушунолмайдиган ҳеч вақо йўқ”, – фирмамизнинг уч хил рангли реклама қофозидаги жарангдор шиор шунақа эди.

Ярим йилда бир марта дабдурустдан буюртмалар кети узилган маҳал учовлон Сибуя бекатига йўл олиб, бекорчиликдан шу қофозни ўткинчиларга тарқатардик.

Адоғи йўқ сукунат бўйлаб борарканман “Орадан қанча вакт ўтдийкин?” деб ўзимга савол бераман. Ишдан қайтиб, эгизаклар дамлаган мазали қаҳвадан ичгач, “Чин заковат танқиди”ни яна бир бор қайта ўқишига киришаман.

Баъзан кечаги кунинг ўтган йилдек туюлади. Гоҳида эса ўтган йилни кечаги кундек идрок этасан. Келаси йил ўтган кунга ўхшаса – демак, аҳвол жуда чатоқ. “Роман Полански санъати”ни ўгирасану, миянгда – шарикли подшипниклар.

Бир неча ой ва ҳатто йилдан бери мен чуқур ҳовузнинг тубида ёлғиз ўтирибман. Илиқ сув, нафис ёруғлик – сокинлик.

Эгизакларни бир-биридан фарқлашнинг фақат битта йўли бор эди – футболкасига қараб ажратиш. Тўқ кўқ рангли униқкан футболкаларга оқ рангли “208” ҳамда “209” рақамлари туширилганди. Икки ўнг кўқрак, саккиз ёки тўққиз эса чап кўқрак устида эди. Ноль ўртада муаллақ осилган.

Биринчи кундаёқ улардан бу рақамлар нимани англатишини сўрадим.

– Ҳеч нимани, – дейишиди улар.

– Худди дастгоҳлардаги тартиб рақамидек экан-да, – дедим.

– Нима-нима?

– Худди бутун бошли тўдангизни рақамлашгандек. 208-рақам, 209-рақам...

– Гапингни қара-ю! – тўнғиллади 209.

– Фақат икковимиз туғилғанмиз, – кескин жавоб қайтарди 208. – Футболкалар кейин пайдо бўлган.

– Уларни қаердан олгансизлар?

– Супермаркетнинг очилиш маросимида илк харидорларга текинга тарқатишувди. – Икки юз тўққизинчи харидор эдим, – деди 209.

– Мен эса икки юз саккизинчи, – давом этди 208.

– Ўшанда уч кути сочиқ олувдик.

– Жуда соз, – дедим мен. – Демак, бундай қиласиз. Сени “Икки юз саккизинчи”, сени эса “Икки юз тўққизинчи” деб атайман. Шунда чалкашмайман.

– Фойдаси йўқ, – деди эгизаклардан бири.

– Нега?

Улар индамай футболкаларини ечишди-да, алмаштириб қайта кийишиди.

– Энди мен Икки юз саккизинчиман, – деди 209.

– Мен эса Икки юз тўққизинчи, – қўшилди 208.

Хўрсанишдан бошқа чорам қолмади.

Лекин барибир уларни бир-биридан фарқлаш зарур бўлганда рақамлар роса қўл келарди. Чунки эгизакларни ажратишнинг бошқа усулини билмасдим.

Уларнинг ўша футболкалардан бўлак кийими йўқ эди. Қаердан ҳам бўлсин – ахир эгизаклар сайр қилиб юрганда, бегона уйга кириб, қолиб кетишиди-ку. Ё гапим нотўғрими? Ҳафта бошида уларга қундалик харажатлар учун озгина пул берардим – аммо эгизаклар энг зарур озиқ-овқатдан ташқари фақат қаҳва билан ширинлик харид қилишарди.

– Тузукроқ кийиминг бўлмаса қийиндор-ов? – сўйардим улардан.

– Одатдагидек, – дерди 208.

– Биз кийим-кечакка қизиқмаймиз, – гап қўшарди 209.

Ҳафтада бир марта улар футболкаларини ваннада ювишарди. Каравотда “Чин заковат танқиди”ни ўқиб ётиб, кафелли полда ёнма-ён турганча кир юваётган ялангоч эгизакларга нигоҳ ташлардим. Бунақа пайтларда ўзимни гўё уйимда эмас, олисларда яшаётгандек ҳис қиласиз. Негалигини билмайман. Ўтган йили ёзда сувга сакраш трамплинида қоплама тишимдан айрилганимдан сўнг, гоҳ-гоҳида шунадай ҳис-туйғуларга ботиш одатга айланди.

Ишдан қайтаётганимда, кўпинча, мени иккита футболка қарши олар, улар жанубдаги деразада ҳилпираб турарди. Уларга қараб баъзан ҳатто кўзимга ёш келарди.

– Нега менинг уйимда яшаяпсизлар? Қачонгacha давом этади бу? Қай бирингиз тўнгичсиз? Ёшингиз нечада? Қаерда туғилғансизлар? – дегим келардию тилимни тишлардим. Ўзлари ҳам ҳеч нима дейишмасди.

Учаламиз қаҳва ичардик, кечкурунлари голъф майдонида сайр қилиб, йўқолган коптокчаларни қидирадик, каравотда умбалоқ ошиб бир-биримиз билан ўйнашардик, – ҳар кунимиз шундай ўтарди. Айниқса, газета мутолааси томошага айланиб кетар, ҳар куни янгиликлардан боҳабар этишим учун бир соат вақт сарфлардим. Эгизакларнинг нодонлиги одамни ҳайратга соларди. Улар Бирмани Австралиядан ажратса олишмасди. Вьетнам ўзаро жанг қилаётган икки қисмга бўлинганини эгизакларга тушунтиришга уч кун, Никсон нима учун Ханойни бомбардимон қилганини изоҳлашга тўрт кун вақтим кетди.

– Сен кимни қўллаб қувватлайсан? – деб сўради 208.

- Кайси маънода?
- Шимолними, Жанубними?
- Ҳа, энди... билмасам.
- Нега билмайсан?
- Вьетнамда яшамайман-ку...

Изоҳларим уларни қониқтирумас, аслида ўзимниям айтганларимга ишонгим келмасди.

– Гапи бир жойдан чиқмагани учун улар жиққамуштми? – 208 масала-нинг тагига етмоқчи бўларди.

– Эҳтимол.

– Демак, у ерда иккита қарама-қарши нуқтаи назар бор экан-да? – савол берди 208.

– Шунақароқ. Дунёда тахминан бир ярим миллион бир-бирига тескари мулоҳаза мавжуд. Балки ундан ҳам кўпроқдир.

– Ер юзида иноқ яшаш қийин экан-да, а? – фикр билдири 209.

– Бўлса бордир. Айтарлик ҳеч ким бир-бири билан келишолмайди.

Етмишинчи йилларда шу тақлид яшадим. Достоевский башорат қилди, мен ҳаётга татбиқ этдим.

2

1973 йил кузида мудҳиш бир сир бор эди. Каламуш уни пайқар – одатда, пойабзалга тушган тошча шунақа сезилади.

Сентябрнинг титроқ ҳавосидан ютди-ю, ёз ҳам эриб кетди, – кўнгил эса, унинг аянчли қолдиқларидан ажралгиси келмайди. Эски кўйлак, калта жинси шим, сув бўйида кийиладиган шиппак... Каламуш “Жейз-бар”га доим шу алпозда келиб, пештахтанинг ёнига ўтириб, бармен Жей билан муздек пиво ичарди. У беш йил тамакидан тийилгач, яна чекишни бошлаганди. Ҳар ўн беш дақиқада соатига қараб кўярди.

Каламушнинг тасаввурида вақт гўё қирқилгандек эди, нега шундайлигини ўзи ҳам тушунмасди. У ҳатто вақт қаеридан қирқилганини аниқлаёлмас, узилган арқоннинг бир учидан тутганча, шилта куз оқшомлари бўйлаб тентираради. Майсазорлар оралаб, жилғалар ошиб, ҳар хил эшикларга бош суқар, аммо унга йўл бошлайдиган арқоннинг нариги уни йўқ эди. Каламуш худди қанотлари юлинган қишки чивиндеқ, худди дengизга рўбарў келган дарёдек ёлғиз ва нотавон эди. Гўё қаҳри қаттиқ куюн унинг илиқ шаффоф қобиғини юлқиб олиб, Ернинг нариги тарафига учириб кетаётгандек туюларди.

Бир Фасл эшикни очади-ю, чиқиб кетади, – нариги эшикдан эса бошқа Фасл кириб келади. Кимдир ўрнидан сапчиб туриб, эшикка югуради: ҳой, шошма, сенга айтмоқчи бўлган гапим ёдимдан чиқибди! Лекин эшик ортида энди ҳеч ким кўринмасди. Хонага аллақачон бошқа Фасл кирган, гугурт чақиб, тамаки тутатганча курсида ялпайиб ўтирибди. Ўша гапингни менга айтиқол, – дейди у. – Жуда зарур бўлса, кейинрок ўзим етказиб кўярман. – Йўқ, шарт эмас, муҳим гап эмасди... Атрофда эса шамол увиллайди. Яна бир Фасл ўлди, холос...

Бу йилнинг кузги-қишки совуғида – худди ҳар йилдагидек – улар бирга эдилар: университетни ташлаб кетган ўзига тўқ оиланинг фарзанди ва сўққабош хитойлик бармен. Улар мункиллаган чол-кампирни эслатарди.

Куз доим ёқимсиз эди. Ёзги таътилда кўп бўлмаса ҳам, ҳартугул бир-иккита дўстлар келар, аммо улар ҳатто сентябрни ҳам кутмай, шоша-пиша хайрлашарди-да, тўрт томонга тарқалишарди. Ёзги қуёш гўё кўз илғамас довонни ошиб ўтгандек рангини хиёл ўзгартирганда Каламушни вақтинча бўлса ҳам ўраб турган ялтироқ шуъла қаёқладир йўқолар, ёзги тушларнинг қолдиклари эса майдада жилғага айланиб, куз тупроғига сингиб кетарди.

Куз Жейга ҳам ёқмасди. Сентябрнинг ўрталаридан унинг синчков нигохи мижозларнинг камаяётганини пайқай бошлади. Ҳар йили аҳвол шу эди, аммо бу кузда камомад шунчалик эдикки, уни пайқаган кўзлар ҳайратдан пешонага чиқиб кетай дерди. Нега бундай бўлаётганини Жей ҳам, Каламуш ҳам тушунолмасди. Кечкурун бар ёпилаётгандан тозаланган яrim чеълак картошка қовурилмай қоларди.

– Ҳали одам тўлиб кетади! – Жейни овутарди Каламуш. – Бунча кўп мижоз йифилди, дейсан ҳали.

– Кўрамиз, – дерди Жей ишонқирамай ва растанинг нариёғига қўйилган ёғоч курсига ўтириб, картошка тозалагичнинг учи билан тостернинг четига ёпишган куйиндини қиришга тушарди.

Бу ёғига нима бўлишини ҳеч ким билмасди.

Каламуш индамай китоб вараклар, Жей вино шишаларини артарди. Икковининг ҳам бармоғига тамаки қистирилган.

Тахминан уч йиллар муқаддам Каламушнинг шууридаги вақт оқими аста-секин тарқоқлаша бошлади. Ўша йили баҳорда у ўқишини ташлаганди.

Тўғри, университетдан кетишига ўзига яраша сабаблар бор эди. Улар ўюлиб-уюлиб, ҳарорат маълум даражага етганда қопқоқ “пақ” этиб отилди. Нимадир қолди, бошқаси ортга улоқтирилди, яна нимадир ўлди.

Каламуш нега университетдан кетганини ҳеч кимга айтмади. Ётифи билан тушунтириш учун камида беш соат кетарди. Бунинг устига, биттасига тушунтирсанг, бошқалари ҳам билмоқчи бўлади. Оқибатда, дардингни бутун оламга достон қилишга тўғри келади. Бу ҳақида ўйлашнинг ўзиёқ Каламушда нафрат уйғотарди.

– Ҳовлиларида чимни текислашгани ёқмади, – дерди у жаврайвериши жонига текканида. Бир қиз эринмай бориб университет чимини кўздан кечириб ҳам келди. “Чимни ёмон текислашмаган, – деди ўша қиз, – атрофини чиқинди қофоз босганини айтмаса, бинойидек”. “Ҳамманинг таъби ҳар хил”, – эътиroz билдириди Каламуш...

– Университет билан чўқишиб қолдик, – дерди у кайфияти чоғ пайтларда. Кейин жимиб қоларди.

Орадан роппа-роса уч йил ўтди.

Ҳамма нарса вақт тўлқинида оқиб, ақл бовар қилмас даражада шитоб билан узоқлашмоқда. Каламушнинг қонини қиздирган кам сонли завқ-хаваслар тезда хиралашиб, айниб, бурунги, маънисиз тушларга ўхшаб қоларди.

Университетга кирган йили Каламуш ота уйидан дадаси ишхона ўрнида фойдаланган квартирага кўчиб чиқди. Ота-онаси қаршилик қилмади. Бу уйни, аслида, кейинчалик унга бериш учун сотиб олишганди: йигит мустақил ҳаёт қийинчиликларини енгишга ўргансин, деб.

Аслида, буни “қийинчилик” дейишга ҳам тил бормасди. Худди қовунни “сабзавот” деб бўлмаганидек. Бекам-қўст лойиҳалаштирилган икки хонали бу квартирада ҳамма нарса муҳайё: ошхона, ҳаво совутгич, сув пуркагичли

ванна, 17 дюймли рангли телевизор, “триумф” деган машинаси бор гараж, устига-устак қуёшда тобланишга қулай ҳашаматли айвон. Жануби-тарб тарафдаги деразадан шаҳар ва денгизнинг гўзал манзараси кўринарди. Ҳамма деразалар очилганда, шамол дараҳтларнинг хуш бўйини ҳамда кушлар товушини олиб келарди.

Пешинги осойишта дамларда Каламуш тўқима курсида ўтириб кўзини юмганча вақтни ҳис қиласди: вақт сокин жилғадек унинг ичидан оқиб ўтар, у шу аҳволда соатлаб, кунлаб, ҳафталаб ўтира оларди.

Баъзан хотирасидан эски кечинмалар қалқиб чиқиб, заиф тўлқин каби юракка уриларди. Шунда Каламуш кўзини чирт юмиб, юрагини маҳкам беркитарди-да, тўлқинларнинг тинишини сабр билан кутарди. Кечга яқин қош қораяётганда одатда шунақа бўларди. Тўлқинлар босилгач, Каламушни бошқа ҳеч нима безовта қилмас, кўнглини яна ҳар доимги заиф ҳамда ўткинчи осойишталик чулғарди.

3

Обуна билан шуғулланадиган газета ходимларини ҳисобга олмаганда, бошқа ҳеч ким ҳеч қачон эшигимни қоқмасди. Газетачиларга эса сира эшик очмасдим, тақиллатса ун чиқармасдим.

Аммо якшанба тонгларининг бирида кимdir нақ ўттиз беш марта эшик қоқди. Кўзимни очиб, каравотдан туриб, бутун гавдам билан эшикка тирғалишга тўғри келди. Йўлакда қирққа кирган бир киши турар, эгнида кулранг коржома, қўлидаги мотоциклчилар қалпогини кучукчани кўтаргандек авайлаб ушлаб олганди.

– Кечирасиз, мен телефон компаниясидан келдим, – деди у. – Тақсимлагич қопқани алмаштиришим керак.

Бош иргадим. Унинг олинмаган соқоли юзига аллақандай кўқимтири-кора тус берганди. Қанча қиртишласанг ҳам, бунақа соқолни тозалаб олиб ташлаш осон эмас. Қовоқларининг тагига ҳам кўкиш соқол чиққандек эди. Унга жуда ичим ачиdi, аммо уйқум келаётганди. Чунки тонгги соат тўртгача эгизаклар билан топган топалоқ ўйновдик.

– Бугун ўн иккидан кейин келолмайсизми?

– Йўқ, ҳозир алмаштирганим маъқул.

– Нега?

У шимининг лопиллаган чўнтагини кавлаб, қора ғилофли ён дафтарча чиқарди.

– Ҳаммаси соатма-соат белгиланган. Бир тумандаги ишни битириб, на-ригисига ўтаман. Мана, қаранг.

У дафтарчасидаги қайдларни кўрсатди. Ростдан ҳам туманимизда факат менинг квартирам колибди.

– Нима қилмоқчисиз ўзи?

– Жуда жўн иш. Тақсимлагич қопқани ечиб оламан-да, симларни узиб, янгисига улайман. Ўн дақиқалик юмуш.

Яна бироз ўйладим-да, бош чайқадим.

– Менга ҳозирги таксимлагич ҳам бўлаверади.

– Ахир сизники эски нусха-ку!

– Нима фарқи бор.

– Бу ёғи қандоқ бўлди? – у ўйланиб қолди. – Биласизми, бу шунчаки қилинаётган иш эмас. Сизни деб бошқалар жабр кўриши мумкин!

– Қанақасига?

– Ҳамманинг тақсимлагичи станциядаги бош компьютерга уланган. Фақат сиздан келаётган сигнал бошқаларнинг сигналига мос тушмаса, оқибати нима бўлишини тушунаяпсизми?

– Тушунаяпман. Темир-терсакни дастурга улаш керак экан-да?

– Тушунганингиз яхши. Энди кирсам майлими?

Тақдирга тан бериб, эшикни очдим-да, уни ичкарига киритдим.

– Ўша матоҳ уйда туриши шартми? – қизиқсиндим. – Бирор хизмат хонасига осиб қўйса бўлмайдими?

– Тартиб шунаقا, – деди тақсимлагични топиш илинжида деворни кўздан кечираётган уста. – Айтмоқчи, бу ускуналар ҳамманинг ғашига тегади. Уларни хўжаликка мослаб бўлмайди, устига-устак сўлоқмондек матоҳ.

Бош иргадим. У пайпоғи билан курсига чиқиб, шифтга разм солди. Ҳеч нима тополмаётганди.

– Худди хазина қидираётгандекман! – деб нолиди у. – Шунаقا жойга тиқишиадики, топгунингча эсинг кетади. Жазо ҳам шунчалик бўлар. Пана қилиш учун аҳмоқона пианинони суриб қўйишиади ёки қутига солинган қўғирчоқ билан беркитишади. Ҳар бало ўйлаб топишиади...

Уста билан баҳслашмадим. У ошхонада тақсимлагич йўқ деган хулосага келиб, меҳмонхонага ўтди.

– Яқинда бир квартирага кирдим, – деди у эшикни очаётиб. – Улар тақсимлагични шунаقا жойга тиқишибдики, мен...

Устанинг гапи оғзида қолди. Бурчақдаги ҳайҳотдек каравотда менинг жойимни бўш қолдириб, иягигача кўргага бурканган иккита бир хил қиз ётарди. Меҳмоннинг тили калимага келмай, ўн беш сонияча анграйиб қолди. Қизлар ҳам индамаётгани учун ўзим бирор нима дейишим керак эди.

– Бу киши уста... Телефонимизни созлаб беради.

– Танишганимдан хурсандман! – деди ўнгдагиси.

– Марҳамат! – деди чапдагиси.

– Ҳа-ҳа, – деди уста. – Раҳмат...

– Уста тақсимлагични алмаштиради, – тушунтиридим мен.

– Тақсимлагич?

– У нима ўзи?

– Бу телефон тармогини бошқарадиган мослама.

– Тушунмадик! – деди икковиям. Тушунтиришни устага қўйиб бердим.

– Хуллас, – деди у. – Бир сўз билан айтганда... Тақсимлагичнинг учтўртта сими бўлади... Нима десам экан... Бирталай кучукваччаси бор она итни кўз олдингизга келтиринг. Энди тушунарлими?

– ?

– Англолмадик!

– Оббо... Она итнинг бир тўда кучукваччаси бор, дейлик. Ит уларни бокади. Агар она ит ўлса болалари ҳам ўлади. Онаси ўлаётганда биз уни оламиз-да, янгисига алмаштирамиз!

– Қандай яхши!

– Ажойиб!

Бу гаплар менга ҳам ёқди.

– Мен бугун шунинг учун келдим. Уйқингизга ҳалал берган бўлсам узр.

– Ҳечқиси йўқ.

– Мароқ билан томоша қиласиз.

Уста енгил тортиб, пешона терини артди-да, хонани кўздан кечирди.

– Энди тақсимлагични қидириш керак.

– Қидириб нима қиласиз? – деди ўнгдагиси.

– У деворга тақалган жавоннинг ичидা, – гап қўшди чапдагиси. – Олдини тўсган тахтани қўпориб олиш керак.

– Сизлар қаёқдан биласизлар? – дедим хайрон бўлиб, – бунақа нарсаларни ҳатто мен ҳам билмайман!

– Бу ахир тақсимлагич-ку!

– У ҳаммага маълум.

– Ақлдан озишим ҳеч гап эмас! – деди уста.

Ўн дақиқада иш битди. Эгизаклар томоша қилиш учун яқинроқ сурилиб, нималарнидир шивирлаб, қиқир-қиқир кулишарди. Уларга чалғиган уста ишни бир неча бор қайтадан бошлишга мажбур бўлди. У ниҳоят ишини якунлагач, эгизаклар кўрпанинг остида ғимирлаб, футболка ва жинси шимларини кийишид-да, ҳаммага қаҳва қайнатгани ошхонага чиқиши.

Устани ейилмай қолган бўличкаларни татиб қўришга таклиф қилдим. У роса хурсанд бўлиб, бўличкаларни бирин-кетин еди.

– Раҳмат. Эрталабдан бери туз тотмагандим, – мамнуният билдириди.

– Нима, хотинингиз йўқми? – деб сўради 208.

– Нега йўқ экан, бор. Лекин якшанба куни уни уйғотиб бўпсан.

– Ана холос! – таажубланди 209.

– Худди якшанбада ишлашни ўзим ўйлаб топгандек!

– Тухум қайнатиб беришсинми? – деб сўрадим раҳмим келиб.

– Йўғ-э... Мени деб овора бўлманглар...

– Нега сизни деб экан? Шу баҳонада ўзимизга ҳам қайнатиб оламиз.

– Қўймадинглар-да! Майли, илиққина қилиб қайнатсанглар бош устига...

Уста тухумни арчиб, гапида давом этди.

– Йигирма йил ишлаб кўп квартиralарда бўлганману, лекин бунақасини биринчи қўришим.

– Нимани айтаяпсиз? – деб сўрадим мен.

– Нимани бўларди... Бирваракайига иккита қиз, устига-устак эгизаклар билан ётган кишини-да. Ҳалиги... Жинсий томондан анча оғир бўлса керак-а?

– Ҳеч ҳам оғир эмас, – дедим иккинчи финжондан қаҳва хўплаб.

– Ростданми?

– Бўлмасам-чи.

– У азamat йигит! – деди 208.

– Буқадек бақувват! – гап қистирди 209.

– Сизлар мени гангитиб қўясизлар, – деди уста.

Уни ростдан ҳам ақлдан оздирдик, шекилли. Йўқса эски тақсимлагични бизнида қолдириб кетмасди. Ким билади, балки нонушта учун шу йўл билан миннатдорчилик билдиргандир. Нима бўлганда ҳам қизлар кун бўйи ўша тақсимлагич билан ўйнашди. Бири она ит, наригиси кучукчага айланниб алмойи-алжойи гаплар айтиб вайсашди.

Мен уларга эътибор бермай, қуннинг иккинчи ярмида уйга олиб келган таржималарим билан шуғулланишга аҳд қилдим. Ймтиҳон топшираётган

талабаларимизнинг таглама ёзишга қўли тегмагани боис иш роса уюлганди. Бошида тез ўгираётувдим, аммо соат учлардан кейин худди батарейкам ўтириб қолгандек иш суръати пасайди. Тўртларга яқин бутунлай ҳолдан тойиб, бир сатр ҳам таржима қилолмадим.

Ойнаванд столга тирсагимни тираб, тамаки тутунини шифтга пуркадим. Майн ёруғда сузаётган тутун ҳавога ёпишган шаффоф қўйқага ўхшарди. Ойна остидаги банк тақвимига “Сентябр, 1973” деб ёзилганди... Худди тушдагидек. “Етмиш учинчи” йил ҳам бўлиши мумкинлигини билмаган эканман. Бунақа йил ҳақида ўйлашнинг ўзиёқ негадир жуда кулгили туюларди.

– Нима бўлди? – деб сўради 208.

– Ўлгудек чарчадим. Қахва дамлайсизларми?

Улар бош иргаб, ошхонага чиқиши. Бири қахва доналарини ғичирлатиб эзаётганда, наригиси сув қайнатиб финжонларни қиздирди. Кейин учаламиз дераза ёнига, полга ўтириб қайноқ қахва ичдик.

– Иш юришмаяптими? – сўради 209.

– Шунақароқ.

– Жуда заифлашиб қолди, – деди 208.

– Ким?

– Тақсимлагич.

– Она кўппак.

Чукур хўрсиндим.

– Ростданми?

Улар бош иргади.

– Яқинда ўлади.

– Тўғри.

– Нима қилсак экан?

Эгизаклар бош чайқади.

– Билмадик!

Индамай тамаки тутатдим.

– Балки сایрга чиқармиз? Бугун якшанба, гольф ўйнаб, кўп коптокча йўқотишгандир...

Яна бир соатча топган топалоқ ўйнадик-да, кейин симли тўсиқдан ошиб ўтиб, кечкуунги хувиллаган гольф майдонига чиқдик. Милдред Бэйлининг “Қишлоқ нақадар сокин” кўшигини икки марта ҳуштак қилиб чалдим. “Яхши қўшиқ экан!” – мақташди қизлар. Лекин бирорта ҳам коптокча топилмади. Шунақа кунлар ҳам бўлади. Худди зарбаси сира хато кетмайдиган энг чапдаст гольфчилар беллашишгандек эди. Балки майдон эгалари коптокчани олиб келишга ўргатилган ит боқишаётгандир. Ҳеч нима тополмай, ҳафсаламиз пир бўлиб уйга қайтдик.

Эгри-буғри узун тўлқинтўсарнинг охирида ёлғиз маёқ сўппайиб турарди. Масофадан туриб бошқариладиган бу пастаккина маёқ бўйига уч метрча келар, авваллари ундан балиқ овлашга чиқкан бир нечта қайиқчи фойдаланарди. Аммо денгиз ифлослангач, қирғоқ яқинига балиқ йўламай қўйди. Маёқ бўлса ҳам бу ерда ҳеч қандай бандаргоҳ йўқ эди. Қачонлардир

чиғир билан ходага тираб тортиб чиқарилган қайиқлар шу қирғоқда турар, нарироқда балиқчиларнинг учта кулбаси бўларди. Тонгда тўлқинтўсарнинг остидан тутилган майда балиқ ёғоч қутиларда қуритиларди.

Ўлжанинг камайиб кетиши ва кулбаларнинг давлатга қарашли ерда, шахар ҳудудида жойлашганидан норози қўшниларнинг ахмоқона важкорсонлари сабаб охир-оқибат балиқчилар кетиб қолишиди. Ўшанда олтмиш иккинчи йил эди. Уларнинг қаёққа кетганини ҳеч ким билмасди. Учала кулба ҳам бузилди, қайиқлар эса, ҳатто ахлатлар уюмагача ҳам етиб бормай, яқинроқдаги дараҳтзорда ётар, болалар уларнинг ичига кириб ўйнарди.

Балиқчилардан айрилган маёқ қирғоқ ёқалаб сузадиган яхталарга ва туман тарқалишини ёки довул тинишни кутиш учун кўрфазга кирган юк кемаларига хизмат қила бошлади. Ундан ҳали фойда бор эди.

Маёқнинг қорамтирик кўланкаси ерга кўйилган қўнғироқни ёки елкасини буқчайтириб чукур ўйга толган одамни эслатарди. Қуёш ботса-да, ҳали мовий ёғду аримаган ёз қоронғисида маёқнинг кўзи тилларанг нур таратиб секин айлана бошларди. У энг муҳим лаҳзани доим аниқ белгилай олар, ботаётган офтоб манзарасидами, туманли ёмғир пардаси остидами – ҳал қилувчи сонияни, ёруғлик зулматга қоришиб, кун тунга енгилай деб турган сонияни адашмай топарди.

Каламуш болалигида айнан шу лаҳзани кузатиш учун қош қораяётган маҳал бу ерга тез-тез келарди. Тўлқинлар баланд кўтарилимаган пайтлари у йўл-йўлакай эски тош лавҳаларни санаб, маёқ томон юрарди. Фавқулодда тиник сувда қузги майда балиқлар галасини илғаса бўларди. Улар ҳудди ниманидир сўраётгандек тўлқинтўсар ёнида бир-икки доира ясад денгиз қарига шўнғирди.

Маёққача етиб келгач, Каламуш тўлқинтўсарнинг бир четига ўтириб, атрофни кузата бошлади. Ложувард осмонда ҳудди мўйқалам билан чизилгандек паркӯ булуғлар сузар, кўм-кўк фалак шунчалик тиник эдики, унга тикилганда боланинг тиззалири беихтиёр титрай бошларди. Одатда, кўрқандан тиззаси шунаقا титрайди. Бари нихоятда аниқ сезиларди – денгиз ҳиди ҳам, осмон ранги ҳам. Каламуш кўнглига ўтириши учун ҳеч нимани кўздан кочирмай атофга узоқ термилар, кейин эса аста ортга қайрилиб, мовий денгиз бутунлай тўсиб кўйган ўз оламига назар ташларди. Ўркачлари кўкка чўзилган қўнғир тоғ тизмаси манзарасида тўлқинқайтаргич, оқиш қирғоқ ва ям-яшил қарагайзор гўё ғижимлангандек туюларди.

Чап қўлда эса улкан бандаргоҳ кўринар, бир неча кран, сузувчи доклар¹, қутига ўхшаш омборхоналар, юк кемалари, кўп қаватли бинолар ястанганди... Ўнг томондаги ёйсимон қирғоқ бўйида сокин шаҳарча қад ростлаган, яхталар учун жой ҳамда арак заводининг омборхоналари катта юмалоқ резервуарлари² дўппайиб, кувурлари кўкка оқ тутун пуркаётган фабрикалари бор саноат ҳудудига туташ эди. Ўн яшар Каламушнинг олами ўша ерда тугарди.

У болалигида баҳордан кузгача ҳар йили бир неча марта маёқ бўйига келарди. Тўлқинлар кўпирган маҳал томчилар унинг пойабзалини ювар, боши узра шамол ҳуштак чалиб, нимжон ёёқчалари йўсин босган тош лавҳаларда тойиб кетаверарди. Аммо Каламуш маёққа элтувчи йўлни ҳеч нимага алишмаган бўларди. У тўлқинқайтаргичнинг бир четига ўтириб,

¹ Док – кемалар тузатиладиган корхона.

² Резервуар – суюқлик сақланадиган катта идиш.

сувнинг шовуллашига қулоқ тутар, булутлар ва майда балиқ галаларини томоша қилиб, чўнтағидаги тошчаларни денгизга ирғитарди.

Қош қорая бошлаганда Каламуш келган йўлидан ўз оламига қайтарди. Ва ҳар сафар ортга қайтаётганида кўнгли тушунарсиз қайғуга чўмарди. Бу йўлда унга мунтазир бепоён дунёда Каламуш учун кафтдеккина жой топилмасди.

Аёл тўлқинқайтаргичнинг яқинидаги уйда яшарди. Каламуш уникига келганда болаликнинг шу гира-шира хаёллари ўша кунлар ҳидига қоришиб унинг хотирасида қайта жонланарди. У машинасини қирғоқ яқинига қўйиб, чанг-тўзондан ҳимояланиш мақсадида экилган сийрак қарағайзор оралаб ўтар, оёғининг остида қуруқ кум ғирчилларди.

Балиқчилар кулбасининг ўрнига қурилган уй атрофидан бир-икки метрли ўра қазилса ҳам денгизнинг бўз суви сизиб чиқадигандек туюлар, иморатнинг ёнидаги майдончада ўсан шойигул гўё кимдир оёғости қилгандек сўлиб буришиб қолганди. Аёл иккинчи қаватда яшар, шамолли кунларда майда кум зарралар дераза ойналарини чертарди. Унинг жанубга қараган квартираси саранжом-саришта бўлса-да, бефайзроқ эди. Денгиз ҳаддан ташқари яқинлиги учун шунаقا, – дерди аёл. – Туз, шамол, қирғоққа урилаётган тўлқин шовқини, балиқ ҳиди... Барি қоришиб кетган.

– Балиқнинг иси келмайди, шекилли, – эътиroz билдиради Каламуш.
– Келганда-чи, – дерди аёл ипни тортиб пардани шараклатиб ёпаркан.
– Аввал бу ерда яшаб кўр-да, кейин баҳслаш.
Деразани кум зарралари чертарди.

5

Талаабалигимда бизнинг қаватда ҳеч кимнинг телефони йўқ эди. Телефон у ёқда турсин, ҳатто ўчирғич ҳам камдан-кам топиларди! Мудирнинг хонаси рўпарасига яқинроқдаги мактаб қарзга берган пастаккина стол қўйилган, қаватимиздаги якка-ягона пуштиранг телефон аппарати ўша столнинг устида турарди. Шунинг учун ҳам телефон сигналини тақсимлагич билан ҳеч кимнинг иши йўқ эди. Унинг кимга ҳам қизиги бор?

Мудирнинг хонаси доим ҳувиллаб ётар, телефон жиринглаганда бинода яшайдиган бирор кимса трубкани кўтарарди-да, чақирилаётган кишига хабар бергани югуради. Турган гапки, ноқулай вактда – масалан, тунги соат иккida – трубкани ҳеч ким кўтартмасди. Телефон худди ўлишини сезиб жонхолатда пишқираётган филдек шовқин солаверар, – бир сафар унинг кетма-кет ўттиз икки марта жиринглаганини санадим, бу рекорд эди – ва охири ўларди. Ҳа, у ўларди. Сўнгги қўнғироқ узун йўлак бўйлаб учеби ўтиб, тун зулматига сингиб кетгач, бари ногоҳ сукунат қарига кўмиларди. Бу ёқимсиз сукунат эди. Ҳар биримиз тўшагимизда ётганча нафасни ичга ютиб тинчиган телефон ҳақида ўйлардик.

Яrim тунги телефон сухбатларини сира мароқли деб бўлмасди. Кимдир трубкани кўтарарди-да, паст овозда гап бошларди:

– Бўлди қилгин энди... Бу нима деганинг?.. Бошқа иложим йўқ эди дедим-ку... Э, ёлғон гапириб нима қиласман... Жонга тегди... Нима қил дейсан... Айтаяпман-ку... Хўп, бу ёғига ўйлайман... Қўйсанг-чи, шуни телефонда муҳокама қилмайлик...

Даҳмазалар бошимиздан ошиб ётарди. Улар гўё осмондан ёмғирдек ёғилар, биз эса барини битта қолдирмай териб, чўнтақни даҳмазага тўлдираётгандек эдик. Уларни нима биландир адаштирардик чофи.

Телеграммалар ҳам келарди. Ярим тунги соат тўртларда дераза ёнида мотоцикл тўхтарди-да, йўлакдан дўпиллаган қадам товуши эшитиларди. Кейин кимнингдир эшигига мушт уриб тақиллатишарди. Бу Ажал Мъбудининг товушига ўхшарди. “Гурс, гурс, гурс...” Гала-гала одамсимонлар ўз жонига қасд қилас, эси оғиб, қалбини давр гирдобига чўктириб, имиллаб ёнаётган тийиқсиз ўй-хаёллар оташида жизғанак бўлиб, ўзларига ва атрофидагиларга азоб берарди. “Минг тўққиз юз етмишинчи” – йил шундай аталарди.

Мен мудирга қўшни эдим, узунсоҷ эса иккинчи қаватда, зинапоянинг бикинидаги хонада яшарди. Телефон қилувчилар сони бўйича бу қиз бизнинг чемпионимиз эди – уни деб ўн бешта сирпанчиқ зинани минг марталаб босиб ўтардим. Эринмаган киши борки, унга қўнғироқ қиласарди. Хушумомала, гапга чечан, ғамгин ва такаббур турли-туман овозлар менга унинг исмини айтишарди. Қизнинг исмини бутунлай унутибман. Қўйилавериб сийқаси чиқкан исм экани ёдимда, холос.

У трубкани кўтариб доим паст овозда қўйналиб гапирав, ғўнғир-ғўнғир товушидан нима деяётганини илғай олмасдим. Қўриниши чиройли, лекин қовоғи уюқ эди. Учрашиб қолсак, баъзан бир сўз демай ўтиб кетаверардик. Қалин ўсан чакалакзордаги сўқмоқда оқ фил миниб кетаётгандек ёнимдан виқор билан ўтарди.

Бу қиз қаватимизда кузнинг бошидан то қиши адогигача ярим йилча яшади.

Трубкани кўтаргач, зинадан чиқиб, унинг эшигини қоқардим. “Телефонга!”. “Раҳмат”, – дерди қиз бироздан сўнг. Шу “раҳмат”дан бўлак менга айтадиган гапи йўқ эди. Мен ҳам “телефонга” дейишдан нарига ўтмасдим.

Ўша қиши ўзим ҳам ёлғиз эдим. Уйга келиб ечинганимда, суюкларим гўё этимни тешиб чиқаётгандек бўлар, ичимда яшаётган тушунарсиз кувват нотўғри томонга силжиб, мени ўзга бир оламга судраб кетмоқчилик туяларди.

Кимdir бошқа бировга бир нима айтмоқчи, деб ўйлардим ҳар сафар телефон жиринглаганда. Менга деярли ҳеч ким қўнғироқ қилмас, ёқлаб ҳол сўрайдиганлар, ўзим эшитмоқчи бўлган гапни айтадиганлар йўқ эди.

Ҳар биримиз хаётга муайян чизма бўйича кириб келамиз. Кимнингдир чизмаси менинидан бутунлай фарқ қилса – аччиқланаман. Ҳаддан ташқари ўхшаса ҳам ёқмайди. Ана шунаقا.

Уни сўнгги бор қиши тугаганда телефонга чақирдим. Баҳорнинг ilk кунлари, шанба тонгига ҳаво очиқ эди. Соат ўнга яқинлашиб қолган – қуёшнинг шаффоф нурлари тор хонамнинг ҳамма бурчагига сочилганди. Миямда телефон қўнғироғи жаранглар экан, деразам ёнидаги каравотдан кўриниб турган карамли полизга термилдим. Кора тупроқнинг у ер-бу ерида худди кўлмакка ўхшаб эримаган қор парчалари оқариб ётарди. Охирги қор, аёзниңг сўнгги эспикини.

Ўн марта жиринглагандан кейин ҳам трубкани ҳеч ким кўтармагач, телефоннинг товуши тинди-ю, аммо беш дақиқадан сўнг янга эшитила бошлиди. Тоқатим тоқ бўлиб, пижаманинг устидан ёқасиз камзулимни кийдим-да, эшикни очиб, трубкани кўтардим.

— ... билан гаплашмоқчи эдим, — деди эркак кишининг фўлдираган ҳиссиз овози. Зўрга жавоб бердим-да, зинадан шошилмай чиқиб, қизнинг эшигини тақиллатдим.

— Телефонга!

— Раҳмат.

Хонамга қайтгач, каравотга чўзилиб, шифтга термилдим. Қизнинг қадам товушлари, сўнг ҳар доимги минғирлагани эшитилди. Бу сафар сухбат узок чўзилмади. Ўн беш сонияча давом этди, холос. Унинг трубкани қўйганини эшитдим — кейин эса сукунат чўкди. Қадам товуши келмади.

Нихоят, у менинг хонамга қараб кела бошлади. Эшик икки марта тақиллади — ҳар икки зарбнинг орасида чукур нафас олса бўладиган вақт ўтди.

Эшикни очдим. Қалин жунли оқ свитер ва жинси шим кийган қиз бўсағада турарди. Дастреб уни телефонга чақириб янгишибман, бошқа бирорвга кўнғироқ қилишган бўлса керак деб ўйладим. Лекин қиз ҳеч нима демади. У қўлларини кўксига маҳкам қовуштирганча жунжикиб менга тикиларди. Одатда, кутқарув қайиғидагилар чўкаётган кемага шунақа қарашади. Тўғрироғи тескариси.

— Мумкинми? — деб сўради у. — Совуқдан ўлай деяпман...

Ҳеч нимага тушунмай уни ичкарига киритиб эшикни ёпдим. У газли иситкичининг ёнига чўккалаб, қўлларини иссиққа чўзганча уйимни кўздан кечирди.

— Ғалати хона экан! Шип-шийдам...

Бош ирғадим. Хонамда фақат дераза остидаги каравот кўзга ташланади. Бу каравот бир кишига жуда кенг, бир ярим кишига эса тор эди. Лекин ҳатто шу матоҳни ҳам ўзим сотиб олмагандим, уни менга бир танишим қолдириб кетувди. Нега каравотни менга берганини тушунолмайман — биз аслида унчалик яқин эмасдик. Деярли гаплашмасдик ҳам. У чекка шаҳардаги бир бойнинг ўғли эди — университет ҳовлисида бегона тўда билан муштлашиб, этик билан башарасига тепки еб, кўзига шикаст етгач, ўқишини ташлаб кетди. Тиббий бўлимда учратганимда уни нуқул ҳиқичноқ тутиб ғашимга тегарди. Бир неча кундан сўнг у уйига қайтаётганини айтиб, каравотини менга қолдириб кетди.

— Ичишга иссиқроқ бирор нима борми? — деб сўради қиз. Бош чайқадим. Ҳар тонг соқол олиш учун сув қайнатадиган кичкина товоқчамдан бўлак на қахва, на чой бор, ҳатто чойнагим ҳам йўқ эди. “Ҳозир келаман”, — деди қиз хўрсиниб, кейин ўрнидан туриб хонамдан чиқди-да, беш дақиқа ўтгач картон кути кўтариб келди. Кутининг ичидаги ярим йилга етадиган қора ва кўк чой, иккита ўрамда печенье, шакар, чойнак, бир нечта қошиқ ва Снутининг расми туширилган иккита узун стакан бор эди. У кутини каравотнинг устига қўйиб, чойнакда сув қайнатди.

— Бу ерда қандай яшайсан ўзи? Робинзон Крузо бўлиб кет-е...

— Илож қанча.

— Кўриниб турибди.

Икковимиз индамай иссиқ чой ичдик.

— Буларнинг барини сенга ташлаб кетаман.

Ҳайратдан йўталиб қолдим.

— Нега?

— Мени телефонга чақирганинг учун.

– Ўзингга керак эмасми?

У бош чайқади.

– Эртага кўчиб кетаяпман. Энди ҳеч ниманинг кераги йўқ.

Гапларини бир-бирига боғлашга уриниб жимиб қолди. Унга нима бўлганини сира тушунолмаётгандим.

– Кўчаётганинг сен учун яхшими? Ёки ёмонми?

– Нимаси яхши? Университетни ташлаб, уйга кетаяпман...

Хонани чулғаган март офтоби хиралашиб, кейин яна ёришди.

– Сенга бунинг нима қизиги бор? Ўрнингда бўлганимда ҳеч нимани суриштирумасдим. Ўзидан нохуш хотира қолдирган кишининг идишидан хузур қилиб ичиб бўлармиди.

Эртаси куни сахармарданда муздек ёмғир ёғди. Куйгани йўғу, лекин ҳарқалай ёмғирпўшимдан ўтиб свитеримни намлади. Қўлимдаги қизнинг кичикроқ саквояжи¹, елкамга ташлаб олган жомадон билан сумкаси ҳам ивиб қорайиб кетди. “Ўриндиққа қўйманглар”, – деди таксичи қовоқ уйиб. Иситкич ва тамаки тутунидан таксининг ичи димиққан, радиоприёмнишка варанглаётган куй машиналар қайрилганда ёниб-ўчадиган алмисоқдан қолган механик мосламадек эски эди. Йўлнинг икки ёнидаги турли-туман дараҳтларнинг хўл новдалари худди дengiz тубидаги маржонлардек диккайган.

– Токио менга бошиданоқ ёқмаганди, ҳалигача унга кўнико майман.

– Йўғ-е?..

– Шу ҳам манзарами? Ер қора, анҳорлар ифлос, тоғ кўринмайди...

Сенга-чи?

– Менга ҳеч қанақа манзара ёқмайди.

Қиз хўрсиниб, кулиб қўиди.

– Сен йўлингни топиб кетасан.

Унинг юкларини поезд бекатигача элтиб бердим.

– Бу ёғига ўзим кетаман, – деди у раҳмат айтиб.

– Қаёққа?

– Узоқ шимолга.

– У ёқ совуқ-ку!

– Хечқиси йўқ. Кўникса бўлади.

Поезд жилгач, у деразадан қўл силкитди. Мен ҳам қўлимни қулоғимгача кўтардим. Поезд қўздан йўқолгач, кўтарилган қўлимни қаёққа даф қилишни билмай ёмғирпўшнинг чўнтағига тиқдим.

Ёмғир қоронғи тушгандан кейин ҳам тинмади. Яқинроқдаги вино дўконидан икки шиша пиво олиб қиз қолдириб кетган стаканни тўлдирдим. Совуқ суюкларимни ҳам қақшатаётгандек эди. Стаканга чизилган Снупи ва Вудсток уччанинг томида кувнаб ўйнар, уларнинг тепасига шиширилган ҳарфлар билан шундай деб ёзилганди:

“Бахт – бу дўстлар қувончи”.

Ўйғонганимда тунги соат уч экан, эгизаклар эса донг қотиб ухлаб ётарди. Ҳожатхона дарчасидан кузги ойнинг ажабтовур ёрқин шуъласи тушарди. Ошхонадаги чаноқнинг четига ўтириб, водопровод сувидан икки стакан ичдим-да, газплитасидан тамаки тутатдим. Ой нурида ёришган гольф майдонида минглаб кузги ҳашаротлар бир-бирига гал бермай чирилларди.

¹ Саквояж – жомадон.

Чаноқнинг ёнида телефон тақсимлаги чуарди – уни қўлимга олиб синчиклаб разм солдим. Тагини устига ағдарсангиз ҳам бу матоҳ чанг босган маънисиз темир парчаси бўлиб қолаверарди. Уни жойига қўйдим ва қўлимнинг чангини қоқиб, керишдим. Ой ёруғида ҳаммаёқ бўзариб кўринар, атрофдаги нарсалар қиммат, маъни ва йўналишини йўқотгандек туяларди. Ҳатто соялар ҳам аллақандай ноаник кўринарди. Тамаки қолдигини чаноқнинг тешигига тикиб, янгисини ёқдим.

Қаёқка борай, ўз ўрнимни қаердан излай? Менинг ўрним қаерда ўзи? Узоқ вақт ўзимга мос жой деганда факат икки кишилик торпеда ташувчи самолёт кўз олдимга келарди. Аммо бу бўлмағур хомхаёл-ку – энг яхши торпедачи самолётлар эскирганига ўттиз йилдан ошди...

Ётокқа қайтиб, тўшақдаги эгизакларнинг орасига шўнғидим. Улар бир-бирига тескари ўгирилганча ғужанак бўлиб пишиллаб ухлашарди. Кўрпага ўраниб шифтга термилдим.

6

Аёл ваннага кириб ортидан эшикни ёпди. Кейин сувнинг шилдираши эшитилди. Ҳали ўзига келиб улгурмаган Каламуш тўшақда ўтирганча лабига тамаки қистириб, ўт чаққични қидира бошлади. Столда ҳам, шимининг чўнтағида ҳам у йўқ эди. Ҳатто бир дона гугурт чўпи ҳам топилмади. Аёлнинг сумкачасидан ҳам ҳеч нима чиқмади. Каламуш столнинг тортмасини очиб, титкилади-да, устига аллақандай рестораннынг номи ёзилган эски картон гугуртни топиб, тамакини тутатди.

Дераза ёнидаги тўқима курсининг ўриндиғига аёлнинг пайпоғи ва ичкийими тартиб билан тахланган, суюнчиғига хантал рангли чиройли кўйлак илинганди. Каравот ёнидаги столчада жажжигина қўл соати ва янги бўлмаса-да ҳали охори тўкилмаган сумкача ётарди.

Каламуш тамакини оғзидан олмай тўқима курсига ўтириб, деразага тикилди.

Кунботар пайт Каламушнинг тоғ ёнбағридаги уйидан туриб одам қурган турли-туман иншоотларни томоша қилиш мумкин. У баъзан қўлини белига тираб, дикқатини бир жойга жамлаб, худди гольф майдонидаги вазиятга баҳо бераётган ўйинчидек кечки манзарага соатлаб тикиларди. Нишаблик кам сонли уйларнинг чироқларини йиғганча секин-аста пастга энар, нимқоронги дараҳтзор, нарироқда чоғроқ тепалик, ҳар-ҳар жойда симобли фонуслар билан ёритилган хусусий ҳовузлар кўзга ташланарди. Қиялик ниҳоят текисликка жой бўшатганда уни худди ерга боғланган ялтир-юлтур тасмадек илонизи асфальт йўл кесиб ўтарди. Қирғоққача қолган бир километрли ҳудудга уйлар қатор қурилган, нариёғи дengiz эди. Денгиз ва осмон зулмати бир-бирига қоришиб, улар орасидаги чегара сидирилиб кетган маҳал тун қоронғисида маёқнинг тўқсариқ чироғи ёнарди – ёнарди-ю, дарров ўчарди. Яна аниқ-равшан кўрина бошлаган чегарага қора чизик санчиларди.

Бу дengизга қуйилаётган дарё эди.

Каламуш фалак ҳали ёзги жилва изларини йўқотмаган пайтда – сентябрнинг бошида бу аёл билан илк бора учрашиди.

У маҳаллий ҳафталик газетанинг “олди-сотди” рукнидаги гўдакларнинг тўрли майдончалари, лингафон тасмалари ва уч фидиракли велосипедлар ҳақидаги эълонлар орасида “электрли ёзув машинкаси сотилади” деган рекламани ўқиди. Телефонни кўтартган аёл ишбилармонлардек дона-дона қилиб тушунтириди: машинка ўтган йили сотиб олинган, яна бир йиллик кафолати бор, пулинни бўлиб-бўлиб тўлаш тўғри келмайди, уни олиб кетгани келганингизда яхлит тўлайсиз. Музокара тугагач, Каламуш аёлнигига борди-да, хаққини тўлаб машинкани олди. Кўп пул кетмади – бу пулларни шундоғам ёзда ҳуда-беҳуда совуриб юборарди.

Паст бўйли, келишган аёл енгиз бежирим либос кийганди. Даҳлизда ҳар хил рангу шаклдаги турли-туман ўсимликлари бор туваклар қаторлаштириб қўйилган. Аёлнинг юзи хушбичим, сочи ортига танғиб боғланган, ёши нечадалигини билиб бўлмасди. Йигирма иккидами, йигирма саккиздами – номаълум.

У уч кундан сўнг қўнғироқ қилди. Машинкага беш-олтита тасма топибди, уларни ҳам сотмоқчи экан. Каламуш тасмаларни ҳам олди-да, раҳмат айтиш учун аёлни “Жейз-бар”га таклиф қилиб, коктейль билан сийлади. Лекин иш шу билан битмади.

Орадан тўрт кун ўтгач, шаҳардаги усти ёпиқ ҳовузда улар учинчи марта учрашишди. Каламуш машинасида аёлни уйигача элтиб, уницида тунаб қолди. Нега бундай бўлганини, ташаббус кимдан чиққанини Каламуш эслолмасди. Бари ҳаво оқимилик енгил кўчди.

Бора-бора юзага келган бу муносабат Каламушнинг яшаш тарзи билан уйғунлашиб, ундаги ҳаёт шавқини қайта уйғотгандек бўлди. Энди у доим нимадандир безовталана, аёлнинг нозик қўллари ўзини қучаётгани ҳаёлида жонланса, аллақачон унутилган туйғу юрагида яна жўш уради.

Жувон жиллақурса ўзининг миттигина оламида баркамол кўриниш учун тиришаётгани сезилиб турарди, бу уриниш унинг учун осон кечмаётганини Каламуш ҳис этмоқдайди. Аёл ҳусн-мaloҳатда тенги йўқ бўлмаса-да, дид билан кийинар, ичкийимлари тоза, атиридан тонгги узумзорнинг хиди келар, гапирганида сўзларни танлаб-танлаб ишлатар, ортиқча савол бермас, ойнанинг олдида аввал кўп машқ қилгандек чиройли жилмаярди. Бир неча учрашувдан сўнг Каламуш у йигирма еттига кирган деган хулосага келди ва жувоннинг ёшини тўғри топди.

Аёлнинг сийналари кичкина, келишган қадди-басти қуёшда бир текис корайганди. У сира қорайиш учун тобланмаслигини, офтобнинг ўзи тери-сига ёпишишини айтарди. Бўртиб чиққан ёноклари ва ингичка лабларидан тарбия кўргани, қатъиятлилиги сезилиб турар, аммо юзи бирор нимадан бужмайса, бутун бадани сесканиб, беркитилгану яхши ҳимояланмаган соддадиллигини фош этиб қўярди.

Аёл университетнинг архитектура факультетини битирганини, лойихалаш бюросида ишлашини айтувди. Қаерда туғилган? Бу атрофда эмас. Бу ерларга ўқишини тугатгач келган. Ҳафтада бир марта ҳовузда чўмилади, якшанба кунлари эса электричкага ўтириб, алт¹ чалиш учун бирор ёққа кетади.

Улар шанба куни кечқурун учрашишар, якшанба куни эса Каламуш эрталабдан кечгача гангид юарарди. Аёл эса Моцартни чаларди.

¹ Алт – пуллаб чалинадиган мусиқа асбоби.

Шамоллаб қолиб уч кун оғридиму, иш тоғдек уюлиб кетди. Томоғим қичишар, фақат томоғим эмас, бутун баданимни жилвир билан ишқалашгандек эди. Столнинг устида қоғозлар, реклама варақалари, журнал ва рисолалар ғарам-ғарам бўлиб ётарди. Шеригим келиб, bemорни йўқлаганда айтиладиган бир-икки оғиз сўз билан кўнглимни кўтарган бўлди-да, хонасига кириб кетди. Котиба ҳар доимгидек қайноқ қаҳва ва икки дона ширип нон келтириб, столимга кўйди-ю, кўздан йўқолди. Тамаки сотиб олишни унутганим учун шеригимдан бир кути “Seven Star” ўмарид, фильтрини олиб, тескарисига чека бошладим. Осмонни туман босгандек қаери тиник, қаери булут, билиб бўлмасди. Худди кўчада нам хазонлардан гулхан ёқишигандек ғалати ҳид келарди. Балки иситмалаётганим учун менга шунака туюлгандир.

Чукур хўрсиниб, столдаги ўзимга энг яқин ғарамни тита бошладим. Ундаги ҳамма ишларга “шошилинч” деган ёрлик ёпиштирилиб, тагига таржима топшириладиган муддат ёзилганди. Яхши ҳам шошилинч уюм биттагина экан. Энг муҳими икки-уч кунда топшириладиган ҳеч нима йўқ, кўплари бир-икки ҳафталиқ ишлар эди. Агар ярми тагламага берилса вақт етади. Уюндаги ишларни тартиб билан тахтай бошлаганимда у лиқиллаб, министрлар маҳкамасининг турли ёш ва жинсдаги аҳоли томонидан қўллаб-куватланиши акс этган газетанинг илк саҳифасидаги графикдек қийшайиб қолди. Ўгириладиган ишлар ҳам турфа.

1. Чарльз Рэнкин “Олимларга саволлар”, “Жониворлар” жилди 68 бет, “Мушуклар нега ювинади”дан 89 бет ва “Айик балиқни қандай овлайди” – 12 октябрга тугаллаш керак.

2. Америка хасталарни парвариш қилувчилар жамияти “Ўлим тўшагидаги bemor билан сухбат” 16 бет, 19 октябрга тугаллаш керак.

3. Фрэнк Десит кичкина “Ёзувчилар хасталиклари” 3-боб, “Пичан без-гагига чалинган адиллар” 23 бет, 23 октябрга тугаллаш керак.

4. Рене Клэр “Итальян похол шляпачаси” (инглизча талқин; сценарий) 39 бет 26 октябрда тугаллаш керак.

Буюртмачилар фамилияси ёзилмагани чакки бўлибди. Бунаقا матнларнинг (устига-устак шошилинч) таржимаси кимга керак эканини ҳатто тахмин ҳам қилолмасдим. Дарё бўйида икки панжасини кўтариб турган бирор айиқ таржимамни тоқатсизлик билан кутаётган бўлса-я. Ёки жони узилаётган bemorга бир оғиз сўз айттолмаётган аллақандай ҳамшира таржимамга муштоқмикан...

Чўмилаётган мушук суратини столга ташладим-да, пластилиндек тамсиз бўличкадан еб, қаҳва ичдим. Иситмадан сўнг қўл-оёғим ҳали бўшашибган бўлса ҳам миям тинқлаша бошлади. Стол тортмасидан альпинистларнинг пичогини олиб, қаламларни чархлашга тушдим. Шошмасдан олтита қаламни яхшилаб чархлагандан кейингина ишни бошладим.

Стэн Гетцнинг эски тасмаларини тинглаганча ярим кун ишладим. Стэн Гетц, Эл Хейг, Жимми Рэйни, Тэдди Котик, Тайни Кан – зўр мусиқачилар гурухи. Улар “Jumping With The Symphony Sid”ни куйлашаётганда Стэн Гетцга жўр бўлиб унинг солосини бошидан-охиригача хуштак килиб чалгач, ўзимни анча тетик ҳис қилдим.

Тушлиқда күчага чиқиб, нишабдан пастроққа тушдим-да, мижозга тұла ресторанда қовурилған балиқ еб, гамбургер тамаддихонасида устма-уст икки стакан апельсин шарбати ичдім. Кейин жониворлар сотиладиган дүконга кириб, деразалар орасидаги тирқищдан бармоғимни суқиб, абиссин мушуги билан ўн дақиқача ўйнадим. Тушлик хар доимгидек ўтди.

Идорага қайтгач, тонгги газетани очиб соат биргача унга тикилиб ўтиридим. Кейин кечгача ишлатиш учун олтита қаламни яна бирма-бир чархлаб, қолган тамакиларнинг фильтрини юлиб, уларни стол устига тердім. Котиба қайноқ күк чой келтирди.

- Ақволлар қалай?
- Ёмонмас.
- Иш силжияптими?
- Силжиганда қандок.

Булут қоплаган осмон ҳамон бўзариб туарар, куннинг биринчи ярмига таққослаганда янаям тундлашгандек эди. Деразадан бошимни чиқариб, тез орада ёмғир томчилай бошлишини ҳис қилдим. Бир нечта кузги қушлар осмонда чарх урарди. Метро поездлари, ер устидаги трассаларни тўлдириган машиналар, пиширилаётган гамбургерлар ва ўзи очилиб, ёпиладиган эшикларнинг сон-саноқсиз товушларидан ҳосил бўлган улкан шаҳар шовқини борлиқни чўқтираётгандек эди.

Деразани ёпиб, магнитофонга Чарли Паркернинг кассетасини тиқдимда, “Just Friends” куйи остида “Кўчманчи қушлар қачон ухлайди?” бобини ўгира бошладим.

Соат тўртда ишни тамомладим ва кун бўйи ўгирганларимни котибага бериб, кўчага чиқдим. Соябонни олиб ўтиrmай, шунаقا кунларда кийиш учун атай ишхонада қолдирган енгил плашимни эгнимга илдим. Вокзалда кечги газета харид қилиб, лиқ тўла поездга чиқдим-да, йўлда бир соатча силкиндим. Ҳали томчилай бошламаган бўлса-да, ҳатто вагонда ҳам ёмғир ҳиди келарди.

Бекат ёнидаги супермаркетда кечки овқатга егулик олаётганимда нихоят ёмғир томчилай бошлади. Кўз илғамас шаффоф зарралар оёғим остидаги йўлакни аста-секин ёмғирга хос кулранг тусга бўяди. Автобус қачон жўнашини суриштиргач, яқинроқдаги тамаддихонага кириб қаҳва олдим. Емакхона гавжум эди, ёмғирнинг ҳиди энди ҳамма ёқдан келар, официант қизнинг кўйлаги ҳам, қаҳва ҳам ёғин исига тўйингандек эди.

Кечки нимқоронғида автобус бекатини куршаган нуқтачаларга ўхшаб фонуслар ёнди. Бекатда тўхтаб ўтидиган автобуслар тоғ дарёсида ў ёқдан-бу ёққа сузиб юрувчи улкан хонбалиқларни эслатарди. Хизматчи, талаба ҳамда уй бекаларига тўла уловлар тобора қуюқлашашётган зулмат қаърига бирин-кетин сингиб кетарди. Деразадан қараб қоп-кора овчарка ит етаклаб кетаётган ўрта ёшлардаги аёлга кўзим тушди. Унинг ортидан резина коп-токчаларини ерга уриб ўйнаганча уч-тўртта бола ўтди. Бешинчи тамакини ўчириб, совиб қолган қаҳванинг сўнгги қултумини сипкордим.

Сўнгра дераза ойнасида кўринаётган аксимига разм солдим. Иситмадан кўзларим киртайиб қолибди. Бу ҳам майли... Олти яримда ўсиб чиққан дағал соқолдан юзим қорайиб кетибди. Бунисигаям чидаса бўларди-ю, лекин юзим худди ўзимники эмасдек туюларди. Ишга кетаётганимда поездда тасодифан қаршимга ўтирган йигирма тўрт ёшли эркакнинг юзи эди бу. Бошқа бирор учун менинг юзим билан кўнглим маънисиз жасаддан ўзга

нарса эмас. Кўнглим бошқа бироннинг кўнглини нуқул четлаб ўтмоқчи бўлади. “Хой!” – дейман мен. “Хой!” – акси-садо беради аксим. Шу холос. Хеч ким қўл ҳам кўтармайди, қайрилиб ҳам қарамайди.

Агар қулоқларимга гул қистириб, қўлларимга сузгич кийдирилса, нари борса уч-тўрт киши қайрилиб қараши мумкин. Уч қадамдан кейин ўшалар ҳам унутиб юборишади. Уларнинг кўзи ҳам, меникиям ҳеч нимани кўрмайди. Гўё куриб битгандекман. Энди ҳеч кимга ҳеч нима беролмасам керак.

Эгизаклар мени кутишаётган экан.

Уларнинг бирига супермаркетдан келтирган жигарранг халтани тутқазиб, оғзимда тамаки билан душга кирдим-да, совун суркамай, оқаётган сувнинг остида кошинли деворга тикилиб туравердим. Чироғи куйган қоронги ваннахона деворларида бир нималар ғимирлаб ғойиб бўлмоқдайди. Аллақандай соялар – булар менга на тегина олади, на кўнглимга бир нима солади.

Ваннадан чиқиб артингач, каравотга чўзилдим. Янги ювилган маржондек қизғиши кўрпода биттаям доф йўқ эди. Шифтга тамаки тутунини пуфлаб кун бўйи нима билан шуғулланганимни эслашга уриндим. Эгизаклар эса сабзавотларни тўғраб, гўшт қовуриб, гуруч қайнатишиди.

– Пиво ичасанми? – деб сўради бири.

– Майли.

Футболкасига 208 раками чизилгани каравотга пиво билан стакан келтириди.

– Мусиқа қўяйми?

– Яхши бўларди.

У пластинкали жавондан Генделнинг “Флейта учун соната”сини олиб патефонга қўйди-да, игнани қистирди. Бу пластинкани менга беш-олти йил бурун Севишганлар кунида бир таниш қиз совға қилганди. Флейта, альт ва клавесин садосига пишаётган гўштнинг чирсиллаши жўр бўлди. Шу пластинканинг кути остида ўша қиз билан бир неча бор алоқа қилганмиз. Мусиқа тиниб пластинкага қистирилган инганинг шифиллаган товуши келгунча у билан индамай узоқ вақт қовушардик.

Дераза ортидаги товушсиз ёмғир қоронғи гольф майдонини сувга бўқтиарди. Пивони ичиб тугатдим, Ганс Мартин Линде фа-минор сонатасининг сўнгги нотасигача ҳұштак қилиб чалгач, кечки овқат ҳам тайёр бўлди. Ўша куни кечқурун оғзимизга толқон солингандек ҳеч биримиздан садо чиқмасди. Пластинка кути тингач, хонада бўғотни чертаётган ёмғир садоси ва уч кишининг гўшт чайнаши эшитиларди, холос. Кечки овқатдан сўнг эгизаклар идиш-товоқни йифишириб, ошхонада қаҳва қайнатишиди. Қаҳвани ҳам бирга ичдик. Қайноқ, ҳұштаъм қаҳвадан гўё ҳаёт нафаси уфурарди. Эгизаклардан бири пластинка қўйиш учун ўрнидан қўзғалди. Бу “Битлз”нинг “Rubber Soul” қўшиғи эди.

– Бунақа пластинкам борлигини билмаган эканман! – дедим ажабланиб.

– Биз сотиб олдик!

– Берган пулингдан ортиб қолганини оз-оздан йиғдик.

Бош чайқадим.

– “Битлз”ни ёқтирмайсанми?

Индамадим.

– Аттанг. Сени хурсанд қиласиз деб ўйловдик.

– Кечирасизлар...

Қизлардан бири ўрнидан туриб патефонни ўчирди ва жиддий қиёфада пластинканинг чангини артиб, конвертга солиб қўйди. Учаламиз ҳам жимиб қолдик. Хўрсиндим.

– Килиғимга эътибор берманглар, – ўзимни оқлай бошладим. – Бироз чарчаганим учун ғижинаяпман... Ўша пластинкани яна бир эшитайлик.

Эгизаклар ўзаро кўз уриштириб кулиб юборишиди.

– Тортинма! Ахир бу ўзингни уйинг...

– Бизларга эътибор берма!..

– Пластинкани ростдан ҳам эшитгим келаяпти.

Охир-оқибат қаҳва ичиб, “Rubber Soul”нинг ҳар икки тарафини тингладик. Хиёл енгил тордим. Қизлар ҳам хурсанд бўлишиди, чамамда.

Қаҳвадан кейин улар танамга ҳарорат ўлчагич қўйиб, иккаласиям бир неча бор текширди. Ҳароратим ўттиз етти-ю, бешга чиқиби – эрталабкидан яrim даража юқори. Бошим караҳт эди.

– Душга тушганинг учун шундай бўляяпти.

– Ётиб ухлашинг керак.

Яхши маслаҳат. Ечиниб, “Чин заковат танқиди” ва бир қути тамаки билан каравотга шўнғидим. Қўрпадан қуёшнинг сезилар-сезилмас ҳиди келар, Кант ҳар доимгидек ажойиб эди, лекин тамакидан найча қилиб ўраб газли горелкада куйдирилган нам газетанинг тами келарди. Китобни ёпиб, қизларнинг товушига паришонлик билан қулоқ тутганча зулмат домига тортишини кутиб ётавердим.

Тоғ чўққиси яқинидаги сокин нишаблик қабристонга айлантирилганди. Қабрлар орасидан қалин шағал ётқизилган йўлкалар ўтган, ора-сира худди майса чимдиётган қўйларга ўхшаб буталари қирқилган арчагуллар кўзга ташланади. Симобли баланд фонуслар бутун майдон бўйлаб худди соат пружиналаридек бураб чиқилганга ўхшар, улар ҳар ёққа сунъий оқиш ёруғлик таратади.

Каламуш машинани қабристоннинг жануби-шарқидаги дарахтзор ёнида тўхтатди-да, аёлнинг елкасидан қучиб, у билан бирга пастда ястанган тунги шаҳарни томоша қилди. Шаҳар ясси идишга тўлдирилган қуюқ ялтироқ бўтқани ёки баҳайбат капалак сочган тилларанг чангни эслатарди.

Аёл Каламушга суюниб, худди ухлаётгандек кўзини юмиб турар, Каламуш ёнбоши билан унинг оғирлигини яққол ҳис этмоқда. Ғаройиб оғирлик. Эркакка муҳаббат, фарзанд туғилиши, кексайиш ва ўлим – бари мужассам эди унда. Каламуш бир қўли билан тамаки кутисини олди-да, чекди. Баъзан дengиздан шамол эсар, тепаликка кўтарилиб, қайрағайзорнинг игнабаргларини силкита бошларди. Аёл ростдан ҳам ухлаб қолгандай эди. Каламуш унинг яноғини силади. Бармоқларини юпқа лабларига теккизисиб илиқ ва нам нафасни ҳис этди.

Бу ер қабристондан кўра қўпроқ ташландиқ шаҳарга ўхшарди. Майдоннинг ярмидан кўпи хувиллаб ётар, жой олганлар ҳали тирик эди. Баъзан, якшанба кунлари улар оиласлари билан келиб, қачонлардир ўzlари ётадиган жойдан хабар олишарди. Улар қабристонга тепароқдан разм солиб

ўйга толарди: хўш, биноидек манзара, мавсумга мос гуллар, тоза ҳаво, чим текисланган, ҳатто сувпуркагичлар ҳам ўрнатилган, қабрга қўйилган нарсаларни олиб қочадиган дайди итлар санғимайди. Энг муҳими, ҳамма ёқ ёруғ ва тоза. Кўнгиллари жойига тушган меҳмонлар ёғоч ўриндиққа ўтириб, қутида олиб келишган тушликни тановул қилишарди-да, серғалва ҳаёт қўйнига қайтишарди.

Эрталаб ва кечқурун назоратчи келиб, дастаси узун ясси белкурак билан йўлаклардаги шағални текисларди. Кейин майдон ўртасидаги сув ҳавзасига бориб, зоғорабалиқларни томоша қилаётган болаларни хайдарди. Кўшимчасига кунига уч маҳал – тўққизда, ўн иккida ҳамда олтида карнайлардан “Қари Қора Жо” янграй бошлияди. Бу куйда қандай маъно бор – Каламуш билолмасди. Аммо “Қари Қора Жо” садоси остидаги кечки хилват қабристон келиб кўришга арзирли манзара эди.

Етти яримда назоратчи автобусга ўтириб, пастки оламга қайтар, қабристон сув қўйгандек жимжит бўлиб қоларди. Шундан сўнг ошик-маъшуқлар машинада келиб, кўнгилхушлик қиларди. Ёз пайтлари дараҳтзорда ҳамиша уч-тўртта машина турарди.

Каламушга ёшлигидаям қабристонда чуқур бир маъно бордек туюлар, мактабда ўқиб юрган кезлари ҳали хайдовчилик гувоҳномасини олмай туриб у ўзининг спорт мотоциклига қизларни миндирганча, дарё ёқалаб бу ерга тез-тез келиб турарди. Тепага кўтарилигач, навбатдаги севгилисини кучиб шаҳар чироқларини томоша қилар, турфа ҳидлар димогини қитиқлаб зум ўтмай тарқарди. Турли-туман орзулару қайғулар, ваъдалар... Бари тарқаб кетарди.

Ўгирилиб каралса, бу кенг майдон бўйлаб аста-секин қулоч ёзаётган ажал кўзга чалинарди. Гоҳо Каламуш қизнинг кўлидан тутиб, рутубатли майдондаги йўлакларда мақсадсиз кезишарди. Ўзига исм, сана ҳамда ўтган умрларни жо этган ўлим худди қатор ўсган буталардек бир текис такрорланар, унинг охири кўринмасди. Бу ерда ётганлар учун шамол шивири ҳам, ҳидлар ҳам, ҳатто зулматга қаратса чўзиш учун пайпаслагич ҳам йўқ эди. Улар вақтдан айрилган дараҳтларга ўхшар, фикрдан, мушоҳадага сўз айтишдан маҳрумдирлар. Қабристонда халоват топганлар буларнинг барини тирикларга қолдиришганди. Каламуш севган қизи билан дараҳтзорга қайтиб, бир-бирини маҳкам қучди. Денгизнинг шўр шамоли, барглар иси билан майсадаги чигирткалар – яшашда давом этаётган бу дунё қайғуси ҳамма ёкни қоплаганди.

– Кўп ухладимми? – хижолат чеккандай бўлди аёл.

– Йўқ, – деди Каламуш. – Бироз мизғидинг холос...

Худди аввалгидек яна бир кун. Гўё ўқилган саҳифани қайта очишгандек. Кун бўйи кузнинг таровати. Ҳар доимги вақтда ишни тугатиб, уйга қайтганимда эгизаклар йўқ эди. Пайпоғимни ечмай каравотга чўзилдим-да, шифтга термилиб тамаки тутатдим. Кўп нарсалар ҳақида ўйлагим келар, лекин бошим бўм-бўш. Хўрсишиб, қаддимни кўтардим-да, бир муддат рўпарамдаги оқ деворга тикилдим. Нима билан шуғулланишни билмай қолдим. Бир умр деворга бақрайиб ўтиrolмайман-ку, – дедим дилимда.

Барибир фойдаси бўлмади. Диплом иши ёзишимга ёрдам берган профессорнинг гапи тўғри эди. Услуб чакки эмас, – девди у, – далил-исботлар ҳам жойида. Лекин мавзу мавхум. Ҳа, худди шундай. Мустақил яшай бошлангандан бери ўз-ўзимга қандай ёндашишни билмасдим.

Жуда ғалати ҳолат. Шунча йилдан бери ёлғиз яшайману ҳаётим рисоладагидек кечганини эслолмайман. Йигирма тўрт йил – бу хотирадан ўчиб кетадиган қисқа муддат эмас. Худди зўр бериб қидираётганимда нимани излаётганимни унугиб кўйгандекман. Аслида нимани излаётувдим ўзи? Шиша очқичними? Эски мактуб ёки ҳужжатними? Қулоқни тозалайдиган чўпними?

Ўйларимни четга сурит каравот бошидаги Кантни кўлга олдим. Китобдан тушган бир парча қоғозга эгизаклар: “Гольф майдонида сайр қилгани кетдик”, деб хат ёзиб қолдиришган экан. Хавотирлана бошладим. Уларга менсиз у ёққа борманглар, деб тайнловдим-ку. Қаердан юришни билмасанг, у ерда сайр қилиш хавфли. Гольф коптоқчаси тегиб кетиши мумкин.

Оёққа пойабзал, эгнимга свитер кийиб, кўчага чиқдим-да, сим тўсиқдан ошиб, майдоннинг нотекис жойидан юрганча ўн иккинчи чукурчагача бордим. Кейин ҳордиқ чиқарувчилар айвонини ёнлаб ўтиб, ғарбий бурчакдаги дараҳтзор оралаб юрдим. Ботаётган куёш нурлари дараҳтларнинг орасидан майсазорга тушарди. Ўнинчи чукурча яқинидаги қумлоқда шакли гантелга ўхшаш ўра қазилган бўлиб, унинг ичидаги менинг қизларим ташлаб кетган қаҳвали крем суртилган ширинликнинг бўш халтачаси ётарди. Халтачани найча қилиб ўраб чўнтағимга тиқдим-да, қумдаги учовимизнинг изимизни оёғим билан текисладим. Ёғоч кўприкча бўйлаб жилғадан ўтгач, тепаликка чиқиб ниҳоят уларни учратдим. Эгизаклар тепаликнинг нариги томонига ўрнатилган эскалатор зинасида ўтириб, топган топалоқ ўйнашаётганди.

– Бу ерда ёлғиз юриш хавфли деб айтувдим-ку.

– Шафақ жуда чиройли экан! – деди қизлардан бири ўзини оқлаётгандек.

Эскалаторда пастга тушиб, ўт босган майдонда ўтирганча куёшнинг ботишини томоша қилдик. Чиндан-да гўзал манзара экан.

– Ўрага чиқинди ташлаш мумкин эмас! – койидим яна.

– Кечирасан, – дейишидди икковиям.

– Мана, қаранглар, бир сафар қўлимни кесиб олганман! – Уларга чап қўлимнинг кўрсаткич бармоғидаги оқ ипга ўхшаш етти миллиметрли чандиқни кўрсатдим. – Ўшанда бошланғич синфда ўқирдим. Кимдир шарбат шишиасининг синифини қумга кўмган экан.

Қизлар бош иргади.

– Тўғри, ширинлик халтаси қўлни кесмайди-ю, лекин барибир қумга чиқинди ташлаш яхши эмас! Қум хамиша тоза бўлиши керак!

– Тушундик, – деди бири.

– Энди бундай қилмаймиз, – таъкидлади наригиси. – Бошқа жойларингният кесиб олганмисан?

– Бўлмасам-чи!

Уларга ҳамма яра-чақаларимни кўрсатдим. Жароҳатларимдан бутун бошли рўйхат тузиш мумкин эди. Мана, футбол тўпи теккан чап кўзим. Тўр пардасидаги из ҳамон кетмаган. Бурнимдаги манави чандиқният футбол ўйнаганда орттирганман. Тепадан келаётган тўпга сакраганимда рақибим тиши билан бурнимни қашқа қилган. Пастки лабимда еттига

чокнинг изи бор. Юқ машинасидан ўзимни четга оламан деб велосипеддан йиқилганман. Мана, синган тишим...

Салқин майсага ёнбошлаб буталарнинг шамолда шовуллашига қулоқ тутдик.

Қоронғи тушгач, овқатлангани уйга қайтдик. Ваннада чўмилиб, бир банка пиво ичгунимча консерваланган сарсабил ва шапалоқдек қоҳу барглари билан безатилган уч-тўртга сулаймонбалиқ тайёр бўлди. Балиқнинг таъми қачонлардир ортда қолган, ёзда ўзим юрган тоғ сўқмоғини ёдимга солди. Ҳафсала билан балиқни пақкос туширдик. Ликопда оқ қилтиқ билан қаламга ўхшаш қоҳу поялари қолди, холос. Қизлар идиш-товоқни апилтапил ювишди-да, қаҳва қайнатишиди.

– Тақсимлагич қопқа ҳақида гаплашиб олсақ, – дея таклиф қилдим мен.
– Негадир у мени хавотирга солаяпти.

Қизлар бош ирғашди.

– Қизиқ, тақсимлагич нега сустлашмоқда?

– Захарли ҳаво ютгандир-да.

– Ё тешилган.

Чап қўлимда қаҳвали финжон, ўнгида тамаки тутганча бироз ўй сурдим.

– Нима қилсан экан?

Улар бир-бирига қараб қўйишди-да, бош чайқашди.

– Энди унга ҳеч нима кор қилмайди!

– Гўр қазиши қолди, холос!

– Териси йиринглаган мушукни ҳеч кўрганмисан?

– Йўқ, – дедим мен.

– Йиринг аста-секин тошдай қотиб қолади. Охири юраги ҳам тўхтайди.

Чуқур хўрсиндим.

– Ўлгунича жим қараб тураверамизми?

– Ачинаётганингни тушунса бўлади, – деди қизлардан бири. – Лекин кўп куйинаверма, ўзингни олдириб қўясан...

Бу гап шунақангги хотиржамлик билан айтилдики, одатда, қор ёғмаган қишида тоғ чанғисига тупуришга шунақа оҳангда кўндиришади. Мен ҳам тупурдим-да, сўнг қаҳвадан хўпладим.

10

Чоршанба куни кечки соат тўққизда элитган уйқу ўн бирда қочди-ю, қайтиб кўз илинмади. Гўё икки ҳисса тор қалпок кийдиришгандек бошни нимадир сиқарди. Жуда ёқимсиз ҳиссиёт. Ётавериш жонига теккач, Каламуш пижамада ошхонага чиқиб муздек сувдан сипкорди. Кейин аёли ҳақида ўйлади. У дераза ёнида туриб, нур сочаётган маёққа қаради, кейин нигоҳи қоронғидаги тўлқинқайтаргичда сирғалиб, аёлнинг уйи турган жойга кўчди. Зулматга урилаётган пўртанаалар шовури, дераза ортига уюлган қўмнинг шитири ёдига тушди... Ўзининг бир қарич ҳам олдинга силжимай узлуксиз ўй суриш одати жуда жирканч туюлди.

Улар учраша бошлагач, Каламушнинг ҳаёти бир хил ўтувчи ҳафталарнинг узлуксиз такрорига айланиб, вақт ҳисси ғойиб бўлди. Неча ой ўтди? Ўн ойдир, эҳтимол. Эслолмайди... Шанба куни аёл билан учрашади. Якшанбадан сесанбагача – уч кун муттасил хотираларга берилади. Пайшанба,

жума ҳамда шанбанинг биринчи ярмида бўлғуси учрашувга ҳозирланади. Фақат чоршанбада ҳар тарафга бурун суқиб бемақсад тентираш мумкин. Келажакка ҳам яқинлашолмайсан, ўтмишдан ҳам олисадасан. Чоршанба...

Каламуш ўн дақиқача қақайиб тамаки тутатгач, пижамани ечиб, кўйлак, устидан куртка кийди-да, ер ости гаражига тушди. Ярим тунги кўчаларда ҳеч зоғ кўринмас, зимистон йўлкаларни ёритган фонуслар сўппайиб турарди, холос. “Жейз-бар”нинг эшигига тунука парда ёпилганди. Каламуш уни ярмигача кўтариб, ичкарига киргач, зинадан пастга тушди.

Жей курсиларнинг суюнчиғига ўнтacha ювилган сочиқни илиб, пештахта ёнида ёлғиз ўзи тамаки чекиб ўтиради.

– Бир шиша пиво ичсам майлимни?

– Бемалол, – деди у хушмуомалалик билан.

Каламуш илк марта “Жейз-бар”га ёпилгандан кейин киравди. Чироқ факат пештахтани ёритар, вентилятор ва совутгичларнинг уни ўчганди. Ииллар мобайнида деворлар ҳамда полга сингган ҳидлар тутқич бермай ҳавода чарх уради.

Каламуш пештахтанинг ортига ўтди-да, музлаткичдан шиша олиб, стаканни тўлдирди. Барнинг қоронғи томони совиган, оғир ҳамда нам ҳаво қатламларидан иборатдек эди.

– Ўзи бугун келмоқчи эмасдим, – деди Каламуш худди кечирим сўраётгандек. – Лекин уйқум қочиб, роса пиво хумор қилди. Кўп ўтирамайман.

Жей пештахтага газета ёйиб, шимиға теккан кулни қоқди.

– Шошмай ичавер. Қорнинг оч бўлса, бирор нима пиширай...

– Керак эмас... Пивонинг ўзи кифоя... Менга эътибор берма.

Каламуш бир кўтаришда тотли пиво солинган стаканни бўшатди-да, ҳовури босилгач, қолганинjam қуиб, кўпикнинг чўкишини томоша қилди.

– Балки мен билан бирга ичарсан? – деб сўради у секингина.

Жей хиёл ўнгайсизлангандек жилмайди.

– Раҳмат. Лекин мен бир қултум ҳам ичмайман.

– Билмаган эканман.

– Шунаقا туғилганман. Вужудим қабул қилмайди...

Каламуш бош иргаб, индамай пиво ҳўплади. Аслида, Жей ҳақида ҳеч ким айтарли гап билмасди. Жуда камсуқум бу одам ўзича сира гапирмас, кимдир савол берса, гўё жавонни ағдариб юбормаслик учун эҳтиётлаб сўраётгандек ҳар билан сўзини ўлчаб жавоб қайтарарди.

Жей хитойлик экани, Хитойда туғилгани ҳаммага аён, шаҳарда бунақа ажнабийлар тез-тез учраб турарди. Каламуш юқори синфда ўқиган кезлари иккита хитойлик билан бирга футбол жамоасида ўйнаган – улардан бири ҳужумчи, наригиси ҳимоячи эди. Хитойликларга ҳеч ким ортиқча эътибор бермасди.

– Мусиқасиз зерикарли! – Жей шундай деб Каламушга мусиқа автоматининг калитини иргитди. Каламуш бешта қўшиқ танлади-да, пештахтадаги пивосининг ёнига қайтди. Динамиклардан Уэйн Ньютоннинг эски қўшифи янграй бошлади.

– Вақтингни оляпманми? – сўради Каламуш.

– Нима фарқи бор. Барибир ҳеч ким кутмайди.

– Ёлғиз яшайсанми?

– Ха...

Каламуш чўнтағидан тамаки чиқарди-да, силлиқлаб тутатди.

– Қари бўлсаям гаплашишга ярайдиган мушугимни айтмаганда, – деди Жей.

– Гапира оладиган мушукми?

Жей бош ирғади.

– Мушук билан анчадан бери биргамиз. Унинг кайфиятини хис қиласман, у эса меникини.

Каламуш оғзида тамаки билан бир нима деб ғўлдиради. Мусиқа автоматининг игнаси шифиллаб, “Макартур-Парк”нинг пластинкаси қўйилди.

– Мушуклар нима ҳақида ўйлади ўзи?

– Ҳар хил нарсаларни... Мисол учун сен билан ўйларимиз қанақа?

– Тўғри айтасан, – деди Каламуш кулиб.

Жей ҳам кулиб қўйди. Кейин индамай бармоғини пештахта юзасида юргизди.

– У бир қўлли.

– Бир қўлли?

– Мушугимни айтаяпман-да. Мушугим чўлоқ. Тўрт йиллар бурун қишида у ҳамма ёғи қонга беланиб уйга қайтди. Панжаси мажақланиб, мармеладга ўхшаб қолибди.

Каламуш стаканни пештахтага қўйиб Жейга қаради.

– Унга нима бўлган экан?

– Билмадим. Дастваб машинанинг остида қолган деб ўйладим. Лекин ғилдирак бунақа босмайди – фақат исканжа билан шундай қисиши мумкин. Панжа титилиб кетганди. Балки, кимдир атайин азоб бергандир...

– Атайин? – Каламуш қулоғига ишонмай қайта сўради. – Сафсата. Мушукнинг панжасини эзғилаш кимга керак?

Жей тамакининг учини пештахтага тиқиллатиб урди-да, тишларининг орасига қистириб тутатди.

– Тўғри, мушукни майиб қилишдан нима наф? Ҳеч кимга зарари тегмайдиган ювошгина жонивор ахир... Унинг панжасини мажақлаб нимагаем эришиш мумкин? Ақлга сиғмайдиган ваҳшийлик бу. Аммо дунёда бунақа сабабсиз ёвузлик тоғдек уюлиб ётибди. Иккимиз сабабини англолмасак-да, у мавжуд, тамом-вассалом. Биз унинг ичиди яшаймиз, десак ҳам бўлади.

Каламуш стаканга тикилиб яна бош чайқади.

– Буни тушунишим даргумон...

– Тушунмаганинг ҳам яхши! Бунақа ахволда энг тўғри йўл – тушунишга уринмаслик.

Жей шундай деб, одатда, мижозлар ўтирадиган зулматдаги бўм-бўш курсилар томонга тамаки тутунини пуркади. Оқиш тутун хавога сингиб, иззиз йўқолди.

Улар бир муддат индамай ўтиришди. Каламуш стаканга термилганча нималарнидир ўллар, Жей эса ҳамон бармоғини пештахта сатҳида юргизарди. Мусиқий автомат сўнгги қўшиққа етиб келди. Хушовоз “Falsetto Boys” гуруҳи соул-баллада куйлай бошлади.

– Биласанми, Жей! – деди Каламуш стаканидан кўз узмай. – Бу дунёда яшаётганимга йигирма беш йил бўлибди-ю, ҳалигача ҳеч нимани фаҳмлай олмагандайман.

Жей индамай бармоқларига тикилиб турди-да, сўнг қадди бироз эгилди.

– Мен эса кирқ беш йил яшаб, биргина ҳақиқатни англадим. Қанақа дегин? Одам агар чин кўнгилдан истаса, ҳар қандай нарсадан сабоқ чиқара оларкан. Оддий, майда-чуйда нарсалардан ҳам ҳар доим сабоқ чиқарса бўлади. Ҳатто соқол олишнинг ҳам ўз фалсафаси бор, деганди кимдир. Агар шундай бўлмагандга бу дунёда ҳеч ким тирик қолмасди.

Каламуш бош иргаб, стаканнинг тубидаги уч сантиметр пивони ҳўплади. Пластинка тугаб, мусиқа автомати “шик” этди ва бар яна сукунат қарига чўмди.

– Айтганларинг тушунарлидег-у... – Каламуш бошлаган гапини охирiga етказолмади. Ичидагини сиқиб чиқаришга уриниши наф бермагач, жилмайиб ўрнидан қўзғалди. – Пиво учун раҳмат. Уйингга элтиб қўяйми?

– Ҳожати йўқ, уйим шу атрофда. Пиёда юришни ёқтираман...

– Хўш, хайрли тун унда. Мушугингга салом айт.

– Албатта айтаман.

Ташқарида кузги совукнинг хиди келарди. Каламуш кафти билан дарахт таналарини шапатилаб, кўча бўйлаб кетаверди. Машина тўхташ жойигача келгач, хисоблагичнинг ракамларига паришонхотирлик билан узоқ термилиб турди. Сўнгра машинага миниб бироз ўлади-да, уловни денгизга қараб ҳайдади. Рулни соҳил ёқалаб ўтган йўлга буриб, аёлнинг уйи ёнида тўхтади. Деразаларнинг ярмида ҳали чироқ ёник, айримларида парданинг ортидаги кишиларнинг қораси кўринарди.

Аёлнинг квартираси қоронги, ётоқхонасининг чироги ҳам ўчиқ. Ухлаётгандир. Каламушнинг юраги баттар сиқилди.

Тўлқинлар борган сари қаттиқроқ шовуллар, тўлқинтўсардан ошиб ўтиб, уни машинаси билан бирга оқизиб кетмоқчидек туюларди. У радиони ёқиб, ўриндикнинг суюнчиғини ортга сурди, кейин қўлларини гарданига тираб, радиобошловчининг валдирашига қулоқ тутганча ўтираверди. Каламуш ўлгудек чарчаганди. Ҳар хил тушунарсиз туйғулар ўз жойини тополмай қаёққадир йўқолар, у енгил тортиб, бўм-бўш бошини қийшайтириб, пўртаналар шовурига қоришаётган вайсақи радиобошловчи товушини элас-элас эшитиб ўтиради. Уйку билдирмай келди.



(Давоми келгуси сонда)

QO'SHNIM- QARDOSHIM

ТУРК ШЕЪРИЯТИДАН

Ражаб ҲИФЗИЙ

(1893–1918)

НАҚШЛАНДИ МИНГ АЛВОНГА ЧЕЧАКЛАР

*Турк тилидан
Тоҳир ҚАҲҲОР
маржимаси*

Ражаб Ҳифзий Усмонли салтанатининг Қарс вилоятидаги Қағизман туманида яшаб ўтган халқ шоиридир.

Ражаб Тупроққалъя маҳалласидаги мадрасада таълим олади, Қуръонхон ҳофиз бўлиб етишади. Ўзи ҳам мактаб очиб, болаларни ўқитади, имом бўлиб хизмат қилади. Айни пайтда ошиқлар, яъни баҳшишлар ўйлида шеърлар битади. Уйланади, уч фарзанд кўради. Афсуски, 1918 йил мартаиди хотини Сўна вафот этади. Бир ой ўтгач, Сариқамиш ва Арзиурмадаги урушда турк қўшинларидан қочган армани тўдалари ўйл-ўйлакай қуролсиз мусулмонларни ўлдиради. Улар орасида Ҳифзий ҳам бўлган.

Бу йил шоир ўлимига юз йил тўлмоқда. Атиги йигирма беш йил яшаган шаҳид шоирнинг қўллэзмалари тўпланиб, турли ўйларда нашр қилинган. Қуйида шоирнинг илк бор ўзбекчага ўғирилган шеърлари билан танишасиз. “Бечора бойқуш” марсиясини шоир ўн беш ёшида ўлган амакисининг қизи Зиёда (айрим тадқиқотчиларнинг айтишича, хотини Сўнанинг вафоти)га бағишилаган.

Таржимондан

БЕЧОРА БОЙҚУШ

*Нечун, ночор бойқуш, кезарсан бунда,
Йўқмидир ватанинг, элларинг қани?
Хафасан, саломга алиқ олмассан,
Шайдо булбул, ширин тилларинг қани?*

*Ажсал тузогини очолмасмисан?
Очиб-да ичиндан қочолмасмисан?
Озод айласалар, учолмасмисан?
Синиқми қанотинг, қўлларинг қани?*

*Тўпидан айрилса қўзи – фалокат,
Тоғларнинг қуши-қурти уни ер албат,
Қатордан айрилдинг, босдими калхат,
Турнам, қочарга ўнг-сўлларинг қани?*

* Манба: Kağızmanlı Hıfzı. Hayatı-Sanatı-Şiirleri. Haz. Sait Küçük. Ürün yay. Ankara. 2007.

Очмисан, ҳеч йўқми овқатинг, ошинг,
Үйинг қон-қоронги, йўқми оташинг,
Ҳамхонанг ҳам йўқми, қани йўлдошинг,
Эшигинга туташи йўлларинг қани?

Қора ерда кўк бинафша битарми?
Баҳор, ёзда бойқуши сайраб ўтарми?
Боғ-роққа ўрганган чўлда ётарми,
Уйғон, гариб булбул, гулларинг қани?

Бунда кўрпа, тўшак, ёстиқ бормидир?
Шундай кенг дунёда жойинг тормидир?
Ортда тоши девору олдда ёрмидир?
Яшил бошли сўнам, кўлларинг қани?

Юргандинг-ку сўлу соғларимизда,
Ёши бир кийик эдинг тоғларимизда,
Янги ниҳол эдинг боғларимизда,
Фалак бутадими, толларинг қани?

Тўйингда кўп аччиқ шарбат ичилди,
Кепинлик либосинг торми – бичилди?
Қадаб қўй тугмангни, кўксинг очилди,
Не бўлди, камарли белларинг қани?

Бормидир у қўлларингнинг хиноси?
Қорамидир кўзларингнинг биноси?
Қаридингми ўн беши йилнинг сўнграси?
Йўқмидир тоқатинг, ҳолларинг қани?

Эй, жигарим, оч эшикни, кирайин,
Хастамисан, ҳол-хотиринг сўрайин,
Сувсиз қолган бўлсанг, бир сув берайин,
Дарёлардан тошган селларинг қани?

Ёши жонингга ахир кўзлар қиярми?
Маъсум бошни тоши ёстиққа қўярми?
Бўй қиз оқ бўз кийса, шу эл қуярми?
Ўрасанг бўлмасми, шолларинг қани?

Ҳар келиб-кетганда салом берайин,
Нишибонгоҳ у тошга юзим сурайин,
Кўтар ниқобингни, юзинг кўрайин.
Мунча сарғарибсан, олларинг қани?

Ёттарсан узлатда гамсиз, қайғусиз,
Алла, болам, алла, қолма уйқусиз;
Гариб ҳам ялангоч, ҳам оч, ҳам сувсиз,
Эй, фалак фақири, молларинг қани?

Тагин сайронгоҳга чиқолмасмисан?
Чиқиб шу боғларга боқолмасмисан?
Тургизсам, оёққа қалқолмасмисан?
Тутай, менга узат, қўлларинг қани?

Сен ҳам Ҳифзий каби кечроқ уйғондинг,
Уйғондинг-да, тоши ёстиққа таяндинг,
Асли хоним мисол қоврулдинг, ёндинг,
Еллар совурдими, кулларинг қани?

МАРХУМАНИНГ ЖАВОБИ

Сендан хафамасман, амаким ўғли,
Ўлим лол айлади, тилларим йўқдир;
Эгди қоматимни, буқди белимни,
Ўрнимдан туришига ҳолларим йўқдир.

Ажал тузогини очолмас бўлдим,
Очиб-да ичиндан қочолмас бўлдим,
Озод айладилар, учолмас бўлдим,
Қанотим синикдир, қўлларим йўқдир.

Кўзийдим, айрилдим сурувларимдан,
Тоғлар қон ийғлади оҳу зоримдан,
Калхат чўқир шул қонаған еримдан,
Тўкилди парларим, жиларим йўқдир.

Заҳарга айланди овқатим, ошиим,
Ўчоғим буздилар, сўнди оташиим,
На бир кимсам қолди, на-да йўлдошиим,
Үй, мўри, эшигим, йўлларим йўқдир.

Билдиринг бойқушлар бундан кечганда,
Салом айтинг ҳар турналар учганда,
Оқ, қизил гуллар илк гунча очганда,
Менга ҳам йўллангиз, гулларим йўқдир.

Бағрим ҳасратидан том ёнар бўлди,
Қарашим жар, қўналгам тоши девор бўлди,
Шундай кенг дунёда жойим тор бўлди,
Кўниб ҳам сузолмам, кўлларим йўқдир.

Соғлиқда кезардим сўлу соғларда,
Кийикдек сакрардим қиры тоғларда,
Бутоқ ёйған ниҳол эдим боғларда,
Фалак кўп бутади, толларим йўқдир.

Тўйимда ҳам аччиқ шарбат ичилди.
Келинлик кийимим торроқ бичилди,
Вужудимда кўп яралар очилди,
Камар боғлаш учун белларим йўқдир.

Қора қошлиаримнинг ўсмаси сўлмиши,
Қора кўзларимга тупроқлар тўлмиши,
Гул рангим саргариб, заъфарон бўлмиши,
Сўнмиши ол яногим, ҳолларим йўқдир.

Хабар айланг, қушилар тутсин азасин,
Рўмолимга уя қўрсин, яйрасин;
Қўймадилар тўлдиришига кўзасин,
Ховуздан айрилдим, селларим йўқдир.

Мен келганда, элимизда ёз эди,
Этганимиз шўхлик, жилва, ноз эди,
Сарпо йиголмадим, умрим оз эди,
Кўчдим – кўйлакларим, шолларим йўқдир.

Онам мени бир қуши қилиб учирди,
Қолма, деди, боғларидан кўчирди,
Золим фалак чархда янчиб, ўчирди,
Қора кийдим, яшил, олларим йўқдир.

Ёру йўлдош мени тушиларда кўрсин,
Кўрганлар хотирим, ҳолимни сўрсин,
Йўлдан ўтган-кетган фотиха берсин,
Фалак тиланчиси, молларим йўқдир.

Бир хастаман, сайдонгоҳга чиколмам,
Чиқиб, ёрнинг йўлларига боқолмам,
Суясанг ҳам мен оёққа қалқолмам,
Узатгани нозик қўлларим йўқдир.

Мен ҳам Ҳифзий каби шошиб уйгондим,
Уйгондим-да, тоши ёстиққа таяндим,
Мисли Асли хоним қоврулдим, ёндим,
Чўл ели совурди, кулларим йўқдир.

ЧЕЧАКЛАР

Тагин ол, яшилга ерлар бўёнди,
Нақшланди минг алвонга чечаклар. Яшилланар, бутокланар, толланар,
Руҳим иришод бўлди, кўнглим қувонди, Биринча яшилланар, биринча олланар,
Биринча багишлади жонга чечаклар. Биринча ботгай қизил қонга чечаклар.

Саҳарда йиғлади, раҳмат тиланди,
Гўзал кўзларида ёш доналанди,
Кунга қараб-қараб, парвоналанди,
Оз қолди ишқимдан ёнгай чечаклар.

Базримдаги ханжармидир, ўқмидир,
Менинг дардим чечакдай кўп, чўғмидир;
Эй Тангрим, буларнинг дарди йўқмидир –
Нечун кулар бу девона чечаклар?

Саф тортмии намозга, қиём этадир,
Ел эсаркан, саждасига кетадир,
Сувсар экан, обираҳмат ютадир,
Кўзин тикар ул осмонга чечаклар.

Руҳим қизил гулдан исини олса,
Ғам эмас, тикани кўксимни юлса,
Қай замон севганим сайронга келса,
Салом айтинг у жононга, чечаклар.

Боди сабо сарин эсар боғларда,
Маст бўлар-да, солланар-да, йиғлар-да...
Теран дараларда, юксак тоғларда
Лашкар тортмии ҳар бир ёнга чечаклар.

Шўх қушлар ичинда парланар, кезар,
Хаста кўнгилларга дармонлар тузар,
Ҳар гул томиридан оқар сийму зар,
Арзир минг жавҳарга дона чечаклар.

Мусофириман, кўлкангиизда қолайин,
Ҳар япрогингизга қурбон бўлайин,
Кўйинг, бирин узиб, сотиб олайин,
Не берайин бу гулшанга, чечаклар?

Шайдо булбул гулни доим чорлайдир,
Сайрап ёниб, юрагини торлайдир,
Қаршимизда юлдуз каби порлайдир,
Айлар мени бир парвона чечаклар.

Ҳикмати ботин-ку чечакка зоҳир,
Буларнинг сиррига эмасман моҳир,
Ҳар бири қийматлиғ лаълу жавоҳир,
Ўҳшайдирлар дур, маржонга чечаклар.

Кибр этган коғирнинг иймони йитар,
Бу хор-зор тупроқда, кўр, нелар битар,
Тонар кароматни, иршодга етар –
Огоҳ эса бир лисонга чечаклар.

Ирмоқлар, сойларнинг тиник сувлари,
Күшларнинг сеҳрлик у ҳувв-ҳуввлари,
Ел билан келадир гул хушибўйлари,
Ул жаннатдан бир нишона чечаклар.

Саҳарда уйғониб, уфққа юзланди,
Гўзаллар кезинди, ўтлар изланди,
Ҳаво булутланди, қуёши гизланди,
Ярашарми бу туманга чечаклар?..

Қай бири очилмии ё гунча бўлмииш,
Бирининг дарди бор, саргайиб-сўлмииш,
Қай бири саргардон, ёт ерда қолмииш,
Айланмиишдир ёй-камонга чечаклар.

Баъзилар иссиқдан безиб, ечинмииш,
Баъзилар сояда сақланиб, тинмииш,
Баъзилар эгнига алвон кийинмииш,
Хуши келдингиз бу сайронга, чечаклар.

Кел, эй Лукмон ҳаким, каттарди яра,
Илми ҳикмат керак, бизларга қара,
Чечакдан топдилар ўлимга чора,
Арзир бири минг дармонга, чечаклар.

Ҳароратдан қизиб, сал маст бўлибдир,
Ёногига ёмғир томиб, кулибдир,
Юлдуз кўкдан ерга дув тўклибдир,
Зийнат бермииш бу жаҳонга чечаклар.

Бул биллур пиёла, қорамтиридир ул,
Қандай ярашадир савсанга сунбул,
Бириси оқарган, бири қизил гул,
Ўхшар яна кўкрайхонга чечаклар.

Бир тўпи ошиқдир, базм айлар тўлиб,
Бир тўпи курашар паҳлавон бўлиб,
Оқар сувни ичарканлар тенг бўлиб,
Раҳмат дейдир у боғбонга чечаклар.

Булар хўп очилмииш, ҳолин сўрайин,
Кўзим қиймас, сўлмай туриб терайин,
Келтириб, дастасин ёрга берайин,
Бир-биридан нозикона чечаклар.

Ишқисизлар чечакка нени ҳам айтар,
Чечакнинг хушибўйи жононинг кетар,
Кеча-кунда тинмай ииғлар, зикр этар,
Инонадир ул раҳмонга чечаклар.

Гул бўғилар золимларнинг дастида,
Ўлим ҳақдир, ажал жонлар қастида,
Дўстлар турсин мозоримнинг устида,
Топширсинглар мени санга, чечаклар

Биз ҳам сизлар каби бир гулисан эдик,
Дарди ғам сўлдиурди, зарнишон эдик,
Зотан-ку, азалдан паришин эдик,
Бадтар солди паришинга чечаклар.

Мен Ҳифзийман, сувлар каби оқарман,
Юрагимни ишқ ўтида ёқарман,
Энди бундан кейин тинмай йигларман,
Ёшим ичсин қона-қона чечаклар.

БУМИДИР

Азал сайронида, жаҳон боғида
Бошимни балога солган бумидир?
Кеча-кундуз ҳасратида ёнганим,
Ақтимни бошимдан олган бумидир?

Сўйди, баданимда қонни қурутди,
Тешиди юрагимни, ҳижрон юрутди,
Эту ёғни парча-парча эритди,
Айлаган жиссимишни талон бумидир?

Танам титрайдиру бу жоним оғрир,
Сой оқар кўзимдан кўксимга тўғри,
Ўзи малаксиймо, жамоли ўғри,
Кўз қўра, кўнглимни юлган бумидир?

Ёрга мактуб ўқир тотли тилларим,
Езув билмас, қалам туттмас қўлларим,
Зулфин тузогида қолди йўлларим,
Дардларим тубига толган бумидир?

Завқи-ҳури жсаннат, ишқи-жсаҳаннам,
Ботинимда юз минг фикру дарду ғам,
Зоҳиримда сўз ва сухбат, хайли дам,
Оташи бағримга тўлган бумидир?

Қон бўлиб оқди-ку жигар пораси,
Дори қабул қилмас ишқнинг яраси,
Луқмон келса ҳамки йўқдир чораси,
Ҳар дардимга дармон қилган бумидир?

Найлайн дунёning давлату молин,
Етар севгилимнинг ҳусни камоли,
Ҳар дам назаримда нақши жамоли,
Хаёли кўнглимда қолган бумидир?

Ҳижрон зулматида нури ниҳоним,
Зимиштон қиши ичра ёзу баҳорим,
Йиглама, сабр айла, чаими дийдорим,
Бу жонимга жонон бўлган бумидир?

Субҳу шом номингни айтиб, ҳар дамда
Йигларман, йигларман, кўзларим намда,
Муҳаббат илмида, қафаси гамда,
Ҳифзий, сени асир қилган бумидир?

ЁР, АЙЛАН-АЙЛАН

Гафлатда овимни қочирдим, ҳайҳот,
Ёт овчи эмасман, ёр, айлан-айлан.
Азалдан муҳаббат, энди айрилиқ
Айлади жонимга кор, айлан-айлан.

Яшилбош сўналар кўлларга тушиби,
Мажнун Лайло дея чўлларга тушиби,
Савдою сирримиз тилларга тушиби,
Йўқми номус ила ор, айлан-айлан.

Каршимда кўриниб, бағрим эзарсан,
Юзма-юз келгандан қочиб, безарсан,
Не дейин? Нечун сен четда кезарсан?
Билолмай, бўлдим-ку зор, айлан-айлан.

Бу агёргингни, йўқса нозмидир?
Чўлда учган ўрдак ва ё гозмидир?
Ингранар турналар, баҳор, ёзмидир?
Ёдидирдинг бошимга қор, айлан-айлан.

Ишқинг занжирини бўйнимга тақдинг,
На йўлдош бўлдинг, на ташлаб, улоқдинг;
Чарчаган кийикдек ортингга боқдинг,
Қочма, бир сўрогим бор, айлан-айлан.

Улфатим борида ширин тил эдим,
Муҳаббат фаслида бир булбул эдим,
Азал бөгимизда мен ҳам гул эдим,
Энди бўлдим тикан – хор, айлан-айлан.

На кундуз кундузим, на кечам кеча,
Хаёлинг кўнглимнинг тугунин ечар.
Ҳифзийнинг бағрига урдинг-ку ханжар,
Ҳар дараҳт бошимда дор, айлан-айлан.

Томас МАНН

(1875–1955)

ЛОТТАНИНГ ВАЙМАРДАГИ ҲАЁТИ

Роман¹

*Олмон тилидан
Янглии ЭГАМОВА
таржимаси*

ТҮРТИНЧИ БОБ

Шарлотта рўмолчасини шошилинч сумкасига тикди. Кўзларини тез-тез пирпиратди-да, қизариб кетган бурунчасини тез, енгил тортиб қўйди. У шу тариқа эшикоғанинг пайдо бўлиши билан бузилган рухий ҳолатни бартараф қилди. Энди унинг юз ифодаси ҳиссиётларининг янги босқичига тегишли, яъни жаҳли чиққанини билдирувчи белги эди.

– Магер! Яна келдингизми? – сўради у аччиқланиб. – Ахир сизни огоҳлантирган эдим-ку, мен доктор Ример билан муҳим масалани муҳокама қиласман, ҳалақит беришларини хоҳламайман деб.

Магер бу гапга эътиroz билдирса бўларди, аммо у хурмат юзасидан ўз-ўзини алдаб, баҳслашиб ўтирмади.

– Қимматли хоним! – деди у фақат, шусиз ҳам қовуштирилган қўлларини кекса аёлга томон чўзиб, – мен сизни ишонтириб айтаманки, сизга ҳалақит бермасликлари учун иложи борича ҳаракат қилдим. Жудаям афсусдаман, бироқ ортиқ нима ҳам қилолардим. Мана қирқ дақиқадан ошди, Ваймар жамиятидан келган янги меҳмон қиз сиз билан учрашиш орзусида кутиб турибди. Бу хабарни сизга етказишни ортиқ кейинга суролмадим ва жаноб докторнинг ҳамда сиз муҳтарама хонимнинг рухсат беришларингизга ишониб, кириб келавердим, шубҳасиз, бошқа улуғ, обрўли кишилар сингари ўз вақтлари ва меҳрларини ўзгалар билан бўлишишга одатланиб қолган инсонсизлар, уларни четлаб ўтмайсизлар, деб ўйладим.

Шарлотта ўрнидан турди.

– Буниси энди ортиқча, Магер, – деди у, – уч соатдан бери ёки ундан ҳам ортиқми, билмайман, устига-устак ухлаб қолибман, мени қутиб эҳтимол хавотир олиб ўтирган қариндошларимниги кетишга тараддулданаман, сиз бўлсангиз мени янги меҳмонлар учун тўхтатиб қолмоқчисиз! Бунақаси

¹ Давоми. Бошланиши ўтган сонда.

энди кетмайди. Мисс Гэзл учун жаҳлим чиқди, жаноб доктор туфайли ҳам жаҳлим чиқди, ҳар ҳолда кейин маълум бўлдики, бу ташриф ҳаддан ташқари қизиқарли кечди. Энди бўлса мени тағин тўхтатиб қолмоқчисиз! Сиз менга ҳар хил йўллар билан изҳор қилган садоқатингизга энди жиддий шубҳа қила бошладим, афтидан мени шу тахлит элга намойиш қилмоқчисиз ҷоги.

– Ардоқли хоним! – хитоб қилди Магер қизариб кетган кўзлари билан тикилиб, – сизнинг норозилигингиз юрагимни пора қилмоқда, шусиз ҳам у иккита муқаддас вазифанинг тўқнашувидан тилка-пора бўлган. Ахир машҳур меҳмонимизни номақбул ташрифлардан ҳимоя қилишни қандай қилиб муқаддас вазифа ҳисобламайин? Майли, ҳурматли хоним, мени бир умрга ўз ғазабингизга дучор қилишдан олдин бундек чамалаб кўришга рухсат берсинлар-чи, сизнинг бу ерга келганингиз ҳақидаги хабарни эшитганлари заҳоти обрў-эътиборли инсонлар сизни кўриш иштиёқида қанчалик куйиб-ёнишлари мендек одам учун муқаддас ва тушунарли бўлмай нима?

– Аввало, – деди Шарлотта унга қаттиқ тикилиб, – бу хабарни ким тарқатганини аниқлаш лозим.

– Ҳурматли хонимни ким сўрайапти? – қизиқсинди Ример ўз навбатида ўрнидан тураркан.

– Фройлайн Шопенхауер.

– Ҳм, – минғирлади доктор, – ҳурматли хоним, меҳмон ҳақида хабар келтириб, бу одам нотўғри иш қилмаган. Рухсатингиз билан айтсан, гап Адель Шопенхауер ҳақида бормоқда, у энг яхши жамиятга дахлдор, ўта зиёли қиз, кўп йиллардан бери шу ерда яшаётган, асли данциглик бадавлат бева аёл Йоҳанна Шопенхауер хонимнинг қизи. У устознинг садоқатли дўсти, ўзиям ёзиб туради, адабий салон соҳибаси, устоз ҳам, қизғин давраларда қатнашиб юрган пайтлари бу салонда кечкурунлари кўп марталаб бўлган. Икковимизнинг мулоқотимизга яхши муносабат билдириб мени хурсанд қилдингиз. Мабодо жудаям толиқмаган бўлсангиз, тағин бирозгина вақтингиз бўлса, мана шу қизгинага ҳам бир неча дақиқани бағишиласангиз, дея маслаҳат беришга журъят этган бўлардим. Шу йўл билан сиз ёш ҳиссиётли қалбга кўрсатадиган ҳимматни ҳисобга олмаган тақдиримизда ҳам, кафолат бериб айтаманки, бу учрашув сизга ёлғиз олим билан қилган мулоқотингиздан кўра шахримизнинг аҳвол-руҳияти, ўзаро муносабатлар ҳақида кўпроқ маълумот олишингизга имкон яратган бўларди. Энди олимга келсак, – жилмайиб қўшимча қилди у, – у жуда узоқ қолиб кетгани учун ўзини қоралаганча майдонни ташлаб кетади.

– Сиз жуда камтарсиз, жаноб доктор, – уни юпатди Шарлотта. – Бирга ўтказган ёқимли вақт учун сиздан миннатдорман, у менинг хотирамда ҳамиша сақланиб қолади.

– Ҳар ҳолда икки соат бўлди, – эслатди Магер, Римерга қўлини узатиётганда, Ример эса унинг қўлларига меҳр билан эгилди. – Эслатиб қўймоқчийдим, икки соат бўлди, сухбат анча чўзилди. Шу боис тушлик бироз кечиккани учун, қимматли хоним, фройлайн Шопенхауерни бошлаб киргунимга қадар енгил тамадди қилиб куч тўплаб олсалар яхши бўлармиди, деб ўйлайман, бир чашкагина қуруқ шўрва билан бисквитми ёки бир стакан виноси биланми.

– Қорним оч эмас, – деди Шарлотта, – тўғриси, кучим ҳам жойида. Саломат бўлинг, жаноб доктор! Ишонаманки, ҳали учрашамиз. Магер, сиз эса,

Худо ҳакқи, бориб анави қизгинани ҳузуримга киритинг, бироқ менинг бир неча дақиқагина вақтим қолганини айтинг – буни талаб қиласан – чунки ишни зиғирча пайсалга солиш ҳам мени кутиб қолган қадрдонларимга кечириб бўлмас зарар келтиради.

– Жуда яхши, марҳаматли хоним! Эслатиб қўйишга изн беринг: иштаҳанинг йўқлиги – овқатга талабнинг йўқлигидан эмас. Ҳурматли хоним енгил тамадди қилиб олиш ҳақидаги илтимосимни тақрорлашга рухсат этсалар эди... Эҳтимол, бу уларнинг фойдасига хизмат қилган ва ҳурматли хоним менинг дўстим, полиция сержантси Рюрихнинг илтимосига мойиллик билдирган бўлармидилар... У бир ҳамкасби билан меҳмонхонамиз олдида тартибни назорат қилиб турибди, ҳозиргина йўлакда менга учрашган эди. Унинг сўзларига қараганда, агар одамлар ҳурматли хонимга бир қур назар ташлашга мушарраф бўлишса, уларни тарқатиб юбориш осон кечармиш. Агар ардоқли хоним очик дераза орқали бир зумга ҳалққа кўриниш берсалар эди, полицияга жамоат тартибини саклашда катта ёрдам кўрсатган бўлардилар.

– Ҳеч қачон, Магер! Зинхор-базинхор кўринмайман! Бу мутлақо, мутлақо ақлга сифмайдиган таклиф! Эҳтимол, нутқ ҳам сўзлашим керакдир? Йўқ, кўринмайман, йўқ, йўқ, мен малика эмасман...

– Ундан-да ортиқсиз, қимматли хоним! Ундан ҳам ортиқроқ, улуғроқсиз. Маданиятимизнинг бугунги тараққиёти нуқтаи назаридан қарасак, одамлар подшоҳзодаларга эмас, балки маънавий ҳаётимизнинг машъалларига интилишади.

– Бўлмаган гап, Магер. Менга омманинг мақсадини тушунтирумай қўя қолинг, улардаги қизиқувчанликнинг сабабларини яхши биламан, аслида маънавият билан уларнинг заррача ҳам ишлари йўқ. Ҳаммаси қуруқ сафсата. Суҳбатим тугаса у ёқ-бу ёққа қарамасдан, чиқиб кетаман. Кўриниш бериш ҳақида сўз бўлиши ҳам мумкин эмас.

– Майли, ихтиёрингиз, қимматли хоним. Аммо салгина тамадди қилиб олсангиз ҳамма нарсага бошқача назар билан қарапмидингиз, дея эслатиб ўтиш ҳам оғир... Фройлайн Шопенҳауерни чакириб келай.

Бир неча дақиқа ёлғиз қолганидан фойдаланиб, Шарлотта дераза олдига бориб, тюль пардан қўли билан йиғди-да, ташқарига қараб, майдонда ҳеч қандай ўзгариш бўлмаганига, ҳалиям одамлар тирбанд бўлиб туришганига ишонч ҳосил қилди. Ташқарига қарагани боис боши қаттиқ қалтирай бошлиди, профессор билан бўлган ҳаяжонли суҳбатдан сўнг юzlари қизариб кетган эди. Деразадан нари ўгирилиб, кўзларини хиралаштириб юборган иссиқликни хис этиш учун кафтларини юзига қўйди. Умуман олганда, гарчи тетиклигининг бироз ўзгариб туришини эсдан чиқармаса-да, куч-кувватим жойида, деган гапи ҳозир ҳақиқатга мос келарди. Тинмай мулоқотда бўлиш ва куйиб-ёниб сўзлаш иштиёқи, шу билан бирга, бўлғуси суҳбатларни сабрсизлик билан кутиш, энг қалтис мавзуларга бориб тақаладиган одатдагига ўҳшамаган сўзамолликни жўшқин хис этиш туйғуси уни қамраб олди. У янги меҳмон учун очиладиган эшикка қизиқувчанлик билан кўз тикди.

Магер киритиб юборган Адель Шопенҳауер унга эгилиб таъзим қилганча тураверди, Шарлотта самимий қад ростлатди. Шарлоттанинг чамаси бўйича йигирма ёшлардаги навниҳол қиз айтарли чиройли бўлмаса-да, зиёлинома эди – ҳатто биринчи кўргандаёқ гоҳ киприкларини тез-тез пирпиратиб, гоҳ назарини атрофга ва тепага қаратиб, сарик-яшил

кўзларининг бироз ғилайлигини бекитишга уриниши табий тажанг фельлига ишора қиласди, катта ва тор, бироқ ёқимли табассум қилиб турган, кўринишдан маърифатли сұхбатларни қийиб юборадиган оғзи узун бурни, худди шундай узун бўйнидан, ёқимсиз диккайган қулоқларидан дикқатни четга тортарди, ғайриоддий шаклдаги похол шляпаси остидан бир нечта жингалак соchlар қулоқлари устига тушиб турарди. Қиз озғин эди. Бўйни ва ориқ елкасини ёпиб турган бурма ҳошияли, калта енгли батис кофта ичиди оппоқ текис кўкраги йўқолиб кетган эди. Ориққина қўлларидағи нафис ярим қўлқоплардан тирноқлари оппок, қуруқ, қизғиш бармоқлари чиқиб турарди. Ўша бармоқлари билан соябон тутқичидан ташқари шойи қоғозга ўралган бир нечта гул ва аллақандай пакетчани ушлаб турарди.

У жумлалар орасида тўхтаб ҳам олмасдан шу заҳотиёқ тез, бенуқсон гапиришга тушиб кетди, шу даражада бидирлардики, Шарлотта чечангина тилидан буни кутган эди. Шу аснода оғзи бироз ҳўлланиб, саксония лаҳжаси сезилиб турган сўзлар баайни мой устида сирғалиб кетаётгандек кетма-кет чиқиб келарди ва Шарлотта беихтиёр, менинг ҳам ҳаяжон билан сўзлаш истагим борлигини у ҳисобга олармикан, дея хавфсиарди.

– Марҳаматли хоним, – деди Адель, – сизга чукур хурмат-эҳтиромимни изҳор қилишим учун менга дарҳол рухсат бериб қанчалар кувонч ато этганингиздан чексиз миннатдорман, буни баён қилишга сўз тополмайман! – ҳатто нафасини ҳам ростламасдан давом этди: – Мен буни фақатгина ўз камтарона номимдан эмас, балки, – топшириғи бўйича деёлмайман, ҳали бундай топшириқ олиб улгурмадим – бизнинг музалар¹ жамиятимиз номидан билдираյпман, жамиятимиз руҳи ва бирдамлиги юракларни титратувчи воқеа, яъни сизнинг ташрифингиз муносабати билан ўзини қойилмақом тарзда оқлади – аъзоларимиздан биттаси, менинг суюкли дугонам, графиня Лина Эглоффштайн, кишига қанот бағишлийдиган бу хабарни оқсоцидан эшита солиб, менга етказди. Виждоним менга шивирлайдики, мен Музелинани, – кечиравасиз, бу Лина Эглоффштайннинг жамиятимиздаги лақаби, ҳаммамизда шунақа лақаб бор, уларни санаб берсам, роса куласиз – мен ўз режам ҳақида Линани миннатдорлик юзасидан бўлса-да, хабардор қилишим керак эди. Шубҳасиз, у менга дарҳол эргашган бўларди. Лекин, биринчидан, мен у кетгандан кейин аниқ қарорга келдим, иккинчидан, сизга ёлғиз ўзим, Ваймарга хуш келибсиз, дейиш ва сиз билан юзма-юз ўтириб гаплашиш учун етарлича асосларим бор... Хурматли хоним, мана шу уч-тўртта астра, қўнғироқгул ва петуняларни ҳамда биздаги санъаткорлар ишлаган оддийгина намунани сизга тақдим этишга рухсат берсангиз.

– Болагинам-ей, – жавоб берди Шарлотта хурсанд бўлиб, чунки Аделнинг “бедуня” деб талаффуз қилиши унинг кулгисини қистатган, “Музелина”га ҳам тегишли бўлган кулгисини энди тутиб туролмасди, – болагинам, булар жуда мафтункор. Диid билан тахланган! Бу гўзал гуллар учун сувнинг ғамини ейишимиз даркор. Қандай чиройли петунялар, – у тағин кулиб юборди, – бунақасини сираям кўрмаганман...

– Бу ер гуллар ўлкаси, – жавоб берди Адель, – Флора бизга хайриҳоҳ. – У нигоҳи билан токчадаги Флора ҳайкалига ишора қилди. – Эрфурт уруғлари бир асрдан бери жаҳонга машҳур.

– Мафтункор! – такрорлади Шарлотта. – Мана бу, “ваймарлик санъаткорлар ишлаган оддийгина намуна” деганингиз нима экан, мен кекса бўлсам-да, жуда қизиқувчанман.

¹ Муза – қадимги юон мифологиясида санъат, адабиёт ва фан илоҳаси.

— Э-ха, мен сал кўчма маънода гапирдим. Бу шунчаки бир арзимас нарса, марҳаматли хоним, буни ўзим ясаганман, оддий табрик ҳадяси. Ечишга ёрдам берайми? Тугун мана бу томонда. Қора ялтироқ қоғоздан кесиб ишланган ва оқ картонга ёпиширилган силуэт, кўраётганингиздек, гурух портрети. Бу бизнинг музалар жамиятимиз, ўзга нарса эмас, кучим етганча портрет ҳолига келтирганман. Мана ўша Музелина, Лина Эглоффштайн, у зўр қўшиқчи, валиахд маликамиз — Улуг княгинянинг севимли сарой хоними. Ёнидаги Юлия, унинг дилбар синглиси, рассом, лақаби Юлемуза. Навбатдагиси мен, Аделмуза, манави қўлини елкамга кўйиб олгани Тиллемуза, яъни Оттилия фон Погвиш — ёқимтой бошча, шундайми?

— Жуда ёқимли, — деди Шарлотта, — жуда ёқимли ва ҳаммаси беҳад ҳаётий чиққан! Маҳоратингизга қойилман, болагинам. Қандай зўр ишланган! Бу бурма ҳошиялару тугмалар, стол ва стулларнинг оёқчалари, жингалак сочлар, бурунчалар ва киприклар! Бир сўз билан айтганда, жуда ҳайратланарли. Мен азалдан силуэт санъатининг мухлисиман, унинг урфдан чиқишини ақл ва қалб учун катта йўқотиш деб ҳисоблайман. Бунда мени мислсиз табиий истеъоддининг шу даражада мукаммалликка эришишига кўмак берган чидам-бардош беҳад ҳайратга солмоқда...

— Бу юртда одам ўз истеъодини ривожлантирмоғи, аввало, унга эга бўлмоғи лозим, — жавоб берди ёш қиз, — акс ҳолда юқори давраларга йўл тополмайсан ва бир чеккада қолиб кетасан. Бу ерда ҳамма нарса музаларга хизмат қиласди, бу яхши хислат, ҳа, шундай эмасми? Болалигимданоқ меҳрибон онам мен учун энг яхши намуна бўлган, ҳали бу ёққа кўчиб келмасимиздан олдин, раҳматли отам ҳаётлик чоғларида, онам тасвирий санъат билан шуғулланарди, аммо бу истеъодини ривожлантиришни фақат шу ерда бошлади, шу билан бирга, клавикордни моҳирона чаларди ва ҳозир дунёдан ўтган санъатшунос олим, узоқ йиллар Римда яшаган Фернодан итальян тилини ўрганган эди. Менинг оддийгина шеърий машқларимга у жуда катта аҳамият берарди, гарчи ўзига, ҳар ҳолда немис тилида шеър ёзиш насиб қилмаган бўлса-да, у Петрарка услубидаги итальянча сонетни бир гал Ферно раҳбарлигига басталаган эди. Ғаройиб аёл. Ўн уч-үн тўрт ёшлик кезларимда, ҳали бу ерда томир отиб улгурмасимизданоқ, кўз очиб-юмгунча адабий салон очиб, уни маърифатли инсонлар тўпланадиган жойга айлантиргани менда кучли таассурот қолдирган эди. Агар мен силуэт ишлаш санъатида нимагадир эришган бўлсам, бунда ҳам онам менга ибрат бўлган, чунки у гулларни кесишнинг устаси эди ва ҳозир ҳам шундай, ҳатто яширин маслаҳатчининг ўzlари салондаги чойхўрликлар чогида унинг санъатидан ҳайратга тушган...

— Гётеми?

— Ҳа-да! Онам камин деворини қирқилган гуллар билан безатиб бўлгунча хотиржам ўтиrolмасди, ўзи ҳам ўта иштиёқ билан уларни ёпиширишда иштирок этарди. Ҳозир ҳам ёдимда, у безатилган девор олдида яrim соатлар унга маҳлиё бўлиб ўтирган эди...

— Гётеми?

— Ҳа-да! Бу улуғ инсоннинг ҳар қандай ясама нарсаларга, моҳирона санъат асарига, ҳар қандай турдаги маҳоратга, хулласи калом, инсон қўли билан юзага келган асарга муҳаббати юракни ҳаяжонга солади. Унинг шу хислатини билмаган одам, демак, уни умуман билмайди.

— Сиз ҳақсиз, — деди Шарлотта. — Мен унинг шу хислатини биламан, кўряпманки, у кекса Гётелигича қолибди, ёш Гётелигича демоқчи эдим.

Ўшанда, Вецларда, ёшлик чоғларимизда мен рангдор ипак иплар билан кашта тиксам, кўриб қувонар, уларга нақшлар чизишмада иштиёқ билан, берилиб ёрдам берарди. Ҳозир тугалланмай қолган мұхаббат саройи ёдимга тушди, унинг остонасида зиёратдан қайтаётган қизнинг дугонаси кутиб олади. Унинг композициясини ишлашда у фаол иштирок этган эди...

– Илоҳий сўзлар, – хитоб қилди меҳмон. – Нималар деяпсиз, қадрли хурматли хоним! Илтимос, илтимос, гапираверинг!

– Ахир тик туриб гаплашмаймиз-ку, жонгинам, – жавоб берди Шарлотта.
– Сизни ўтиришга таклиф қилишни ҳам унубтиб қўйибман, эсим қурсин, сизнинг эътиборингиз ва мана бу чиройли совғаларга хаёлим кетиб, шунча вакт тик турганимизни пайкамабман.

– Сўзсиз, ишончим комил эдики, – сўзида давом этди Адель, кекса хоним ёнидаги канапега жойлашаркан, – сизни кўриш шарафига мұяссар бўлиш учун шухратингиз чегарасини ёриб ўтганларнинг на биринчиси, на охиргисиман. Назаримда, сиз беҳад мазмундор сұхбат билан банд эдингиз-а? Шу ердан чиқиб кетаётган Ример амакини кўрдим...

– Нима, у сизнинг...

– Э, йўқ. Мен уни болалиқдан “амаки” дейман, онамнинг пайшанба ва якшанба кунларида чойхўрликларида кунда-шундалар ёки тез-тез кўриниб турадиган меҳмонларини шундай деганман, ҳозирам дейман. Мейерлар, Шютцелар, Фальклар, барон Айнзидел, таржимон Теренций, майор фон Кнебель, легацион маслаҳатчи, “Оммабоп адабий газета”нинг асосчиси Бертух, Гримм, князь Цюклер, aka-ука Шлегеллар, Савинъялар ҳаммаси мен учун амакилар ва холалар эди, ҳозир ҳам шундай. Ҳатто Виландни ҳам “амаки” деб чақираман.

– Гётени ҳам шундай дейсизми?

– Уни бундай демайман. Лекин яширин маслаҳатчи хонимини “хола” деярдим.

– Вульпуисними?

– Ҳа, марҳума фон Гёте хонимни, Гёте никоҳдан ўтганларидан кейиноқ уни онамнинг салонига бошлаб келган эди, бошқа уйларга бошлаб бориши қийинчилик туғдирган эди. Ҳатто айтиш мумкинки, улуг инсон бизникидан бошқа жойларда жуда кам бўларди, чунки унинг марҳума билан никоҳсиз яшаганига ижирғаниб қараган сарой ва асилзодалар давраси қонуний никоҳдан ўтганини кечиролмасди.

– Баронесса фон Штайн-чи, – сўради Шарлотта ва ёноқларига андак кизиллик югурди, – у ҳам норози эдими?

– Ҳаммадан кўп ўша норози бўлди. Ҳар ҳолда у муносабатларнинг ошкор бўлганлиги учун ўзини хафа бўлгандек кўрсатса-да, аслида, буларнинг муносабатидан азалдан изтироб чекарди.

– Унинг аҳволини тушунса бўлади.

– Ҳа, албатта. Бироқ, масалага бошқа томондан ёндашсак, буюк инсон шўрлик аёлни ўзининг қонуний хотинига айлантириб хайрли иш қилди-ку. Ўша йилги даҳшатли француз юришлари кунларини бу аёл унинг ёнида туриб матонат ва садоқат билан бошдан кечирди ва шундай оғир синовлардан биргаликда ўтгач, икковлари Яратганинг олдида ҳам, одамлар олдида ҳам бирга қолишини у афзал кўрди.

– Ўша аёлнинг феъл-атвори унчалик эмас, дейишади, шу ростми?

– Ҳа, у беадаб эди, – деди Адель. – De mortuis nil nisi bene¹, беадаблиги ҳаддан ташқари эди, баднафс, семиз, мудом ёноклари қип-қизил, рақсга муккасидан кетган, меъеридан ортиқ ичар, ёши ўтиб қолган бўлса ҳам актёрлар, ёш йигитлар билан улфатчилик қиласарди; маскарадлар, кечки овқатлар, чанада учишларнинг поёни йўқ эди, талабаларнинг балларида йеналик йигитлар яширин маслаҳатчининг хонимиға хушомад қилган ҳоллар ҳам бўлган.

– Гёте бунақа ахволга чидаб туармиди?

– У буларни кўрмасликка оларди, ҳатто кулиб кўя қоларди. Айтиш мумкинки, маълум маънода ўзи хотинининг бебош ҳаётига эрк бериб юборган эди, менимча, бунинг сабаби, у ҳам ўз ҳисларига ўзи эгалик қилиш хукукини қўлда сақлаб қолишни ўйлаган. Даҳо шоир ижодий илҳомни фақатгина эр-хотинлик ҳаётидан ололмайди.

– Сиз жуда кенг, жуда эркин дунёкарашга эгасиз, болагинам.

– Мен ваймарликман, – деди Адель, – Амур²га бизда эътибор катта, хулқ-атворни ҳурмат қилган ҳолда унга кенг хукуклар берилган. Таъкидлаш лозимки, бизнинг жамиятимиз яширин маслаҳатчи хонимининг кўполроқ хушчақчақлигини ахлоқий томондан эмас, балки эстетик нуқтаи назардан қоралади. Аммо, ҳаққоний бўлишни истаган ҳар қандай одам, у юксак мартабали эрига ўзига хос намунали хотин бўлганлигини, унинг соғлиги учун ҳамиша куйиб-пишиб юрганлигини инкор қилолмайди, негаки соғлигига шоирнинг ўзи ҳам бефарқ бўлмаган, гарчи аёли, тўғрисини айтганда, унинг асарларидан ҳеч вақони, ҳатто битта сўзни ҳам тушунмаса-да, ижод қилиши учун энг яхши шароитларни яратган. Рухий-маънавий олам унинг учун тошёнфоқ эди, бироқ бунинг инсоният учун зарурлигини жуда яхши тушунарди. Шуниси борки, уйлангандан кейин ҳам бўйдоклик давридаги одатларини тарк этмади, вақтининг асосий қисмини Йена, Карлсбад, Теплицда ўтказарди, у ўзи учун яшарди. Аммо шу йилнинг июнида хотини бегона қаровчи аёл қўлида акашақдан вафот этганида, унинг ўзи ҳам ўша куни касал бўлиб, тўшакка михланиб ётган – у кўпдан бери тўсатдан касал бўлиб қолаверарди – хотини эса, ғайриахлоқий, жирканч ҳаётнинг тимсолига айланган эди... Бироқ у жон таслим қилган чоғда, айтишларича, Гёте унинг устига ўзини отиб: “Йўқ, йўқ, мени ташлаб кетолмайсан!”, деб дод солган экан.

Шарлотта жим эди, унинг сухбатдоши бўлса, асилзодаларга хос тарбия сухбатда тўхтаб қолишга йўл бермаслиги боис яна бидирлашда давом этди.

– Нима бўлганда ҳам, – деди у, – бу ердаги юкори даврадагилар орасида фақат менинг онам ақлли иш қиласарди: уни салонида қабул қилар ва ўта хушмуомалалик билан ноқулай ҳолатлардан олиб чиқарди. Шу йўл билан онам улуғ инсонни янгигина салонига маҳкамроқ боғлади, негаки у салон учун асосий фигура эди, шубҳасиз. Вульпиусни “хола” деб чақиришни ҳам онам ўргатди. Гётени сира “амаки” деб чақирмаганман. Бу қовушмайди. У эса мени яхши қўрар ва мен билан ўйнарди. Йўлини ёритиб келган фонарини ўчириб қўйсам ранжимасди, ўйинчоқларимни титкиларди, бир куни энг яхши кўрган қўғирчоғим билан рақс тушди. Шунга қарамасдан, мен уни “амаки” деёлмадим – бунинг учун у беҳад юксак эҳтиромга лойик инсон эди, нафақат мен учун, балки катталар учун ҳам, мен буни қўриб-

¹ Марҳумлар ҳақида гапирма ёки яхши гапни гапир (лот.).

² Амур – қадимги Рим мифологиясида ўқ-ёй билан қуролланган қанотли бола қиёфасидаги севги худоси.

билиб туардим. Чунки гоҳида унинг кайфияти бўлмай, столда жимгина ўтириб, расм чизганча салонда етакчилик қиласди, негаки ҳамма одамлар ва ҳамма нарса унга мослаштирилган эди, у одамларга зулм ўтказарди, зулмкор бўлгани учун шундай қилмасди, балки уни мажбурлаб зулмкор бўлишга олиб келишган эди. У шу ролга кирап, столга муштлаб хукмонлик қилас, гоҳ ундан, гоҳ бундай буйруқ берар, шотланд балладаларини ўқир ва аёллар нақаротига хор бўлиб қўшилсин, деб талаб қиласди, кулиб юборганинг шўри қурирди, бундай ҳолларда у кўзларини ялтиратиб: “Ўқишни бас қиласман!”, деярди, онам бўлса вазиятни изга тушириш учун олдиндан яхши тартиб-интизомни таъминлаб қўярди. Кутилмагандан бирорта қўрқоқ хонимни шарпалар ҳақидаги ҳикояни айтиб қўрқитишни қўнгли тусаб қоларди. Умуман, у бирорларни масҳаралашни хуш кўрарди. Эсимда бор, бир куни кечкурун тинмай гапини рад қиласвериб кекса Виланд амакини жонидан тўйғизиб юборди, ўз фикрини ҳимоя қилиб эмас, балки ҳазил тариқасида; Виланд буни жиддий қабул қилиб, роса аччиқланди. Гётенинг хушомадгўйлари, Мейер билан Ример, гўё илтифот кўрсатган бўлиб: “Хурматли Виланд, буни кўнглингизга олмант”, деб уни юпатган бўлишди. Бу қилиқ яхши эмас эди; мен ёшгина қизалоқ буни сездим, менимча, ҳамма сезди, таажжубки, Гётенинг ўзи сезмади.

– Ха, бу ғалати ҳол.

– Менда кўпдан бери шундай таассурот пайдо бўлганки, – сўзида давом этди Адель, – жамият, хусусан, немислар жамияти, ўз устунлигини суиистеъмол қилиб, бўйсундиришга ўргатиш орқали хўжайнлари ва яқин кишиларини ўзи бузади, бу ҳар иккала томонга ҳам қувонч олиб келмайди. Бир куни Гёте бутун кун давомида одамларни қийнаб, аччиқ ичакдай чўзилган ҳазили билан уларни тамоман ҳолдан тойдирди: у ҳозиргина репитиция қилдириб келган, ҳали ҳеч кимга маълум бўлмаган янги пъесанинг мазмунини айрим реквизитлар асосида айтиб беришга уларни мажбур қилди. Бу номаълумликларга тўлиб-тошган қийин вазифа эди, ҳеч ким жўяли бир гап айттолмади, ҳамманинг юзи осилиб, ҳомуза тортишлар бошланиб кетди. Бироқ у бас қилай демас, одамларни диққатпазлик билан қийнашда давом этарди, шунда беихтиёр: наҳотки у одамларга зулм ўтказаётганини ўзи сезмаса, деб ўз-ўзингдан сўрайсан. Йўқ, у буни ҳис этмасди, одамлар уни шунга ўргатиб, ҳис этмайдиган қилиб қўйишган эди. Ахир ҳайрон қоласан киши, наҳотки шундай шафқатсиз ўйин ўзини ҳам безор қиласа? Зулмкорлик, шубҳасиз, беҳад зерикарли машғулот.

– Сиз ҳақсиз, болагинам.

– Менимча, – қўшиб кўйди Адель, – у золим бўлиб эмас, балки инсониятга дўст бўлиб туғилган. Унинг одамларни яхши кўришини, уларни кулдиришга усталигини кўриб мен шу холосага келдим. Бундай хислатли киши золим бўлолмайди, албатта. Буни у овоз чиқариб ўқиш билан ҳам, ҳар хил қизиқарли воқеаларни ҳикоя қилиш, нарсалар ва одамларни кулгили қилиб тасвирлаш билан ҳам исбот қилган. Овоз чиқариб ўқиши ҳамиша ҳам зўр эмас, буни ҳамма билади. Сўзсиз, ҳамма унинг хушоҳанг теран овозини жон деб тинглайди ва ҳаяжонли юзига қувонч билан бокади. Жиддий саҳналарда у эҳтиросга, баландпарвоз декламацияга ўта берилиб кетади, бу ҳамиша ҳам қулоқقا ёқавермайди. Кулгили ҳолатларни, аксинча, шу қадар кучли юмор билан табиий қилиб берадики, барча тингловчиларнинг бошлари кўкка етади. Кувноқ латифалар айтиб берса ёки шунчаки

бекорчи олди-қочди нарсалардан гап сотса, ҳамма меҳмонлар кулавериб думалаб қолишиди. Бир нарса диққатни тортади: унинг ҳамма асарларида характерларга хос босиқлик ва назокат етакчилик қиласи, улар ахён-ахёнда жилмайишга сабаб бўлиши мумкин, фақат қулишга эмас, мен бунақасини эслолмайман. У ўйлаб топган сафсаталардан одамлар қотиб-қотиб қулишгани унга ҳамма нарсадан ортиқроқ ёқади. Бир гал ўзим гувоҳ бўлганман, Виланд амаки бошини салфетка билан ёпиб, бас қилишини илтимос қилган, чунки ортиқ чидолмай қолган, бошқалар ҳам кулавериб ичаклари узилаётган эди. Ўзи эса бундай вазиятларда маълум жиддийликни сақлаб туради, унда ўзига хос одат бор эди: кулавериб ҳолдан тойган тингловчиларни кўзларини ийтиллатиб, завқли қизиқувчанлик билан кузатиб ўтиришни хуш кўрарди. Кўпинча ўйлаб қоламан, буни қандай тушунса бўлади, нега шундай кучли, кўп нарсаларни бошдан кечирган, шунча асарларни яратган инсон одамларни шу даражада қотиб-қотиб қулишга мажбур қиласи.

– Афтидан, бунинг сабаби шундаки, – деди Шарлотта, – у ўз улуғлиги билан бир вақтда ёшлигича қолган ва ҳаётидаги оғир синовларда ҳам кулгига садоқатни сақлаган, мен бундан ҳайрон қолмайман, буни қадрлайман. Ёшлик чоғимизда икковлашиб, учовлашиб тинмай қулишардик, гоҳида унинг кайфияти тушиб, хафақон бўлиб қолса, дарҳол ўзини кўлга оларди ва ҳаммасини ҳазилга айлантириб, турфа қилиқлари билан худди онангизнинг меҳмонларини кулдирганидек бизни кулдираради.

– О-о, гапираверинг, қимматли хоним! – ўтиндиди ёш қиз. – Икковларинг, учовларинг бошдан кечирган ўчмас кунлар ҳақида менга айтиб беринг! Нималар қиляпман, мен аҳмоқина? Кимнинг ёнига бораётганимни, кимга ичимдагини тўкиб солишга қайноқ иштиёқ сезганимни билардим. Энди эса, буни бирданига унутдим ва манави мен ўтирган канапе ёнидаги одам ким эканлигини сизнинг сўзларингиз ёдимга солди, ҳатто кўрқиб кетдим. О, гапиринг, ўша кунлар ҳақида гапиринг! Ўтинаман сиздан!

– Сизни тинглаш мен учун ёқимлироқ, азизам, – деди Шарлотта, – сиз шу қадар мафтункорлик билан мени ром этдингизки, сизни узоқ вақт куттириб қўйганим учун ўзимни тинмай койияпман, сабр-бардошингиз учун яна бир бора ташаккур изхор қиласи.

– О-о, менинг сабр-тоқатимга келсак... Мен сиздек буюк аёлни тезроқ кўриш ва сизга қалбимни очиш учун сабрсизликдан куйиб ёндим, бу мақтовга арзимайди, менимча, ахир мен сабрсизлик учун сабр қилдим-да. Маънавийлик – одатда, эҳтиросдан яралган бўлади, санъатни эса, назаримда, сабр ва сабрсизликнинг юксак мактаби деб қарамоқ жоиз.

– Эҳ қандай гўзал фикр, болагинам! Зўр ареғчи¹! Кўряпман, сиздаги талантлар қаторида фалсафий қобилият ҳам анчагина етакчилик қиласкан.

– Мен ваймарликман, – тақрорлади Адель, – биз буни ҳаводан илиб оламиз. Агар одам Парижда ўн йил яшагандан сўнг француза гапира бошласа, бунинг хеч бир ҳайрон қоладиган жойи йўқ, шундайми? Умуман, бизнинг музалар жамиятимиз фалсафа ва танқидга шеъриятдан кам эътибор қаратмайди. Биз нафақат бир-биримизга шеърларимизни ўқиймиз, балки ўқиган илмий нарсаларни, яъни илгариги таъbir бўйича “ақлий”, ҳозирги таъbir бўйича “руҳий” маҳсулларни таҳлил ва муҳокама қиласиз. Фақат йиғилишларимиз ҳақида ҳурматли яширин маслаҳатчи хеч нарса билмаслигини истаймиз.

¹ Чуқур маъноли хулоса (фр.).

– Ҳеч нарса билмасин? Нега?

– Бунинг сабаблари кўп. Аввало, у интеллектуал аёл зотига нисбатан истеҳзо билан қарайди, бизнинг дилимизга бехад ёқадиган машғулотларимиз устидан кулмасин, деб қўрқамиз-да. Қаранг энди, шундай улуғ инсон бизнинг жинсимизга нотўғри муносабатда бўлади, деб ўйлаш кулгили, албатта, бу фикрни рад қилиш қийин бўлмасди. Барibir, унинг аёлларга муносабатида аллақандай беписандлик, ҳатто айтиш мумкинки, кўполлик – эркакларга хос зўравонлик борки, бу бизнинг олий нукталарга – шеъриятга, маънавиятга интилишишимизни бўғишга ва биз учун қимматли бўлган нарсаларни мазах қилишга тайёр туради. Ҳозир бу ерга тўғри келадими-йўқми, бир воқеа ёдимга тушди, бир куни бир неча қизлар ўтлоқда гул териб юришганини кўриб, уларни сентиментал эчкиларга ўхшатган. Галати ўхшатиш, тўғрими?

– Унчалик эмас, – жавоб берди Шарлотта кулиб. – Ўзимни кулгидан тўхтатолмадим, – изоҳ берди у, – чунки бу бироз қўйол туюлса-да, нишонга тегадиган ўхшатиш. Ҳар ҳолда одам унчалик қаттиққўл бўлмаслиги керак.

– Нишонга тегадиган? – деди Адель. – Ҳамма гап шунда-да. Бу ўхшатишда ғоят кўнгилсиз нимадир бор. Энди мен сайд қилиб юрганимда баҳор чечакларидан уч-тўрттани узиб, бағримга босиш учун эгилсан бўлди, ўз-ўзимга сентиментал эчки бўлиб туюламан ёки ўзимнингми, бирорнингми шеърини альбомимга кўчириб ёзаётганимда ҳам шунақа ҳолатга тушаман.

– Сиз буни юрагингизга жудаям яқин олманг. Ҳўш, қандай сабабларга кўра Гёте дугоналарингизнинг эстетик қизиқишилари ҳакида билмаслиги керак?

– Қимматли хоним, биринчи ақидага мувофиқ...

– Бу нима деганингиз?

– Бу дегани, – деди Адель, – “Сенда мендан ўзга Худо бўлмаслиги керак”. Мухтарама хоним, биз яна жабр-зулм мавзусига қайтамиз, бу энди жамият томонидан зўрлаб жорий қилинган зулм эмас, балки табиий, ҳамиша мислсиз буюкликнинг ажралмас бўллаги бўлган, унга бўйсунишга ҳаракат қилмасдан, фақат авайлаш ва хурмат қилиш лозим бўлган зулм. У буюк инсон, аммо кексайиб қолган, ўзидан кейин нима бўлиши билан қизиқмайди. Лекин ҳаёт олдинга силжияпти, ҳатто буюклик олдида ҳам тўхтамаяпти, бизлар, Музелина-ю Юлемузалар, янги давр фарзандлари, янги авлодмиз, зинҳор сентиментал эчкилар эмасмиз, ўз давримиз ва ўз дидимизни ҳимоя қила оламиз. Биз Корнелиус, Овербек сингари диёнатли рассомларни биламиш ва хурмат қиласиз; уларнинг картиналарига яхшиси тўппончадан ўқ узган маъқул, деганини ўз қулогим билан эшитганман, шунингдек, илоҳий Давид Каспар Фридрихнинг картиналарини, унинг фикрича, оёғини осмондан келтириб кўриш лозим эмиш. “Бу кўкатлар ўсмайди!”, дея гулдуради у, – чинакам золимона гулдурак, нимаям деймиз, аммо биз ўз музалар жамиятимизда ҳар қандай қўрқувларни четга суриб қўйиб, альбомларимизга Уланд шеърларини қўчириб ёзамиз ва бир-бирилизга Хоффманнинг ажойиб-гаройиб ҳикояларини мароқ билан ўқиб берамиз.

– Мен бу муаллифларни билмайман, – деди Шарлотта совуқина қилиб.

– Ҳар қалай, улар қанчалик ажойиб-гаройиб ёзишмасин, “Вертер” муаллифига тенглаша олишади, демоқчи эмасдирсиз?

– Улар унга тенглаша олишмайди, – эътиroz билдири Адель, – шунга қарамай – бундай парадоксни маъзур туting! – улар ундан кўра афзалроқ, эҳтимол, шунинг учунки, улар кейинроқ пайдо бўлишди, янги босқич вақиллари, чунки улар бизга яқинроқ, суюклироқ, амона ҳайбат билан янги даврга бостириб кирган буюкларнинг қотиб қолган чўққисидан кўра янги, юракка яқин гапларни бизга сингдиришади. Илтимос, буни ҳурматсизликка йўйманг! Бундай муносабат давр билан боғлиқ, негаки у эскилиқдан воз кечиб, янгиликни юзага келтиради. Албатта, у каттадан кейин кичкинага йўл очади. Бироқ бу кичиклар, яъни бизга тегишли бўлган ва бизнинг қалбимиз, онгу шууримиздан ўчмайдиган барҳаёт замондошлар ҳам вақти келиб ўз қадрини йўқотиб, ўрнини янгиларга бўшатиб берадиганлар даври ва унинг фарзандларига бирдек хосдир.

Шарлотта ҳалиям жим эди.

– Оилангизнинг келиб чиқиши, фрайлайн, – деди у тутилиб, бироз сохта самимият билан, – эшишишмга қараганда, Данцигдан бўлса керак, шундайми?

– Тўппа-тўгри, қимматли хоним. Она томондан шундай, ота томондан сал нисбий. Марҳум отамнинг бобоси, бадавлат савдогар, Данцигда туриб қолган, умуман Шопенхауерларнинг келиб чиқиши ҳолландлардан, агар отамнинг ихтиёрида бўлса эди, унинг аждодлари инглизлар бўларди, чунки у бошдан-оёқ жентльмен, инглизларга хос барча одатларнинг ашаддий тарафдори ва қадрловчиси эди, ҳатто унинг Оливадаги боғ-уйи инглиз услугида курилган ва ясатилган эди.

– Бизнинг уруғимиз, яъни Буффларнинг келиб чиқишини, – гапга аралашди Шарлотта, – инглизлардан дейишади. Тўгри, бунга тегишли далилларни тополмадим, ҳар ҳолда, аниқ сабабларга кўра, оиласиз шажараси билан тиришиб шуғулландим, генеологияни ўргандим, унча-мунча қизиқарли маълумотларни тўпладим, буларнинг ҳаммасини садоқатли Ҳанс Христианимнинг вафотидан кейин қилдим, чунки бу пайтда бунақа изланишларга вакт бор эди.

Аделнинг юзи бир зум ифодасиз қолди, негаки у “аниқ сабабларга кўра” сўзларининг бу масалага алоқасини дарҳол тушуниб етмади. Кейин бирдан миясига урди-да, хитоб қилди:

– О-о, сизнинг бу харакатларингиз қандай аҳамиятли, қандай диққатга сазовор! Келажак авлод учун қандай масъулият билан ишляпсиз, шубҳасиз, авлодлар инсоният қалби учун ғоятда аҳамиятли, тақдир кулиб боқкан инсоннинг келиб чиқиши, оиласиз шажараси хусусида аниқ маълумотларга эга бўлишни истайди.

– Мен ҳам шунинг харакатидаман-да, – деди Шарлотта ғурур билан, – хабарим бор, ҳозирги кунлардаёқ фан менинг келиб чиқишим билан қизиқмоқда, қўлимдан келганча уларга кўмаклашишни ўз бурчим деб биламан. Уруғимизнинг ўттиз йиллик уруш давридаги тармоғини аниқлашга муваффақ бўлдим. 1580 йилдан то 1650 йилгача Буцбахда бекат назоратчиси Симон Ҳайнрих Буфф яшаган экан. Унинг ўғли новвой бўлган. Бунинг ўғилларидан бири, Ҳайнрих капеллан¹ бўлган, бирмунча вактдан кейин Мюнценбургда викарий² даражасига етган, шундан бошлаб Буффлар асосан диний ишлар билан машғул бўлишган ва Кренфельд, Штайнбах,

¹ Капеллан – католикларда хонаки черков руҳонийси.

² Викарий – католик черковида поп ёки епископ ёрдамчisi.

Виндхаузен, Райхельсхайм, Гладербах ҳамда Нидервальштадтда округ консисторий¹ларида хизмат қилишган.

– Булар мұхим, бебақо, олий даражадаги қизиқ маълумотлар, – деди Адель бир нафас билан.

– Адабий ҳаётдаги у қадар эътиборга молик бўлмаган nouveautés² сизни унчалик қизиқтирмаса-да, – жавоб берди Шарлотта, – мендаги маълумотлар дикқатингизни тортишига ишонгандим. Туғилган кунимга тегишли битта хатоликни йўл-йўлакай тўғрилашга эришдим: ҳамиша менинг туғилган кунимни ўн биринчи январда нишонлардик, Гёте ҳам шунга риоя қиласди, эҳтимол, ҳозир ҳам шундай қиласди. Бироқ аслида мен ўн учинчи январда туғилган ва эртасига чўқинтирилган эканман, бу Вецлардаги черков китобида аниқ қайд этилган.

– Кўлдан келадиган ҳамма нарсани қилиш керак, – деди Адель, – мана шу масалага оид ҳақиқатни ошкор қилиш учун бор имкониятимни сарфлайман. Аввало, яширин маслаҳатчини бундан хабардор қилиш лозим, бунга сизнинг ташрифингиз яхшигина йўл очиши мумкин. Айтинг-чи, анави қизлик қўлларингиз билан, ўша ўчмас кунларда унинг нигоҳи остида тиккан кашталарингиз, битмай қолган муҳаббат қасри сингари эсадалик буюмлар нима бўлди, Худо ҳаққи, улар ҳалиям борми? Афсуски, биз суҳбатдан четга чиқиб кетдик.

– Улар мавжуд, – жавоб берди Шарлотта, – аслида арзимас бўлган бу буюмларни сақлаб қўйишга ўзим ғамхўрлик қилдим. Уларни укам Георгнинг қарамоғига топширдим, у раҳматли отам ҳали ҳаётлигигидаёқ амтман лавозимини эгаллаган ва Немис диний жамоаси уйида унинг вориси бўлган эди. Менинг илтимосим билан бу сувенирларни у сақлаб қўйган: битмай қолган қаср, гулчамбарга тикилган бир-иккита ҳикматли гаплар, майда мунҷоқ қадаб тикилган бир нечта ҳамён, расм альбомига ўхшаш майда-чуйдалар. Шу нарсалар, бутун уй, ҳовли, икковимиз кўпинча бирга ўтирадиган пастдаги емакхона, деразаси кўчага қараган, девордаги гулқоғозларида мажусийларнинг худолари расми туширилган, биз “ҳашамдор хона” деб атайдиган бурчакдаги хона, унинг деворига илинган, циферблатида табиат манзараси акс этган қадимий курант, – унинг чиқ-чиқи ва занг уришини у кўпинча тинглаб ўтиради, – келажакда музей ашёлари қимматини олади, деган фикр билан ҳисоблашгинг келади кишининг. Ана шу хона, емакхонага нисбатан музей учун кўпроқ тўғри келади, агар менинг фикрим эътиборга олинса, бу эсадалик буюмлар рамкали шиша остида сақланади.

– Келгуси авлод, – ғурур билан деди Адель, – бутун келгуси авлод, нафақат ватандошлар, балки чет эллик зиёратчилар ҳам сизнинг бу ғамхўрлигингиз учун миннатдор бўлишади.

– Үмид қиласман, – деди Шарлотта.

Суҳбат узилиб қолди. Меҳмоннинг билимдонларча сўзамоллиги афтидан ниҳоясига етди. Адель соябонининг учи билан полга чизиб ўтирган жойга тикилиб қолди, Шарлотта уни энди туриб кетса керак, деб ўйлади-ю, аммо суҳбатни кўпроқ давом эттиришни хоҳларди. Қиз аввалгидек ҳаяжон билан гап бошлаганидан у ҳатто мамнун бўлди.

– Қимматли хоним, ёки энди сизни, муҳтарама дугона, деб атайверайми? Юрагим менга қаттиқ таъна қилмокда, бу таъналардан энг аччиғи шуки, мен сизнинг даврингиз тортиқ қилган нарсаларни ғоятда бепарво қабул

¹ Консисторий – католик черковида папа раислигидаги кардиналлар кенгаси.

² Янгиликлар (фр.).

қиляпман, бундан ҳам аччикроғи – мен бу ҳадядан ёмон фойдаланаяпман, имкониятни жинояткорона қўлдан чиқариб юбораяпман. Бир ҳалқ эртаги беихтиёр ёдимга тушаяпти – биз немис ёшлари ҳалқ эртакларининг сехрига беҳад шайдомиз – бир одамга сехр йўли билан учта эзгу истагини амалга оширишга йўл очилганда, у ҳар учала гал ҳам энг муқаддас, энг муҳимларини эслолмайди-да, арзимас, беҳуда тилакларни айтади. Шунга ўхшаб мен ҳам бўлар-бўлмас нарсалар ҳақида валдираб, юрагимнинг тубида ётган энг эзгу истакни – тан олишга рухсат этинг – сизнинг ҳузурингизга мени етаклаб келган нарсани хаёлдан қочирдим, чунки сизнинг маслаҳатингизга, кўмагингизга ишониб, умид боғлаб келганман. Музалар жамиятилизнинг болаларча ташвишлари билан сизни банд қилишга журъат этганим учун ҳайрон бўлишингиз, мендан ранжишингиз мумкин. Агар мен сизга тўкиб солмоқчи бўлган кўркув ва ташвиш бўлмаганида эди, бундай журъатга ботинолмасдим.

– Бу қанақа ташвиш, болагинам, ким ёки нима сизни ташвишлантиряпти?

– Мен учун қимматли инсон қалби, ҳурматли хоним, суюкли дугонам, менинг ягонам, бебаҳоим, энг дилбар, энг асиљ, баҳтли бўлишга энг муносаб хилқат, ноҳақлик тўрига ўралган, ҳеч бир кераги йўқ, аммо афтидан бартараф қилиб бўлмайдиган қисмат чизифига тушиб қолган қиз, бир сўз билан айтганда: Тиллемуза.

– Тиллемуза?

– Кечирасиз, бу жондек дугонамнинг лақаби. Олдин ҳам у ҳақда эслатган эдим – Оттилия фон Погвиш.

– Ҳа-а. Фройлайн фон Погвишни қанақа қисмат тўри ўраб олган дейсиз?

– Уни ҳадемай унаштиришади.

– Хўш... Ким билан унаштиришади, айтоласизми?

– Камерал маслаҳатчи жаноб фон Гёте билан.

– Нималар деяпсиз? Август биланми?

– Ҳа, даҳо ва Вульпиус хонимнинг ўғли билан. Яширин маслаҳатчи хонимининг вафоти бу никоҳга йўл очди, у ҳаёт бўлганида Оттилиянинг оила аъзолари ва юқори давралар бунга йўл қўймаган бўларди.

– Бу никоҳнинг хавфлилиги нимада деб ўйлайсиз?

– Бу ҳақда маълумот беришга имкон беринг, – ўтинди Адель. – Сизга сўзлаб, тўлиб кетган юрагимни бўшатишга, йўлини йўқотган, суюкли хилқат учун сиздан йўл-йўриқ сўрашга изн беринг, гарчи у шундай кўмакка муҳтож ва лойик бўлса-да, менинг бу ғамхўрлигимдан аччиғи чиқкан бўларди.

Шундай қилиб, кўзининг ғилайлигини яшириш учун назарини тез-тез шифтга қаратганча, фройлайн Шопенхауер катта, кенг оғзининг четлари бироз намланиб, қуйидагиларни ҳикоя қилишга тушди.

БЕШИНЧИ БОБ

Аделнинг ҳикояси

Менинг Оттилиям ота томондан ҳолштайн-прусс офицери оиласидан келиб чиқкан. Онасининг, асли Ҳенкель фон Доннерсмак, жаноб фон Погвиш билан никоҳи қалбларнинг иттифоқи бўлиб, афсуски, унда ақл иштирок

этмаган эди. Ҳар ҳолда бу Оттилияниң бувиси, ўтган асрнинг ашаддий зодагони графиня Ҳенкелнинг фикри эди: у ақли расо, қатъиятли, ҳеч қаочон бўш келмайдиган, тили заҳар, бекорчи гапларга ўрин қолдирмайдиган аёл эди. У қизининг яхши бўлса-да, бироқ бемулоҳаза ташлаган қадамига бир умр норози бўлди. Жаноб фон Погвиш камбағал эди, унинг бир тармоғи бўлган Ҳенкеллар ҳам бундан аъло эмас эдилар. Шу сабаб бўлиб графиня Йена жангидан икки йил олдин валиаҳд шахзодамизнинг рафиқаси, шарқлик малика хизматига, уй муаллимаси бўлиб ишга кирди. У қизи учун ҳам худди шундай лавозимни топишга ҳаракат қилди ва бунга деярли эришди ҳам, шу билан бирга, борган сари ўсаётган моддий етишмовчилик дастидан қизининг баҳти мана-мана инқирозга юз тутай деб турганлигидан ўзига ёқмаган ушбу никоҳни бекор қилиш учун ҳам жон-жаҳди билан тиришди. Прусс зобитининг арзимас маоши уларнинг ўз мартабалари даражасида турмуш кечиришларига камлик қиласди. Лоақал бир амаллаб бўлса-да, оёққа туришга уринишлари пулга бўлган янада каттароқ эҳтиёжларни келтириб чиқарди. Хуллас, эр-хотинлар орасида тез-тез бўлиб турган жанжаллар она режаларининг тантана қилишига йўл очди: иккала томоннинг ҳам розилигига кўра дастлаб суд аралашувисиз ажрашишга қарор қилишди.

Иккита гулдек қизалоқлари, Оттилия ва унинг сингилчаси Ульрикани ўзидек баҳтсиз турмуш ўртоғи қўлида қолдирган эрнинг, отанинг кўнглига бир кур назар ташлайдиган одам топилмади. Эҳтимол, унинг бундай аянчли қарорга келишига севимли, ягона отамерос лавозими – ҳарбий хизматдан айрилиб қолишдан кўрққани сабаб бўлгандир. Хотини бўлса қон қақшади, ҳеч бир муболагасиз айтиш мумкинки, зарурият олдида енгилган лаҳзаларидан бошлаб у бирор зум баҳтли яшамади. Кизларга келсак, гўзал, олийжаноб оталарининг тимсоли уларнинг қалбида бир умрга муҳрланиб қолди, айниқса, ўта таъсирчан, романтик қалбли каттаси, Оттилияниң бутун туйғулар олами, атрофда кечётган воқеалар, давр ғояларига бутун муносабати, – ҳали булар ҳақида ҳикоям давомида билиб оласиз, – ғойиб бўлган отаси ҳақидаги хотиралари билан белгиланади.

Фон Погвиш хоним эри билан ажрашгандан сўнг бир неча йил танҳоликда, ҳеч кимга қўшилмай Дессауда яшади, у ерда у тушкунлик ва шармандали кунлар – Буюк Фридрих армиясининг мағлубияти, Ватан инқирози, жанубий ва ғарбий немис князликларининг ёвуз корсиқалик кўлига ўтиши сингари воқеаларнинг гувоҳи бўлди. 1809 йилда, ниҳоят кекса графиня унга ваъда берган саройдаги лавозимни елиб-югурибundiришга муваффақ бўлгач, у Ваймарга кўчиб келиб, херцогиня Луиза хизматига ишга жойлашди.

Оттилия ўша пайтда ўн уч ёшлардаги, ўзига хос мафтункор қиз эди. У нотинч, ўзгарувчан мухитда ўсиб улғайди. Сарой хизмати уйдаги тартибга мос келмасди. Онанинг доимий бандлиги боис қизлар аксарият ўз ҳолларига ташлаб кўйиларди. Оттилия дастлаб сарой болохонасида, кейин бувиси билан яшади. Кундузлари навбати билан онаси, кекса графиня ёнида, дарсда ва дугоналари ёнида бўларди, уларнинг орасида мен ҳам бор эдим, ёшим улардан бироз каттароқ эди. Оттилия, кўпинча, обер-камергер Эглоффштайн хоним хузурида овқатланар, унинг қизлари эса, менинг энг яқин дугоналарим эди. Биз ҳаммамиз қалбан бир иттифоққа бирлашдик, бу иттифоқнинг муддати йиллар билан ўлчанмайди, негаки бу йиллар жиддий

ҳаётий ўзгаришлар даври бўлиб, шу жараёнда биз ҳам пати чиқмаган палапонлардан тажрибали инсонларга айландик. Маълум маънода – самимий дўстлигимиз менга ана шундай эътирофга йўл очади – Оттилия ўзига хос ёрқин феъл-автори ва эрта шаклланган эътиқоди билан иттифоқимизнинг қалби ва етакчисига айланди.

Биринчи навбатда бу сиёсатга тегишли. Тўғри, ҳозир анави зўравон газанда бошимизга солган оғир синовлар ва изтироблардан сўнг ҳаётда яна тинчлик бирмунча тикланди, бу муқаддас иттифоқ томонидан қўриқланмоқда, сиёсат энди шахсий ва ижтимоий онг устидан ўз ҳукмини ўтказмаяпти ва инсоний ҳис-туйғуларга кенг ўрин қолдирмоқда, илгари эса бутун руҳий оламини ўз ҳукмига ўтказган эди. Оттилия, уни мавжуд муҳитдан узил-кесил ажратиб юборган тушунча ва руҳияти билан сиёсатга бутунлай берилиб кетди. Бироқ у ўз муҳолифатини бирор кишига, ҳатто энг яқин дугонаси бўлсам-да, менга ҳам ошкор қилишга журъат этмас эди, кейинроқ ўз ҳиссиётлари ва ўй-фикрларини менга сингдиришга эришди, мени ҳам ўз эътиқоди ва орзу-умидлари оламига олиб кирди, иккаламиз биргаликда сирнинг сехрли жозибасидан роҳатланардик.

Қанақа сир дейсизми? Райн иттифоқи таркибига кирган давлат ҳерцоги ғолиб авлиё сифатида афв этилган, содик вассал сифатида давлатни бошқаради; ҳамма буюк жаҳонгир олдида бош эгар ва унинг жаҳон тақдирини ҳал қилишдаги вазифасига, қитъанинг хўжайини эканлигига, иштиёқ билан бўлмаса-да, ҳар ҳолда итоаткорлик билан ишонарди – менинг Оттилиям бор вужуди билан Пруссия тарафида эди. Прусс армиясининг мағлубиятидан эсанкираб қолмасдан, шимолий-немис наслининг саксония-тиурингияликлардан афзал эканлигини миасига сингдириб олган ва унинг таъбири билан айтганда, “шулас орасида яшашга мажбур” лигидан куюнар, қалбида уларга нисбатан аччиқ нафратни сақлар, бу фақат менга-гина аён эди. Бу ёқимтой қизгинанинг қаҳрамонона қалбини битта идеал: прусс зобити эгаллаган эди. У сажда қиласидан бу тимсол хотираларида ярқ этиб ёниб-ўчиб турадиган йўқотган отаси эканлигини айтиб ўтириш ортиқча бўлса керак. Лекин, ҳар ҳолда бу ерда фақат унинг ўзига тегишли бўлган, қалбини аллалайдиган, бўлғуси воқеаларни олдиндан ҳис этадиган туйғулар ва ўй-хаёллар ҳам бўлгандирки, буларни биз ҳали хаёлимизга ҳам келтирмасдик, у бўлса аллақачон улар билан алоқага киришган ва хаёлан ўша воқеаларда дохиёна бир тарзда иштирок этган ва охiri ҳам мен ўйлаганимдек дохиёна бўлиб чиқди.

Қандай воқеаларни кўзда тутаётганимни осонгина англаб оласиз. Унинг ватанида фожиадан кейин юзага келган маънавий уйғониш ва янгиланишлар; ўша фожиага сабабчи бўлган, эҳтимол, келтириб чиқарган мафтункор, такомиллашган, аммо бироз заифлашган тамойилларга нисбатан қаттиқ нафрат, уларни қоралаш, йўқ қилиб ташлашга интилиш назарда тутилаяпти. Эътиқод ва одатларнинг ҳар қандай маза-бемаза қолдикларидан қаҳрамонона тозалangan ҳалқ танаси четдан келган ҳукмдорларни йўқ қилиш ва озодликнинг тантана қилишига йўл очувчи бўлғуси шон-шухрат учун тобланди. Бартараф қилиб бўлмайдиган қийинчилик – очарчилик бошланди, ана энди қашшоқлик тавба-тазарруни келтириб чиқарди ва унга руҳонийларнинг иккита хислати: зоҳидлик ва итоат қилиш қўшилди. Бу энди воз кечиш, ўзини қурбон қилишга тайёрлик, машаққатли фидокорлик, ватан учун яшашга дахлдор туйғулар.

Жимгина кечәётган бундай маънавий жараёнлар, шунингдек, армиянинг улар билан бирга қадам-бақадам қайта тикланиши ҳақидаги хабарлар, гарчи забт этувчи томонидан қўйилган мажбуриятлар ва солиқлар туфайли норозиликлар ҳам бўлиб турса-да, голиб давлат таркибига ортиқча иккиланишларсиз, ҳатто ишонч билан қўшилган бизнинг кичкина дунёчамизга етиб келмас эди. Бизнинг давримизда, бизнинг жамиятимизда буларни ёлғиз Оттилиягина сукут сақлаганча тантанавор хис этарди. Бироқ биздан узоқдами, яқиндами, ўзларини ёш авлод қаторида ҳисоблаб, ёшларга етакчилик қилувчи олимлар топилиб қолдик, улар янгиланиш ғояларини тарқатувчилар ҳисобланишади. Улардан бигтаси билан дугонам ўртасида тез орада фикрлар ва туйғулар алмашинуви бошланиб кетди.

Йенада Ҳайнрих Луден деган профессор, энг соф ватанпарварлик ғояларига эга бўлган инсон яшарди. Ўша шармандали вайронагарчилик юз берган кунда шўрлик профессор бутун бор-будидан, илмий материалларидан айрилиб, ёш хотини билан мутлақо бўм-бўш, совук ва чиқиндиларга тўлиб-тошган бошпанага қайтишга мажбур бўлган. Бироқ бундай хўрликлардан унинг рухи тушмади ва у баралла айтдики, Йенадаги жанг ғалаба билан тугаса, қўён бўлаётган душман кетидан тантана қилсан бўлди, ҳар қандай йўқотишни, очлик-яланғочликни қувонч билан енгган бўлардик, хуллас, ватанга бўлган ишончини ўз талабаларига ҳам тўлиб-тошиб изҳор қилди.

Бундан ташкари, Ваймарда асли мекленбурглик йигирма бир яшар Пассов деган йигит, гимназия профессори ҳам бор эди, у ўта билимдон, дунёқарashi кенг, фикрини ўтказа оладиган, шу билан бирга, асл ватанпарвар ва эркпарвар эди. У юонон тили, эстетика, тил фалсафаси фанларидан дарс берар, менинг акам Артур ҳам ўша кезда унинг ёнида яшаб, ундан *privatum*¹ сабоқ оларди. У дарсларини ўзига хос ғоялар билан жонлантиради, яъни фанни ҳаёт билан боғлаш, қадимиятга топиниш ўрнига немисватанпарварлик ва эркеварлик ғояларига ўтишни, бошқача қилиб айтганда: антик дунё руҳини жонли талқин қилиб, ҳозирги сиёсий ҳаётимиз учун ундан амалий фойда чиқаришни тарғиб қиласди.

Ана шундай инсонлар билан Оттилия енг ичиди маҳфий алоқа боғлади, айни пайтда у ўзини императорга олий даражадаги садоқатли, франко-фил жамиятининг келишган вакили сифатида тутарди. Менга шундай туюлардики, мен ҳам дугона ва ишончли киши сифатида дахлдор бўлган иккюзлама ҳаётидан у гўё лаззатланиб, романтик хузур-ҳаловат топгандек кўринарди. Бу зиддиятлар хузур-ҳаловати бўлиб, худди шу нарса, менимча, хиссий саргузаштлар йўлида муҳим, ҳал қилувчи роль ўйнади, мана энди тўрт йилдан бери менинг қушчам тўрдан чиқолмай овора, мен уни қутқазиш учун бор-будимдан воз кечган бўлардим.

Россияга юриш бошланганининг бир йиллигидан бери Август фон Гёте Оттилияга севги изҳор қилишдан тўхтамайди. Ўшандан бир йил олдин у Ҳайделбергдан қайтиб келиб, сарой ва давлат хизматига киришди, уни камер-юнкер² ҳамда ҳерцогликка қарашли камер-коллегия³сининг ҳақиқий асессори лавозимларига тайинлашди. Аммо, ҳерцогнинг кўрсатмаси бўйича ушбу лавозимлар остида кўзда тутилган ҳақиқат олдиндан белгилаб қўйилган эди: бу вазифалар Августнинг улуғ отаси олдидаги фаолиятига

¹ Хусусий тарзда (лот.).

² Камер-юнкер – монархия давлатларида сарой аҳлларига берилган унвон ва шу унвондаги киши.

³ Камер-коллегия – пул солиқини бошқарган муассаса.

тўсиқ бўлмаслиги лозим эди, у отасини ҳар қандай кундалик турмуш ташвишларидан ва жонга тегадиган хўжалик ишларидан озод қилиши, ҳар хил ижтимоий маросимларда ва ҳатто Йенага текшириш учун қилинадиган сафарларда унинг ўрнига вакил бўлиши, коллекцияларига қарashi, унга котиблик қилиши зарур эди, чунки айни ўшанда доктор Ример мархума яширин маслаҳатчи хонимининг надимаси фрайлайн Ульрихга уйланиш учун кетган эди.

Ёш Август бу топширикларни жуда ўрнига қўйиб, булар отаси ва хонадонига тегишли бўлғанлиги боис учига чиқкан расмиятчилик билан, бағритошлик – мен ҳозир бундан бошқа сўз тополмайман – ҳа, бағритошлик билан бажаарди, таъкидлаб айтаман: бу унинг феъл-авторига мос, атайлаб қилинган бағритошлик. Очиғини айтсам, мен бу кимса табиатининг ички сир-асрорларига чукур кириб боришга шошилмайман, аллақандай ачиниш ва нафратни ўзида жамлаган қўркув туфайли буни кейинга сурман. Бу йигитнинг бунақа қиликларидан таъсирланган биргина мен эмасман. Ример, масалан, ўзи менга икрор бўлди: у ўшандаёқ унинг олдида чинакам даҳшатни хис этган, собиқ ўқувчисининг ота-онаси хонадонига қайтиб келиши Римернинг мустақил яшаши режасини янада тезлаштирган.

Уша кезларда Оттилия саройда кўрина бошлаган, афтидан Август ўша ерда у билан танишган. Бу танишув Фрауенпланда, яширин маслаҳатчи бир неча йил давомида уйида ташкил этган концертлар ёки уларнинг репетициялари вақтида юз берган бўлиши ҳам мумкин. Дугонамнинг мафтункорлиги ва туғма фазилатларига унинг ажойиб жарангдор овози ҳам киради, мен буни ундаги мусиқага ошно қалбнинг сози ёки жисмоний ифодаси деган бўлардим, бу истеъодони у, Гётенинг уйида хафтада бир марта ташкил этиладиган ва якшанба кунлари унинг меҳмонлари олдида кўшиқ куйланадиган кичкина хорда шакллантирган эди.

Бундай ёқимли лаҳзалар яна улуғ шоир билан шахсий мулоқотлар орқали тўлдирилар эди, ишонч билан айтаманки, шоир унга бошиданоқ қаттиқ эътибор қиласар, у билан гап сотар, ҳазиллашар, шоир таъбири билан айтганда, бу “амазонка”га оталарча кўнгил яқинлигини яшириб ўтирасди...

Хали сизга унинг ташки қиёфасига хос жозибадорликни тасвирлаб берганим йўқ – қандок тасвирлайн, бунга сўз топилмайди ахир, шундай бўлса-да, у кизнинг ўзига хос мафтункорлиги ҳикоямда жуда катта роль ўйнайди. Чарақлаган кўк кўзлар, қуюқ малла соchlар, кўпроқ хипчабел, ўта хушбичим, Юнонаникidan қолишмайдиган хушқомат – қисқаси, ким ҳис-туйғулар ва шеърият оламига эҳтиром кўрсатса, бу қиёфа ҳам ўшандай одамнинг дидига мос келади. Бошқа гап айтмайман, фақат шуни эслатмоқчиманки, худди шунга ўхшаган олийзот қизни бир сафар ўша машхур унаштиришгача олиб боришиди, иш ниҳоясига етмади-ю, аммо, шубҳасиз, бу нарса ижтимоий табакаларнинг химоячиларини хафа қилди.

Мана энди, қачондир қочиб кетган куёвнинг ўғли, ёш дворян уруғидан никоҳсиз туғилган зурриёт гўзал Оттилияга, фон Погвиш-Ҳенкель-Доннерсмаркка суйкалиб юрибди, бир тўда зодагонлар ўша пайтда, Франкфуртда бўлгани каби яна ғазабланишди; бироқ энди буни ҳеч ким очиқасига изҳор қилмаяпти, сабаби энди ҳолат алоҳида имтиёзли, маҳсус ҳак-хукуққа эгаки, булар янги қиёфа касб этган дворян томонидан қаттиқ назорат қилинади. Ота мана шу хукуклардан онгли равища, ишонч билан ўғли учун фойдаланишга ўзида истак сезди. Булар менинг шахсий

фикрларим, аммо бу фикрлар воқеаларнинг боришини дард билан аниқ кузашибиларга асосланган, бу гапларнинг ҳаммаси рост. Гап шундаки, биринчи бўлиб Оттилия билан отаси қизиқди, унинг қизга хайриҳоҳлиги ўғлининг эътиборини тортди, бу эътибор тезда эҳтиросга айланди, шу билан у диidi отасининг дидига мос келишини намойиш қилди. Гўё уларнинг дидлари бошқа соҳаларда ҳам мос келишини у очиқчасига тақрорлади, аслида эса, ҳаммаси тақлид ва тобелиқдан ўзга нарса эмас, гап орамизда қолсин-у, унда дид деган нарсанинг ўзи йўқ, унинг аёлларга муносабати бунинг ёрқин исботидир. Майли, бу ҳақда кейинроқ гаплашамиз, қанча кейин бўлса, шунча яхши! Яхиси ҳозир Оттилия ҳақида гапираман.

Дилбар қизнинг жаноб фон Гёте билан учрашган пайтдаги ҳолатини тавсифлаш учун “кутиш” сўзи айнан тўғри келади. Ёшлигиданоқ унга йигитлар мулозимат қилишган, алоҳида эътибор кўрсатишган, уларга ярим ҳазил жавоб қайтарган, бироқ у ҳеч кимни севмаган эди, биринчи муҳаббатини кутарди. Унинг қалби гўё ҳаммаёқни забт этувчи илоҳий бир кучни кутиб олиш учун безангандан эди ва мана шу ноодатий, ўзига хос улуғвор талабгор томонидан унга ўтган ҳиссиётларда у ўшанинг қудратини кўради. Улуғ шоирга нисбатан Оттилиянинг ҳурмати, шубҳасиз, баланд эди, шоирнинг унга кўрсатган хайриҳоҳлигидан беҳад яйради – у ўғлининг отаси томонидан очиқчасига маъқулланган ва гўё унинг томонидан қилинган талабини рад қила оларми? Ўғлининг ёшлиги орқали, ўғлида қайтадан дунёга келган ота гўё ўзи унга талабгор бўлди. “Ёш Гёте” уни севарди – Оттилия уни манглайимга ёзилгани шу, деб дарҳол қабул қилди, ҳеч иккиланмай унга севги билан жавоб қайтарди.

Назаримда, қисмати унга ҳозирлаган ўша тимсолни севиб қолиш қанчалик номувофиқ туюлса, у бунга янада кўпроқ ишонарди. Унинг муҳаббат ҳақида билгани шу эдики, у ўзига бек, ўзига хон, қайсар, мулоҳазакорликни писанд қилмайдиган, ақл ҳукми устидан мустақил равишда ўз ҳақ-хуқуқини ўтказадиган кучдир. Унинг тасаввуридаги шаҳзодаси бошқача: кўпроқ ўзига ўхшаб кетадиган, очиқкўнгил, Августга нисбатан қувноқроқ, енгилроқ, хушчақчақроқ эди. Унинг хаёлидаги тимсолга Августнинг жуда кам мос келиши, ҳис-туйғуларининг ростлигига романтик исбот бўлиб туюлди.

Август болалигига ҳам у қадар диққатни тортмаган, ўсмирилигига ҳам унчалик умидбахш бўлмаган. Уни узоқ яшамайди, деб тахмин қилишган, ақлий қобилиятига келадиган бўлсақ, хонадон дўстларининг фикрига кўра, унга беҳад катта умид боғлаб бўлмайди. Болалигига касалманд бўлса-да, кейин кенг елкали, бўй-басти келишган йигит бўлиб улгайди – шу билан бирга, бироз вазмин, тунд қиёфали, айтиш мумкинки, бироз рангиз, бунда кўзларини назарда тутаяпман, агар улар кўпроқ ифодага, кўпроқ ўз нигоҳига эга бўлганда эди, чиройли бўлармиди ёки тўғрироғи, чиройли бўлишга муваффақ бўлармиди. Мен унинг шахси ҳақида, ўзимдан уни узоқлаштириш, у ҳақда беғараз фикр юритиш мақсадида ўтган замонда гапирайпман. Бироқ барча айтганларим Оттилия билан эндиғина танишган пайтдаги йигирма етти яшар ёшгина йигитга тегишли. У ёқимли, ширин сўз суҳбатдош эмас эди. Унинг бутун руҳиятини бадқовоқлик, ичидагини юзага чиқаришдан ҳадиксираш, қандайдир тушкунлик, тўғрироғи, теварак-атрофини бўм-бўш қилиб кўядиган умидсизлик десак, ҳақиқатга яқин бўлар, эгаллаб олган эди. Назаримда, бундай феъл-автор, бераҳмларча ўз-

ўзидан воз кечиш, отаси билан узлуксиз, ҳолдан тойдирадиган даражадаги қиёслашлар туфайли қўрқув оқибатида юзага келган эди.

Буюк инсоннинг ўғли бўлиш – бу улкан баҳт, бебаҳо имтиёз, шу билан бирга, оғир юқ, ўз “мен”ингни тинимсиз таҳқирлаш, ерга уришдир. Ота ўғлига альбом совға қилган бўлиб, улар бирга йиллар давомида қаерда бўлишса, Ваймардами ёки саёхатга борган жойлари – Ҳалле, Ҳельмштедт, Пирмонт, Карлсбаддами, Германиянинг, ҳатто чет элнинг машҳур кишилари ўз дастхатларини альбомга туширишган эди. Бу ёзувлар орасида ёш йигитнинг шахсий фазилатларини кўрсатадигани деярли йўқ, хаммасида битта, яъни отасининг ўғли, деган хираҳандон фикр ҳукмрон эди. Файласуф профессор Фихтенинг: “Давримиз ғурурланадиган ягона инсоннинг ягона ўғлидан миллатимиз кўп нарса кутади” деган сўзлари ёш қалбни қанчалик кўкларга кўтарса, шунчалик гангитиб қўйиши мумкин эди. Бир француз дипломати бу альбомда ёзиб қолдирган кичкинагина жумланинг таъсири қандай бўлиши мумкин: “Улуғларнинг ўғиллари келажак авлод учун камдан-кам ҳолларда аҳамиятли бўлишади”. Бу сўзларни истисно сифатида қабул қилиш керакмиди? Шундай ҳам дейлик. Аммо уларни Данте жаҳаннамнинг эшигига ёзиб қўйган сўзлар маъносида ўқисак табиийрок бўларди.

Август ҳаддан ортиқ қиёслашдан дағал бир қайсарлик билан қочишига ҳаракат қиласарди. У ҳар қандай поэтик шуҳратпарастликни, бадиий ижод олами билан ҳар қандай алоқани илтифотсизлик билан ўзидан нари итарар, ўзини фақат кундалик ишларга қодир одам, бекам-кўст хизматчи, сарой амалдори қилиб кўрсатишга уринарди. Олий даражадаги юкинишдан қатъий ва мутлақ воз кечишини сиз эҳтимол дикқатга сазовор, ҳурматга лойик ғурур деб ўйлашингиз мумкин, агар ўша улуғликнинг куртаклари унда озми-кўпми бўлган тақдирда ҳам машъум қиёслашдан қочиши мақсадида уларни яшириш ва синдиришга ҳаракат қилди. Бироқ унинг ўз-ўзига ишончсизлиги, одамовилиги, норозилиги, жаҳлдорлиги ундан одамни нари итарар ва уни мутлақо мағрур деб бўлмасди. Бемалол айтиш мумкин: у мағрур эмас, ғурурининг синганидан азоб чекарди. Ҳозирги ижтимоий мавқеига улуг номи орқасида келган, нафақат келган, балки тиқиширилган имтиёзлар туфайли эришган эди. У имтиёзларни ҳечам маъкулламаса-да, улардан фойдаланар, воз кечолмас, уларни ўз эркаклик қадр-қиммати учун ҳақорат эканлигини ҳис этарди. Илм эгаллашга уни мажбур қилишмаган, билими юзаки эди. Эгаллаб турган лавозимларига ҳали билим ва қобилиятини намойиш қилмай туриб, олдиндан тайнинлаб қўйилган эди. У бу мавқега ўз билими билан эмас, балки улуғнинг арзандаси бўлгани учун этишганини яхши биларди. Бошқа одам бўлганда бунақа кўтарилишдан мағруона шодланган бўларди, у эса бундан изтироб чекиши учун яратилган эди. Шуниси борки, қисмати унга тортиқ қилган бундай эътирофга лойик имкониятдан ҳар ҳолда воз кечмади.

Бошқа жиҳатни ҳам ёддан чиқармайлик! Август нафақат отасининг ўғли, онасининг, Вульпиус хонимнинг ҳам ўғли эканлигини унутмайлик, бу нарса унинг оламга муносабатига-ю, ўз қадр-қимматини ҳис этишига ўзига хос номувофиқликнинг келиб чиқишидаги катта фарқ – у томоннинг юксаклиги ва бу томоннинг бетартиб чатишма уруғи ўртасидаги зиддиятни келтириб чиқармаслиги мумкин эмас эди. Ҳерцог дўстининг, яъни унинг отасининг илтимоси билан ўн бир яшар болага илтифот кўрсатиб,

махсус буйруқ билан унинг қонуний туғилганини, шу билан дворянлар табақасига мансублигини расмийлаштириди, аммо бу билан ҳеч нарсани ўзгартиролмади, шунингдек, олти йил кейин ота-онасининг никоҳдан ўтишгани ҳам фойда бермади. “Ишқ фарзанди” – бу тушунча одамларнинг миясига қандай ўрнашган бўлса, “буюкнинг ўғли” тушунчаси ҳам худди шундай ўрнашиб қолди. Бир марта у, ўн уч яшар болакай, Амур либосида ҳерцогиняning таваллуд куни муносабати билан унга гул тақдим қилиб, қасида ўқиганида асилзодаларнинг ғазабига дучор бўлган эди. Ишқ фарзанди, яна Амур либосида, асилзода инсонлар орасида пайдо бўлишга ҳаққи йўқ, дея очик-ойдин эътиroz билдирилган эди. Бу гаплар унинг қулоғига етиб бордими-йўқми, билмайман. Бироқ бу тахлит қарама-қаршиликларга у кейинги ҳаётида кўп бора дуч келган бўлса керак. Отасининг обрў-эътибори ва ҳерцогнинг марҳамати билан ҳимояланган унинг ижтимоий мавқеи оғизга тушган, аммо бу мужмал мавқе эди. Унинг дўстлари ёки шундай деб аташ мумкин бўлган одамлар гимназияда, унинг хизмат жойида топилса-да, чин дўсти йўқ эди. У ҳеч ким билан дўстлашолмас, ичимдагини топ, ўзининг юксак ва шубҳали маънодаги алоҳида мавқеига берилиб кетган эди. У турфа хил кишилар, онасининг атрофидаги лўли тахлит одамлар, кўплаб актёр оғайнилари, ичишни ёқтирадиган ёшлар билан алоқа қилар, унинг ўзи ҳам спиртли ичимликка ружу кўйган эди. Ҳурматли баронессамиз фон Штайннинг айтишича, ўн бир яшар бола онасининг чапанича даврасида нақ ўн етти бокал шампань виносини кўрдим демаган, фон Штайн хоним ўз уйида уни винодан базур тўхтатган экан. Бола ҳақида бундай дейиш ғалати туюлса-да, кўшимча қилди у, бироқ Август афтидан ғамини унутиш учун ичарди, бу ғам ҳам асоссиз эмас ҳар ҳолда, негаки у бир куни отасининг йиглаётганини кўрган ва бу ҳолат болага қаттиқ руҳий зарба бўлган. Бу 1801 йилдаги устознинг оғир бетоблик пайтида юз берган, у стенокардия билан оғриб, кетиб қолишига бир баҳя қолган. Соғайиши қийин кечиб, мадорсизликдан йиглаган, ўшандан кейин ўғли ўн етти бокаллаб ичишни бошлаган. Ота бунга кўпам эътибор қилмаган, чунки унинг ўзи Яратганинг неъмати, дея винони берилиб ичган ва гоҳида ўғлига ҳам манзират қилган. Биз, четдаги одамлар, Августнинг феъл-авторидан кўплаб ёқимсиз иллатларни – жizzакилик, тундлик, одамовилик, кўпол қиликларни унинг Бахус¹ инъомига ёшлиқдан берилганидан, – афсуски, бу борган сари куҷайди – изламай иложимиз йўқ.

Шундай қилиб, дилбар қиз Оттилия, йигитнинг унга қилган, унча ҳам ёқимли ва дилтортар бўлмаган изҳорларида ўзининг азалий тақдирни мужассам топганини кўрди. Унинг назарида бу иш ақлга тўғри келмаса ҳам, ёки тўғрироғи, мен айтганимдек, ақлга тўғри келмагани учун ҳам, у Августнинг севгисига рози бўлди. Йигитнинг ҳаётидаги фожиавий нохушликларни англаб етишида унга хос олийжаноблик, поэтик туйғу кўмак берди. У меҳрибон фаришта сифатида Августнинг ичига кириб олган шайтондек ғолиб чиқдим, деб тасаввур қилди. Эслатиб ўтганимдек, у ўзининг икки хил ҳаётидан – ваймарлик асилзода қиз ва махфий прусс ватанпарвари – романтик жозиба топа олди. Августга бўлган мухаббат унга бу жозибани янги, чуқурлашган шаклда англаб етишга имкон берди; унинг дунёқараши билан йигит мансуб бўлган хонадон дунёқараши ўртасидаги зиддият унинг

¹ Бахус – қадимги Рим мифологиясида ўсимликлар, вино ва қувноқлик худоси. Узумчилик ва виночилик ҳомийси.

хис-туйғуларидаги ғайритабиийликни янада ўтқирлаштириб, буни айнан чин муҳаббат деб ҳисоблашга мажбур қилди.

Бизнинг маънавий қаҳрамонимиз, Германиянинг фахри на мард ватанпарварларнинг Ватан мағлубияти учун чеккан ғам-ғуссаларига, на қалбларимизда тўлиб-тошган завқ-шавққа шерик бўлганини айтмасам ҳам бўлади; озодлик ва кураш соати етиб келганда эса, совуқконларча ўзини четга олди, айтиш мумкинки, душманнинг кўзи олдида бизни тарк этди. Худди шундай бўлган эди. Буни яххиси унутмоқ, касалликни бошдан кечиргандек ўтказиб юбормоқ, унинг даҳолиги ҳурмати, қалбдаги улуғ инсонга муҳаббат ҳурмати ичга ютмоқ лозим. Йена ёнидаги талатўп унга ҳам катта талафот етказди, аслида, бунга дастлаб ғолиб француздар эмас, балки ҳали жанг бошланмасданоқ Ваймарни эгаллаб турган прусслар айбордor эди, улар унинг боғ уйига бостириб кириб, эшиклар ва мебелларни синдириб, ўтда куйдиришган. Ундан кейин юз берган ҳодисадан ҳам у ўз улушини олган. Айтишларича, бу бебошлиқдан у нари-бериси билан икки минг талер зарар кўрган, винонинг ўзидан ўн икки челақдан ортиқ ичилган, босқинчилар ҳатто унинг ётоқхонасига ҳам киришган. Бироқ унинг мол-мулки талон-торож қилинмади, чунки уйни маҳсус қоровул қўриқларди, уницида маршаллар Ной, Ожеро, Ланн, кейинроқ, Гётега Венеция давридан яхши таниш бўлган мосъе Денон, император музейларининг бош инспектори, Наполеоннинг санъат масалалари, яъни босиб олинган мамлакатлардан ўзлаштирилган санъат асарлари бўйича маслаҳатчиси истиқомат қилишарди.

Бу одамни ижарачи сифатида ушлаб туриш устозга жуда ёқарди, аммо у, пировардида ҳамма нарсани шундай кўрсатишга ҳаракат қилди, гўё унга ҳеч нарсанинг алоқаси йўқдек эди. Бехад қаттиқ азият чеккан профессор Луден, ўша даҳшатли воқеалардан бир ой кейин у билан Кнебелникида учрашганини бир куни менга айтиб берган эди. У ерда ўша улкан баҳтсизлик ҳақида сўз очилган, жаноб фон Кнебель бир неча бор: “Бу даҳшат! Бу кўз кўриб, қулоқ эшитмаган ҳодиса!” дейа хитоб қилган, Гёте бўлса бир-икки оғиз тушунарсиз сўзларни минғирлаган ва Луденнинг, зоти олийлари фожиали ва мусибатли кунларни қандай ўтказдингиз, деган саволига: “Мен ҳечам шикоят қилмайман. Ўзимни байни баланд қоя тепасидан туриб қутураётган денгизни кузатиб ўтирган, гарчи кема ҳалокатига учраётгандарга ёрдам қўлини чўзолмаса-да, лоақал ўша тўлқинларга ем бўлмаган одамдек ҳис қилдим – қайсиdir антик дунё донишмандининг сўзларига қараганда... бу холат ҳар ҳолда ёқимли”, дейди. У ўша донишманднинг номини тополмай шу ерда тутилиб қолади. Ким назарда тутилганини билса-да, Луден айтишдан тийилади, аммо Кнебель, ҳозиргина газаб отига миниб турган бўлса-да, гапга қўшилади: “Лукреций айтган!” “Тўппа-тўғри, Лукреций айтган”, – тасдиқлайди Гёте ва: “шу тахлит мен хотиржам кузатиб ўтирдим, қий-чув, тўс-тўполон ёнимдан ўтиб кетаверди”, деб гапини тугатган. Луденнинг куйиб-пишиб айтишича, маълум маънода қониқиши билан айтилган бу сўзлардан унинг эти жимиirlab кетибди. Ўша сухбат асносида Луден яна бир неча бор ҳайратдан ёқа ушлаган, негаки у Ватан бошига тушган баҳтсизлик ва фалокат ҳақида, ёруғ кунлар келишига ўзининг юксак ишончи ҳақида гапирганида, Кнебель “Яшанг! Тўғри!” деб уни қўллаб-қувватлаб турган, Гёте бўлса, парво ҳам қилмасдан, миқ

этмай ўтираверган. Шу билан майор ҳаяжонли хитобларидан сўнг гапни қандайдир адабий мавзуга бурган, Луден эса дархол ғойиб бўлган.

Хурматли профессор менга мана шуларни айтиб берди. Гёте гимназия ўқитувчиси доктор Пассовни қарашлари учун тавбасига таянтирганини айтмайсизми, буни ўз қулоқларим билан эшидим, чунки сухбат онамнинг салонида бўлган, у пайтда мен кичкина қизча эдим, ўша ерда юргандим. Гапга чечан Пассов, антик дунёни кашф этиш ва юонон руҳини лоақал айрим одамлар онгига сингдириш, немис ҳалқи буткул йўқотган нарсани қайта тиклаш, яъни озодлик ва Ватан ғоялари билан уларни илҳомлантиришга бутун фикр-зикри билан берилганини беҳад таъсиrlаниб тушунтириди. (Эслатиш лозимки, бунақа одамлар улуғ шоир олдида соддаларча самимият билан қалбларини очишади, чунки улар учун соғлом ва фойдали туюлган ғояларга кимдир эътиroz билдириши мумкинлиги хаёлларига ҳам кириб чиқмайди, ҳатто салгина бўлса ҳам тасаввур қилишолмайди. Улуғ инсоннинг уларни қўллаб-қувватлашга мутлақо рағбати йўқлигини, унинг ҳузурида бунақа мавзуларни кўтариш жоиз эмаслигини тушуниб етгунларича хийла вакт керак бўлади). “Гапимни эшигинг! – деди у нихоят. – Антик дунё ҳақида нималаргadir ақлим етади, аммо улардан ўрганмоқчи бўлганингиз эрксеварлик ва ватанпарварлик тушунчасининг ҳар дақиқада карикатурага айланиш хавфи бор!” У “карикатура” сўзини қанчалик муздек алам билан айтганини, бу сўзнинг унинг оғзидан аччиқ танбех бўлиб янграганини зинҳор унутмайман. “Бизнинг бюргерларга хос яшаш тарзимиз, – давом этди у, – қадимгиларнидан тамоман фарқ қиласди, давлатга муносабатимиз-ку умуман ўзгача. Немислар ўз қобиғига ўралиб ўтирасдан, бутун дунёни ўз бағрига олмоғи ва кейин унга таъсир ўтказмоғи лозим. Мақсадимиз ўзимизни бошқа миллатлардан душманларча четга тортиш эмас, балки бутун дунё билан дўстона алоқа ўрнатиш, ҳатто туғма ҳис-туйғулар, ҳақ-хуқуқлар ҳисобига бўлса-да, ўзимизда яхши ижтимоий фазилатларни тарбиялаш бўлмоғи зарур”. У охирги сўзларни ўзи ўтирган столга кўрсаткич бармоғи билан тақиллатиб урганча амrona баланд овозда айтди ва қўшимча қилди: “Бошлиқларга қарши туриш, биз юонон ва лотин тилларини билганимиз учунгина ғолибга нисбатан қайсаrlик қилиш, у бу ҳақда оз билади ёки умуман ҳеч нарса билмайди, деб ўйлаш, бу болаларча бемаънилик. Бунақа профессорларча гердайиш нафақат ўзини-ўзи кулгига қўяди, балки ўзига зарар ҳам келтиради”. Шу ерда у бироз тин олди. Кейин батамом довдираб қолган ёш Пассовга томон бурилди-да, анча илиқ, аммо сўник оҳангда хуласа қилди: “Жаноб доктор, мен сизни зинҳор хафа қилишни истамасдим. Биламан, ниятларингиз холис. Аммо ниятларнинг тоза ва холис бўлишининг ўзи етарли эмас, одам ўз интилишларининг натижаларини олдиндан кўра билиши лозим. Сизнинг ниятларингиз эса, мени даҳшатга солади, чунки улар, бир кун келиб немисларни энг шармандали бебошликларга олиб келадиган ярамасликларнинг ҳозирча олийжаноб, содда кўринишларидир, агар ўша ярамасликлар сизнинг қулоғингизга етиб борадиган бўлса, ўзингиз ҳам гўрингизда бир ағдарилиб тушган бўлардингиз”.

Хона бўйлаб тилсиз фаришта учиб ўтгандек ҳамманинг донг қотиб қолганини кўз олдингизга келтиring! Хотиржам сухбатни изга солиши учун онам қанча ҳаракат қилмади, дейсиз! Бироқ у ўзгармади, сўзлари ва сукути билан қалбларимизни, дилимизда ардоқлаган туйғуларимизни

яралаб, у ўзини ўшандай тутган эди. Буларнинг ҳаммасини унинг император Наполеон олдида сажда қилиши билан боғлаш мумкин, у 1808 йилда, Эрфуртда шоирни Фахрий легион ордени билан мукофотлаган, ўшандан буён у буни энг суюкли ордени ҳисоблайди. У император тимсолида бутун дунёда тартиб ўрнатувчи Зевсни кўрди, ўз немис давлати таркибида эса, жанубий ҳамда асл немис вилоятларининг Райн иттифоқида бирлашувини тасаввур қилди, бу қандайдир янги, умидбахш туйғу эди, бундан у катта фойда кутарди, агар немислар ҳам, кўп жиҳатдан шоирнинг ўзи бурчли бўлган француз маданияти билан самарали ҳамкорликни йўлга қўйса, руҳий-маънавий оламида кўтарилиш ва тиниқлашув юзага келган бўларди.

Ёдингизда бўлсинки, Наполеон Гётени Парижга кўчиб ўтишга таклиф қилган, ҳатто мажбурлаган, Гёте ҳам анча вақт ўтсамми-йўқми, деб бу масалани тарозига солиб кўрган, у ердаги турмуш шароитлари ҳақида жиддий маълумотлар тўплаган. Эрфурт воқеаларидан кейин у ва Цезарь ўртасида шахсий алоқалар ўрнатилган. Наполеон у билан худди тенгдошидек муносабатда бўлар, устознинг ҳам, чамаси ишончи комил бўлганки, унинг фикрлаш оламига, немис руҳига у ҳеч қандай хавф солмайди, гарчи бутун дунё унинг олдида титраб қақшаса-да, Наполеон даҳоси шоирнинг даҳосига душман эмас.

Бундай ишонч ва дўстликни худбинлик деб аташ мумкин, лекин биринчидан, бундай одамнинг худбинлиги шахсий иш эмас, балки қандайдир юқорироқ, барчага тегишли жиҳат воситасида тасдиқлангандир; иккинчидан, Гёте шундай маслаги ва қарашлари билан якка-ёлғизмиди? Мутлақо, шафқатсиз протектор томонидан кичкинагина мамлакатимиз елкасига юкланган оғир қийинчиликларга қарамасдан, у ёлғиз эмасди. Масалан, вазиримиз Фойт, ҳамиша, Наполеон ҳадемай сўнгги душманини енгадида, бирлашган Европа унинг кўли остида тинч ҳаёт гаштини суради, деб ҳисобларди. Бу фикрни мен кўп бора унинг оғзидан эшитганман, аник эсимда, 1813 йилда у Пруссиядаги намойишларга норозилик билдирган, бу мамлакатни partout¹ Испанияга айлантириб юборади, бу invito rege², деган эди. “Шўрлик қирол! – хитоб қилган эди у. – Минг афсус, у бутунлай айбиз бўла туриб энди бошига қандай жазолар ёғилади. Биз, қолганлар эса, хотиржамлик, бетарафлик, император Наполеонга садоқатни сақлаш учун бутун ақлимиз ва ҳушёрикни ишга солишимиз лозим, факат шу йўл билан ҳалокатдан омон қоламиз”.

Мана, ҳозиргача тепамизда турган оқил, виждонли давлат бошлигининг фикри. Ҳерцог зоти олийлари-чи? Москвадан кейиноқ, император зудлик билан янги қўшин ташлагач, бизнинг ҳукмдоримиз унга Эльбагача ҳамроҳлик қиласди, мақсади бизнинг умидларимизга хилоф равишда унга карши бирлашган прусслар ва русларни тор-мор қилиш эди, биз бўлсақ, Пруссия қироли бу гал ҳам Наполеон билан бирга босқинчиларга қарши оёққа туради, деб ўйлаган эдик, бу юришдан ҳам Карл Август кўтаринки руҳда, унинг таъбири билан айтганда, унга Тангридан руҳ олган Мұхаммад бўлиб туюлган “чинакам ғаройиб инсон”га мафтун бўлган ҳолда қайтиб келди.

Аммо Лютцендан сўнг Лайпцихга навбат келди ва Тангридан руҳ олиш борасидаги гаплар барҳам топди; қаҳрамонга мафтунлик ўрнини бошқа, яъни озодлик, Ватан туйғусидан илҳомланиш, қисқаси, Пассов қарашлари эгаллади. Қараб туриб ҳайрон қоласан киши, одам қандай қилиб, ўзи

¹ Нима бўлганда ҳам (фр.).

² Қирол иродасига қарши (лом.).

ишонган кишининг бахтсизлигига, ташқи воқеаларга қараб тез ва осонгина ўзгара қоларкан. Янада ҳайрон қоларлиси, янада ақлга сифмайдигани шуки, воқеаларнинг бориши буюқ, машхур зотларнинг башоратчилик қобилиятига эга бўлган кичкина одамлар олдида ноҳақ бўлиб чиқмасликларини исбот қиласди. Гёте ҳамиша такрорларди: “Содда одамлар-эй, занжирларингни шақирлатаверинглар, бу одам сизлар учун қўл етмасдир”. Ана энди кўринг: занжирлар узилди, херцог ўрисларнинг мундирини кийди, биз Наполеонни Райндан нарига қувиб юбордик, устоз “соддалар” дея масхара қилганлар – Луден ва Пассовлар, унинг олдида ҳақ ва ғолиб бўлиб туришди. Ўн учинчи йил Луденнинг Гёте устидан ғалабаси йили бўлди, буни бошқача таърифлаб бўлмайди. У ўз қилмишидан уялиб, пушаймон бўлиб, Берлин учун “Эпименида” номли мадҳиясини ёзди, унда қуидаги сатрлар бор:

*Лоқайд хотиржамлик уятга қўйди
Сиз учун ўртансам бир даврон экан.
Сиз чеккан изтироб, азоблар боис,
Сизлар бугун рости юксаксиз мендан.*

*Темир қисматингиз Сизни қўллади,
Тубсиз қаърдан сақландингиз мардона.
Ярим дунё эгаллаган фотиҳ зот,
Энди жарга қулаб кетди ордона¹.*

Кўряпсизми, у ўз императорини, дунёни бирлаштирувчи пэр²ини тубсиз жарликка қайта ташляяпти, ҳеч бўлмаганда мадҳияда, чунки, менимча, ичida мудом “соддагиналар”ни такрорлаётган бўлса керак.

Унинг ўғли Август, Оттилияning севгилиси, сиёсий қарашларда батамом отасига ўхшади, ундан бир туки ўзга бўлмади. У ўзича, бир хил маданиятга эга бўлган бутун Германияни бирлаштирувчи Райн иттифоқининг ашаддий тарафдори эди, шимолий ва шарқий варварлардан очиқласига нафратланар, бу ҳолат, кекса Гётега нисбатан унга номуносиб эди; негаки унинг табиатига аллақандай варварларга хос, нима десам экан, қандайдир бесўнақай, ҳатто дағал тундлик билан қоришиб кетган, олийжанобликдан кўра кўпроқ кўнгил ғашлигига ўхшайдиган белгилар хос.

Император 1811 йилда бизга, Ваймарга, юксак билимли, келишган зодагон барон Сент-Эньонни элчи қилиб юборди. Тан олиш керак, у инсофли, Гётени беҳад қадрлайдиган киши бўлиб, Гёте кўп ўтмай у билан дўстлик алоқаларини йўлга қўйди. Август ўз навбатида бароннинг котиби жаноб фон Вольбок билан дарҳол дўстлашиб олди. Буни сизга эслатаётганимнинг сабаби, биринчидан, унинг қандай давралардан дўстлар орттирганини сизга кўрсатиш, иккинчидан, жаноб фон Вольбок деганимиз, 1812 йил декабрида Наполеон Москвани ташлаб қочиб келаётib, Эрфурт орқали ўтганда император номидан Гётега салом йўллаган эди. Бу ҳам Август учун кўп нарсани ифодалар эди, чунки у ҳамиша Наполеонга Худога сифингандек сиғинар, бу ҳолат, менинг назаримда, ҳеч қандай руҳий-маънавий асосга эга эмас эди. Ҳозир ҳам у Наполеон портретлари ва унга дахлдор ёдгорлик буюмларини йиғади, отаси ҳам унинг коллекциясини Фахрий легион ордени билан тўлдирди, энди уни такиб юриш ноқулай бўлиб қолган.

¹ Ваҳоб Раҳмонов таржимаси.

² Пэр – Англия ва Францияда олий дворянлик унвони ва шу унвонга эга бўлган киши.

Ҳар хил оҳангда тепадиган икки юракда, мен сизга айтсам, камдан-кам ҳолларда муҳаббат ришталари боғланади. Август худди Наполеонга сажда қилгандек, Оттилияга сажда қилди, ха, ҳар қанча ғалати туюлса-да, бу қиёсга мурожаат қилмай иложим йўқ, шўрлик дугонам бўлса, фикрлар ва қарашларни кулиб туриб оёқости қиласидиган муҳаббат илоҳининг мутлак қудратига ишонган ҳолда унинг оғир-вазмин мулозиматларини мулойим-гина қабул қилди, мен бунга титраб-қақшаб, кўркув билан қараб турдим. Бунда Августга нисбатан унга оғирроқ бўлди: Август ўз қарашларини очик-ойдин изҳор кила олар, у бечора эса уларни яширишга мажбур эди. Бироқ, ўзининг муҳаббати деб ҳисоблаган нарсани, улуғ шоирнинг ўғли билан кечадиган сентиментал зиддиятларга тўла кечинмаларини яширасди, бизнинг кичкина дунёчамиизда, ҳис-туйғулар ҳамманинг назарида бўладиган ва қадрланадиган жойда буни яширишга ҳожат ҳам йўқ эди. Мен унинг энг ишончли кишисига айланган эдим, кечинмаларининг барча босқичлари ва эпизодларига садоқат билан гувоҳ бўлардим. У онасига ҳам бемалол дилидагини айта оларди, фон Погвиш хоним ҳам шундай руҳий ҳолатларни бошидан кечираётгани боис қизининг иқрорларини аёл ва дўст сифатида қабул қиласиди. Онанинг диққати хушбичим граф Эдлингда эди, жанублик ҳофмаршал ва вазир, қизларининг васийси, хонадоннинг дўсти, эҳтимол, тез орада оила аъзосига ҳам айланса керак. Фон Погвиш хоним ушбу одамнинг вафосига ишонар, бунга асослари ҳам йўқ эмасди, унинг қатъий фикрини кутар, аммо ҳозирча у жим эди. Шундай қилиб, Амур она ва қизга тўлиб-тошиб ётган кундалик қувончу ғам-андуҳлар, умиду ноумидликлар ҳакида биргаликда дил изҳорларини тўкиб солишга шароит яратарди.

Август билан Оттилия саройда, театрда, отасининг уйида, асилзода-ларнинг йиғинларида кўришиб туришарди. Бироқ севишганлар одамлардан четда, хилватда ҳам учрашишарди, Ильм дарёси соҳилидаги уйли боғ, Гёте ва Оттилияning бувисига тегишли иккита боғча улар учун овлоққина гўша эди. Бу учрашувларда мен мудом қушчамга ҳамроҳлик қиласидим, у бу жойларни қанчалик баҳтиёр хўрсинишлар билан тарк этар ва кўмагим учун мени бағрига босиб миннатдорчилик билдирардики, бундан ҳайрон қолмай иложим йўқ эди; бу учрашувларнинг нечоғлик самарасиз, сухбатларининг маънисиз, ясама туюлишини мен ўргада воситачи сифатидагина ҳис этмасдим. Бу ланж, дудмал сухбатлар аллақандай рақслар, саройдаги ғийбатлар, ўтган ёки бўладиган кўнгилоchar саёҳатлар атрофида айланар, гап йигитнинг отаси олдидаги хизматларга бориб тақалсагина, сухбат бироз жонланар эди. Аммо Оттилия бу зерикиш ва нокулайликни тан олгиси келмасди. У бундай зўрма-зўраки сухбатлар ва сайрлар чоғида юраклар бир-бирига қўшилиб кетади, деб хаёл қиласиди ва ҳаммасини онасига айтиб берар, онаси ҳам ўз навбатида, граф тез орада унга қатъий фикр айтар, ҳамма нарса шунга қараб бормоқда, деярди.

Аҳвол мана шундай кечаётган пайтда қизгинанинг ҳаётига бир воқеа кириб келди, бу ҳақда мен ички бир титроқ ва ҳаяжонсиз гапиролмайман, чунки бу воқеада иккаламиз учун ҳам давримизнинг бутун улуғлиги ва гўзаллиги ўз мужассамини топган эди.

Ўн учинчи йилнинг тонги отган, Пруссияда юз бераётган ажойиб воқеалар ва ватанпарварларнинг тантана қилишлари, уларнинг бетайин қирол устидан ғалабалари, кўнгилли корпусларнинг юзага келиши, уларга

қўшилишга интилаётган энг олийжаноб ёшларнинг ҳатто билим олиш ва роҳат-фароғатдан ҳам воз кечиб, Ватан учун жонларини тикишга тайёр-ликлари – буларнинг ҳаммаси ҳақида, айтиб ўтганимдек, бизгача дастлаб мужмал, ноаниқ хабарлар келарди. Ташлаб кетган отасининг муҳити билан дугонам қалбан сезиларли алоқа боғлагани, Пруссиядаги қариндошлари уни янгиликлар билан таъминлаб туришлари ҳақида сизга гапирган эдим. Бечора қизгина, бизнинг жимжитгина дунёчамиизда яшаб туриб, аллақачон сезган, аллақачон тахмин қилган, энди тайёрланаётган ва юз бериб улгурган воқеаларни эшитиб, титраб-қақшаб, куйиб-ёниб кетди. Қони ва руҳи билан у дахлдор бўлган қаҳрамон ҳалқ француз жабр-зулмининг шармандали изларини елкасидан улоқтириб ташлаш учун оёққа турган эди! У бутун қалби билан тантана килар эди, унинг ҳалқи намуна бўлиб Германияни ор-номус ва эрк учун курашга етаклаганидек, мени ҳам ўз ортидан эргаштириб, нафрати ҳамда ёркин умидларини у билан тўлиқ бўлишишга мажбур қилди. Ҳар ҳолда энди у шаҳарда илгаригидек ёлғиз эмас эди. Бу ерда, Наполеоннинг Райн иттифоқи осмони остида ҳам Ватан озодлиги учун кураш учқунлари ялтирай бошлади, камерхер фон Шпигель, йеналик маслаҳатчи фон Фойт сингари ёш дворянлар, пруссларни Ваймарда кечაётган аҳволдан хабардор қилиб туриш мақсадида улар билан хавфли алоқага киришишди. Кўп ўтмай Оттилия улар билан топишиб, махфий равишда уларнинг ҳаракатларида қизғин иштирок эта бошлади. У ўз ҳаётини хавф остига қўйди, мен ҳам бир томондан уни қайтариш учун, бошқа томондан ўз ихтиёrim билан сиёсий сирларда унинг ишонган кишисига айландим, худди Август фон Гёте билан учрашувларида дугонамнинг қизлик сирасорларига шерик бўлганим сингари. Улардан қайси бири мени қўпроқ қўрқитаётгани ва ташвишга солғанлигини ҳозир аниқ айтотмайман.

Маълумки, дастлаб ҳарбий ҳаракатлар кам умид уйғотди. Тўғри, Ваймар кўчаларида прусс ҳарбий кийимидағиларни кўриш Оттилияга насиб қилди, апрелнинг ўн олтинчисида, худди ҳозир юз бергандек эсимда, гусар ва егерларнинг отлиқ бўлинмаси шаҳримизга бостириб кириб, бу ерда ижарада яшаётган француз аскарларини асир олиб, уларни ўзлари билан ҳайдаб кетишидди. Императорнинг отлиқ аскарлари бундан хабар топиб, Эрфуртдан етиб келишидди, бироқ бу ерда пруссларни тополмай, куруқ қайтиб кетишидди: кейин маълум бўлди, шошилишган экан. Эртасига тонгда – Оттилиянинг қувончини кўз олдингизга келтиринг! – ҳалқ қувонч билан кутиб олган кичик Блюхернинг эскадрони, гусарлар ва яшил егерлар тантана билан шаҳарга кириб келишидди. Ўйин-кулги, ичкиликбозлик бошланди, бундай бегам-бепарвоникдан қўплар хавотирга тушишидди ва кўп ўтмай бутун қувонч елга учди. “Французлар!” деган қичкириқ эшитилди ва ҳалоскорларимиз зиёфатни қўйиб, куролларга ташланишидди. Пруsslарга нисбатан сон жиҳатдан анча кучли бўлган генерал Суон армияси шаҳарга ҳужум қилди, жанг узоқ давом этмади ва французлар шаҳарни қайтадан эгаллаб олишидди. Биз ҳозиргина вино ва егуликлар билан меҳмон қилаётган қаҳрамонларимизнинг қон тўкишларини кўриб кўз ёши тўкканча хоналарга беркиниб олиб, бурғу овозлари ва отишмаларга тўлиб-тошган кўчадаги тўс-тўполонни парда ортидан кузатиб ўтирадик; ҳарқалай жанг кўп ўтмай парк ва шаҳар четига чекинди. Галаба душман томонда қолди. У бундай ғалабаларга ўрганиб қолган эди, афсуски, буни ғалаённи бостиришдаги

ғалаба деб ҳисоблашди, устига-устак бу болаларча ва аҳмоқона бир ҳолат эдики, бу унинг тезда бостирилишида ўз исботини топди.

Хотиржамлик ва тартиб, у ким томонидан ўрнатилишидан қатъи назар, ёқимли. Биз французларни жойлаштириш ташвишига тушдик, шаҳар кучи ва имконияти етгунча уларни жой билан таъминлади, улар айни пайтда ва яна узоқ вақт шахримиз елкасида юк бўлиб ётди. Лекин тинчлик тикланди, кўча ҳаракати кеча-ю кундуз эркин эди, аҳоли душманинг наридан-бери ҳимояси остида ўзининг кундалик ишларига қайтиш имкониятига эга бўлди.

Эртасига Оттилия мени сайдига таклиф қилди, бунга уни қанақа сирли куч, қанақа олдиндан ҳис этиш туйғуси мажбур қилди, билмайман. Ёмғири кечада ўрнини майин, ёқимли апрель куни эгаллаган, қуёшли ҳаво баҳор умидлари билан нафас оларди. Кечагина жанг даҳшати чулғаган кўчаларда унинг изларини сесканиш билан кузатганча бемалол айланиш учун кишида аллақандай иштиёқ бор эди, ўқлардан илма-тешик бўлган уйлар, у ер-бу ерда қотиб қолган қон изларига қўзимиз тушганда биз аёлларнинг хайратланишимиз, бундан ҳам кўра, эркакларимизнинг жасорати ва мардлиги олдида бош эгишимиз ўша иштиёққа аралашиб кетарди.

Ям-яшил кенгликларга етиш учун биз, дугоналар, сарой ва бозор майдонидан чиқиб, кўтарма ёнидан айланиб ўтдик, кейин Ильм томон юриб, унинг соҳили бўйлаб майсазор ва бутазор орқали ёлғизоёқ йўлдан бориб, дараҳт пўстлогидан ясалган уйча ёнидан ўтдик-да, Рим вилласига етдик. Топталган ўт-ўланлар, у ер-бу ерда қолиб кетган қурол ва мундир бўлаклари жанг, қочиш ва таъқиб қилиш шу ергача етиб келганидан гувоҳлик бериб турарди. Биз бўлиб ўтган ва эҳтимол яна бўладиган воқеалар, саксония шаҳарларининг руслар томонидан эгалланиши, Эрфуртдаги император истехқоми ҳамда бостириб келаётган прусслар ва руслар оралиғида қисилиб қолган Ваймардаги оғир мухит, ҳерцог зоти олийларининг нокулай аҳволи, улуғ князининг бетараф Богемияга ва француз элчисининг Готага кетиши ҳақида сўзлашдик. Ёдимда бор, Август ҳақида, унинг отаси ҳақида ҳам гаплашдик, яқинларининг қистови билан шоир ҳавфли шаҳардан чиқиб кетган: кечада тонгда, Блюхер қўшинлари шаҳарга кириб келиши арафасида у извошда Карлсбадга жўнаб кетган, эҳтимол уларга дуч келган ҳам бўлиши мумкин.

Кимсасиз жойларда юришда давом этаверишдан кўрқдик ва орқага қайтмоқчи бўлдик, шу аснода ярим чақириқ, ярим инграшга ўхшаш овоз қулоғимизга чалинди, турган жойимизда қотиб қолдик. Қулоқ солиб турдик-да, сесканиб кетдик: йўл бўйидаги бутазор ичидан ўша нолиш, ўша чақириқ эшитиларди. Оттилия кўрққанидан қўлларимни қисиб олди, кейин кўйиб юборди, кўрқувдан титраганча, “ким у?” деб тақрор-тақрор сўраганча икковимиз гуллаган бутазор оралаб йўналдик. Бизнинг хайратимиз, ачинишими, довдирашимизни қай сўз билан ифодалай? Бутазор орасида, хўл ўтлар устида ниҳоятда кўркам йигит, ярадор жангчи, қаҳрамонона ҳужум иштирокчиси ётарди; жингалакmallаранг соchlари чалкаш-чулкаш бўлиб бошига ёпишиб кетган, нозиккина кўркам юзидағи соқоли эндиғина сабза урган, ёноқларидаги талвасали қизиллик манглайидаги сомондай сарик рангпарликка даҳшатли тарзда зид эди, лойга булғаниб ярим қуриган жойлари қотиб қолган мундири ифлос бўлиб кетган, пастки томони ярим қотган қонга беланган эди. Даҳшатли, шу билан бирга, кўтаринки, қалбни

ҳаяжонга солувчи манзара! Қаттиқ кўрқув ва ҳамдардлик билан унинг яраси, ахволини суриштириб саволларга кўмиб ташлаганимизни сиз яхши тасаввур қилоласиз.

– Сизларни менга Худонинг ўзи етказди, – деди у дағал шимолий немис лаҳжасида, аммо ҳар бир ҳаракат қилганида оғриқдан чиройли юзи буришиб кетганида такиллаган тишлари орасидан ҳавони тортарди. – Кечаги олишув ҷоғида бўқсамга ўқ тегиб, бирданига оёғим ишламай қолса бўладими, вақтинча одатдаги тикка туриб юришдан воз кечишимга тўғри келди, бу ерга эмаклаб етдим, бу ер бугун кечки ёмғир томчилашидан бироз заҳ тортган демаса, анчагина қулай, кеча эрталабдан бери шу ерда ётибман, яхшиси тўшакда ётсан бўлардику-я, андак иссиғим ҳам борми дейман.

Қаҳрамонимиз ўз аянчли ахволини мана шундай, талабалардек баён қилди. У ростдан ҳам талаба экан.

– Ҳайнке, Фердинанд, – деди у чучук тилда. – Бреслаулик юрист, кўнгилли егер. Ҳонимлар энди мени нима қилишмоқчи?

Дарҳақиқат, нимадир қилиш керак, бундай пайтда дарҳол тўғри маслаҳат топила қолмайди. Бу саргузаштдан довдираб қолишимиз, эркатойимиз, прусс қаҳрамони билан учрашувимиз, дабдурустдан, шундок яқин, моддий, бесаранжом воқеликда мешчанларга хос Ҳайнке исмли бу йигитнинг олдимиздан чиқиши бизни эс-хушимииздан, аниқ бир қарорга келишдан маҳрум қилган эди. Нима қилмоқ керак? Иккита ёш қизнинг кўз олдида ётган, бўқсасидан яраланган, бунинг устига беҳад чиройли йигитга қўл теккизишдан тортиниб туришларини сиз тушунасиз, албатта. Уни кўтариб олиб кетайликми? Қаёқка? Француздар билан тўлиб-тошган шаҳарга олиб боролмаймиз-ку ахир. Ҳар қандай яқинроқ, вақтинчалик бошпанага ҳам, майли у дарахт пўстидан ясалган уй бўлақолсин, етиб боришга на унинг, на бизнинг кучимиз етмасди. Тўғри, унинг гапига қараганда, ярасининг қони тўхтаган, лекин оёғи қаттиқ оғрирди, биз суюган тақдиримизда ҳам ўзи юриши ҳақида гап бўлиши мумкин эмас эди. Бизнинг қўлимиздан келадигани қаҳрамонни шу жойда, бирорта бутанинг панасида қолдириш, – у ҳам шу фикрда эди – шаҳарга зудлик билан қайтиб бориб, ишончли кишиларга топилдигимиз ҳақида хабар бериш ва бамаслаҳат керакли ёрдамни уюштириш эди, холос. Ёлғиз иккаламизнинг қўлимиздан бир иш келиши қийин эди. Фердинанд қўлга тушиб қолишдан қўрқарди, миясида нуқул тезроқ тузалиб, душманнинг бошини янчиш, Ватанни озод қилиб, Парижнинг кулини қўкка совуриш учун қайта хизматга ва жангга киришиш хаёли ҳукмрон эди.

Уни кутқазиш йўлидаги қийинчилкларга қарамасдан, у мана шу режаларини ияги совукдан титраб баён қилди. Уни қийнаётган чанқоққа қарши Оттилия сумкаласидан бир нечта ялпизли конфет олиб берди, у буларни дарҳол ҳузур қилиб сўришга тушди. Ёнимда олиб юрган ҳидлайдиган тузли шишаҷани у эркакларга хос фурур билан рад этди, аммо елкамизга ташлаб олган шол рўймолларни олди, биттасини ёстиқ қилдик, иккинчисини устига ёпиб қўйдик, хайрлашаётib у бизга шундай деди:

– Ҳа, энди ҳонимлар, нима қилсанлар қилингларки, мени шу ботқоқликдан қутқазинглар! Афсуски, сизлар билан мулоқот қилишдан ҳозирча маҳрумман.

Ҳаёт ва мамот ўртасидаги қаҳрамон борган сари бўшашиб шу сўзларни айтди. Биз кетиши олдидан унга тиззаларимизни букиб хайр-хўш қилдик, у

бунга жавобан оёқларини бир-бирига уриб салют бергандек ҳаракат қилди ва биз кетдик.

Шаҳарга қандай етиб келганимизни тасвирилашга сўз ожиз. Қувонч, кўркув ва кўтарилик қанотида бўлсак-да, бирор одам бунақа ҳис-ҳаяжонни пайқаб қолмаслиги учун ўзимизни қўлга олишимиз лозим эди. Бу ажойиб инсонни асрар қолиш режасини ўзимизча тузишга қурбимиз етмасди. Уни иккинчи кеча очиқ осмон остида ўз ҳолича қолдирмаслик ва бирор бошпанага жойлаштириб, яхши парваришни ташкил этиш – гангиган миямизда кезаётган ягона фикр шу эди. Шу билан бирга, унга қарашда ўзимиз ҳам албатта иштирок этишимиз зарур, деган қатъий қарорга келдик.

Оналаримизни сиримиздан воқиф қилиш фикри туғилди, аммо биз уларнинг кўмагига ишончимиз комил бўлса-да, улар қандай маслаҳату қандай ёрдам беришлари мумкин эди? Эркакларнинг мададисиз ишимиз битмасди, қарашлари биз билан мос инсон, камерхер жаноб фон Шпигелга маслаҳат солишига қарор қилдик, у ўша ҳалокатли прусс хужумининг ташкилотчиларидан бири эди, шубҳасиз, ўша тўқнашув қурбонларидан бирига ёрдам беришдан бош тортмасди. Айнан ўша кунлари у озодликда эди, у ва унинг дўсти Фойт бир неча кун кейинроқ бир манфаатпараст қўшнисининг чақуви орқасида қамалишди, икковлари ҳам, агар Ваймарга келган Наполеон ҳерцогиня Луизага хурмати туфайли уларнинг гуноҳидан ўтмаганида эди, таптортмас ватанпарварларидан боис бошларидан жудо бўлишарди.

Бу энди шунчаки омади гап. Бундан кейин майда-чуйда деталларга тўхтаб ўтирамайман; қисқаси, фон Шпигель ишончимизни оқлади ва зудлик билан, бор кучини ишга солиб, зарур чораларни кўрди. Махфий тарзда паркка бўлак-бўлак қилинган замбил келтирилди, қисқа муддатда қуруқ кийим-кечак, егуликлар билан таъминланди, жарроҳ ярадорга биринчи ёрдам кўрсатди, қош қорайган пайтда фуқаро кийимидағи йигит шаҳар чеккасидаги Бастилия деб аталадиган саройга ҳеч бир қаршиликка учрамайгина келтирилди, камерхер бошқарувчи билан келишиб, у ернинг чордоғидаги хоначани унга бошпана сифатида тайёрлаб қўйган эди.

Бутун дунёдан панада бизнинг мард дўстимиз бир неча ҳафта қасаллик билан олишиди, нега десангиз, йирингли яра устига зах жойда ўтказилган ёмғирли кечаки туфайли қаттиқ йўтал билан бирга, катар¹ орттириб олган, оқибатда иситма ва оғриқ зўрайиб кетган эди. Агарда бемор ёш, яхши феъл-атворли, ҳамиша қувноқ кайфиятда бўлмаганида, тезроқ янгидан жангга киришиш иштиёқи билан ёнмаганида, доктор қийин аҳволда қолган бўлар ва эсон-омон тузалиб кетишига ҳеч қандай кафолат бўлмасди. Бемордан тинмай хабар олиб турган доктор ва уни егуликлар билан таъминлаб, парвариш қилиб турган бошқарувчининг меҳнатларини бўлишиш мақсадида Оттилия икковимиз ҳар куни лиқиллаб турган зинапоядан унинг хоначасига кўтариладик, унга вино, шакарга ботирилган мевалар ва бошқа тансиқ нарсалар келтирадик, қизиқарли китоблар олиб келиб ўқиб берардик, аҳволи дуруст бўлса, у билан гап сотишиб ўтирадик, унинг учун хатлар ёзардик. У бизни ўз ҳалоскор фаришталари ҳисобларди, негаки унинг мулоҳазакор-бегараз руҳдаги феъл-атвори ортида юмшоқ қалб яширинган эди. Агар у бизнинг эстетик қарашларимизга қизиқиши билдиримай, улар устидан кулса, хаёлида ўз ҳукуқшунослиги, Ватан ташвиши ва тезроқ соғайишидан ўзга фикр бўлмаса, унда биз бажонудил тан оламиз: модо-

¹ Катар – шиллик пардаларнинг яллиғланиши.

мики шеърият ўз вужудингда мужассам экан, унинг устидан кулсанг, уни тушунмасанг ҳам майли – биз учун бу чиройли, очиқкўнгил, олийжаноб инсон шеъриятнинг чинакам тимсоли, орзу-умидларимизнинг рўёби эди. Бир куни, унинг ҳузуридан чиқиб, зинапоядан тушаётганимизда Оттилия мени жимгина бағрига босди, мен ҳам бунга жавобан уни қучоқлаб қаттиқ ўпдим, бу изҳордан ўрта асрдан қолган зинапояда ҳаётимиз қил устида қолиши мумкин эди.

Бу ҳис-ҳаяжон ва кўтаринкиликка тўла ҳафталар эди; улар бизнинг қизлик ҳаётимизга ажойиб мазмун олиб кирди, негаки бир неча ташвишли кунлардан сўнг ёш қаҳрамоннинг борган сари соғаяётганини кўриш қувончли эди, унинг ҳаётини сақлаб қолиш бизнинг ватан олдидаги хизматимиз эди-да. Биз худди туғишидан опалардек қувончимизни, шу билан бирга, ёқимтой тарбияланувчимизга нисбатан қалбимизда туғилган ҳиссиётларимизни бир-биришимизга изҳор қиласардик. Иккаламизнинг қалбларимиздаги раҳм-шафқат ва ватанпарварликка яна қандайдир нозик, сўз билан ифодалаб бўлмайдиган туйғулар аралашганини ўзингиз сезиб, билиб оласиз; менинг ҳис-туйғуларим бу ерда ҳам жозибали Оттилияning туйғуларига йўлбошчилик қилди, яъни уларга ён берди – шундай бўлиши керак эди. Мен шўрликкинага Фердинанднинг оддийгина ташаккури насиб қилди, холос. Аммо унга ярашиб турган руҳан камсукумлиги, шундан келиб чиқадиган фазилатларга тўлиқ бепарволиги – мен буларни ташқи гўзаллик билан алмаштиридим-да, аввал бошиданоқ ҳеч нарсага умид боғламай, бу романда бор-йўғи ишончли киши роли билан чекланиб ақлли иш қилдим. Менинг табиатим унга қаршилик қилмади, рашқ қилишдан мени нафақат дугонамга бўлган муҳаббатим, нафақат унинг нафосатидан дўстона фахрланишим, нафақат Фердинанднинг икковимизга ҳам бир хил муомалада бўлгани сақлаб қолди; мен инсон қалбига хос кечирувчанлик билан сезардимки, у ҳеч қачон дугонамга нисбатан дўстона-эркин оҳангни ўзгартирмайди; бундан ташқари, тағин бир учинчи фикр ҳам менга кўмакка келди: яъни бу янги, кутилмаган ҳодиса Оттилияни Август фон Гёте билан сирли, баҳт келтириши гумон бўлган иттифоқдан чалғитиши мумкин эди. Шунинг учун у менинг бўйнимга осилиб, Фердинандга нисбатан туйғуларида қандайдир ўзгача, қалбida шу пайтгача туғилмаган нимадир борлигини, ҳаёт унга дўстлик билан чинакам муҳаббатни фарқлашни ўргатганини изҳор қилганида беҳад хурсанд бўлганимни, қониқишимни яшириб ўтирамадим. Ҳайнкенинг дворянлар тоифасидан эмас, балки сиlezиялик оддий мўйнафурушнинг ўғли эканлигини, Оттилия фон Погвишга мутлако жуфт бўлолмаслигини билиб қувончим сўниб қолди. Шуни англаб етгани учунгина у Оттилияга нисбатан дўстона-эркин муносабатини ўзгартирмадими ёки ўзга сабабданми, бу энди бошқа масала.

Фердинанднинг соғайиши арафасида асилзодалар фасли ниҳоясига етди, гарчи театр эшиклари ҳали очиқ бўлса-да, бироқ саройдаги, кейинги пайтларда факат француз зобитлари етакчилик қилган тантанали зиёфатлар, баллар аҳён-аҳёндагина ўтказиладиган бўлди. Августни ҳам қишки пайтлардагига нисбатан камроқ кўрардик, паркдаги учрашув ва сайрлар бутунлай тўхтамаган бўлса-да, анча камайган, негаки отасининг сафарга кетгани боис уйдаги ишлари кўпайган эди. Фердинанд воқеаси ғамхўрлик билан сир сақланди, бир нечта шундан хабардор кишилардан ташқари каптархонадаги топилдигимизни ҳеч ким билмасди. Бироқ Оттилия бу

ҳақда камер-ассессорга айтиш истагини ҳис этди – аввало, дўстлик ва ўзаро ишонч юзасидан, кўпроқ, эҳтимол менга шундай туолгандир, қани у бизнинг саргузаштларимизни қандай қабул қиласкин, юзида қандай ўзгариш бўларкин, деган қизиқувчанлик туфайли. У бу хабарга бепарво қаради, айниқса, Ҳайнкенинг оддий фуқаро оиласидан эканлигини билгач, ҳатто масхаралади. Бу унинг деярли қизиқиш билдиримаганини, тўғрироғи, воқеадан ўзини четга олишни истаганини англатарди, шу боисдан бу ҳақда жуда кам, тасодифан гапирилмаса, умуман тилга олинмасди, Август қаҳрамонимизнинг соғайиши ва бу шаҳарда уч-тўрт кун бўлиши ва тез орада кетишидан атайлаб бехабар эди ёки кам биларди.

Бу ҳикоям билан мен воқеаларнинг боришини олдиндан пайқадим. Фердинанд биз кутганимиздан ҳам тезроқ тўшақдан турди ва оёғини машқ қилдириб, кулбачаси бўйлаб қўлтиқтаёқда юра бошлади. Ёқимли баҳор қуёши унинг халоскор қамоқхонасига фақат туйнук орқали мўраласада, ўз ишини қилди, уни руҳлантириди ва жонлантириди, баҳордан янада кўпроқ завқлансин учун турар жойни ўзгартиришга қарор қилишди: бошқарувчининг Кегельплацда, сарой сайхонасининг орқасида этиқдўзлик устахонасини юргизиб турган жияни ўша ердаги битта хонани бизнинг беморимизга беришга рози бўлди ва дастлабки июнь кунларидан бирида у романтик бошпанасидан ўша ёққа кўчиб ўтди, у ерда дарё бўйида скамейкада ўтироволиб қуёшда исиниши, яшил кенгликларни, Овчилар уйчаси атрофидаги дараҳтзорларни, Тифурт хиёбонини завқланиб томоша қилиши мумкин эди.

Ўша кунлари баҳтимизга вақтингчалик сулҳ тузилиб, ёзниг охиригача бўлса-да, тарихий воқеаларда танаффус насиб этди, мен афсуски демаяпман, чунки ундан кейин юз берган воқеалар даҳшатли қийинчиликлар ва изтироблар ичра кечган бўлса-да, озодлик ва шон-шуҳратга етказди. Бу орада шаҳримиздаги ҳаёт анча изга тушиб қолди, ҳарбийларни жойлаштиришнинг охир-кети кўринмаса-да, буни ҳам бир амаллаб уddaладик. Аслзодаларнинг ўйин-кулгилари, ҳар замонда бўлсаям баҳорнинг охирларига келиб яна бошланди, ёнокларига қон югуриб, анча тўлишган бизнинг жангчимиз фуқаро кийимида эҳтиёткорликни қўлдан чиқармай ўйин-кулгиларда иштирок этиб турди: менинг онам, Оттилияning онаси, Эглоффштайнлар хузурларида, фон Вольцоген хонимнинг салонида ва бошқа уйларда қаҳрамонимиз билан бирга кўплаб қувончли, шу билан бирга, мазмунли соатларни ўтказдик, ёшлик гўзаллиги ва рицарларга хос эркинлиги туфайли ҳамма жойда уни ҳурмат билан қучоқ очиб кутиб олишарди. Чунончи, доктор Пассов унинг учун ўзини ўтга ҳам, сувга ҳам уришга тайёр эди, чунки унда ўз таълимотининг моҳиятини, яъни эллинларга хос гўзаллик билан ўз юртига хос жанговар эркесварликнинг ўйғунлигини кўрди.

Фердинандга келсак, у ҳамма билан бир хил қувноқ муносабатда бўлар, биз билан, яъни Оттилия билан муомаласи жаноб фон Гётенинг рашкини қўзғаши даргумон эди, худди тун билан кундек бир-биридан фарқ қиласидиган бу икки йигит бирор кун учрашиб қолишадиган бўлса ҳам Оттилия бунга йўл қўймаган бўларди. Аниқки, у қаҳрамонимизга нисбатан қалбida туғилган ҳис-туйғулар учун тунд ошиғи олдида ўзини айборд сезарди, буни у дўстлик бурчига хиёнат деб биларди, уларнинг учрашувларидан унинг виждони қийналган бўларди. Бу воқеага шундай

назар билан қарашга ундаған маңнавий маданияти мени ҳар қанча ҳайратта солса ҳам, барибир, хавотир ичида шу хulosага келдимки, менинг умидларим ушалмайды ва Ҳайнке воқеаси Буюкнинг ўғли билан боғланган ришталарни узмайды.

– Ҳа, Адель, – деди у менга бир қуни, кўк кўзлари хира тортиб, – мен Фердинанд тимсолида баҳт, зиё, қалблар уйғунлигини тушуниб етдим. Бироқ уларнинг таъсири қанчалик улуғвор бўлмасин, биздаги олийжаноблик олдига зулмат ва изтироблар қўядиган талаблар анча чуқур, қалбим тубида мен ўз қисматимни кўряпман.

– Сени Яратганинг ўзи асрасин, азизам! – дея олдим, холос, байни дийдаси қотиб қолган қисматга дуч келгандек, ичим музлаб кетди.

Ҳайнке кетди. Биз уни яна кўришимиз лозим эди, лекин бу гал, етти хафта биз билан бўлгач, дастлаб ўз юрти Силезияга, мўйнафуруш оиласидаги яқинларини кўриш учун жўнаб кетди, у ерда ярасининг тўлиқ тузалишини кутиб, кейин дарҳол тағин армияга ўзини отмоқчи эди. Оттилия икковимиз бу йўқотишга аччиқ кўз ёши тўқдик, аммо икковимиз бундан буён у билан дўстлигимизни мудом хотирамизда сақлаймиз, дея бир-биrimизга қасамёд қилдик. Унда бизнинг идеалимиз, “Лира ва қилич” кўшиғида куйланган алангали немис йигити бутун қони-ю, тани билан ўз мужассамини топган эди, қон ва тан идеалга ҳамиша зид бўлганлиги ва эс-хушни жойига келтириб қўювчи таъсири борлиги боис, очиғини айтадиган бўлсан, айрилиқнинг ўзига яраша хайрли томони ҳам бор, у бутун соғлиги билан намоён бўлишда идеалга имкон яратади. Охирги пайтларда Фердинандни биз оддий фуқаро кийимида кўрган эдик, энди эса у хаёлнимизда, биз уни илк марта кўрганимиздагидек фаҳрий ҳарбий либосда жонланарди – мундоқ ўйлаб қарасанг, ҳарбий форма эркак кишининг обрў-эътиборини ошириши – бу, катта имтиёз. Қисқаси, унинг тимсоли бизнинг тасаввуримизда кундан-кунга ёругрок бўла борди, бошқасининг, яъни Августнинг тимсоли эса, ҳозир буни билиб оласиз, борган сари қора булат билан қопланарди.

Учинчи августда вақтингчалик сулҳ тугади, бу орада Пруссия, Россия, Австрия ва Англия француз императорига қарши бирлашиб олишди. Ваймаримизга прусс лашкарбошилари Блюхер, Бюлов, Клайст, Йорк, Марвиц, Тауерцинларнинг ғалабалари ҳақида узук-юлук хабарлар келиб турарди. Фердинандимиз ҳам қаердадир шу ғалабаларга ҳисса кўшаётгандир, деган фикр қалбларимизни ғуур ҳиссига тўлдиради, бироқ, эҳтимол Ватан учун тўкилган унинг ёш қони яшил кенгликларни қизилга бўягандир, деган хаёл дилларимизни хира киларди. Биз деярли ҳеч нарса билмасдик. Шимолий ва шарқий варварлар яқинлашиб келишмоқда – биз билган хабарнинг бор-йўғи шу эди. Улар қанчалик яқин келишса, “варвар” деган ном шунчалик кам тилга олинарди, французлардан кескин юз ўғирган аҳоли ҳамда аслзодаларнинг умид ва ҳурмат-эътиборлари уларга шунчалик кўп қаратиларди: қисман шунинг учунки, одамлар шарқий жангчиларда ғолибларни қўра боғладилар, уларни итоаткорлик билан олдиндан юмшатишга умид боғладилар, аслида бунинг сабаби шуки, одам деганлари қарам мавжудот, у мавжуд шарт-шароитлар ва воқеалар билан ички уйғунликда яшаш талабига бўйсуниб келган, энди бўлса, қисматнинг ўзи одамларни аввалги қарашларини ўзгартиришга ундағи чоғи. Шундай қилиб, маданиятга қарши қуролланган варварлар бир неча кун ичида халоскорларга ай-

ланиб қолишиди, уларнинг ғалабалари ва муваффақиятли ҳужумлари Ватан ва озодлик учун оммавий қўтариқиликнинг ва француз босқинчиларига қарши нафратнинг юзага чиқишига йўл очди.

Октябрнинг ўрталарида Ваймар қўчаларида қўрқув аралаш ҳаяжон билан казакларни кўрдик. Француз элчиси қочиб кетди, агар унга бемалол жўнаб қолишга изн берилган бўлса, бунинг сабаби фақат шундаки, қисмат нимани ҳозирлаётгани ҳали номаълум эди, куч ва муваффақият билан ҳамжиҳатликка эришиш учун ўзини қандай тутиш кераклигини ҳеч ким билмасди. Йигирма биринчи октябрга ўтар кечаси шахримизга беш юзта хунн отликлари бостириб киришиди ва уларнинг қўмондони, Гайсмир деган одам, шапкасини қулоғигача бостириб кийиб олганча тунда саройда, ҳерцогнинг тўшаги ёнида туриб, унга иттифоқчиларнинг Лайпцихдаги ғалабаси ҳақида хабар қиласди. Уни шоҳ Александр ҳерцог оиласини ҳимоя қилишга юборганини айтади. Шунда зоти олийлари кимнинг фурсати етганини, ақлли ҳукмдор воқеалар устидан ҳукмронликни қўлдан чиқармаслик учун ўзини қандай тутиши кераклигини англаб етди.

Азизим, бу қандай кунлар эди-я! Шаҳарнинг теварак-атрофида кетаётган жангларнинг шовқин-сурони даҳшат солиб кўчамизгача етиб келган эди. Французлар, райнликлар, казаклар, прусслар, мадъярлар, кроатлар, славенлар – ёввойи башаралар алмашинар, бунинг ниҳояси йўқдек эди, французлар Эрфуртга чекиниб, қароргоҳларини ташлаб чиқишига ултурмаслариданоқ у ерни иттифоқчилар эгаллаб олишди, бизнинг устимизга тураржойталаб ҳарбийлар ёғилишди, каттами-кичикми, ҳар бир хонадонни ҳаддан ташқари оғир талаблар билан эгаллаб олишди. Одамлар билан тўлиб-тошган шаҳар қанча-қанча дабдаба-ю, улуғларни қўрмади дейсиз. Россия ва Австрия подшолари, прусс валиаҳд шаҳзодаси саройни эгаллаб олишган; қўп ўтмай канцлер Миттернах ҳам қўшилди, ҳаммаёқда амалдорлар ва генераллар гиж-гиж эди, ҳеч нарса талаб қилиб бўлмайдиган энг камбағаллар бор-йўғи томоша билан чекланишарди, холос. Биз, бир чеккада сиқилиб қолганларнинг эса ош-овқат ташишдан бошқа ишимиз йўқ эди, ҳамма иш билан, сон-саноқсиз талабларни бажариш билан банд бўлганлигидан, нафас олишга вақти бўлмас, шу боисдан қўшниси ҳақида қайғуришга ҳеч кимнинг кучи етмас эди, биз одатда, юртдошларимизнинг аҳволидан жуда кечикиб хабар топардик.

Гарчи кўргиликлар юки кўринишдан ҳамманинг елкасига бирдек тушаётган бўлса-да, баҳтсизлик ва жабр-зулм бошига тушган одамлар орасида фарқ бор эди: умумий ватанпарварлик ишининг ғалабаси учун қувонаётганлар бу кийинчиликларни осонроқ, қувноқроқ бошдан кечиришарди. Бу ғалаба казаклар, бошқирдлар, шарқлик гусарлар, ёввойи, тартибсиз дўстлар мадади билан кўлга киритиладими, бунинг фарқи йўқ эди. Ғалаба барча азоб-уқубатларни қайта-қайта ювиб кетар ва уларга бардош беришга куч бағишлиарди. Менинг онам ва Оттилиянинг онаси ҳам ўз хонадонларида генераллар ва уларнинг адъютантларини сақлаш, уларга хизмат қилишга мажбур бўлишди, бизлар, уларнинг қизлари, том маънода бу гердайган жанобларнинг чўриларига айландик. Суюкли дугонам пруссларга бўлган хурматини энди ортиқ яширишга мажбур эмас эди. Ҳар қанча азобларга қарамасдан, қувончдан яйраб-яшнаб юрар, кўпинча, тушқунликка тушиб юрадиган мени ҳам улуғ, ёруғ кунлардан ўзи билан бирга завқланишга мажбур қиласди, бу кунлар иккаламизга ҳам

севимли, ёркин сифатларни, яъни биз қутқарган, ҳозир биз билмайдиган манзилларда озодлик учун қонли курашни ниҳоясига етказища кўмакдош бўлган қаҳрамон йигит сифатларини баҳш этди. Анча-мунча бежаб-бўяб кўрсатилганига қарамасдан, жамоатчилик, умумхалқ кайфиятидан андак фарқланадиган бизнинг туйғуларимиз, аҳволимиз ҳақидаги гаплар мана шулар. Оттилиямни ғайриоддий, юрагимга ҳамиша кўркув соладиган муносабатлар боғлаб турган машхур хонадондаги аҳвол бутунлай ўзгача эди! Германиянинг улуғ шоири ўша кезларда шаҳардаги, ҳерцогликдаги, эҳтимол, юксак туйғулар чулғаган бутун мамлакатдаги энг баҳтсиз одам эди. Олтинчи йилда унинг баҳтсизлиги бунинг ярмича ҳам бўлмаган эди. Хурматли баронессамиз Штайн уни тушкунликка тушган деб ўйлади. У ҳаммага ўзи билан сиёсий мавзуда гаплашмасликни маслаҳат берарди, чунки юмшоқ қилиб айтганда, Гёте ялпи қувонч, завқ-шавққа қўшилмасди. Бизнинг қайта тикланиш йилимизни, чинакам аҳамиятли, тарихимизда ярқираб турадиган йилни у “ғамгин”, “энг даҳшатли” йил деб хисоблади. Аслида, бу йилнинг рад қилиб бўлмайдиган даҳшатлари ҳаммамиздан ҳам кўра унга камроқ дахл қилди. Апрелда, уруш саҳнаси бизга яқинлашиш хавфи туғилган, прусслар ва руслар теварак-атрофни эгаллаб олиб, Ваймар уруш алангаси, талон-торож исканжасида қолиш арафасида турганда, Август билан онаси олтмиш уч ёшли, гарчи ҳали бақувват бўлса-да, тез-тез оғриб турадиган, аллақачон тинч, хотиржам хаётга одатланиб қолган одамнинг олтинчи йилгидан ҳам баттарроқ азобларга дуч келишини исташмади. Улар уни зудлик билан ўзининг севимли манзили Богемияга, Теплицга жўнатиб юбориши, у ерда бемалол хотираларининг учинчи жилдини охирига етказиши мумкин эди. Бу пайтда она-бала даҳшатли кунларни кутиб олиш учун уйда қолиши. Буларнинг ҳаммасига майли деймиз, ҳеч бир эътирозим йўқ, мен-ку эътиroz билдиrmайман. Унинг жўнаб кетганини коралайдиган, буни каттакон жанобнинг худбинларча ўзини авайлаши деб ҳисоблайдиган одамлар бор эди. Бироқ шундоққина Ваймар бўсағасида унинг извошини учратган ва “Фауст” ижодкорини дарҳол таниган Блюхер армияси уни шунчаки сайр қилишга кетаётгандир, деб ўйлаган бўлишлари мумкин. Улар уни ўраб олишиб, ҳеч нарсадан хабарлари йўқ шоирдан куролларига оқ фотиҳа беришни чин кўнгилдан илтимос қилишган, бироз каршилик кўрсатиб тургач, у илтимосларини бажарган – зўр манзара-а, нима дедингиз? Фақат жиндак қийин ҳолат, унинг тагида ётган озгина тушунмовчилик дастидан бироз оғир.

Ёзнинг охиригача шоиримиз Богемияда бўлди. Кейин, у ерда ҳам нотинчлик бошлангач, уйга қайтди, бор-йўғи бир неча кунга, холос; жануби-шарқдан Ваймарга австрияликлар яқинлашаётганини эшифтгач, Август уни яна сафарга жўнатиб юборди: у Илменауга кетиб, у ерда сентябрнинг бошлигача турди. Ўшандан бўён у орамизда яшаяпти, уни қадрлайдиган ҳар бир одам айтиши мумкинки, барчамизнинг бошимизга тушган уқубатларга у ҳам тенгма-тенг бардош берди. Бу келгиндиларни жойлаштиришнинг энг оғир даври эди, ҳамма тинчлик-осойишталик тилаган унинг башанг уйи ҳам карvonсаройга айланган эди: ҳафта давомида уницида ҳар куни йигирма тўрт киши овқатланарди. Уницида Австрия артиллерия бошқармаси бошлиғи граф Колларедо турарди. Эшифтган бўлсангиз керак, ўз вақтида бу ҳақда кўп гапирилди: аллақандай ғофилликданми ёки атайлабми, эҳтимол шунга ишонишганми, граф ва Гётега ўхшаган улуғлар омманинг

қизиқишиларига бегона бўлган, алоҳида муҳитда яшашади, дейишаркан-а? – Гёте графни кутиб олиш учун Фахрий легион орденини тақиб чиқсан, “Фу, жин урсин! – дея хитоб қилган Колларедо. – Шунақа нарсани ҳам одам тақиб юрадими?” Гётега шундай деган-а! У графга ҳеч нарса демаган. Аммо кейин бошқаларга: “Нима, энди император урушда енгилди, деб у берган орденни тақмайинми?”, деганини эшитишиган. У ва эски дўстлари бир-бирларини тушунолмай қолиши. Австриялиқдан сўнг уникига вазир фон Хумбольд келди, бу унинг руҳан яқин, йигирма йиллик дўсти, эски удумларга риоя қилишда Гётедан ҳам ошиб тушадиган космополит, ўз юртидан кўра чет элларда яшашни афзал қўрадиган одам. Олтинчи йилдан бошлаб Хумбольд пруссияликка, одамлар айтганидек, бошдан-оёқ яхшигина пруссияликка айланди. Наполеон шундай қилди. У немисларни тубдан ўзгартириди, унга қойил қолиш керак. Холис ниятли қарашларнинг сутини аждаҳонинг куйдирувчи қонига айлантириди, бўшанғгина гуманист фон Хумбольдни шиддаткор ватанпарвар ва озодлик учун курашчига айлантириди. У бизнинг қарашларимизни ўзгартириб, ўзимизни ўзимизга қайтарганини Цезарнинг айби деб ҳисоблаймизми ёки хизмати дебми? Билмай қолдим.

Уша пайтда Пруссия вазири билан буюк шоир ўртасидаги суҳбат тафсилотлари асилзодаларнинг қулогига етиб келиб, оғиздан-оғизга ўтган. Берлин ҳавосидан тўйиб шимирган Хумбольд Шиллер ва Гётенинг ўғиллари ҳам ёш Кернерга ўхшаб қилични қўлга олиб, умумнемис ишининг ҳимоясига киришишса керак, деб баҳордан бошлаб кутган эди. Энди бўлса, у эски дўстининг кайфияти ва Августнинг режаларини суроштириб билиб олганидан сўнг ҳамма беҳад улуғ, беҳад ажойиб деб ҳисоблаган буниси тунд бепарволик билан, униси аянчли ғазабнок ишончсизлик билан қарашларини билиб олди. “Озодлик? – сўради у Хумбольддан аччиқ киноя билан. – Бу ҳалокатга элтувчи озодлик. Бундаги дори-дармон касаллиқдан ҳам ёмонроқ. Наполеон енгилдими – э, йўқ, ҳали бунгача бориб етгани йўқ. Тўғри, у ҳозир заҳарланган буғуга ўхшайди, лекин бу ҳолатдан юпанч топаяпти, бир кун келиб итлар тўдасини елкасидан иргитиб ташлаши ҳам эҳтимолдан холи эмас. Айтайлик, енгилди – хўш, кейин-чи? Ҳалқ уйғонди ҳам дейлик, нима қилиш кераклигини ўзи биладими? Буюк инсоннинг ҳалокатидан сўнг нима юз беришини бирорта одам англаб етадими? Французлар эмас, руслар бутун дунёга эгалик қилсинми? Казакларнинг Ваймарда туриши ҳам, бундек олиб карасанг, кўнгилга ўтиришадиган ҳолат эмас. Ёки уларнинг қилаётган ишлари французларнидан афзалроқми? Душмандан кўра ўз дўстларимиз бизни кўпроқ қийнашайпти. Аскарларимизга зўр-базўр етиб бораётган от-араваларни улар тортиб олишмоқда, жанг майдонидаги ярадорларимизни иттифоқчилар талашмоқда. Бу ҳақиқатни сентиментал сўзлар билан бўяб-бежашмокда. Сиёsatдан бели букилган ҳалқ, шу жумладан, унинг шоирлари ҳам ёқимсиз, мутлақо ярамас бир асабий ҳолатга тушиб қолган. Қисқаси, бу даҳшатли ҳолат!”

Хурматли хоним, дарҳақиқат, бу даҳшат эди. Энтузиазмни ўсал қиласидиган нарса шу эдики, улуғ шоирнинг ваҳимаси кундалик барча воқеаларни, уларнинг моҳиятини қамраб олган эди. Ҳақиқатдан ҳам, французларнинг чекиниши ва уларни таъкиб қилиш хунукдан-хунук вайронагарчилик ва ялпи қашшоқлашувга олиб келди. Энди шахримизда фўдайган прусс полковниги, шунингдек, рус ва австриялик лашкарбошилар

хўжайнинлик қилишар, ҳалқ шу ерда яшаётган ҳамда ўтиб кетаётган турли миллат ҳарбийлари жабр-зулми остида эзилиб кетган эди. Қамалдаги Эрфуртдан бизнинг лазаретларимизга ярадорлар, майиб-мажрухлар, иситма ва дизентерия билан оғриганлар оқиб кела бошлишди, кўп ўтмай эпидемия шаҳар аҳолиси ўртасида ҳам тарқалди. Ноябрда бизда беш юзта терлама билан оғриганлар бор эди – бу олти минг аҳолиси бўлган шаҳардаги аҳвол! Врачлар етишмасди, ҳамма докторларимиз касал бўлиб ётиб қолишган эди. Ёзувчи Йоҳаннес Фальк бир ойда тўртта боласидан айрилди, соchlари оқариб кетди денг. Айrim хонадонларда эса бирорта жон зарап кўрмади. Касаллик юқтиришдан қўркув, вахима ҳаммамизни ерга михлаб қўйди. Ҳар куни икки марта шаҳар қайнатилган мум билан дудланарди, шунга қарамасдан кўчаларда тобутлар ва мурдалар ортилган араваларнинг кети узилмасди. Очлик туфайли ўз жонига қасд қилганлар кўпайиб кетди.

Воқеаларнинг ташқи томондан кўриниши, таъбир жоиз бўлса, ҳақиқий аҳвол мана шундай эди, кимки ундан юқори кўтарилиб, Ватан ва озодлик идеалларини чуқур ҳис этолмаса, шўри куриди. Ҳар қалай бу кўпларнинг кўлидан келди: профессор Луден, Пассов, Оттилия ҳаммага ўрнак бўлди. Шоирлар сultonининг бундай идеалларни ҳис этолмагани ва буни истамагани ҳам ташвишларимиз ичидағи энг аччиғи эди. Унинг нуқтаи назарини ўғлига қараб аниқ билар эдик – ахир у ҳамиша отасининг акс садоси эдида, отасининг фикрларини бу тахлит болаларча кўр-кўrona такрорлашида кўнгилни аллақандай юмшатадиган, шу билан бир вақтда, ғайритабиий, одамни титратадиган алланима бор эди, сўzlари билан бизни ранжитгани ҳақида-ку гапирмаса ҳам бўлади. Отасининг Ҳумбольдга ва бошқаларга давримиздаги ғам-алам, адашишлар ҳақида, шунингдек, ундаги бемаънилик ва майнавозликлар ҳақида айтган гапларини гўё ўз фикридек дадил такрорлаганида, Оттилия бошини эгганча, аҳён-аҳёнда нигоҳини унга қаратиб, кўзлари ёшга тўлиб тингларди.

Тўғри, одам истаса, оёққа қалқиган, эс-хушини йўқотган, оммавий кўзғалишдан ҳаяжонга тушган ва руҳан қашшоқлашган кишиларнинг аҳволидан бемаъниликлар ва қулгили ҳолатларни топса бўлади. Берлинда Фихте, Шлайермахер ва Иффланд тишлирагача қуролланиб, қиличларини тош йўлга жаранглатиб урганча айланиб юришарди. Жаноб фон Коцебу, машҳур драматургимиз, амazonкалар гурухини ташкил қилмоқчи бўлди, Оттилия, агар имкон топса, ўшаларга жон деб қўшилишига ишончим комил эди, гарчи миям жойидалигида, бу фикр менга мутлақо ғайриодатий туюлаётган бўлса-да, эҳтимол, у мени ҳам ўзига қўшиб олган бўлармиди. У пайтда яхши дид етакчилик қилмасди, йўқ, кимки факат унга, факат маданият, мулоҳазакорлик, ўз-ўзига танқидий муносабатга диққатини қаратадиган бўлса, унга жуда қийин бўлади. Бундай одам, масалан, ўша вақтда дунёга келган, гарчи ўз даврида шунчаки ҳис-ҳаяжон кўзғаб, кўзларга ёш индирган бўлса-да, ҳозир ярамас туюладиган шеърларга эътибор қаратади. Бутун ҳалқ шеър ижод қиласи, апокалипсис¹лар, башоратлар ичра сузуб, уларга кўмилиб, нафрат ва қасоснинг қонли тўрига ўралашиб ётарди. Қандайдир руҳоний улуғ армиянинг Россияядаги мағлубияти ҳақида бутунлай ахлоқсиз сатира яратибди. Ҳурматли хоним, илҳомланиш – яхши нарса, аммо унда маданият белгиси мутлақо кўринмаса, ғоят шодланган фуқаро, тарихий фурсат унинг тубан инстинктларига йўл очиб берганлиги учунгина душ-

¹ Апокалипсис – насронийларнинг охирзамон ҳақидаги ривоятларни ўз ичига олган диний китоби.

маннинг иссиқ қонида чўмилаётган бўлса, бу энди, шубҳасиз, жуда ёқимсиз ҳолат. Тан олиш керак: яқиндагина уни кўрганлари заҳотиёқ қўркув ва эҳтиромдан жон таслим қилишга тайёр инсон устидан кулиш, таҳқирлаш, ҳақорат қилиш мақсадида тўқилган қофиябанд оқимлар мамлакатни тўлдириши – бу энди ҳазилга ҳам, жиддийликка ҳам кирмайди, муҳими, мулоҳазакорлик ва одоб доирасидан мутлақо йироқ, устига-устак бундай памфлетлар золимдан кўра кўпроқ ҳалқ ичидан чиқкан инқилоб фарзандига, янги давр ижодкорига қаратилган эди. Бу қовушмаган, беибо, ҳақорат ва тухматларга тўла “Келгинди Наполеонча” сингари ҳақоратномалар ҳатто Оттилияни ҳам хижолатдан лабини тишлаб қолишга мажбур қилди, мен буни сездим. Немис маданияти ва илмининг султони, Ифигениянинг куйчиси, ўз ҳалқи ақл-идрокининг бундай ахволидан қандай қилиб куюнмай ўтира оларди? “Кутурган Лютцовнинг¹ таъкиби”га ўхшамаган нарса билан ҳеч кимнинг бир пуллик иши йўқ” дея зорланарди у ўғлининг тили билан. Бундан биз озор чекдик, унинг қоғоз булғайдиган қонхўрлар билан бирга озодликнинг талантли куйчиларини, Клайст ва Арнди ҳам рад қилганини, уларнинг ижод маҳсулларини аҳмоқона намуна деб атаганини, афтидан, биз тушунишимиз зарур эди, ахир у ўз қаҳрамонининг ҳалокатига сабаб чек-чегарасиз тартибсизлик ва жаҳолат деб билди-да.

Кўряпсизки, улуғ инсонни қўлнимдан келганча ҳимоялашга, унинг ўша кезлардаги совуқконлиги ва бепарволигини кечиришга уринаяпман – бундай қилишни жуда истаётганимнинг сабаби у ижодкор сифатида аллақачон оммадан бегоналашиб, маълум маънода масофа сақлашга одатланган бўлишига қарамай, ўз қарашлари билан яккаланиб қолиши ўзига ҳам анчамунча ғам-ташвиш келтирган бўлса керак, деган ўйга бордим.

Бироқ у ўша пайтлар ўғли учун қилган иши, шусиз ҳам тунд феълатворли Августга – шу билан бирга, Оттилиянинг севгисига шундай оғир, шундай азобли оқибатларни келтириб чиқарганини кечиролмайман, ҳеч қаҷон кечиролмайман.

Гап шундаки, ўша улуғ ва даҳшатли йилнинг ноябри охирида ҳерцог прусслардан ибрат олиб, кўнгиллилар отрядлари тузиш учун ҳалққа мурожаат қилди, Йена профессорлари ва талабаларининг жанговар кўтарилишлари бунга туртки берди, мушкетларни қўлга олишга зориқиб турганлар ҳерцогнинг маъшуқаси, гўзал Ҳайгендорф хоним, асли Ягеман, тимсолида жўшқин тарафдорни топиши – шуниси борки, ҳерцогнинг бошқа маслаҳатчилари бунга қарши бўлишиди. Вазир фон Фойт бундай ёшлиқ оловини яххиси ўчиришни маъқул ҳисоблади. Зиёли одамларнинг ҳарбийча юришлари маъқул эмас, буни дехқон болалари ҳам қилишса бўлади, улар яхшироқ эплашади, деди у, кўнгиллиларга қўшилаётган талабалар эса, жуда етуқ илмли, умидли ёшлар, уларни тўхтатиш зарур.

Шоиримиз ҳам шу фикрда эди. У кўнгилли отрядлар тузишга норози бўлди, фаворитка² ҳақида шунаقا сўзларни ишлатдики, буларни сизга айттолмайман. Доимий хизматдаги аскарларни хурмат қиласман, деди у, лекин кўнгиллилар ҳаракати кичкина уруш, ўз жонини гаровга қўйиш дегани бўлади, армия сафларидан ташқаридаги ҳаракат – бу ўзига ортиқ даражада ишониш ва ўзбошимчалик. Баҳорда у Дрезденда Кёрнерларникида бўлган, уларнинг кенжা ўғиллари Лютцовнинг отлиқ аскарларига қўшилган, юрак-

¹ Адольф фон Лютцов (1782-1834) – Наполеон давридаги прусс қўмандони.

² Фаворитка – севимли қиз, аёл, маъшуқа.

юрагидан императорга содик бўлган курфюрст¹дан рухсат сўрамаган. Бу исёнкорликдан ўзга нарса эмас, ҳаваскор аскарнинг ўзбошимчалиги бошлиқларга ташвишдан ўзга нарса келтирмайди.

Буюк инсонимиз мана шунаقا. Агар унинг мунтазам ва кўнгилли армияни қарама-қарши қўйиши бироз сунъий, бироз муболағали бўлса-да, юрагининг тубида у ҳамиша ватанпарварлик ишига қарши эди, барибир, битта нарсани тан олиш лозим: кўнгиллилар масаласида ғоя эмас, балки иш нуқтаи назаридан у тамоман ҳақ эди. Уларнинг таълим олиши ҳам юзаки бўлди, очиғини айтганда, улардан ҳеч бир наф келмади, амалда улар ортиқча бўлиб чиқиши. Кўнгиллилар орасида дезертирлар кўпайди, улардан чиқкан зобитлар нўноқ эди, кўнгилли полкларнинг байроқлари одатда аслаҳаҳонада турарди, Франциядаги ғалабадан сўнг ҳерцог ёш йигитларни ташаккурнома билан уй-уйларига тарқатиб юборди ва шу билан уларнинг жанговар фидокорликлари ҳақидаги оммавий-поэтик тасаввурлар ҳисобга олинди. Ўтган йили Ватерлоода улар умуман чакирилмади. Булар энди майли. Энтузиазмдан йироқ бўлган шоиримиз бу ишни аниқ ва хушёр тасаввур қилса, агар у аввалбошданоқ кўнгиллилар ҳаракатига қарши бўлса, ишратпараст ва ҳарбий ишлар жинниси Ҳайгендорф хонимни койиб юрса – тўғриси, мен унинг бу аёл ҳақидаги номақбул сўзларини эслолмайман – бунинг сабаби асосан шуки, у қалбининг туб-тубидан озодлик урушларига ва кўнглида туғилган ғалаёнларга қарши бўлган, – чандон аччиқ бўлса-да, бу ҳақиқатни тан олмай илож йўқ.

Қисқаси, олий даражадаги чақириқ эълон қилинди, кўнгиллиларни рўйхатга олиш бошланди, эллик етти нафар отлиқ егерлар, пиёдалар тўқсон еттига. Ҳамма йигитларимиз, ёш дворянлар рўйхатдан жой олишди. Бу юкоридаги хўжайнинлар томонидан рағбатлантирилган маъқул иш эди, айнан шундай ҳодиса бўлгани, яъни ватанпарварлик бурчи зодагонларча кўриниш олгани беҳад ажойиб иш бўлди. Август фон Гёте ҳам иложсиз шу сафга қўшилди, бу ерда гап шахсий қарашлар, мартаба ҳақида эмас, балки ор-номус ҳақида бораради, тўғри, у рўйхатга жуда кеч, отасига айтмасдан пиёда егерларнинг эллигинчиси бўлиб ёзилди. Шу воқеадан сўнг кўп ўтмай улар ўртасида қаттиқ тортишув бўлиб ўтган. Айтишларича, отаси ўғлининг қилган ишини аҳмоқлик ва масъулиятсизлик деб ҳисоблаган, унинг бу ташлаган қадами ҳар қандай мақсаддан келиб чиқкан бўлиши мумкин, фақат ватанпарварлик туйғусидан эмас, деган ва аччиғидан у шўрлик билан бир неча кун гаплашмаган.

Ўғли бўлмаса у қийналиб қолган бўларди, бунга шубҳа йўқ, атрофидағи ноқулайликларга тоқат қилолмасди. Доктор Ример Ульрихга уйланиб, хонадонни тарқ этгандан бери (аслида бир жиҳатдан бунга Августнинг бу хушмуомала инсонга димоғдорлик билан, қўпол муносабатда бўлгани сабаб эди) шоир хузурида котиблиқ ишларини Жон деган одам бажарадиган бўлди, у вақтинчалик ишга олинган, ўғил отасига ёзув-чизув ишларида керак бўлади. Ҳақиқатнинг яна бир томони борки, ўғилни жўнатаби юбориши зарурати кўнглида ҳазм қилиб бўлмайдиган нотинчлик туғдирдики, ана шу ҳазм қилиб бўлмаслик унинг кўнгиллилар ҳаракати ғоясига қарши муносабати, унинг учун янги рух тимсоли бўлган ана шу ҳаракат билан боғлиқ ҳамма нарсани ёқтираслиги билан айнан мос келади. У Августнинг урушга кетишини зинҳор-базинҳор истамасди, бунга қаршилик қилиш

¹ Курфюрст – император сайлаш ҳуқуқига эга бўлган давлатманд князь.

учун у дархол қўлидан келган ҳамма ҳаракатни қилди. Вазир Фойтга, ҳатто ҳерцог зоти олийларига ҳам мурожаат қилди. Уларга ёзилган, мазмунини биз Август орқали билиб олган хатларни “тассомонанд”дан¹ ўзга ном билан атаб бўлмайди – хатлар унинг иккинчи “мен”ининг ҳаддан ташқари енгилтабиатлиги билан тўлиб-тошган эди. “Ўғлимдан айрилиш, – деб ёзган эди у, – бегона одамни менинг ижодхонам, ёзувларим, бутун шарт-шароитларим ичига олиб кириш заруриятини туғдиради, бу менинг аҳволимни, бутун ҳолатимни чидаб бўлмас кўйга солиши мумкин”. Бу ҳазм қилиб бўлмайдиган иш эди, аммо у тарози палласига ўз ҳаётини, ўз азим ҳаётини қўйдики, у палла ғир этиб пастга йўналди, вазир ҳам, ҳерцог ҳам унинг истакларини қондиришга шошилишди. Августнинг номи кўнгиллилар рўйхатидан дархол ўчирилмади, бу унинг обрўсини тушириши мумкин эди. Фойтнинг тавсияси бўйича Август камерал маслаҳатчи Рюльман билан бирга Франкфуртга, иттифоқчиларнинг шабт-квартирасига, кўнгиллиларнинг озиқ-овқатларига сарфланадиган пулни муҳокама қилиш учун бориб келиши, у ердан қайтгач, кўнгиллиларнинг номигагина бошлиғи, валиаҳд шаҳзода Карл Фридрих ҳузурида худди ўшандай номигагина адъютант лавозимини эгаллаши, шу билан отасининг ихтиёрида қолиши лозим эди – қизифи, бу тавсияни он ҳазратлари битта туки ҳам қийшаймасдан маъқуллади.

Шундай бўлди, Худо шуни хоҳлаган экан, шу воқеа содир бўлди! Ўн тўртинчи йил январь ойининг охирида, сафдошлари шаҳар черковида қасамёд қабул қилишган кунда Ваймарда бўлмаслик учун Август янги йилдан сўнг Франкфуртга жўнаб кетди. Кўнгиллилар Фландрияга кетгандаридан кейин бир ҳафта ўтгач, у қайтиб келди-да, валиаҳд шаҳзода ҳузурида адъютант вазифасини эгаллади. Бу ҳам шаҳзода сингари егер либосини кийди, отаси буни “бурғу овозига эргашиш” деб атади. “Менинг ўғлим бурғу овозига эргашди” деди ва ўзини гўё ҳамма ишлар жойидадек тутди. Эҳ, афсуски, бундай эмас эди. Ҳамма уйда қолган йигирма тўрт яшар йигитнинг устидан кулди, немис ҳалқининг янги ватанпарварлик ташаббусини ўзи кўллаб-қувватламагани етмагандек, ўғлини ҳам бу йўлдан қайтарган отадан бутун ҳалқ норози бўлди. Барча тенгдошлари, хавфхатарни матонат билан енгаётган барча кўнгиллилар олдида Августнинг аҳволи нечоғлик нокулай бўлиши олдинданоқ маълум эди. Ахир қайтиб келишганларидан кейин улар ҳам унинг муҳитида ҳаёт кечиришади-ку. Улар билан Август ўртасидаги муносабатлар энди дўстона бўла оладими? Улар энди уни ҳурмат қилишадими, дўстлик назари билан қарашадими? Кўрқоқ деган тавқи лаънат ҳавода муаллақ турарди. Мен шу ерда кисматнинг нобарорлиги борасида бир аламли фикримни қистириб ўтишдан ўзимни тиёлмайман: бир одам учун ишлар осон, жазосиз кўчса, бошқа бирор учун катта гуноҳ хисобланади ва у жазога тортилади, албатта, бу одамларнинг хилма-хиллиги билан белгиланади ҳамда бизнинг ахлоқий ва эстетик қарашларимиз бирорвга қора чаплаб, бошқасини олқишилашга олиб келадиган ички шахсий сабабларга боғлиқ, бошқача айтганда, битта нарса бир одамда ғашимизни келтирса, бошқасида табиий ҳолдек туюлади. Менинг бир акам бор, қимматли хоним, исми Артур, ёш олим, файласуф; болаликдан уни тижорат ишларига тайёрлашган, шу боисдан кўп нарсаларни ўзи мустақил ўрганишга мажбур бўлди. Гап орасида айтиб ўтган эдим,

¹ XVI асрда яшаб ўтган, васвослик дардига чалинган итальян шоири Торквато Тассора (1544 – 1595) ишора қилинмоқда.

у доктор Пассовдан юонон тилини ўрганди. Фикри ёруғ одам, шубҳасиз, факат дунёга ва инсониятга баҳо беришда андак дарғазаб. Унинг келажаги порлок деб башорат қилувчиларнинг кўпини биламан, кўпроқ унинг ўзи ҳақида фикри шундай. Хўш, шундай қилиб, акам Артур ҳам илм йўлидан кечиб, Ватан учун урушга ўзини урганлар авлодига тегишли, бирорта жон ундан буни кутмаган, у шундай ишни қиласди, деб ҳеч ким ўйламаган эди, оддийгина сабаби шундаки, урушда жасорат кўрсатиш ҳақида Артур Шопенхауердан ҳам кўра камроқ ўйлаган, мутлақо ўйламаган одам то-пилмасди. У кўнгиллиларни курол-аслаҳа билан таъминлашга пул берган; уларга қўшилиш хаёлида ҳам йўқ эди, бу ишни совуққонлик билан ўзи “табиат фабрикасининг ишончли моллари” деб атайдиган одамларга қўйиб берган эди. Ҳеч ким бунга ҳайрон бўлмади. Унинг ишига одамлар ниҳоятда бепарво муносабатда бўлишди, бу сўзиз маъқуллашнинг айни ўзи эди, шунда менга кундек равshan бўлдики, биз ахлоқ ва эстетик жиҳатдан кўнглилизни хотиржам қиласидиган нарсаларнигина, яъни ўзаро уйғунлик ва ўз-ўзидан қониқиши маъқуллар эканмиз.

Лекин Августнинг худди шундай ҳаракати борасида гийбатлар, гиди-биди гапларнинг кети узилмасди. Ҳурматли фон Штайн хонимнинг гаплари ҳозир ҳам қулоқларим остида жаранглайди: “Гёте ўғлини кўнгиллиларга қўшилишга қўймади! Хўш, бунга нима дейсизлар? Табақамиздаги ёш йигитлардан фақат ўша уйда қолди”. Шиллер хонимнинг гаплари ҳам ёдимда: “Агар Карлим урушга кетаман деса, ҳеч қачон, ҳеч бир нарса эвазига монелик қилмасдим! Унинг бутун ҳаёти зил кетган бўларди, бола тушкунликка тушиб қоларди”. Бизнинг бечора дўстимиз тушкунликка тушмадими? У мудом шунақа эди. Аммо ўша машъум кундан бошлаб ундаги тундлик янада ошди ва унинг табиатида мавжуд бўлган емиришга мойиллик кўзга ташланувчи шаклларни ола бошлади: ичкиликка ҳаддан ташқари ружу қўйиш, (узр, айтишга мажбурман) ёмон хотинлар билан алоқа қилиш; у ҳамиша ўз истакларини амалга ошириб келарди, тоза қалбда савол туғилди, бу феъл-атвор ундаги хафақонлик ҳамда унинг соясида туғилган Оттилияга муҳаббат билан қандай чиқиши экан? Сиз мендан сўраган экансиз – сўрамасангиз, ўз мулоҳазаларимни айтишдан тортинган бўлардим, – бундай бебошликларда юқори доирадагилар шубҳа остига олган эркаклик ғурурини устун қўйиш, лоакал номақбул иш билан бўлса ҳам шу ғурурни намойиш этиш истаги бор. Унинг қиликлари борасидаги менинг туйғуларим, агар бу ҳақда гапириш ўринли бўлса, аралаш-қураш эди. Август ҳақида ўйласам, дилимда ачиниш ва нафрат кураш тушарди; унинг улуғ отасига бўлган ҳурмат билан бир қаторда, ўз тенгларига эргашишни истаган итоаткор ўғилга қилинган, давр руҳига мос келмайдиган монелик ўртасида низо келиб чиқди. Буларга яшириқча яна бошқа умид ҳам аралашдики, Августнинг беибо қилмишлари, изтиробли қиёфаси, бутун шаҳарга маълум бўлган бебошликлари суюкли дугонамни зора ундан со-вутса, деярдим. Оттилия бу нолойиқ, хавф туғдириши мумкин бўлган муносабатдан воз кечса, қиликлари унинг муқадас қараашларига тамоман зид бўлган, яқинлиги обрў-эътибордан мосуво қиласидиган йигитдан юз ўгирса, ичимни кемираётган ташвишдан кутуламан, деб ўйлардим. Ардоқли хоним, менинг умидларим ушалмади. Ватанпарвар Фердинанд Ҳайнкени қадрловчи Оттилия Августга ёпишиб олди, у билан дўстлик ришталарини қаттиқ тутди, уни кечирди, юқори давраларда ҳар жиҳатдан ҳимоясига

олди. Унга Август ҳақида бирор ёмон гапни етказишса, бунга ишонишдан бош тортарди ёки бу шайтон юракка соглан андух, мен уни шундан ҳимоя қилишга сафарбар этилганман, деб бағрикенглик билан талқин қиларди. “Адель, – деярди у, – менга ишон, одамлар уни ҳар қанча ёмонлашса ҳам майли, мен уни мутлако ёмон деб ҳисобламайман. Улардан нафратланаман, унинг ҳам мен билан ана шу нафратни бўлишишини истайман, шунда у уларнинг ғийбат тегирмонларига камроқ сув қўйган бўларди. Совук, ичиқора одамлар билан яккаланиб қолган инсон ўртасидаги курашда сенинг Оттилияниг ҳамиша кейингини ҳимоя қилади. Шундай отанинг ўғлига хос маънавий олийжанобликка шубҳа билан қараб бўладими? Бунинг устига, у мени севади, мен эса, Адель, унинг севгиси олдида қарздорман. Мен улкан баҳтни, Фердинанд билан улкан баҳтимизни татиб кўрдим, агар мен ўша баҳт билан хотираларимда лаззатланишда давом этаверсам, бу менинг Август олдидағи айбим, бурчим ҳисобланадики, буни ўташга унинг ғамгин нигоҳи чақириб туради. Ҳа, мен унинг олдида қарздорман! Агар у ҳақда айтилаётган гаплар тўғри бўлса, уни шу йўлга итараётган нарса менинг айбим билан юз берган умидсизлик эмасми ахир? Менга қара, Адель, у менга ишонган пайтларда бошқача эди-ку!”

Мана шунақа сўзлар билан у менга бир неча марта мурожаат қилди, бу ерда ҳам мени турфа хил зиддиятли хаёллар банд этган эди. Унинг бу шўрликдан воз кечолмаётганини кўриб даҳшатга тушардим, Августнинг буюк отаси хоҳлагани учун ўзини унга бағишлиш фикри Оттилияниг кўнглига худди балиқ тутадиган қармоқдек ёпишиб олган эди. Шу билан бирга, унинг сўзлари қалбимга ширин таскин ва маънавий хотиржамлик бағишиларди, агар унинг Пруссияга садоқати, жанговар-ватанпарварлик рухи бу нозик, оппоқ вужудда дағал, бераҳм қалб яшаётгани ҳақида гоҳида мени даҳшат ичида ўйлашга мажбур қилса, унда унинг Августга муносабати, гўзал, содда ва қаҳрамон Ҳайнкемиз тимсолига бўлган майли учун унга таъна қилувчи виждонининг овози мени унинг қалбидаги етук олийжаноблик, нозик хислатни ҳис этишга ундади; бунинг учун Оттилияни янада қаттиқроқ севдим, шубҳасиз, бу нарса менинг хавотиримни икки карра ошириди.

Ўн тўртинчи йилнинг майида Август билан боғлиқ кўнгилсизликлар чўккисига етди. Ҳарбий юришлар тугади, Париж олинди, йигирма биринчи май куни ваймарлик кўнгиллилар қайтиб келишиди, Ватан олдида беҳад улкан хизматлар қилишмаган бўлса-да, ҳар ҳолда шон-шуҳратга бурканиб қайтишдик, ҳамма уларни тантанали кутиб олди. Мен ҳамиша мана шу дақиқалардан кўркардим, хавотирларим тасдиқланди. Жангчилар уйда қолган тенгдошларига ўз нафратларини тортинасадан, очиқасига, дарғазаб бўлиб изҳор қилишиди. Буни кўриб тағин бир марта ишонч ҳосил қилдимки, одамлар ўз хатти-ҳаракатларини асослаш учун келтирган далилларининг ҳақиқийлигига ишонмай тўғри қилган эканман. Улар ўзларича эмас, балки ҳаракат қилишнинг аниқ бир шартли кўлламини кўлларига берадиган шарт-шароитга қараб иш қилишади. Агар шарт-шароит золимликка йўл очса – янада яхши. Улар бу очилган йўлдан яхшигина фойдаланишади, бунга ҳеч бир иккиланмаса бўлади: кўпчилик одамлар шарт-шароитлар улардаги дағаллик ва жоҳилликка йўл очишини, бошқаларни таҳқирлашга имкон яратишини кутиб туришади. Августда кўнгилли егерлар кийимидағи тенгдошларини кутиб олишга соддадиллик ёки қатъийлик етишмадими? Бунга

у фахрий бошлиқ зоти олийларининг адъютанти сифатида тўла ҳукуққа эга эди. Айниқса шу туфайли – буни ҳам тушунса бўлади – жангчиларимизни киноя ва аламли кесатиклар қилишга мажбур қилди. Теодор Кёрнер бекорга мана бу сатрларни ёзмаган эди: “Иссиқкина уйда, оқсоқ қиз қучоғида ётган, хушомадгўй болага нафратлар бўлсин! Эҳ, сен шўрликкина лапашанг!” Бу сатрлар айнан шу ҳолатга тўғри келганилиги учун бемалол иқтибос олинган. Айниқса, ротмистр фон Вертерн-Визе ҳар қандай қўпполликни рағбатлантирувчи бундай ҳолатдан бирор фойда чиқаришга ҳаммадан кўп ҳаракат қилди. У Августнинг шубҳали келиб чиқишига ҳам шама қилди, унинг фикрича, боладаги қўрқоқлик ва йигитларга хос бўлмаган хатти-ҳаракат шу билан боғлиқ эмиш. Жаноб фон Гёте ўшангача қўлга олинмаган қиличи билан унга ташланди, лекин одамлар уларни ажратиб қўйиши. Бу тўқнашувнинг натижаси дуэлга чақириш билан тугади.

Бу пайтда жаноб яширин маслаҳатчи шаҳар яқинидаги Берка сиҳатгоҳида эди ва “Эпименида”ни ёзаётганди. Берлинлик интендент¹ Иффланд ундан Пруссия қиролининг қайтишига бағишлаб мадҳия ёзишни илтимос қилган эди, бу шоир учун шундай эътиборга лойиқ ва ўзига тортадиган таклиф бўлиб туюлдики, ер юзидаги бирорта мадҳияга ўхшамайдиган, кўп маъноли-антика, соф ўзига хос фалсафий аллегория яратиш мақсадида ўзининг барча бошқа поэтик режаларини бир четга йиғишириб қўйди. “Хузур лаҳзалари учун хижолатдаман”, деб ёзди у ва: “Ахир у чохга қайта қулаши керак” дея давом этди. Шу аснода унинг бир муҳлиси, сарой хонимларидан бири фон Ведель хонимдан мактуб келиб қолди, унда Августнинг аҳволи, ротмистр билан тўқнашуви ҳақида хабар қилинган ҳамда бу қандай оқибатга олиб келиши борасида огоҳлантирилган эди. Обрў-эътиборли ота дарҳол кескин чораларни кўрди. Танишларини ишга солиш, ўғлини илгари урушдан олиб қолганидек, дуэлдан озод қилиш учун ўз имкониятларидан фойдаланиш, буларнинг бари, унга қандайдир хузур бағишларди, Августнинг ҳаёти учун ғамхўрлик қилиш бир баҳона эди, назаримда, чунки у ҳамиша асилзодаларча имтиёзларни, бежамаadolат-сизликни ёқтиради. У огоҳлантирган аёлдан орага тушишини илтимос қилди, биринчи вазирга хат ёзди. Обрўли амалдор, яширин маслаҳатчи фон Мюллер Беркага келди, музокарага валиаҳд шаҳзода, ҳатто ҳерцогнинг ўзи аралашди, ротмистр кечирим сўрашга мажбур бўлди, жанжал бостибости қилинди. Олий даражадаги ҳомийлар соясида Августнинг димоғи кўтарилиб кетди, танқидий овозлар пасайди, бироқ бутунлай ўчмади. Амалга ошмай қолган дуэль унинг эркаклик мартабасига бўлган хурматсизликни янада оширди, олий даврадагилар елка қисиб қўяқолиши, ундан ўзларини четга олиши, тенгдошлари билан бемалол юракдан мулоқот ҳақида энди ўйламаса ҳам бўларди. Гарчи жаноб фон Вертерн бемулоҳаза қилинган шамаси учун юқоридан яхшигина шапалоқ еб, ҳатто қамоқда ўтириб чиқкан бўлса-да, Августнинг шубҳали келиб чиқиши ҳақидаги фикр, яъни, агар таъбир жоиз бўлса, чала зотли эканлиги одамларнинг ўй-хаёлида яна юзага қалқиб чиқди ва унинг қилиқларини талқин қилишга туртки берди: “Одамни қадам ташлашидан билса бўлади” ёки “Энди нимаям деймиз” деган гаплар қулоққа чалинарди. Шуниям эслатиб ўтиш керакки, яширин маслаҳатчининг хоними ўз яшаш тарзида замон руҳиятини кам ҳисобга оларди, унинг кўнгилочишларга ўчлиги турли ғийбатларга, албатта, бегараз, аммо ёқимсиз-кинояли гап-сўзларга йўл очарди...

¹ Интендент – армияда моддий таъминот хизматини бажарувчи ҳарбий ходим.

Охир-оқибат Оттилияning ғамнок ошиғи бу гапларни қўнглига жуда яқин олгани унинг ор-номус масалаларида инжиқлигини кўрсатарди, у буни бизга ғалати бир тарзда, орқаворатдан: яъни Эльбанинг туткуни, мағлуб қаҳрамонга нисбатан борган сари ўсиб бораётган, эҳтиросли сифиниши билан намоён қилди. Ўз-ўзидан тушунарлики, Август ўз ғурури ва қатъийлигини ўшанга садоқат ҳамда яқиндагина Наполеоннинг таваллуд кунини нишонлаб, бу кунни йилнинг энг тантанали куни деб ҳисоблаган, энди эса буни унтишга улгурган “маслагидан қайтганлар”га нафрат билан қондирди; чунки у билан бирга ва унинг учун азоб чекди-да! Унга қарши урушмаслик учун юришга қўшилмагани туфайли эшитган киноя ва кесатикларга итоаткорона бардош бермадими? Куннинг авзоси-ю, қонун-қоидаларидан юқори турувчи отаси олдидা у, шубҳасиз, ўзининг ҳақоратланган ор-номусини императорга содикларча таҳсин ўқиш орқали оқлаш имконига эга эди: у бундай қилифини бизнинг олдимизда ҳам ҳеч тортинмасдан, қатъий туриб қиласерди, бундай нутқлари билан Оттилияning қарашларини оёқости қилаётгани ҳақида ўйлаб ҳам ўтиради. Гарчи Оттилия сабр-тоқат билан, чиройли кўзларида ёш билан унинг кўпол қилиқларига чидаса-да (Август бу қилиқлари билан ўзи енгил тортар, бошқаларга озор етказаётгани парвойига келмас, эҳтимол, бундан янада илҳомланарди), менинг яширин истакларим амалга ошадигандек туюларди, пок виждонли дугонамнинг Августга нисбатан туйгулари бундай синовларга дош бериши гумон эди. Августнинг Наполеонга сажда қилиши остида яна нимадир яшириниб ётар ёки тўғрироғи, яшириниб ётганга ўхшар, шу қобикка ўралиб олиб, вакти-вақти билан яққол юзага чикарди, яъни тағин орамизда пайдо бўлиб қолган ёш Ҳайнкедан рашқ қиларди, Август уни бизнинг кўз олдимизда қадимги тевтон қабиласининг янги замон Цезарига қарши кўр-кўрона курашаётган варварларга қўшилган вакили деб ҳақорат қилди.

Ха, бизнинг топилдигимиз яна, аниғи иккинчи марта Ваймарда эди. Лайпцих жангидан сўнг у бир неча ҳафта прусс қўмондонининг адъютанти сифатида шахримизда хизмат қилди, асилзодалар даврасида бўлиб, ҳамманинг эътиборини қозонди. Энди бўлса, Париж қўлга олингач, Франциядан кўкрагида Темир хоч ордени билан қайтди; кўкрагидаги бу муқаддас нишон қизлик қалбимиз, айниқса, Оттилия қалбида ажойиб йигитга нисбатан юксак фаҳр оловини янгидан алангалаатди. Биз билан учрашган пайтдаги ўзининг самимий миннатдорликни ифодаловчи дўстона, бироқ андак вазмин муносабати билан бу оловга бироз сув сепарди, бундай муносабат – тан олмай иложимиз йўқ эди – биз унга билдирган туйгуларга тўла мос келмасди. Кўп ўтмай бунинг оддий – яшириб ўтирмайман, – бизни ҳушёр торттирган ечими топилди. Фердинанд, билмадим қандай сабаблар билан биздан яшириб келган сирини ошкор қилди: ўз юртида, прусс Си-лезиясида, уни суюкли қаллиғи кутаётган эмиш ва уйига қайтганиданоқ улар никоҳдан ўтишармиш.

Бу хабарни эшитган лаҳзада биз дугоналар қалбида туғилган енгил саросимани сиз тушунасиз, албатта. Мен умидимиз пучга чиққани ҳақида гапирмаяпман, бундай ҳиссиёт бизда бўлмаслиги лозим эди, негаки Ҳайнкега муносабатларимиз идеал ҳайратга йўғрилганди, тўғри, унинг халоскорлари сифатида маълум маънода унга нисбатан озроқ ҳуқуқ ҳам аралашган эди. Биз учун у шахсдан ҳам кўра жонли тимсол эди, ушбу тушунчалар бир-

биридан кескин фарқ қилмай, бир-бирига мутаносиб бўлганликлари боис, охир-оқибат шахснинг ижобий фазилатлари жонли тимсол бўлишга йўл очади. Нима бўлганда ҳам, ёш қаҳрамонга бўлган туйғуларимиз, тўғрироғи, Оттилияning туйғулари – аслида мен бу ерда иккинчи даражалиман – аниқ истаклар ва умидлар билан сира боғлиқ эмас эди: ахир Фердинанднинг қуи табақага мансублиги, яъни мўйнафуруш оиласидан келиб чиқсанлиги боис бундай умидларнинг бўлиши мумкин эмас-да. Табака нуқтаи назаридан, кўпинча бундай фикрларга мен борсам дуруст, деган ўйга борардим, ўйга толган пайтларимда, дугонамнинг у етолмайдиган гўзаллиги менинг хунуклигимни тўлдирса-ю, йигитни менга уйланишга ундаса, дея орзу қилардим ва шу заҳотиёқ бундай никоҳ келтириб чиқариши мумкин бўлган даҳшатли хавф-хатарларни англаб етардим, гарчи бундай хаёллар маълум даражада гаштили туюлса-да, уларни миямдан нари қувардим... ўз-ўзимча, менинг хаёлий орзуларим Гёте учун хис-туйғулар ва урф-одатлар омухталигидағи лирик асар яратишга мавзу бўлар, деб ўйлаб қўярдим.

Қисқаси, бу ерда биз ўзимизни қадрли инсон томонидан алданган ҳис этганимиз ёки ҳис этишимиз мумкинлиги ҳакида гап бўлиши мумкин бўлмаганидек, умиднинг пучга чиқиши ҳакида ҳам гап-сўз бўлмаслиги лозим эди! Унинг икрорини қувонч билан, унга баҳт тилаган ҳолда кутиб олдик, тўғри, у бизни шунча вақт аяганидан кўнглимиз бироз хижил бўлса-да, бу янайам узоқ чўзилса эди, деган ўй ҳам ўтди хаёлимидан. Албатта, Фердинанднинг унаштирилганлиги, энди боши очиқ эмаслигини билганимиздан сўнг бизда саросима ва таажжуб, озми-кўпми изтироб бўлмади, деёлмаймиз, у билан бўладиган дўстона мулоқотларимизга қандайдир ширин ҳислар ато қиладиган ноаниқлик, хира умид-орзулар ғойиб бўлди. Биз ҳеч бир шартлашмаган ҳолда, худди яшириқча келишиб олгандек, бундай аламдан ҳолос бўлишга ҳаракат қилдик ва ҳеч иккиланмай унинг қаллиғини ҳам ўзимизнинг эъзозли ширин хаёлларимизга аралаштира бошладик, ўшандан бошлаб ёш қаҳрамонимизга ва унинг қаллиғига хаёлда ҳурмат кўрсата бошладик, бу немис қизининг фазилатларига шубҳа билан қарашни хаёлимиизга ҳам келтирмадик, унинг қиёфаси худди Туснельда тимсоли ёки Гётенинг Доротеяси сингари, шубҳасиз, қоракўз эмас, балки кўк кўзли бўлиб тасаввуримизда қолди.

Худди Хайнке биздан унаштирилганини шунча вақт сир тутганидек, биз ҳам буни Августдан яширганимизни қандай изоҳлашни билмайман. Оттилия шуни хоҳлади, бунинг сабабларини муҳокама қилмадик. Очигини айтсам, бу мени ҳайрон қолдирди, ахир у хафақон жазмани олдида ёш жангчига нисбатан ватанпарварлик ҳурмат-эҳтироми учун ўзини гуноҳкордек ҳис қиларди, аммо бу ҳурмат-эҳтиром табақалар нуқтаи назаридан ҳам Август учун хавфли эмас эди, уларни бирон бир мақсад ёки режани кўзлаган қараш деб аташ ҳам шарт эмас эди, гарчи бундай янгилик, шубҳасиз, Августнинг руҳий мувозанатини тиклаши, эҳтимол, уни Фердинанд билан хийла дўстона муносабатда бўлишга етаклаши мумкин бўлса-да, Оттилия буни сир тутди. Камер-ассессорнинг Фердинандга ичиқоралик, душманлик назари билан қарashi унга бор-йўғи таскин берарди, холос. Бундан ташқари, ундаги ғазабноклик охир-оқибат яхшиликка олиб бормайди, бундай ҳақоратланишдан безган Оттилия охири ундан юз ўтиради, дугонамнинг руҳий хотиржамлиги учун мен шуни орзу қилардим.

Қадрли сұхбатдошим, ахвол мана шунақа эди. Дастрлаб, қисқа муддатта бўлса-да, ишлар мен хоҳлагандек кетди. Бизнинг жаноб фон Гёте билан учрашувларимиз ва мулоқотларимиз борган сари носамимий ва жанжалли тус ола борди, жанжал кетидан жанжал чиқарди. Ўзи ҳақидаги гап-сўзлардан ғам-андуҳ исканжасида қолган Август, дўстлигимизга хиёнат қилдинглар, мени кап-кatta аҳмоққа, қип-қизил жиннига чиқариб қўйдинглар, деб бизга таъна-маломат ёғдиришдан чарчамасди. Ҳайнке билан Силезия кечинмалари ҳақида ҳалигача унга ҳеч нарса демаган, садоқати туфайли ҳақоратланган Оттилия мени кучоклаганча кўз ёш тўкарди ва ниҳоят мана портлади, бунда одатдагидек сиёсий ва шахсий томонлар аралашиб кетди: бир куни кечкурун графиня Ҳенкелнинг боғида Август тўлиб-тошиб Наполеонни кўкларга кўтара бошлади, шу аснода ракибларини ҳам танқид қиларкан, ишлатган сўзлари очиқдан-очиқ Фердинандни ҳам четлаб ўтмади. Оттилия унга эътиroz билдириди, одамхўр Наполеонга нафратини яшириб ўтиради, унга қарши бош кўтарган ёшларга қаҳрамонимизга хос хислатларни ёпишириди, мен уни маъқуллаб турдим, қаҳр-ғазабдан оқариб кетган Август бўғик овоз билан, энди орамизда ҳеч нарса қолмади, сизлар энди мен учун йўқсизлар, деди-да, ғазабланганча боғни тарк этди.

Бўлиб ўтган воқеадан қаттиқ ларзага келган бўлсам-да, орзуим ушалган эди, буни Оттилиядан яшириб ҳам ўтирасдан, бутун сўзамоллигимни ишга солиб, жаноб фон Гёте билан алоқаси узилгани учун тасалли бердим, у билан муносабатлар ҳеч қачон яхшиликка олиб келолмайди, дея уни ишонтиришга уриндим. Лекин менга гапириш осон эди! Шўрлик дугонам эса, даҳшатли ахвoldа қолган, уни кўриб мен ҳам қийналиб кетган эдим. Ўйлаб кўринг! У чин кўнгилдан севган йигит бошқага насиб қилди, ажойиб бир нажоткор сифатида ўз ҳаётини қурбон қилишга тайёр турган йигити бўлса, ундан юз ўғирди, даҳшатли сўзлар билан дўстликни оёқости қилди. Бу ҳам етмагандек, ёлғиз қолган қиз ўзини онасининг бағрига ташлаганида, бу қалб ҳам ўз навбатида шафқатсиз умидсизликдан яраланган қизга мададкор бўлишга қурби етмас, ўзи таскинга муҳтож эди. Август билан бўлган таҳқирловчи воқеадан сўнг, менинг маслаҳатим билан Оттилия бир неча ҳафтага Дессаудаги қариндошларини кетди, аммо орқасидан чопар жўнаташди, у оёғини кўлига олганча уйига қайтиб келди. Жуда ёмон иш бўлган эди. Граф Эдлинг, хонадоннинг меҳрибон дўсти, ҳомийси ва ота ўрнидаги, Погвиш хоним барча асосларга эга бўлган ҳолда қаттиқ ишонган одам, ҳеч кутилмагандан, килаётган иши ҳақида бир оғиз индамасдан, молдавиялик йўловчи княгиня Стурцага уйланди-олди!

Қанақа кузу қанақа қиши бўлди дейсиз, ҳурматли хоним! Бундай деяётганимнинг сабаби Наполеоннинг февралдаги, Эльба бўйидаги иккинчи мағлубияти эмас, балки қисматнинг она ва қиз бошига солган, уларнинг ҳис-туйғулари ва обрў-эътиборларини синовдан ўтказган қақшатқич кўргиликлариdir. Фон Погвиш хоним саройда граф билан, унинг ёш хотини билан кундалик учрашувлардан қочолмас, юрагида минг азоб билан унга табассум қилишга, шу билан бирга, умидларининг поймол бўлганини билган асилзодаларнинг намойишкорона жилмайишларига чидашга ҳам мажбур бўларди. Инсон кучи етмайдиган бундай синовда онасига мададкор бўлиши учун чакирилган Оттилиянинг ўзи асилзодаларнинг қизиқувчанлигига дош беришга мажбур бўлди, чунки жаноб фон Гёте билан ораларига совуқлик тушганини, у Оттилияни назар-писанд

қилмай қўйганини, ҳатто қўпол муомала қилишини ҳамма сезиб қолган эди. Мен бўлсан, ўзим ҳам бўм-бўш бўлиб қолган қалбим билан мана шу ихтилофлар ичида бирор ечимни топишга ҳаракат қиласадим, чунки рождестводан олдин Фердинанд бизни тарк этди ва ўзининг Туснельдаси ёки Доротеяси – аслида унинг исми Фанни эди – билан қовушиш учун Силезияга жўнаб кетди, табиат унга ишонишимда менга қанчалик панд берган, мени бор-йўғи ишончли киши сифатида чегаралаган бўлмасин, уни йўқотганим туфайли етарлича изтиробларни ҳам менга раво кўрди, кўнглимда эса, буларга маълум маънодаги ёнгил тортиш туйғуси, ёнгил қониқишига ўхшаган нарса аралашиб кетди. Ахир хунуккина қизга йигитнинг ҳузурида тенг бўлмаган баҳтни бўлишгандан кўра гўзал дугонанинг ёнида ўтировлиб гойиб бўлган қаҳрамон ҳақидаги хотираларга берилиш яхши-да – биз энди ўшандай ширин хотиралар билан яшай бошладик.

Шундай қилиб, йигитнинг жўнаб кетгани ва учинчи бир қиз билан оила қургани менга хотиржамлик бағишлигар бўлса, Август билан ораларининг очиқ бўлгани Оттилияни ҳам худди шундай хотиржам қилди. Ҳа, асилзодалар даврасидаги гап-сўзларга қарамасдан, Оттилия бу узилишни баҳт ва озодлик деб хисоблашини, энди у, ҳамиша уларга йўлдош бўлган жанжаллардан бегам-бепарво дам олиши мумкинлигини менга айтди.

Энди у Фердинанд ҳақида бемалол тотли хаёлларга берилиши ва баҳтсиз онасига мадад бериши мумкин. Буни эшитиш қулоққа ёқарди, шундай бўлса-да, мендаги иккиланиш ва хавотир ҳеч чекинай демасди. Август – Гётенинг ўғли, бу унинг асосий фазилати. У деганда биз улуғ шоирни тушунишимиз лозим эди, шубҳасиз, ўзининг рухсатисиз юз берган бу узилишни ота маъқулламаган ва албатта уларни яраштириш учун бор имкониятларини ишга солган бўларди. У бу никоҳни хоҳлашини билардим, шу ҳақда ўйлаган сайин даҳшатга тушардим. Ўғилнинг Оттилияга нисбатан хирагина эҳтироси отадаги истак ва ироданинг натижаси эди, холос. У отасининг дидидаги қизни севарди, унинг севгиси тақлид, мерос, итоатгўйлик эди, ундан воз кечиши эса, ўткинчи мустақилликнинг намоён бўлиши, исён эдики, унинг қаршилик кўрсатиш кудратига, афсуслар бўлсинки, мен у қадар ишонмаган эдим. Оттилия-чи? Бундай отанинг ўғлидан у ростдан ҳам юз ўтирганми? Мен уни ҳақиқатдан ҳам қутқазилган, деб хисоблай олармидим? Бунга ишонмасдим, бу ҳам бекорга эмас экан.

Августнинг ҳаёт тарзи ҳақидаги тез-тез қулоққа чалинаётган мишишлар ва хабарларни эшитганда Оттилиянинг ғамга чулғаниши мени, ишонмай тўғри қилган эканман, деган фикрга олиб келарди. Ҳамма нарса шундай тўғри келдики, йигитнинг маънавий асослари зил кетди, у бепарвоникка юз тутди, бузуқилик гирдобида қолди, аслида, у илгаридан шубҳали қилиқларга мубтало, одамда табиатан хавфли ҳис-туйғу үйғотадиган нусха эди. Юрагидаги кўнгиллилар ҳаракатидан қолган машъум доғ, Оттилия билан алоқанинг бузилиши, отаси билан, шунингдек, ўз-ўзи билан юз берган ички, эҳтимол, ташки тўқнашувлар: мен буларни асилзодаларимизнинг фийбатларига сабаб бўлаётган Августнинг ахлоқсиз ҳаётини оқлаш учун эмас, балки буни қандай бўлмасин тушунтириш учун санаб келтиряпман. Августнинг суюқоёқлиги ҳақида кўплардан, жумладан, Шиллернинг қизи Каролина ва унинг укаси Эрнстдан ҳам эшитдик, улар ёш Гётенинг чидаб бўлмас инжиқ табиати ва хурмача қилиқларидан шикоят қилишди. Айтишларича, у ичкиликка бехад ружу қўйган, бир куни кечаси маст ҳолда

бир муштлашишга аралашиб қолиб қамоққа ҳам тушган, уни отасининг номи туфайлигина озод қилишган ва шу туфайли ишни бости-бости қилиб юборишган. Унинг аёллар билан, бузук хотинлар билан алоқаси бутун шаҳарга достон бўлган. Минераллар ва маъданларни тўплаш учун яширин маслаҳатчи ажратган, кўтарма ёнидаги боғдаги павильон (Август ҳам отасига тақлид қилиб ўзича коллекция қилишга ишқибоз бўлган), гап-сўзларга қараганда, кўпинча, ножўя ишлар манзилиги айланган. Бир аскарнинг хотини билан дон олишгани қулоққа чалинди, хотин уйга мўлкўл совға-саломлар келтиргани учун эри бу ишга панжа орасидан қараган. Бу бўйи дароз, бесўнақай, ҳар ҳолда у қадар хунук бўлмаган аёл эди. Август унга гўё: “Сен ҳаётим нурисан” деган эмиш, аёл мақтаниш учун бу сўзларни оғзидан гуллаб қўйган ва асилзодаларимиз буни эшитиб, роса кулишди. Шунингдек, ҳам шармандали, ҳам кулгили бир воқеа устидан ҳам одамлар кулишди: гўё бир куни кечаси кекса шоир боғда бехосдан бу жуфтни кўриб қолган ва: “Болалар, бемалол, тортинманглар!”, деган эмиш ва тезгина кўздан ғойиб бўлганмиш. Бу гапнинг қанчалик тўғрилигига кафолат беролмайман, менимча, бу ҳақиқатга яқин, чунки бу ерда гап, андиша билан айтганда, улуғ инсоннинг маълум маънода ахлоқий кўнгилчанлиги ҳақида бормоқда, бунинг учун унга кўплар таъна ҳам қилишади, бироқ мен бирор ҳукм чиқаришдан тийиламан.

Битта нарсани айтишга журъат қилишимга изн беринг, бу ҳақда мен кўп бош қотираман – ҳар ҳолда бутунлай тоза виждан билан эмас, тўғриси, иккиланишлар остида – менга ёки умуман бирор одамга шу тахлит мулоҳазаларга берилиш муносибми, билмайман. Назаримда, ўғилда омадсиз ва ҳалокатли бир тарзда намоён бўлган айрим белгилар, гарчи улардаги ўхшашликни аниқ илғаш осон бўлмаса-да, улуг отага хос белгиларнинг такорига ўхшайди, ортиқ даражадаги хурмат-эҳтиром бундай фикр билдиришдан бизни чўчитиши мумкин. Чунки отада бу белгилар ёруғ, маҳсулдор, баландпарвозлик, улар одамларга қувонч бағишлияди, ўғилга мерос бўлиб ўтганлари эса, кўпол, нурсиз, бўм-бўш бир тарзда ўзини кўрсатади ва ахлоқий жиҳатдан ярамаслиги билан очиқ ва ҳаёсизларча кўзга ташланади. Масалан, беҳад ажойиб, кишини сехрловчи, ха, маънавий жиҳатдан сехрловчи “Ҳамроҳ диллар” романини олайлик. Бевафоликка бағишлиланган ушбу буюк ва ўта нафис асарни фикри тор одамлар маънавиятсизликда айبلاغан ҳолатлар ҳам бўлди, аммо, шубҳа йўқки, мумтоз сўзнинг қадрини биладиган ва хис этадиган ҳар қандай одам бундай таъна-дашномларни бемаъни иккюзламачилик сифатида инкор қиласи ёки елка қисиб қўяқолади. Аммо, қимматли хоним, охир-оқибат на униси, на буниси бўлди. Вижданан олиб қарасак, мазкур буюк асарда ҳақиқатан ҳам маънавий жиҳатдан қандайдир шубҳали, одобдан ташқари, бунинг устига – ушбу сўзим учун мени маъзур тутасиз! – мунофиқона, муқаддас никоҳни ноинсофларча масхаралаш, очиқ айтилмаса-да, тақдири азалга фаталистларча ишонч мавжуд. Ҳатто ўлим ҳам, буни қаранг, биз табиий ҳолат, табиатнинг маънавий эркинлиги деб қарайдиган ўлим бу ерда ўз майлича юз берувчи, севги орзу-истакларининг сўнгги ширин паноҳи сифатида талқин қилинмайдими? Роман тарзида инсониятга тортиқ бўлиб келган белгилар Августнинг тийиксиз ахлоқсиз ҳаётида бузилган шаклда намоён бўлган, деб қаралса тўғри бўлади, бундай дейиш қанчалик бемаъни, қанчалик ҳақоратли туюлишини биламан, албатта. Бундан олдин ҳақиқатни

танқидий таҳлил қилиш билан боғлиқ бўлган виждан азоби ҳақида ҳам гапирган эдим, бундан муаммо келиб чиқади: ҳақиқатнинг ичига кириб бориш шартми, у билишимизнинг қонуний мақсадими ёки дунёда ман этилган ҳақиқатлар ҳам борми?

Оттилия бўлса, жаноб фон Гётенинг қилғилиқларини эшитиб, шундай ҳаяжонга тушди, шундай дили оғридики, у билан энди қизиқмай кўйганлигига ҳам ишонолмай қолдим. Унинг аскар хотинига нисбатан нафрати шубҳасиз эди, бу нафратга бошқача бир ном ҳам топса бўларди. Кўнгил берган одами бошқа аёлларга ҳиссий илтифот кўрсатиб, маълум даражада, майли ярамас бўлса ҳам, чин устунликни улардан топса, тоза қалбли аёлнинг бунга муносабати – бу энди, сўзсиз, маънавий ҳалокат. Нафратланиш ва жирканиш ҳисси тарк этилган қизга ўз қадр-қимматини йўқотиш имконини бермайди, аммо ҳасаднинг рашқ деб аталмиш маҳсус кўриниши уни иродасидан ташқари ҳолда, ўша нафратга лойиқ нусхани ўз даражаси қаторига кўтаришга, унда нафратнинг тенг ҳуқуқли – бир хил жинсдалиги туфайли тенг ҳуқуқли объектини кўришга мажбур қиласди. Шу билан бирга, қалбимизда уйғотадиган жирканиш ҳиссига қарамасдан, эркакнинг бадахлоқлиги, барибир тоза қалбли қиз учун шундай чукур, даҳшатли жозибадорликка эга бўлиши мумкин эканки, бу нарса ўчаёзган туйғуни янгидан ўт олдира олиши, орзу йўлида фидокорлик кўрсатишга мажбур қилиши, ўз азоблари эвазига эркакни иккинчи, энг яхши “мен”ига қайтариши мумкин.

Қисқаси, суюкли дугонам Августнинг яна ярашишга интилишига хайриҳоҳлик кўрсатиши мумкинлигига, шунингдек, Августнинг эртами-кечми Яратганнинг иродасига бўйсуниб, бу интилишга жазм қилишига унчалик ишонмаган эдим, негаки у Оттилия билан орани очиқ қилиш орқали бу иродага шак келтирган эди-да. Мен нимани кутган, нимадан хавфсираган бўлсан, ўша юз берди. Ўтган йилнинг июнида – бу оқшом худди кечагидек ёдимда – биз тўрт киши саройнинг кўзгулар галерейасида турардик: Оттилия, мен, дугонамиз Каролина Ҳиршал ва жаноб фон Гросс, – кўпдан бери атрофимизда ўралашиб юрган Август, ҳе йўқ, бе йўқ, бизга яқинлашди-да, қаторимизга қўшилиб, сухбатга аралашиб кетди. Дастрлаб у ҳеч кимга алоҳида мурожаат қилмади, бироқ кейин – бу бехад таранг, ҳар биримиздан анча-мунча довдираబ қолмаслик қудратини талаб қилувчи вазият эди – айнан Оттилияга қандайdir саволлар берди. Сухбат одатдаги асилзодаларга хос оҳангда, уруш ва тинчлик, ҳалок бўлганлар рўйхати, Августнинг отаси ёзган мемуарлар, прусс бали ва унинг котильони¹ атрофида давом этди, бироқ Августнинг кўзларида унинг ва бизнинг сўзларимизга мутлақо мос келмайдиган муҳаббат олови ёнарди, хайрлашаётib биз унга тиз букиб хайр-хўш қилганимизда (биз аллақачон кетишга чоғланган эдик) бу олов янада алангаланди.

– Кўзлари қандай ёнганини кўрдингми? – сўрадим Оттилиядан зинапояда.

– Ҳа, кўрдим, – жавоб берди у, – бу мени ташвишга солди. Ишон менга, Адель, мен унинг аввалги муҳаббатимизга қайтишини истамайман, эски азобларимни бепарволикка алмаштирасам, хотиржам яшайман.

У шундай деган эди. Аммо тўсиқ олиб ташланди, низо барҳам топди. Театрда ҳам, йиғинларда ҳам жаноб фон Гёте яқинлашиш йўлларини

¹ Котильон – қадимги рақсларнинг бир тури ва уларнинг мусиқаси.

қидирди; агар Оттилия у билан ёлғиз қолишдан қочса, Август унга баттар интиларди, шунда дугонам менга икрор бўлдики, илгариги вақтларни ёдга соловчи унинг нигоҳи буни алланечук ҳаяжонга солармиш, Августнинг чехрасидаги чексиз баҳтсизлик ифодаси қизнинг юрагидаги эски айбдорлик туйғуларини янгилармиш. Мен унга мана шу қўрс, маънавий қашшоқ одам билан яқинлашиш орқасида келиб чиқадиган фалокат ҳақида, у билан дўстлашиш ақлга тўғри келмаслиги ҳақида ўз хавотиримни айтиб, негаки бу одам – агар дугонамнинг гапларига ишонсан, – Оттилия унга берадиганидан кўпроқ нарса талаб қилишини эслатган эдим, Оттилия шундай жавоб қилди: “Ташвиш чекма, азизим, мен озодман ва бир умр шундай қоламан. Мана қара, у менга “Пинтонинг йигирма бир кун ичидаги фантастик саёҳати” китобини ўқишига берди, мен уни ҳатто очиб ҳам кўрмадим. Агар шуни Фердинанд берганида сув қилиб ичиб юбормасмидим?” Бу айни ҳақиқат. Оттилия уни севмаслигига ишонардим. Бироқ бу тасалли бўла оладими, кафолат бера оладими? Ахир кўрдим-ку, худди қушча илонни орзу килгандек, Оттилия унинг хаёли, уники бўлиш фикри билан банд эди.

Уни Августнинг хотини сифатида тасаввур қилсан, жинни бўлаёзаман, охир-оқибат фақат шундай бўлади шекилли-да. Бу қиз билан, менинг юрагимни тилка-пора қиласидиган даҳшатли бир ҳолат юз берди. Бу яшамагур қизни хароб қиласи, деган ишончим муддатидан олдин ўз тасдигини топди, чунки ўтган йили кузда суюкли дугонам қаттиқ касал бўлди, чамаси қасаллик ички ихтилофлар натижаси эди. У уч ҳафта сарик бўлиб, каравоти остида қатрон бочкаси билан ётди, айтишларича, қатронга тикилиб ўтириш шу дардга қарши фойдали эмиш. У соғайиб, яна саройда учрашишганда, Август ҳатто унинг шунча кун кўринмаганини пайқамади ҳам, ҳолинг не деб қизиқмади ҳам. Миқ этиб оғиз ҳам очмади!

Оттилия ўзини йўқотиб қўйди, қасаллик қайталаб, яна саккиз кун қатронга тикилиб ўтиришга мажбур бўлди.

– Унинг учун мен ҳар қандай хузур-ҳаловатдан кечган эдим, – деди у менга ёпишганча пиқиллаб йиғларкан, – у эса мени алдади!

Хўш, нима деб ўйлайсиз? Кейин нима бўлди? Икки ҳафта ўтгач, шўрлик қиз ранги қордек оппоқ, менинг олдимга келди, маъносиз нигоҳ билан айтдики, Август унга гўё аввалдан келишиб олингандек, икковларининг келгусидаги никоҳлари ҳақида бемалол, хотиржам гапирганмиш! Хўш, бу гап сизга қандай таъсир қиласи? Бундан-да даҳшатлироқ ҳодиса бўладими? У қизга фикрини тушунтиргомади, муҳаббатини илтижо билан билдирмади, у Оттилия билан турмуш қуриш ҳақида гаплашди деб ҳам бўлмайди, у буни шунчаки йўлакай эслатган, холос.

– Сен-чи? – қичқирдим мен. – Худо ҳаққи, Тиллемуз, азизам, сен нима деб жавоб бердинг?

Қимматли хоним, у икрор бўлдики, гапиролмай, тили тутилиб қолганмиш.

Нима учун мен қисматнинг машъум кўргилигига тиш-тирноғим билан қарши турганим сабабини тушунасиз деб ўйлайман. Оттилияниң йўлида бир аёл тимсолида ҳали охирги тўсик турарди, борди-ю жаноб фон Гёте онаси ва бувисидан Оттилияниң қўлини сўраса, бу аёлнинг мавжудлиги жиддий ғов бўлиши мумкин эди: яширин маслаҳатчининг хоними, Кристиана Вульпиус эди бу аёл.

Хурматли хоним, июнь охирида у вафот этди. Бу тўғаноқ ҳам бартараф бўлди, бундан ташқари, унинг ўлими вазиятни янада кескинлаштириди, не-гаки энди Августнинг вазифаси ота уйига янги бекани олиб келиш бўлиб қолди. Аза ва жазирама ёздаги жимжитлик сабаб у Оттилияни камроқ учратди. Шу аснода бир воқеа бўлдики, бу ҳақда сизга батафсил маълумот бериш имконига эга эмасман, чунки ярим қувноқ, ярим маҳфийлик сирларига ўралган бу воқеа масалани ҳал қилганига ҳеч иккиланмаса ҳам бўлади. Август ойининг бошида кўтарма ёнида яширин маслаҳатчи, Германиянинг буюк шоири билан Оттилия ўртасида учрашув бўлган.

Такрорлайман, бу учрашув ҳақидаги муфассал маълумотлар менга коронғи. Менга мутлақо ёқмайдиган ҳазилкашлик билан Оттилия бу ҳақда гапиришдан бош тортди; бу воқеани қандайдир ҳазилнамо тантанали сир қобиғига ўраш унга ёқади.

— Ахир у ҳам, — дейди у мен сўраб тиқилинч қиласверсан, — император Наполеон билан бўлган сұхбатини ҳаммага ёйишни ёқтирамайди, буни худди қаттиқ қўриқланаётган хазинадек бутун дунёдан, ҳатто яқинларидан ҳам бекитади-ку. Агар мен ҳам ундан ибрат олаётган бўлсан, мени кечир, Адель, у мен билан беҳад мулојим муносабатда бўлди, деган хабарим билан чекланиб қўяқол.

У Оттилия билан беҳад мулојим муносабатда бўлган — буни сизга сўзмасўз келтираяпман, марҳаматли хоним. Шу сўзлар билан новелламни, кўриб турганингиздек, назокатли новелламни тугатаман, у сўзсиз унаштириш ёки шунга ўхшаш бирор ҳодисани башорат қилиш билан ниҳоясига етади. Агар бирор мўъжиза юз бериб, осмон қулаб тушмаса, сарой ва шаҳар рождество олдидан ёки янги йил киришига ўша ҳодисанинг гувоҳи бўлади.

ОЛТИНЧИ БОБ

Фройлайн Шопенхауернинг ҳикояси ҳеч бир узилишсиз, бир текис келтирилди. Аслида эса, саксония лаҳжасининг нуқси урган, катта сўзамол оғиздан чиқаётган сўзлар оқими икки марта — сұхбат ўртасида ва охирроғида — ҳар гал, эшикоға Магер томонидан узилди, у ўз бурчи тақозосидан қийналиб, узр сўрай-сўрай янги меҳмон келгани ҳақидаги хабар билан сұхбатхонага киради.

Биринчи марта Шарлоттанинг синглиси Риделнинг оқсочи келганини хабар қилди. Қиз пастдаги йўлакда кутиб турибди, деди Магер, зудлик билан муҳтарама хонимнинг ахволи ва кечикиш сабабини билмоқчи, чунки Эспленадада ҳамма хавотирда, тушлик ҳам совиб қолганмиш. Магер, машҳур меҳмоннинг синглисиникига бориши беҳад муҳим учрашувлар туфайли кечикаётганини, уларга ҳалакит беришга ҳаққи йўқлигини қизга тушунтиришга бекорга уринарди... Оқсоқ қиз бир муддат кутгач, ўзининг келганини Шарлотта хонимга етказишга Магерни мажбур қилди, чунки хонимга ҳамроҳлик қилиб, уни синглисининг уйига бошлаб бориш унга қатъий буюрилган, у ерда ҳамма безовта, ҳамма оч қолган.

Шарлотта қизарib кетди ва:

— Ҳа, яхши иш бўлмади! Соат неччи бўлди? Мен кетишим керак! Сұхбатни тўхтатишга тўғри келади, — дея аниқ қарор билан шошилиб ўрнидан турди.

Таажжубки, шу сўзлардан сўнг у дарҳол қайта жойига ўтириди-да, тамоман тескари фикрни айтди: – Яхши, Магер, – деди у, – биламан, бу ерга яна кириб келиш сиз учун осон эмас. Қизгинага айтингки, у сабр қилиб ўтирсин ёки кетаверсин – яхшиси кетақолсан, синглимга айтсинки, улар тушликка мени кутиб ўтиришмасин, бу ердаги ишлар оёқлаганданоқ етиб бораман, мендан хавотир олиб ўтиришмасин. Мен вақт деган нарсани мутлақо унугиб қўйдим, умуман ҳамма ишлар мен ўйлагандек бўлмади. Нима бўлганда ҳам, мен оддий бир одам эмасман, мени кутаётган тушликдан кўра юксакроқ талаблар билан ҳисоблашмай иложим йўқ. Оқсоқ қизга айтинг, у яқинларимга етказинки, мен дастлаб бу ерда портретимни чизишлари учун ўтиридим, сўнг доктор Ример билан беҳад муҳим мавзуларда баҳслашдик, ҳозир эса, мана бу хонимнинг ҳикоясини тингляпман, дабдурустдан гапни бўлиб туриб кетолмайман. Қизга юксак талабларни эслатишни унугманг ва хавотир, ҳаяжон менга ҳам бегона эмаслигини айтиб қўйинг, ахир мен ўз бурчимни англаш етишим керак-ку, айтинг, улар ҳам шуни тушунишсин.

– Тушундим, айтганингиздек бўлади, хоним, – жавоб берди Магер қоникиш билан, вазиятни чуқур тушуниб, хонани тарк этаркан.

Бироз нафасини ростлаб олган фройлайн Шопенҳауер ҳикоясини, тахминан, қизлар парқдаги топилдиқдан сўнг кувонч қанотида шаҳарга юргурган жойидан давом эттириди.

Магер иккинчи марта эшикни тақиллатганда ҳикоя аскар хотини ва “Ҳамроуз диллар” романни воқеаларига етган эди. Бу гал тақиллаш жиддий эшитилди ва Магер эндиги ташрифи мутлақо қонуний, ҳеч қандай иккилашибниш ва қаршилик бўлмаслиги керак деган юз ифодаси билан кириб келди ва қатъий ишонч билан эълон қилди:

– Камерал маслаҳатчи фон Гёте!

Бу хабарни эшиитган Адель канапедан ирғиб турди, Шарлотта ўтирганча қолди, аммо бу унинг хотиржамлигидан эмас, балки куч-қувват уни тарк этганидан нишона эди.

– Lupus in fibula!¹ – хитоб қилди фройлайн Шопенҳауер, – яратган Тангрим, нима қилиш керак? Магер, камерал маслаҳатчи мени кўрмаслиги даркор! Бунинг йўлини қилинг, дўстим! Қандай бўлмасин мени бу ердан олиб чиқиб кетинг! Умидим Сиздан, бир иложини қилинг!

– Албатта, фройлайн, – ишонтирди уни Магер, – албатта. Ҳаммасини олдиндан иложини қилиб қўйганман, чунки юқори табақадагиларнинг назокатлилиги менга маълум, кўзда тутилмаган ҳодисалар ҳам бўлиб туришини биламан. Жаноб камерал маслаҳатчига, ҳурматли меҳмонимиз ҳозир бандлигини айтиб, уни пастдаги спиртли ичимликлар хонасига киритдим. У бир стакан мадера виноси сўради, мен унинг олдига очилмаган шишани қўйдим. Энди хонимларга сухбатни тугатиш имконини бераман, сўнгра фройлайнни билдиришмайгина зинапоядан кузатиб қўяман-да, жаноб камерал маслаҳатчига, ҳурматли хоним сизни қабул қилишга тайёр, деб айтаман.

Хонимлар Магерни бундай тадбиркорлиги учун мақташди, Магер чиқиб кетди. Адель дарҳол гапга киришди:

– Қимматли хоним, мен бу лаҳзанинг улуғлигини тасаввур қиласман. Ўғил шу ерда – демак, у отасининг элчиси. Бундан чиқадики, сизнинг кел-

¹ Масалдаги бўри (лот.) – лотин матали, ўзбек тилидаги “Бўрини йўқласанг, қулоғи кўринади” мақолига тўғри келади.

ганингиз ҳақидағи хабар кимга күпроқ тегишли бўлса, ўшанга аллақачон етиб борган, бошқача бўлиши ҳам мумкин эмас-да, шов-шув катта бўлган, Ваймар Фама¹си илдам илоҳа. У сизга одам жўнатган, у зурриёти тимсолида ўзини намоён қилмоқда – мен беҳад ҳаяжондаман, бусиз ҳам бугунги воқеалар таъсирида кўз ёшларимни зўрға тутиб турибман. Бўлғуси сухбат мен билан қилинган сухбатдан кўра шу даражада муҳимроқ ва зарурроқи, камерал маслаҳатчи мадера билан таъминланган бўлса-да, ҳикоямни давом эттирай деб сўрашга ҳатто журъат қилолмайман, шубҳасиз. Буни хаёлимга ҳам келтирмайман, ҳурматли хоним, фикримни ҳозир ғойиб бўлиш билан исботлайман.

– Қолинг, болагинам, – қатъий оҳангда жавоб қайтарди Шарлотта, – агар шунни кўнглингиз тусаётган бўлса, жойингизга ўтиринг! – Кекса хонимнинг юзига нафис қизиллик югурди, самимий кўк кўзлари бесаранжом йилтиллади, бироқ у оромкурсида ўзини рисоладагидек тутиб, бемалол ўтиради. – Мехмон андак сабр қиласа ҳеч гап бўлмас, – сўзида давом этди у, – тўғриси, сизни тинглай-тинглай у билан шуғулланаман, аслини олганда мен ўз ишларимда тартиб ва мунтазамлиликка риоя қилишга одатланганман. Илтимос, давом этинг! Сиз ўғилга қолган мерос, қандайдир улуғ истеъодод ҳақида гапираётудингиз чоғи.

– Тўппа-тўғри, – эслади фройлайн Шопенхауер жойига шоша-пиша ўтиаркан. – Масалан, олайлик, бетакрор роман... – Аделмуза юқори суръатда, ўта жилвакор оҳантларда ва фавқулодда тезлик билан ҳикоясини охирлатди, бор-йўғи сўнгги сўздагина нафасини ростлади, шундаям бир сонияга, холос. Тўғрироғи, нафасни ростламади-ю, салгина оҳангни ўзгартириб, сўзида давом этди: – Қимматли хоним, сизнинг келганингиз ҳақидағи хабар менга етиб келганиданоқ, мана шу воқеаларни сизга тезлик билан етказиш истаги туғилди. Бу истак сизни кўриш ва сизга бўлган ҳурмат-эҳтиромимни изҳор қилиш истаги билан қўшилиб, Лина Эглоффштайн олдида гуноҳкор бўлишимга олиб келди – ўз режамни яшириб, сизни кўриш баҳтидан уни маҳрум қилдим. Қадрли, марҳаматли хоним! Сизга айтганим мўъжизани энди сиздан кутаман. Агар хавфи ва соҳталиги менинг юрагимни эзаётган ушбу никоҳнинг олдини олиш учун сўнгги дақиқада осмон узилиб ерга тушмаса, унда ҳозир кўнглимдан лип этиб ўтганидек, эҳтимол, ўша нажотбахш лаҳзада сиз бунга қўргон бўларсиз, Худо шунинг учун сизни бу ёққа бошқаргандир. Бир неча дақиқадан сўнг сиз ўғлини, бир неча соат ўтгач эса, буюк отасини кўрасиз. Сиз бунинг олдини олишингиз, таъсир ўтказишингиз мумкин, бунга ҳаққингиз бор! Сиз Августнинг онаси бўлишингиз мумкин эди – лекин унинг онаси эмассиз, чунки сизнинг машҳур ҳаётингиз, ўзингиз хоҳлаган, ўзингизга ёққан бошқа ўзандан кетди. Тоза ақл, илоҳий мустаҳкам иродат, тўғри ва маъқул ишнинг этагидан тутганингиз сизга кўмак берди, – бу ерда ҳам шуларни ишга солинг! Оттилияни қутқазинг! У сизнинг қизингиз бўлиши мумкин эди, ҳатто сизга ўхшайди ҳам, шунинг учун қачонлардир сиз юксак мулоҳазани қарама-қарши қўйган хавф энди унга таҳдид қилиб турибди. Сизнинг ёшлик тимсолингиз такрорланган қизга она бўлинг, негаки бу ўшанинг ўзи, шу боисдан ҳам у ўғли орқали отаси томонидан севилган. Гёте “амазонка” дейдиган қизгинани ҳимоя қилинг, бир вакъллар отасига қўллаган усулингизга суюнган ҳолда уни ҳимоя қилинг, у ҳашамат курбони бўлмасин, бу менинг

¹ Фама – қад. юон мифологиясида хабар илоҳаси.

юрагимга ваҳима солади! Сиз ўткир ақл билан танлаган эрингиз оламдан ўтган, Августнинг онаси бўлган аёл ҳам бу дунёда йўқ. Сиз отаси билан ва ўғлингиз бўлиши мумкин бўлган йигит билан ҳамда сизнинг ёшлик тимсолингизни тақорорлаган гўзал қиз билан ёлғизсиз. Сизнинг сўзингиз она сўзига тенг, уни сохталик ва ҳалокатга қарши қўйинг! Сиздан илтимос қиласман, ўтиниб сўрайман!

– Болагинам! – деди Шарлотта. – Мендан нимани талаб қиляпсиз? Нимага аралашибимни сўраяпсиз? Сизнинг ҳикоянгизни турфа хил ҳиссиётлар, аммо қизғин хайриҳоҳлик билан тинглаганимда, талаб деб бўлмайди албатта, бунақа ишончни кутмаган эдим. Сиз мени нафакат илтимосингиз билан, балки уни асослаш усулингиз билан ҳам саросимага солиб қўйдингиз. Сиз мени... кекса бир аёлга ўзимнинг тақороримни кўрсатиб... шундай муносабатларга аралашибига мажбур қилмоқдасиз. Сиз чамаси, яширин маслаҳатчи хонимининг вафоти мен бир умр кўрмаган улуғ инсонга нисбатан менинг муносабатимни ўзгартирган, деб ўйлајапсиз, бунинг устига, мени унинг ўғлига она ўрнини босади, деган фикрдасиз... Кечирасиз, бу бўлмағур фикр мени қўрқитаяпти! Назаримда сиз, гўё мен бу саёҳатни уни деб... Эҳтимол сизни нотўғри тушунгандирман. Кечирасиз! Мен бугунги таассуротлар ва ташвишлардан толиқсанман, маълумингиз-ким, ҳали яна униси ҳам, буниси ҳам олдинда турибди. Саломат бўлинг, қизим, очиқкўнгиллигингиз учун миннатдорлигимни қабул қилинг! Бу хайрлашувни рад жавоби деб ўйламанг! Ҳикоянгизни эътибор билан тинглаганимнинг ўзи сиз бепарво қалбга мурожаат қилмаганингизнинг исботи бўлиши мумкин. Сизга ёрдам беришимга, маслаҳат беришимга имкон ҳам туғилиб қолса ажаб эмас. Ўзингиз тушунасиз, мен кутаётган хабарни олгунимга қадар сизга фойдам тегадиган вазият туғиладими-йўқми, билмайман...

У жойидан турмади, Адель сакраб туриб, саройдагиларга хос реверанс қилгач, самимий жилмайиб унга қўлини узатди. Унинг боши қалтиради, худди шундай ҳаяжонланган ёш қиз эгилиб унинг қўлини ўпди. Кейин Адель кетди. Шарлотта қабулхонасидаги оромкурсида бошини эгганча бир неча дақиқа ўтириди, Магер келиб хабар қилди:

– Камерал маслаҳатчи жаноб фон Гёте!

Август кириб келди, лабларида хижолатомуз табассум қалқиб турар, яқин жойлашган жигарранг кўзларини қизиқувчанлик билан Шарлоттага тиккан эди. Бу ҳам нигоҳини табассум билан юмшатишга уринганча унга қаттиқ тикилди. Юраги қинидан отилиб чиққудек эди, қизариб кетган ёноқлари, – майли, буни толиқицдан деб ўйлай қолайлик, – бунга қўшилиб, кулгили ҳолат юзага келган, бироқ ишонамизки, айни пайтда кузатувчининг унча тиниқ бўлмаган назари билан қарасак, ёқимли эди. Олтмиш уч ёшдаги бунақа ўқувчи қизни бирор жойдан топиб бўлмаса керак. Йигитнинг ёши йигирма еттида, демак ўшандагидан тўрт ёшга катта. Негадир Шарлоттага уни ўша ёздан факат тўрт йил ажратиб тургандек туюлди, манави ёш йигит ўшандаги Гёtedан тўрт ёш катта эди. Янаям кулгилиси – қирқ тўрт йил ўтган ахир. Бир дунё вақт, бутун бир умр, узок, бир хилдаги, ба-рибир, тинимсиз ҳаракатдаги, бой ҳаёт, – бой, болаларга бой ҳаёт, ўн бир марта оғир ҳомиладорлик, ўн бир марта туғиши, ўн бир йил бола эмизиш, икки марта фарзанддан жудо бўлиш, касалманд туғилган болаларни ерга топширишга мажбур бўлди. Ундан кейин ёлғизликда ўн олти йил умр

кечириш, бевалик ва фахрий кексалик даври, унинг ёнидаги жойни бўш қолдириб, ундан олдин эри ўлиб кетди, эрсиз, отасиз ёлғизлиқдаги муносиб қартайиш; меҳнат, бола туғишилардан холи, ўтган замондан кўра анча кучли ҳозирги кундаги ҳаётий бекорчилик фурсати; мумкин деган фикрни рад қилиб ташлаган ҳақиқатдан холи, яъни хотирлаш учун, ҳаётнинг “агар мана бундай бўлганда-чи” деган рўёбга чиқмаган лаҳзалари учун, уларнинг ўзгача қадр-қиммати – оддий халққа хос бўлмаган, ҳаёлий, мавжудликка, оналикка дахлдор бўлмаган, балки рамз ва афсонага айланиб, инсонлар тасавурида йиллар давомида юксакроқ аҳамият касб этган қадр-қимматини англаб етиш учун, ҳаёлот оналик даврига нисбатан кенгроқ қанот қоқадиган бекорчилик фурсати...

Ха, вақт – биз ҳам унинг фарзандларимиз! Биз у билан бирга сўлдиқ, тепадан пастга тушдик, лекин ҳаёт ва ёшлар ҳамиша тепада бўлишди, ҳаёт ҳамиша ёшлигича қолаверди, ёшлар ҳамиша биз, ёшини яшаб ўтганлар ёнида яшашди: биз улар билан бирга, ҳали бизнинг ҳам давримиз ҳисобланган, аллақачон уларники бўлган даврда яшадик, уларга қараб суюндиқ, биз тукқан, ёшлигимизни такрорлаган ёшларнинг ажин тушмаган пешонала-ридан ўпдик... Мана бу турган бола ундан туғилмаган, ундан туғилиши ҳам мумкин эди, буни инкор қилиши мумкин бўлган аёл оламдан ўтгандан буён, нафақат Шарлоттанинг ёнидаги, балки бунинг отасининг, ўша даврдаги йигитнинг ёнидаги жой ҳам бўшаб қолгандан буён буни айниқса тасаввур қилиш осон. У бошқа аёл дунёга келтирган болага синовчан боқди, жиддий танқидий назар билан унинг жуссасини чамалади, эҳтимол, Шарлотта уни яхшироқ қилиб дунёга келтирган бўларди? Йўқ, хоним ўз ишининг уддасидан яхши чиққан, у хушбичим, айтиш мумкинки, хатто чиройли ҳам. У Кристианага ўхшармикан? Шарлотта уни сира кўрмаган. Тўлаликка мойиллик, чамаси, ундан ўтган, гарчи бўйи бу камчиликни яшириб турса-да, у ёшига нисбатан анча гавдали, отаси ўша паллада бўй-бости келишганроқ эди, ўтмиш ўз болаларига бошқача зеб берган, улар одамшаванд, ярашиқли кийинишар эди. У пайтда йигитлар жингалак соchlарига пудра сепиб, гарданларидағи бир тутам сочни ўриб юришарди. Манавининг бўлса, очиқ бўйни кружева ёқали кўйлагидан яп-яланг кўриниб турар, қизгиш-жигарранг жингалак соchlари инқилобдан сўнгги эркинликда, ҳозирги одатга кўра пудра сепилмаган, ярим манглайнини бекитиб, жингалак бакенбардлар тарзида типпа-тиқ ёқасига томон чўзилиб кетган, ёш, мулойим ияги деярли кулгили виқор билан ёқасига тирадан эди. Бу турган йигит ёқасининг очиқ жойини тўлдириб турган баланд бўйинбоғида салобатлироқ, вазминроқ, тўғриси, расмийроқ таассурот қолдиради. Расм бўлганидек олди кенг очилган, кифти баланд кўтарилиган енглик, бир енгига мотам тасмаси боғланган жигарранг фрак хийла барваста қоматни яхши, маҳкам қисиб турарди. У билагини белига тираб, цилиндрининг очиқ томонини ўзига қаратиб ушлаганча қоматини тик тутиб турарди. Шу билан бирга, бутун бенуқсон романтик бекам-кўстликни унутишга мажбур қиласидан қандайдир ёт, оддий халқ нуқтаи назарида унчалик муносиб бўлмаган, хечам тўғри келмайдиган нимадир бор эди: бу унинг мулойим, ҳорғин, айтиш мумкинки, аллақандай жоиз бўлмаган шукуҳ билан бокувчи нам кўзлари эди. Бу, қачонлардир ҳерцогиняга табрик шеърларини тақдим қилишга журъат қилиб, умумий норозиликка сабаб бўлган Амурнинг кўзлари, “ишқ фарзанди”нинг кўзлари эди.

Ранги айнан такрорланган бу жигарранг кўзларнинг сал-пал фарқ қилиши, уларнинг яқин жойлашганлиги, йигит хонага кириб, эгилиб саломлашгач, Шарлоттага яқинлашган бир неча сония ичида Августнинг отасини эслатиб уни ҳаяжонга солди. Бу қанчалик шак-шубҳасиз бўлса, шунчалик исботи қийин бўлган, бироқ тан олинган ўхшашилик эди: манглайнинг торлиги, бурнининг у қадар диққатни тортмаслиги, оғзининг кичиклиги ва аёлмонандлигига қарамасдан, бу ўхшашилик тушкун кайфиятдалигини англаган ҳолда тортиниб, ғамгин, гўё узр сўрагандек туришида кўзга ташланарди, бундан ташқари, гавдасини тик тутиши, бироз орқага ташланган тўғри кифтлари, ҳатто борди-ю бу тақлид бўлганида ҳам, ўхшашиликни инкор қилиб бўлмасди. Шарлотта беҳад ҳаяжонланди. Ҳаётнинг бундай ҳадиксираб қилган асоссиз уриниши – такрорланиб, вақтнинг юзасига қалқиб чиқиб, кўз олдингда қайта намоён бўлиши, ширин хотираларни уйғотиши, унинг ёшлик ва мавжудликни сақлаб қолиши билан ўтмишга тенглашиши кекса аёлни шунчалик ҳаяжонга солдики, Кристиананинг ўғли унинг қўли устига эгилганида – ундан вино ва одеколон ҳиди анқиди – Шарлоттанинг нафас олиши қисқа, бўғиқ ҳиқиллашга айланди.

Дарҳол унинг хаёлига, бу тимсолдаги ёшлиқда дворянлик мавқеи муҗассам, деган фикр келди.

– Жаноб фон Гёте, – деди у, – ҳузуримга хуш келибсиз! Мен сизнинг эътиборингизни қадрлайман ва Ваймарга келганимданоқ ёшлиқдаги дўстимнинг ўғли билан танишаётганимдан беҳад мамнунман.

– Илтифотли қабул учун миннатдорман, – жавоб берди у назокат билан жилмайиб, шунда унинг майда, оппоқ, соғлом тишлари бир зумга ялтираб кетди. – Мени отам юборди. Сизнинг мазмундор мактубингиз унга етиб борди, сизга ёзма жавоб бериш ўрнига, ҳурматли хоним, у мен орқали шахримизга хуш келибсиз, дейишни маъкул кўрди, сизнинг ташрифингиз ҳаммага ҳаётий таъсир кўрсатиши шубҳасиз, деди у.

Шарлотта хижолат бўлиб ва тўлқинланиб кетганидан кула бошлади.

– О, бу толиққан, кекса аёлдан жуда кўп нарса кутилади, дегани, – деди у, – хўш, қимматли яширин маслаҳатчининг аҳволлари қалай? – қўшиб кўйди у ва Ример билан бирга ўтирган стуллардан бирини кўрсатди. Август стулни олди-да, такаллуф билан унинг ёнига ўтириди.

– Эътиборингиз учун раҳмат, – деди Август. – Ёмон эмас. Шикоят қилишимизга ўрин йўқ. Умуман унинг аҳволи яхши. Ташибшиланишга, тўғрироғи, ғамхўрликларга хамиша сабаб топилади, албатта, саломатлигининг тез-тез ўзгариб туриши ўзини намоён этади, мунтазам эҳтиёт чораларини кўриб турамиз. Ўзингиздан ҳам, ўз навбатида, сўрашга изн беринг, қимматли хоним, сафарингиз қандай ўтди? Бехатар етиб келдингизми? Мехмонхона сизни қониқтирдими? Бу ҳақдаги хабарлар отамни жуда мамнун қиласди. Эшишимга қараганда, бу саёҳат ҳурматли синглингиз, камерал маслаҳатчи хоними Ридель билан дийдор кўришиш учун қилинган экан. Сизнинг ташрифингиз, юқори ва қуий, ҳамма томонидан қадрланадиган хонадонда жуда катта кувончга сабаб бўлади. Ишонч билан айтишим мумкинки, жаноб камерал маслаҳатчи билан ҳам шахсий, ҳам хизмат масалалари юзасидан бир-бири мизни тўлиқ тушунамиз.

Шарлотта унинг сўзлаш тарзини ёшига номувофиқ расмиятчилик деб ҳисоблади. “Ҳаётий таъсир кўрсатади” деганинг ўзи ноодатий эди; “жуда катта кувонч”, “тўлиқ тушуниш” ҳам унинг кулгисини қистатган эди. Бунака

бирикмаларни Ример қўлласа бўлади, улар ёшгина йигит оғзидан хийла ғалати, ўта расмийлиги боис ғайритабиий эшитилади. Шарлотта сездики, бу одат тусига кирган сўзлаш тарзи бўлиб, сўзловчи унинг ўта баландпарвозлигини сезмайди, шунингдек, у Шарлоттанинг юзи беихтиёр бужмайганини ҳам сезмади, негаки бунинг сабабини фаҳмлашдан йироқ эди. Шарлотта унинг сўзларидағи сунъийликни саргузаштлари ҳақида билганлари, анави Аделнинг катта нам оғзидан эшитганлари билан солиширишга уринди.

У Августнинг винога ружу қўйгани, аскарнинг хотини ҳақида, бир марта камалгани, унинг дағаллиги сабаб Римернинг кетиб қолгани ҳақида ўйлади; ўша машъум қўнгиллилар воқеасидан кейин сунъий қайта тикланган сохта ижтимоий мавқеи ҳақида, уни қўрқоқликда, номардликда айблашгани, таъна-маломатлар юкини кўтаришга мажбур бўлганини эслади; буларнинг хаммасининг устига Оттилияга, малла сочли, ёқимтой “амазонка”га бўлган номаълум интилиши ҳақидаги ўйлар қалқиб чиқди. Аслини олганда, бу севги унинг ўзига хос сўзлаш тарзига ҳечам зид келмас, балки, Шарлоттанинг назарида, турли ўйлар билан, бироқ барибир бевосита ўша севги билан боғлиқ, у билан мувофиқ келарди. Шу билан бирга, бу севги унга, кекса Шарлоттага ҳам дахлдор, тўғрисини айтганда, унинг иккинчи, кенг тарқалган “мен” и билан қандайдир ўта таъсири, вазиятни мураккаблаштирадиган бир тарзда дахлдор эди, чунки ўғилнинг ва ошиқнинг характер-хусусиятлари бирга кўшилиб кетган, гарчи ўғил ўғил даражасида қолган бўлса-да, бу дегани: у ўзини отасидек тутарди. “Ё Худойим!” – ўйлади Шарлотта унинг анча-мунча чиройли ва ўхшаш чехрасига назар соларкан, – “Ё Худойим!” Ушбу илтижоли нидода манави йигит таъсирида унда кўз очган ҳаяжон ва мулойим бир меҳр ўз мужассамини топган, шунингдек, у Августнинг фикр ифодалаш тарзидаги кулгили ҳолатга ҳам тегишли эди.

Бундан ташқари, у ўзига топширилган вазифани, айрим ҳолатларга аралашиб, маълум бир ишларни тўхтатишни, ё ошиқни “амазонка”дан ёки бўлмаса “амазонка”ни ошиқдан ажратиш ҳақидаги унинг юрагигача етиб борган илтимосни ўйлади. Бироқ, очишини айтганда, унда бу ишга қизиқиш ҳам, интилиш ҳам йўқ эди, чунки “амазонка”ни “кутқазиш” мақсадида унга қарши фитна уюштиришни у ортиқча талаб деб ҳисобларди. “Амазонка”нинг очик-равshan вазифаси аскар хотини ва ўшанга ўхшаганларни майдондан сурib ташлаш бўлса, бу ҳаракатда у, яъни кекса Шарлотта тўлиқ “амазонка” тарафида бўлади.

– Жаноб камерал маслаҳатчи, – деди Шарлотта, – шундай иккита обрўли инсон, сиз ва менинг куёвим бир-бирларингни қадрлаганларинг мени қувонтиради. Ҳар ҳолда, мен буни биринчи марта эшитётганим йўқ. Синглим ёзма шаклда ҳам (у Август нутқининг кулгили баландпарвозлиги устидан кулиш учун шундай сўзлади) менга бу ҳақда айтган эди. Шу мавзууда сўз очганингиз муносабати ила, сизни яқинда саройдаги хизматингизда юқори кўтарилганингиз билан табриклашга рухсат этинг.

– Беҳад миннатдорман.

– Сиз албатта бундай илтифотга муносабисиз, – давом этди Шарлотта. – Сизнинг ишchanлигингиз, ҳерцог учун, давлат учун хизмат қилишга жиддий ёндашишингиз ҳақида кўп бора эшитганман. Агар шундай хулоса чиқаришга ҳаддим сифса, сизга ёшингизга нисбатан кўп вазифа юкланган. Агар адашмасам, сиз бу вазифалардан ташқари яна отангизнинг ишларига ҳам яқиндан ёрдам бераркансиз.

– Бундай имкониятга эга бўлганимдан беҳад хурсанд бўлмоғим керак, – жавоб берди у. – Биринчи ва бешинчи йилда қаттиқ оғриганидан кейин унинг ёнимизда эканлигига мўъжизадек қарашга одатланганмиз. Иккала сафар ҳам мен жуда ёш эдим, аммо ўшандаги даҳшатни яхши эслайман. Биринчи марта стенокардиянинг хуружи уни сал бўлмаса гўр лабига олиб бориб қўювди. Касаллик ўқтин-ўқтин йўталга қўшилиб, отам тўшакда ётолмай қолди, ётса нафаси қисиб қоларди. У дардни оёқда туриб енгишга уринди. Асабийлик анча вақтга чўзилди. Бундан ўн бир йил олдин у томир тортишиш билан кечган иситмага йўлиқдики, узоқ вақт биз унинг ҳаёти учун титраб турдик. Йеналик доктор Штарк уни даволаган эди. Танг ҳолатдан кейин тузалиши бир неча ойга чўзилди ва доктор Штарк унга Италияга саёҳат қилишини тавсия этди. Аммо отам унинг ёшида бунақа сафарга журъат қилолмаслигини айтди. Ўшанда у эллик олти ёшда эди.

– Бу – қариликни жуда эрта бўйнига олди, дегани.

– Сиз ҳам шу фикрдамисиз? Ўтган ва ундан олдинги йили ўзини жуда яхши ҳис қилган “Райнбўйи Италияси”га боришни ҳам рад қилди, чамамда. Унинг йўлда баҳтсиз ҳодисага йўлиққани ҳақида эшитган бўлсангиз керак-а?

– Йўқ, эшитмадим. Унга нима бўлган эди?

– О, ҳалиям охири баҳайр бўлди. Шу ёзда, онамнинг вафотидан кейин...

– Қимматли жаноб фон Гёте, – қўрқиб унинг сўзини бўлди Шарлотта, – ўзингиз эслатмасангиз... қандай қилиб ёдимдан кўтарилибди... бундай оғир жудолик боис сизга ўзимнинг чуқур таъзиямни билдиришни унутибман. Аммо сиз, кекса дўстингизнинг юракдан чиқкан изҳорига ишонасиз, шундайми?

Август қоп-қора, мулойим бокувчи кўзлари билан унга назар ташлади ва тағин ерга қаради.

– Чин юрақдан раҳмат, – дея ғудранди у.

Бир неча мотам сониялари жимлиқда кечди.

– Ҳар ҳолда, – деди Шарлотта кейин, – бундай оғир зарба қимматли яширин маслаҳатчимизнинг саломатлигига у қадар жиддий таъсир қилмаган, деб ишонса бўлар.

– Онам касал бўлган охирги кунларда отамнинг ҳам соғлиги ёмонлашди, – жавоб берди Август. – Онам оғирлашиб қолгач, у ишлаб ўтирган Йенадан шошилинч қайтиб келди, онам дунёдан ўтган куни отам иситмалаб, тўшакка михланиб қолган эди. Эшитган бўлсангиз керак, онам оёқ-қўлларининг чангак бўлиб қолишидан жуда қийналиб ўлди. Мени ҳам унинг ёнига киритишмади, дугоналаридан ҳам бирортаси ёнида ўтирмади. Римернинг хотини, Энгельс, Вульпиуслар – ҳаммалари қочиб кетишиди. Чамаси, унинг ахволига чидаб бўлмасди. Четдан иккита қаровчи аёлни чақиришди, ўшаларнинг қўлида жон берди. Бу афтидан... бу ҳақда бир нарса деёлмайман, қандайдир аёллар дарди эди, бўйидан тушишми ёки бола ўлик туғилганми, хуллас, ўлимга олиб келган дард. Менга шундай туюлди. Эҳтимол, чангак бўлиб қолгани унинг касаллигини шу маънода тушунишинга мажбур қилгандир, шу билан бирга, мени хушмуомалалик билан у ерга киритмаганлари шу гумонимни янада тасдиқлади. Агар отамнинг ўзи ўшанда тўшакка михланиб қолмаганида, уни ҳар қандай ғам-андухли ҳодисалардан четда юришга мажбур қиласиган таъсирчан асаб тизимини ҳимоя қилишимиз жуда қийин бўларди. Шиллер жон бераётганида ҳам

у тўшакда ётган эди. Ўлим ва қабрга яқинлашишдан уни табиатнинг ўзи асрайди – бунда мен қисмат ва ироданинг ўзаро алоқасини кўраман. Сиз билсангиз керак, унинг тўртта опа-укалари гўдаклигида ўлиб кетишган. Отам яшаяпти, бардам-бақувват десак ҳам бўлади; лекин у ёшлигидан бошлаб бир марта эмас, бир неча мартараб гўр оғзига бориб қолиш даражасида касал бўлган, бунда мен Вертер даврини кўзда тутяпман, – у хушёр тортиб, тутилиб қолди ва қўшиб қўйди. – Жисмоний танглик демоқчиман, ўсмир боланинг қон тупуриши, эллик ёшидаги оғир касалликлар, уни Богемия курортларининг кунда-шундасига айлантириб қўйган зардобнинг баданга тарқалиши, буйрак санчиғи каби дардларни, ҳеч бир сабабсиз-несиз ҳаёти қил устида қолган кезларни-ку, айтмаса ҳам бўлади, бутун Ваймар ҳар куни уни йўқотишдан қўрқиб, титраб-қақшаб туради. Бундан ўн бир йил олдин Шиллер вафот этганида барча нигоҳлар ташвиш ичида унга қаратилган эди. Онам шундай касалманд одам ёнида ҳамиша гул-гул очилиб юрарди, лекин у ўлиб кетди, бу – яшаяпти. Ҳар қанча ташвиш тортишимизга қарамасдан у ҳаётнинг этагидан маҳкам тутган, гоҳида у ҳаммамиздан қўра узоқроқ яшаса керак, деб ўйлаб қоламан. У ўлим ҳақида билишни ҳам истамайди, уни инкор қиласди, унинг устидан жимгина олдинга тикилади. Агар мен унинг кўз олдида ўлсам бу нарса қандай осон юз бериши мумкин, гарчи мен ёш, у кекса бўлса-да, лекин менинг ёшлигим унинг кексалиги олдида нима деган гап! Мен унинг ҳаётидаги бор-йўғи тасодифий, арзимас бир ўсимта, борди-ю мен ўлсам, бу ҳақда у миқ этмаган бўларди. У шундай қиласди, мен уни биламан. Таъбир жоиз бўлса, унинг ҳаёт билан мулоқоти хавфли дўстликка ўхшайди, у ҳар қандай хунук, ваҳимали қўринишлар, жон бериш, тобутга қўйилиш манзараларидан ўзини астагина четга олади. Дафн маросимларига боришга ўзини ҳеч қачон мажбур қилмаган, Ҳердерни, Виландни, руҳан беҳад боғланиб қолган ҳерцогиня Амалияни тобутда кўришни истамаган. Уч йил бурун Османштедтда, Виланднинг дафн маросимида мен ундан вакил бўлиб қатнашиш шарафига муюссар бўлган эдим.

– Ҳм, – деди Шарлотта ичида деярли газабга айланган норози оҳангда. – Дафтарчамга, – деди у сал кўзларини қисиб, – ўзимга ёккан фикрлар ёнига бир жумлани қўшиб қўйгандим. Мана у: “Сен ҳар қандай бошқа тимсоллар каби ўлимнинг ўзгарувчан тимсоллари билан ер юзида одатдагидек хотиржам яшаб келдинг-ку, энди қачондан бери ўлим сени даҳшатга соладиган бўлди?” Бу “Эгмонт”дан олинган.

– Ҳа, Эгмонт, – дея такрорлади Август. Кейин бошини қуи эгди, дарҳол яна кўтарди-да, Шарлоттага қаттиқ тикилиб, синовчан назар солди, сўнг яна ерга қаради. Шундан сўнг Шарлотта, мен қарши курашаётган ҳистийғуларни у атайлаб қайта қўзғатмоқчи бўлди, бундай тез назар ташлаб олиши ўз ютуғининг тасдигини кўриш бўлса керак, деган хаёлга борди. Сўнгра Август сухбат маромини тез ўзгартириди ва сўзларини силлиқлашга шошилди чоғи, шундай деди: – Албатта, отам онамни тобутда кўрди ва у билан юракларни тилка-пора қиладиган бир ҳолатда видолашди. Бизда онамнинг ўлимига бағишлиб ёзган шеъри бор. Унинг жони узилгандан кейин бир неча соат ўтгач бу шеърни, афсуски менга эмас, хизматкорга айтиб туриб ёздирган, мен бошқа юмушлар билан банд эдим, ўзи тўрт мисра шеър, аммо жуда таъсирчан:

Эй қуёши, сен энди уринма бекор
Қора булутлардан чиқма чараклаб.
Ҳаётимнинг қолган кунлари буткул,
Ўтар уни мудом ииғлабу йўқлаб.

– Ҳм, – деди яна Шарлотта ва нима дейишни билмай бош иргади. Кўнглидан кечдики, шеър бир томондан у қадар аҳамиятли ҳам эмас, иккинчи томондан муболағадан ҳам холи эмас. Шу билан у яна шубҳалана бошлиди, – Августнинг унга тикилган нигоҳида бунинг тасдифини кўрди, – гўё Август, у овоз чиқариб айтмаган, фақат хаёлидан ўтган, бир-бирларининг кўзларидан уқиб олишлари мумкин бўлган бу хulosани зўрлаб билиб олмоқчидек эди. Шунинг учун Шарлотта нигоҳини пастга олди ва тушунарсиз бир мақтовни фўлдиради.

– Ушбу шеърнинг борлиги жуда муҳим-а, шундайми? – сўради Август, ҳеч нарса тушунмаган бўлса-да, – бунга роса қувонаман, мен уни кўп нусхада кўчириб, саройдагиларга тарқатдим. Улар буни ўқиб ғазабланишар, ўз эркинлиги ва бемалоллигидан, шубҳасиз, воз кечолмаса-да, отам онамга қанчалик садоқатли бўлганини билиб, эҳтимол уялишар, шундан ибрат олишар. Отам онамни қанчалар эъзозлаганини, унинг хотирасини нечоғлик қадрлашини, улар ғазаб-нафрат, фийбатлар билан таъкиб қилган аёлнинг хотирасини ардоклашини кўриб кўйишисин. Хўш, нима учун таъкиб қилишди? – сўради қизишиб. – Шунинг учунки, у саломатлиги кўтарган кезларда кўнгил ёзишни, рақс тушишни хуш кўрар, қувноқ давраларда бир-икки стакан ичарди. Қулай сабаб-а? Отам бунга кулиб қўяқолар, гоҳида менинг ҳузуримда онамнинг бироз қўполроқ қувноқлиги учун ҳазиллашар, бир марта ҳатто онамнинг атрофида сехрли бир қувноқлик ҳукм суриши ҳақида кичкина шеър ҳам ёзган эди, бироқ бу очиқкўнгиллик билан, уни рағбатлантириш руҳи билан йўғрилган эди. Сирасини айтганда, у уйда, бизнинг ёнимизда бўлишдан кўра қўпроқ сафарларда, Йенада, курортларда бўларди. Шундай вақтлар ҳам бўлардики, менинг туғилган кунимга тўғри келадиган рождествода келолмай, Йенадаги саройда, ўз ишлари билан қолар, фақат совға жўнатиш билан чекланар эди. У узокдами, яқиндами, фарқи йўқ, онам унинг жисмоний саломатлиги учун шунчалик куюнардики, қимматли асарларини ёзишига халақит берадиган ҳар қандай ташвишлардан уни ҳимоя қилиб, уйдаги юмушлар юкини бутунлай ўз гарданига оларди, тўғри, у отамнинг ижодини тушунишни даъво қилмасди, – бошқалар уни қанчалик тушунади? – бироқ уларни хурмат қиларди, отам буни жуда яхши биларди ва бунинг учун ундан миннатдор бўларди. Саройдагиларимиз ҳам агар отамнинг асарлари моҳиятига етишганда эди, онамга миннатдорлик билан муносабатда бўлган бўлардилар, йўқ, бунга уларнинг разил табиати йўл бермади, улар онамнинг устидан кулишни, у назокатли эмас, семиз, ёноклари қип-қизил, француз тилини билмайди, деб уни ғийбат қилишни афзал кўришди. Бироқ буларнинг бари ҳасад, ёвуз ичиқораликдан ўзга нарса эмас, чунки онамга улкан баҳт насиб қилган эди, у хонадоннинг қалби, улуғ шоирнинг, улкан давлат арбобининг хотини эди, Ҳасад ва фақат ҳасад! Шунинг учун онамнинг вафотига шу шеър битилганидан қувонаман, негаки саройдаги зодагонлар буни кўриб аламдан кўкариб ўлади, ахир шеър шундай ажойиб, мазмундор-да, – хитоб қилди у муштларини қаттиқ тугиб, ғазаб, нафратга тўлганча. Кўзлари хира тортиб, манглай томирлари бўртиб кетди.

Шарлотта кўз олдида забти тор, жанжалга мойил одам турганлигига амин бўлди.

– Ардоқли жаноб камерал маслаҳатчи, – деди у ва эгилиб Августнинг титраётган муштига қўлини қўйди-да, қисилган бармоқларни меҳрибонлик билан ёзди, – ардоқли жаноб камерал маслаҳатчи, мен бутун қалбим билан сизни тушунаман, айниқса, раҳматлик онангизнинг хотирасини шу қадар қадрлашингиз, шундай улуғ отангиз билан фахрланиш туйғусини изҳор қилишдан чарчамаслигингиз мени мамнун қилди. Сизга тақдир насиб этган шундай отанинг ўғли бўлиш, бу – найрангбозлик эмас. Сиз олийжаноблик билан, зодагонларнинг фикрларига қарама-қарши ўлароқ, ҳаммамизга ўхшаган, яъни умумий андазага кўпроқ тўғри келадиган суюкли онангизнинг хотирасини шу қадар ардоқлашингизни мен сиздаги энг яхши хислат деб ҳисоблайман, чунки мен ҳам онаман, ёшимиз нуқтаи назаридан сизнинг ҳам онангиз бўлишим мумкин эди. Энди ҳасадга келсак! Худо гувоҳ, фикрингизга тўлиқ қўшиламан. Мен ундан ҳамиша нафратланганман, ҳамиша ундан иложи борича ўзимни олиб қочганман – бемалол айтишим мумкин: бунинг уддасидан чиққанман. Бироннинг қисматига ҳасад билан караш – қанчалар тубанлик! Ҳаммамиз ҳам бандалар бошига тушадиган кулфатларни тотиб кўрамиз-ку; бошқаларнинг қисматига ҳасад қилиш қанчалар хато, қанчалар бемаънилик ахир! Чинакам жирканч, нолойик туйғу. Биз ўз қисматимизнинг моҳир устаси бўлишимиз, бошқаларнинг ишларига беҳудага аралашавериб ҳолдан тоймаслигимиз лозим.

Август хижолатомуз жилмайиб, Шарлотта унга кўрсатган оналик меҳри учун миннатдорлик белгиси сифатида сал эгилди ва ёзилган қўлини кўксига қўйди.

– Сиз ҳақсиз, қимматли хоним, – деди у, – онам жуда кўп азият чекди. Гўрида тинч ётсин. Лекин нафақат онам учун қаттиқ хафаман. Отам учун ҳам қайғураман. Энди, ҳаёт ўтиб кетаётгани сингари ҳаммаси ўтиб кетди, тинч-осойишта палла келди. Халал берадиган мушкулот ер остига кетди. Бироқ у бир вақтлар қанчалар халақит берди, мунофиқлар, ахлоқпарастларни жонидан тўйғазди, отам уларнинг хоҳишлари билан ҳисоблашмай, уларнинг ахлоқ қоидаларига зид ўлароқ оддий халқдан чиққан қизни ўзига teng кўриб, уларнинг кўз олдиларида у билан яшай бошлагани учун отамни ҳақорат қилишди, орқаворатдан ғийбат қилишди! Улар имкон топган заҳоти буни менга ҳам сездириб қўйишга интилишди, менга кўз остидан қараб устимдан кулишди, таъна ва афсус билан елкалари ни қисиб қўйишди, гўё мен мавжудлигим учун бу эркинликдан миннатдор бўлишим керакдек! Гўё отамдек инсон ўз хоҳиш-иродаси билан яшашга ҳаққи йўқдек, гўё у факат қотиб қолган ахлоқий қоидаларгагина риоя қилиши зарурдек... Бу насроний ватанпарварлар ва саховатпеша маърифат-парварлар ҳеч ён беришни исташмади, гарчи эркин ва автоном гўзаллик қонунини нафақат санъат, балки ҳаётнинг ўзи илгари суриб турган бўлсада, улар даҳо ва ахлоқ ўртасидаги қарама-қаршилик ҳақида айюҳаннос солишди, бунга уларнинг фаҳм-фаросатлари етмади, тафовут ҳақида, нохуш қилиқ ҳақида дод-вой қилишди. Хотинларнинг ғийбати! Ҳар ҳолда улар инсон шахсини тан олишмаса ҳам, даҳо шоирнинг хуқуқларини эътироф этишлари керак эди-ку? Худойим, ўзинг асра! “Майстер”ни фоҳишалар уяси, “Рим элегиялари”ни заиф ахлоқ ботқоқлиги, “Худо ва баядер” ҳамда

“Коринфлик келин”ни беадаб иборалар йифиндиси деб аташди. “Вертер”ни энг зарарли ахлоқсизлик дея айблашганига ҳайрон қолмаса ҳам бўлади.

– Бу мен учун янгилик, жаноб камерал маслаҳатчи, наҳотки шунга журъат қилган одам...

– Топилди, қимматли хоним, топилди. “Ҳамроҳ диллар”ни ҳам шу тахлит айблашди, бу романга бадаҳлоқ асар деган тамға босишиди. Агар сиз одамларда бирор нарсага журъат етишмайди, деб ўйласангиз, демак, сиз одамларни яхши билмайсиз. Агар булар оддий, бемулоҳаза оми ҳалқ бўлса эди. Ўйқ, классицизмга, эстетик автономияга қарши бўлганларнинг ҳаммаси – марҳум Клопшток, марҳум Ҳердер, Бюргер, Штолльберг, Николаи ва шуларга ўҳшаганлар, ҳаммалари отамни руҳан эзишди, ноқонуний иттифоқлари учун онамга ола қарашиди. Нафақат консисториянинг¹ президенти, отамнинг дўсти, мени диндорлар сафига қўшишдан бош тортмаган Ҳердер, ҳатто отам билан бирга “Ҳикматлар”ни чиқарган марҳум Шиллер ҳам, буни аниқ биламан, онамдан жирканиб юз ўгириган, ўзига ўхшаб дворян қизни эмас, балки ўз даражасидан паст қизни олгани учун отамни зимдан айبلاغан эди. Ўз даражасидан пастга тушиши лозим, демак табақага айиришнинг нима кераги бор? Ахир Шиллернинг ўзиям наслий асилизодаликдан кўра руҳий асилизодаликнинг устунлигини афзал кўрарди-ку, у буни отамдан кўра кўпроқ уқтиради. Унда у нега отамга ғамхўрлик қилиш орқасида руҳий асилизодаликка ҳалол меҳнати билан эришган онамдан юз ўгириди экан?

– Қимматли жаноб камерал маслаҳатчи, – деди Шарлотта, – гарчи эстетик автономия нима эканлигини билмасам-да, сизнинг фикрингизга тўлиқ қўшиламан, шунинг учун ўзимга унчалик тушунарли бўлмаган бу масалада ўйламасдан маъқулласам, мени Клопшток, Ҳердер ва Бюргер сингари улуғ инсонлар билан, айниқса, одоб ва ватанпарварлик масалаларида фикрим тескари келиб қоладими, деб кўрқаман. Бундай бўлишини истамасдим. Бироқ бундай эҳтиёткорлик, Германиянинг улуғ шоири шаънига доғ туширишга, қимматли яширин маслаҳатчимизни руҳан эзишга журъат қиласидан одамларга қарши сизнинг тарафингизда туришимга халакит бермайди.

Август эшитмади. Янгидан бостириб келган ғазаб исканжасида ўзининг гўзаллик ва ёқимтойлигини йўқотган қора кўзлари бежо алангларди.

– Ахир ҳамма ишлар рисоладагидай тўғри бўлмаганми? – бўғик овоз билан давом этди Август. – Отам онамни меҳроб олдига олиб бориб, қонуний хотини қилмадими, ахир бундан олдин мен отамнинг қонуний ўғли сифатида олий даражадаги ёрлиқ билан тасдиқланиб, керакли имтиёзларга эга бўлмадимми? Ҳамма гап шундаки, аслида наслий асилизодалар биздек руҳий асилизодаларга қарши ғазабдан ёрилиш даражасига етмоқда, ҳар қандай ярамас кавалерист арзимаган сабаб билан, ўз қарашларим ва отамнинг тўлиқ розилиги билан Европанинг энг улуғ хукмдорига қарши урушишга бормаганим учун мени масҳаралашга, онамга тил теккизишга йўл қўяди. Бу зоти бузуқ дворянчанинг руҳий асилизодаликка қарши бунака ҳаракати учун қамоқ жуда енгил жазо. Бунга жаллод керак, бунга қиздирилган темир керак...

У ғазабдан кўкариб, ўзини йўқотган ҳолда мушти билан тиззасига урди.

– Қимматли жаноб камерал маслаҳатчи, – аввалгидек юпатувчи оҳангда деди Шарлотта ва унга томон эгилди, сўнгра унинг ғазабланганидан ку-

¹ Консистория – черков ишларини бошқарувчи идора.

чайган вино ва одеколон ҳидини сезиб, ўзини яна орқага олди. Титраётган мушт қайтадан очилишини кутиб турди ва ярим қўлқопдан чиқиб турган бармоқларини меҳрибонлик билан Августнинг қўли устига қўйди. – Шунча қизишишнинг нима кераги бор? Мен сизни унчалик ҳам тушунмаяпман, менимча, биз шубҳа-гумон ва кераксиз хаёллар ичида йўқолиб кетяпмиз. Мавзудан четга чиқиб кетдик. Ёки тўғрироғи, сиз четга чиқдингиз. Мен тинмай ўзимча сиз боя эслатганингиз қимматли яширин маслаҳатчимиз йўлиққан фалокат ҳақида ўйлаяпман, агар сизни тўғри тушунган бўлсан, у фалокатдан ҳарқалай омон қолган, шундайми? Акс ҳолда мен аллақачон бу воқеани аниқлаштириб олган бўлардим. Нима бўлган эди ўзи?

Август яна бир неча марта чуқур-чуқур нафас олди ва аёлнинг меҳрибончилигига жилмайиб қўйди.

– Нима бўлган дейсизми? – сўради у. – А-а, ҳеч қандай қўрқинчли ходиса юз бергани йўқ. Сизни хотиржам қилсам бўлади. Йўлдаги нохуш ходиса... Воқеа бундай бўлган: шу ёзда отам қаёққа боришни анчагача ҳал қилолмай турди. Богемия курортлари жонига теккан, энг қайғули 1813 йилда у ерда сўнгги марта бўлган эди, ўшандан бери Теплицга назар солмаган, бундан афсусланмай илож йўқ, чунки сув билан уйда даволаниш курортнинг ўрнини босолмайди, Берка ва Теннштедт ҳам худди шундай. Яқинда у фойдаланган Теннштедтнинг олтингугуртли ванналарига нисбатан Карлсбад суви қўлидаги ревматизми учун фойдалироқдир эҳтимол. Аммо Карлсбаддан унинг қўнгли қолган эди, негаки ўн иккинчи йилда ўша ернинг ўзида буйрак санчиқлари хуруж қилган, бу илгари бошидан ўтказган хуружлардан энг оғири бўлган эди. Шунда унинг ёдига Висбаден тушиб қолди: ўн тўртинчи йилнинг ёзида у илк бора Райн, Майн ва Неккер водийларига саёҳат қилди, бу саёҳат уни кутилганидан ҳам ортиқ тетиклаштирди, рухини кўтарди. Узоқ йиллардан кейин у ўз она шахрида бўлди.

– Биламан, – бош ирғади Шарлотта. – Афсуски, у ўшанда меҳрибон онажонини, қимматли империя маслаҳатчиси хонимини учратолмаган, у оламдан ўтган эди! “Франкфурт почта хабарлари” газетаси ҳам ўшанда шаҳарнинг буюк фарзандининг ташрифи шарафига каттагина мақола эълон қилганидан ҳам хабарим бор.

– Ҳа, албатта! Айтмоқчиманки, у Висбаденда Сельтер ва тоғ ишлари бўйича маслаҳатчи Крамер билан бирга вақтини ёқимли ўтказиб, қайтиб келаётганида Франкфуртга кирган. Ўша ердан Муқаддас Роҳ ибодатхонасига борган, кейинроқ уйга қайтгач, ажойиб меҳроб эскизини чизган эди: Муқаддас Роҳ ёш зиёратчи сифатида ота уйини тарқ этиб, бутун бойлиги, олтинларини болаларга бўлиб бермоқда. Сюжет беҳад оддий ва таъсирчан. Асарни профессор Мейер билан бизнинг йеналик танишимиз Луиза Зайдлер якунлашди.

(Давоми келгуси сонда.)

ҮЙГУР МУМТОЗ ШЕЪРИЯТИДАН

Үйгүр мумтоз адабиёти ва унинг вакиллари ижодига Жалолиддин Румий, Абдурахмон Жомий, Саъдий Шерозий, Низомий Ганжавий, Низомиддин Алишер Навоий, Бобораҳим Машраб каби буюк шоир ва мутафаккирларнинг ижоди катта таъсир кўрсатди.

“Үйгүр шоирлари ижодини Алишер Навоийнинг бадиий меросисиз тасаввур этиши мумкин эмас. Хусусан, XVII–XIX асрларда улуғ устоззага шогирликни орзу қилмаган үйгүр шоири йўқ десак, муболага бўлмайди”, дейди бу ҳақда адабиётшунослар.

Қуйида турли даөрларда яшаб, үйгүр шеърияти ривожига муносиб ҳисса қўшган турли шоирлар ижодидан намуналар эътиборингизга ҳавола этилмоқда.

Мұхаммад Сиддиқ ЗАЛИИЙ

(XVII асрнинг охири ва XVIII асрнинг иккинчи ярми)

Үйгүр тилидан
Омонбек ЖАЛИЛОВ табдили

* * *

*Сени Лайлию Раънодек ажойиб дилрабо дерлар²,
Мени Мажнуни ҳайрондек кўйингда бир гадо дерлар.*

*Ажабдур эй шаҳи ҳўбон кечаю кундуз ишқингда,
Ҳамиша мен наво қилсан, дози сен бенаво дерлар.*

*Боқибон эл сори, жоно, юзингдин бир ниқоб олсанг,
Руҳингни чун моҳи анвар, тажсаллии Ҳудо дерлар.*

*Табассум айлабон токи, назар қилсанг гўристонга,
Туриб гўрида барча мурда, унга ҳасрато дерлар.*

*Кўрубон бальзи ошиқларки, ҳалқа-ҳалқа зулфинги,
Азалдин бирга солгон бу ҳама занжиси по дерлар.*

*Юриб сўрдим табиблардин надур бу дардима дармон,
Табиб айтурки, эй нодон, бу дардни бедаво дерлар.*

* Манба: Хитой ҳалқ Республикаси Шинжон уйғур автоном ўлкаси уйғур мумтоз адабиёти тадқиқот жамияти томонидан “Шинжон ҳалқ нашиёти”да турли йилларда нашр қилинган китоблардан фойдаланилган.

² Худди шундай матлали ғазал Б.Машрабда ҳам учрайди.

Отиниң хоки роҳига Залилий юзини сурди,
Нидо келдики қасрингдин, күзинг сур, тўтиё дерлар.

НАВБАТИЙ

(XVII асрнинг охири ва XVIII асрнинг биринчи ярми)

* * *

Чиқди ногоҳ маҳваши турфа нигори ўзгача,
Очилиб, чун лола аҳмар, гулузори ўзгача.

Икки шаҳло кўзлари кўнглим қушини қилди сайд,
Мубтало айлаб мани ёри нигори ўзгача.

Отди мужсон ўқлари пайваста қошин ё қуруб,
Тегди новак ўқлари, қилди қарори ўзгача.

На иложс айлай ёронлар, дард ўлдирди мани,
Барча дардлар бир сари, ўқ захмкори ўзгача.

Ястанибдур моҳитобон чехрасин пинҳон этиб,
Аждаҳо янглиғ ики зулфи, нигори ўзгача.

Муддао қўймас аниң ҳуснин тамошо қилгали,
Икки саф лашкар турубдур, сад ҳазори ўзгача.

Муддатидур мунтазирдурмен жамолига аниң,
Раҳм этгай деб қилурмен нола зори ўзгача.

Келмагай оламга андоғ нозанин маккорае,
Бир тараҳҳум золими ҳардам шикори ўзгача.

Кечакундуз мен жамоли шавқида бўлдим хабар,
Кошки, бу Навбатийга ё бўлса ёри ўзгача.

Хожса Ёқуб АРШИЙ

(1685–1756)

* * *

Жилвагар бўлди манго бир канизаки нозуккина,
Кокули ҳар ён сочилгон, қоп-қора кўзлуккина.

Ёшлиғ айларму ва ё шўхлук қилурми, билмадим,
Лобалар кўргузмии ул ҳар лаҳза юз турлуккина.

Лабларидин жсон берурда нози ишвасин күрунг,
Жон олурда йўқ эмиши мундог яна чобуккина.

Сабзаи гул рангида бир ҳол йўқдур ёзу қиши,
Турфадурким, қип-қизил мангзи¹, қошидур кўккина.

Айтиб эрди бир куни, келгил хуморингни ёзай,
Деб экан, борсам умид айлаб, бори ўтруккина.

Шўхлуқ ижнос этиб, билмай нечадин тутма саҳл,
Гарчи ўғлонваши эрур ул, бўлса ҳам сўзлуккина.

Шўхи жавлон, жилваи кофир, шеваси сайёдлиқ,
Сарви қад, сиймин зақан, ҳам орази ўтлуққина.

Нимча норанжи, қизил кўнглак, бошида қарқара,
Сунбули бешдин ўрулган, тол чибиқ бўрклуккина.

Ариший, ёшлар васфида ёшлиқлиқингни қўймойин,
Лоуболик²дин дединг сўзлар, бу эмди шуккина³.

ФУТУХИЙ

(XVII асрнинг охири ва XVIII асрнинг биринчи ярми)

* * *

Бир кичик дилбар кўриб мен қомати нозуккина.
Ғунча лаб ҳаваста эрур қип-қизил ўнглуккина.

Гарчи ёшидур кичик, ширин лаби асрү сучук,
Ҳар боқшида кўзининг иймоси бир турлуккина.

Ашкдек бир ерда самоъ-жилва айлаб ҳар тараф,
Қирмизи кўнглак ичидаги тор тишик бўрклиқкина.

Кўлмусуб деди манга: бир кун санга раҳм айлагум,
Кўзидин билдимки, эрмас хандаси ўтруккина.

Навмид⁴им эрди бу ёлгон ваъдасидин сурулуб,
Ёши болалар ичра кўрдим ногаҳон сурлуккина.

Ихтиёр этдим аёгин ўфкали, қилмай қабул,
Сесканиб қочди самандин сакратиб чобук⁵кина.

¹ Мангзи – юзи.

² Лоуболик – йўқлик.

³ Шуккина – индамай туриш.

⁴ Навмид – ноумид.

⁵ Чобук – чавандоз.

Чунки кўрдим мунча макру шевалар андин дедим,
Эй Футухий, ун чиқармай энди бўлгил шуккина.

МАҲЗУН

(XVIII аср)

* * *

Гул яқо чок айлади, ружсори олингни кўриб,
Сарви ар-ар титради нозук ниҳолингни кўриб.

Янги ой қон йиғлади, эрмас шафақ чарх узраким,
Қоматин хам айлабон, мушкин ҳилолингни кўриб.

Сайр этиб кўнглум қуши боғланди зулфунг домига,
Дона янглиғим, лабинг устидаги холингни кўриб.

Хизр суйи бирла Исо ёшуниб бўлди хижил,
ЛАълинг ичра ногаҳон ширин зилолингни кўриб.

Бир нафас жон турмасун тандаги, сани гар кўрмасам,
Хизр умридур манго ўлсам жамолингни кўриб.

Жаннат ул-фирдавс аро сан бўлмасанг, эй маҳжабин¹,
Тонг эмасдур кечсам андин чун висолингни кўриб.

Эй кўнгул, кўйида бўлдинг неча йилдин нотавон,
Раҳмиси келмасму бир озурда ҳолингни кўриб.

Аҳли дунёниг ипак тўнини қилма орзу,
Эй фақир, шукр эт, чу бўлгон эски шолингни кўриб.

Маҳзуно, май истасанг синдур кўнгулни, бўл гадо,
Дайр пири май берур, синган сафолингни кўриб.

ҚАЛАНДАР

(XVIII асрнинг ўрталари – XIX асрнинг биринчи чораги)

* * *

Илитди кўнглумни Хўтандаги бир ажойиб дилбари,
Ул париваши нозанин бир боқмади ошиқ сари.

¹ Маҳжабин – Ой.

Ким кўрибдур бу жаҳон ичинда мендек зорни,
Юрак-базри кабобу кўзлари хунборни.

То санга бердим кўнгилни, эй маҳи номеҳрибон,
Кўрмади ҳеч ким бу олам ичра мендек хорни.

Не бўлур қатл айласанг сен Ҳайдари каррордек,
Шум рақибу золиму хунхораи бадкорни.

Не илож жайлай, мусулмонлар, мен ул сайёдга,
Жон қушумга дом этибдур турраи¹ таррорни.

Не бўлурким манга ҳам бир илтифоте айласа,
Лутфунг ила қул қилибсен мўъмину қуффорни.

Қилмади Жамишиду Искандарга бу дунё вафо,
Чолгил, эй мутриб, рубобу, қонуну сеторни.

Давр агар сурссанг Сулаймондай, эй олий гуҳар,
Қилдурур охир сани, бу чархи ноҳамворни.

Топмадим излаб, Қаландар, даҳр аро бошдан аёқ,
Дегали рози дилим бир соҳиби асрорни.

Охунд Мулла МАШХУРИЙ

(XVIII аср)

* * *

Ғунча лаълингга, эй ширин даҳан, суйгум келур,
Боги ҳуснингга кирибон гунчалар узгум келур.

Тийра хотир ҳамнишинлардан ер узра мен малул,
Осмон узра чиқиб ойлар билан юргум келур.

Бўлмаса лаъли шакарборинг баҳам мен ташнага,
Қанд сувни ичмайин, ҳасрат суви ичгум келур.

Дуди оҳимни менинг ўрлатма, оч шамъи жамол,
Мендумен парвона, дийдор ўтида куйгум келур.

Ўтмагил тунда равон салқинидек умри азиз,
Остони ёрда бир неча кун тургум келур.

Гул совуқ салқиндан очилур, доги мен гул каби,
Ҳасм еткурса совуқ сўз, гул каби кулгум келур.

¹ Турраи – кокил.

*Аҳли дунё, аҳли фақир бу иков ҳолин күрүб,
Зар қаболарни қўйиб, пашмин¹ қабо кийгум келур.*

*Шум ганимлар юзидан яхшидурур ўлум юзи—
Ким, рақиби шум рўларни кўруб ўлгум келур.*

*Куфрудур аҳли тариқат мазҳабида ким, риё,
Худнамо зоҳидларни Маишхурӣ ўлтургум келур.*

ГУМНОМ

(XVIII аср)

* * *

*Қошинг кўргач, нечук айланмайинким қиблагоҳимдур,
Аёгингга нечук бош урмайинким саждагоҳимдур.*

*Лабинг истаб недан жон бермайин оби ҳаёт андин,
Юзинг кўргач, нечук кўз очмайин барқи моҳимдур.*

*Чекиб учқинлар ургон оҳ била бошимга чирмашқон,
Гадолиг шаҳлиқига бошима зардан кулоҳимдур.*

*Юзинг ҳажсрига сабр этмай, ўт узра мушики тушгандек,
Эмас ҳолинг ёпушган мардуми чашми сиёҳимдур.*

*Юзингни гайридан асраб, кун олдин абр тутгандек,
Сочинг эрмас, юзинг атрофи узра дуди оҳимдур.*

*Недин сарви қадингни гулшани жонда макон этмай,
Алиф қаддингни жоним ичра беркитган илоҳимдур.*

*Чаманда гул, фалакда ахтар эрмас қон ютиб афгон,
Юракдур еру кўкда ҳуснинг ахтарған нигоҳимдур.*

*Рақиблардан ғамим йўқ, берса роҳат ғамзае чашминг,
Ани барҳам урарга кипригинг ҳайли сипоҳимдур.*

*Нетурдум жону кўнглим бегумон, сендан гумон этдим,
Севингандек топиб гавҳар, шакар хандинг гувоҳимдур.*

1 Пашмин – оддий мато, бўз.



Сомерсет МОЭМ

(1874–1965)

ОМАДИ ЧОПГАН МУСАВВИР

Ҳикоялар

*Рус тилидан
Мұхиддин ОМОН
таржимаси*

Машхур инглиз адаби Уильям Сомерсет Моэм ўзбек китобхонларига ўзининг “Ой ва чақа”, “Teatr” романлари, “Ёмғир” номли ҳикоялар түплами ва бошқа асарлари билан яхши таниш. У қисқа насыри жанрлар, хусусан, ҳикоялар ёзиши борасида нұхоятда моҳир бўлган. Ҳукмингизга адабнинг энг сара ҳикояларидан бир туркуми илк бора тақдим этилмоқда.

Чарли Бартл ўз турмуш тарзida гоҳида рўй бериб турадиган оғир Қазиятлардан ҳам енгилгина, уларни юрагига яқин олмасдан чиқиб кета оларди. Зеро, Парижнинг мусаффо осмони ложувард тусга кириб, сарин шабадаларнинг ифори янги мусаллас ҳидини эслатадиган кунларда Чарлининг Рю Бред кўчасидаги болохонали уйлардан бирида жойлашган устахонаси кўзига у қадар ҳам факирона ва хароб кўринмасди-да.

Ана шундай сафоли кунларда бу барно йигит кўчага чиқиб, ўзи яшайдиган даҳа бўйлаб кезар, турли дўконлардан эрталабки харидлари билан банд бўлган шўх-шаддод қизларга бокиб ҳузурланарди. Уларнинг эрталабки либосларидаги пала-партишлик ҳамда ранг-баранглик, бу олифта сатанглар оқшомлари кенг кўчалар бўйлаб ўзларини кўз-кўзлашиб, солланиб юрганларида кийиб оладиган ўта дабдабали ва бежирим кийимларидан мутлақо фарқ қиласди. Бу оғатижон ойимқизлар эрталаб саҳармардондан кўкат ва сабзавотлар сотиладиган мўъжаз дўкончалар олдида тўпланишиб, қий-чув қилганча турли хил зираворлар, сабзавоту ошкўкиларни танлашга тушиб кетишар, ўзларини киройи уй бекалари қилиб кўрсатиш илинжида нарх-наво борасида сотувчилар билан талашиб-тортишардилар. Улардан айримлари ўз суратларини Чарлига чиздиришган, ва шунинг аносисида даҳаларидаги ҳар хил миш-мишу ғийбатлардан сўзлаб, мусаввирни ҳам хабардор этиб турардилар.

Парижнинг эрталабки жонбахш ғала-ғовуридан олган таассуротлари хали тарқаб улгурмаган ёш мусаввир устахонасига қайтди-да, ўзи

* Манба: С.Мозм. Вилла на холме. Эшенден, или Британский агент. Рассказы – М.: Издательство “Республика”, 1992.

ҳозиргина гувоҳи бўлган шаҳар кўчаларининг қуёш нуридан янада музайянлик касб этиб, ҳаёт нафаси барқ уриб турган ранг-баранглигини матога муҳрламоққа киришди. Бундай лаҳзаларда у ўзининг санъат соҳасида ноёб бир дурдона асар яратса олиш салоҳиятига эгалигини англар ва бунга қайта-қайта икрор бўларди.

Самони қўрғошин тусдаги рутубатли булутлар босиб, ҳеч қачон тугамайдигандек туюлгувчи ҳазин ёмғирлар тинимсиз силқиган кезлари эса Чарлининг палитрасидаги бўёқлар ҳам тундлашиб, кайфияти ҳам шунга яраша бўларди. Бундай кунларда у ўз студиясидаги ночор ахволдан сиқилар ва сўнгги бир ой давомида тунларни тонгга улаб яратган картинасига ижирғангандай назар ташлаб, бу тасвирларнинг ҳаммаси бир пулга қимматлигини ҳис қиласа, ўзининг ҳаддан зиёд қашшоқ ва ночор ахволидан дилгир бўлиб, хўрлиги келиб кетарди.

Худди шундай маҳзун кунларнинг бирида Чарли трубкасини тишлари орасига қистириб, хаёли паришон, хомуш бир алпозда мўйқалами остидан эндинга чиқкан сўнгги ижод намунаси тикилиб ўтиради. У бироз муддат оғзидан қуюқ тамаки тутунларини буркситиб асарига ўйчан тикилиб қолди-да, кейин матога кўчган барча тасвирларни бутқул сидириб ташлаш ниятида кўлига мойбўёқ суртадиган куракчаси – мастихинини олди. Лекин, худди шу пайт, кутилмаганда ижодхона эшигини кимдир тақиллатди.

– Киринг, – деди баланд овозда мусаввир, ажабланган кўйи ортига ўгирилиб.

Хона эшиги оҳиста очилиб, ундан жуссаси кичик бўлса-да, миқтигина, боши кал, сал бесўнақайроқ қирғий бурунли, лекин оппоқ соқоллари ўзига ярашиб турган чолнинг нуроний чехраси қўринди. Унинг эгнидаги костюми бироз унніккан, соҳибига анчагина хизмат қилиб қўйганлиги шундоқ билиниб турса-да, қўлидаги узуги, бўйинбоғига қадалган олмос кўзли тўғнағичи ҳамда нимасининг чўнтагидан осилиб турган қимматбаҳо соатининг қалин тилла занжири бу жаноб зинҳор қашшоқлар тоифасидан эмаслигини кўрсатиб турарди.

– О, мсье¹ Леир, – деда хурсанд бўлиб жилмайди рассом. – Марҳамат, ичкарига киринг. Сизни кўрганимдан бағоят мамнунман.

– Биламанки, бундай об-ҳавода сиз мўйқаламингизни қўлга олмайсиз. Шу боисдан ташрифим билан сизга кўпам халал бермасам керак, – деди меҳмон тавозе билан.

У шундай дея мольберт²да турган хомаки чизгиларга тикилиб қолди. Рассом эса унинг юзларига син солиб қараб турарди, бироқ чолнинг юз ифодасидан ҳеч нимани англаб бўлмасди.

– Хўш, бунга нима дейсиз?... ...Ёқмадими? – деда сўради Чарли, юзага келган сукутга ортиқ сабри чидамай.

– О, азизим, биласизми, сиз каби бугунги авлод ёшлари ниҳоятда бе-сабр. Нима, сизнингча бир парча мато, озгина бўёқ ва яна битта мўйқалам сотиб олибоқ, бирпасда дурдона асар яратиб қолармиди киши. Эҳ, ёшлар... ёшлар... сизда на сабру қаноат бор, на кунту иштиёқ... Ана, ўтмишдаги улуғ санъаткорларни, буюқ мусаввирларни олиб қаранг, уларнинг бирортаси ҳам ижод борасида шошилишмаган. Ишонмасангиз Вазари³нинг китобларини

¹ Мсье – жаноб (фр.). (Бу ва бундан кейинги изоҳлар таржимонга тегишили).

² Мольберт – рассомларнинг расм чизишида кўлланадиган маҳсус дастгохи.

³ Джорджо Вазари (уни баъзан Арецино ҳам дейишади, 1511–1574 йилларда Флоренцияда яшаган) – итальян рассоми, архитектори ва ёзувчisi. Асосан, италиялик машҳур рассомлар ҳаётига оид биографик асалари билан донг таратган.

кўлингизга олинг-да, би-ии-р ўқиб чиқинг. Шунда ўша буюк даҳоларнинг санъат йўлида қанчалар заҳмату машаққату риёзат чекканликларини билиб оласиз.

Чарли Бартл чолнинг бу гапларидан бироз асабийлашиб, ҳалидан буён кўлида тутиб турган куракчасини бир четга отиб юборди.

– Эй, бундай рассом бўлгандан кўра, кўча супурадиган фаррош бўлганим минг карра аълороқ эди! – дея хитоб килди у аламзадалик билан. – Мен яшамаяпман ахир... биласизми, шунчаки кун кўряпман, умримни бехуда елга совуряпман, холос! Шу кунга қадар бирорта ҳам асаримни сота олганим йўқ! Модомики, кўлимдан ҳеч иш келмас экан, менинг чизганларимга бунчалик ҳайратланиб тикилишингиздан нима наф?

Чол бамайлихотир хона бурчагидаги оромкурсига чўқди, нимчасининг чўнтағидан охиригача чекиб тугатилмаган сигарани чиқариб, унинг кўмирга ўхшаб қотиб қолган қатронли, бадбўй учларини ғижимлаб юмшатди-да, лабларига қистириб, гугурт чақди. Унинг сигарани шошилмасдан ичига тортиб, бурама тутунлар чиқаришдан қанчалар хузурланаётганлиги рўйи рост билиниб турарди. Бу одам ўз умри давомида не-не мусаввирлар билан ошно тутинмади, дейсиз. Аммо унга таниш рассомларнинг деярли бирортасининг ҳам ҳаётда омади чопмаганди, у билган мўйқалам соҳибларининг деярли ҳаммаси ҳам санъат йўлига кирган чоғларида қандай омадсиз бўлсалар, умр шомига етганларида ҳам шундай нотавон бўлиб қолаверишган. Шу билан бирга жаноб Леир мусаввирлик касбини танлаган киши, агар у ўта омадли инсон бўлган тақдирда ҳам, ҳаётда жуда кўп машаққатли ва оғир синовларга рўбарў келиши муқаррарлигини яхши биларди. Ҳатто даҳоларнинг ҳам вақти келса оч қолиб, бир бурда нонга зор кунлари бўлган, уларнинг аксариятига шон-шуҳрат ва мартаба деганлари, бу фидойи жонлар қалбини аламу изтироблар, армону омадсизликнинг доғи еб битиргандан сўнггина насиб этган, натижада уларга ўзлари эришган рутбаю шуҳратнинг гашти ҳам татимаган. Лекин шундай бўлса-да, чол рассомларни жуда ёқтирас ва улар билан бўладиган дилкаш сухбатлардан олам-олам завқ оларди. Қолаверса, бундай бўлиши табиий ҳам эди, негаки, у ўзи эга бўлган молу давлатга, айтиш керакки, эндиликда кўпчиликнинг ҳавасини келтиридиган беҳисоб бойликларига, айнан мана шу рассомларнинг қўмагида мушарраф бўлганди. Жаноб Леир ишбилармон корчалон бўлиб, у асосан тасвирий санъат асарлари савдоси билан шуғулланарди.

У бошқалардан анча илгари, импрессионист¹ рассомларнинг асарлари вақти келиб яхшигина фойда келтириши мумкинлигини пайқаганди ва имкон топди дегунча, уларнинг картиналарини сотиб олаверди, шу билан бу тоифадаги рассомларнинг неча-нечасини, қашшоқлик ва ночорлик чангалидан қутқариб қолди. Кейинчалик, бутун башарият ахлига Мане² ҳам Моне³ ҳам, ва ҳатто Сислей⁴ ҳам буюк мусаввирлар эканлиги аён бўлганида,

¹ Импрессионизм (фр. impressionnisme, impression – таассурот сўзидан олинган) – тасвирий санъатнинг ўзига хос йўналиши. Мазкур йўналиш Франциядаги XIX асрнинг охири ва XX аср бошларидаги пайдо бўлиб, кейин бутун дунёга тарқалган. Импрессионизмнинг асосий мақсади инсон онгидаги борлиқка нисбатан муносабат ва таассуротларнинг қанчалар ўзгарувчан эканлиги, ойлигини информалашдан иборатdir.

² Эдуард Мане – 1832–1883 йилларда Парижда яшаб ўтган машхур француз мусаввири, ўймакор наққоши. Э.Мане тасвирий санъатдаги импрессионизм йўналишининг асосчиларидан бири саналади.

³ Оскар Клод Моне (1840–1926) – атоқли француз рассоми. К.Моне ҳам импрессионизм оқими етакчиларидан.

⁴ Альфред Сислей (1839–1899) йилларда яшаган, Парижда таваллуд топиб, Море-сюр-Луэн шахрида вафот этган) – асли келиб чиқиши инглиз бўлган атоқли француз рассоми, асосан, рангтасвир ҳамда пейзаж жанрларида ижод қиласан, импрессионизм оқими вакили.

жаноб Леир бир пайтлар арзимас нархда харид қилған асарларни катта пулга сотиб, энг бой одамлардан бирига айланди-қолди.

Унинг яккаю ягона қизи бўлиб, у нью-йорклик тижоратчига турмушга чиққанди, дарвоқе, жаноб Леирнинг куёви ҳам айнан тасвирий асарлар савдоси билан шуғулланарди. Леирнинг ўзи эса хотини ўлиб, тул қолгач: “Энди қолган умримни тинчгина, ҳузур-ҳаловатда яшасам ҳам бўлаверар”, – деган қарорга келди. У баъзан ортига қараб, ўзи бир пайтлар асарларини арzon-гаров сотиб олган мусаввирлар шунчаки тижоратдаги мижозлари эмас, балки энг яқин дўстлари бўлганлигини ўйлаб, таскин топарди. Сўнгти пайтларда у ҳали ҳаёт бўлган кекса мусаввирларнинг устахоналарига бориб, улар билан сухбатлашишдан ҳам ўзгача роҳат туйяди. Шу ишқибозлиги туфайли кекса тадбиркор ўзи яшайдиган уйнинг юқори қаватига Чарли Бартл деган ёшгина бир рассом кўчиб келганини эшитгач, табиийки, у билан танишиш имкониятини кўлдан чиқармади.

Навқирон рассом чолнинг Монмартр¹да яшаб, қашшоқликда кун кечирган мусаввирлар, актёрлар ва шоирлар ҳаётида юз берган аломат воқеалар, қизиқарли кечмишлар ҳақидаги хотираларини жон-кулоги билан тингларди. Уни собиқ тужжорнинг санъат аҳлига бўлган ўзгача меҳр-муруввати, самимий хайриҳоҳлиги тамоман маҳлиё қилиб қўйганди. Жаноб Леирнинг унга муносабати шу қадар самимий ва бегидир эди, натижада кўп ўтмай Чарли унга ўзининг кўнглида бор дарду ҳасратларини айтиб берадиган, орзу-ўйлари, шон-шуҳратга эришиш борасидаги режалари билан ўртоқлашадиган бўлиб қолди. Чол ҳам ҳаётда деярли ёлғиз яшарди, шу сабабли у ҳам тез орада ёш рассомга жуда боғланиб, у билан апоқ-чапоқ бўлиб кетди. Чол эндилиқда ўзининг олди-сотди ишларидан батамом кутулиб, фаолиятига якун ясаганди; энди дўстларини ҳам корчалонлик назари билан эмас, балки айнан кўнглининг амрига кўра танлаши мумкин эди. Бироқ, шундай бўлса-да, уни баъзан навқирон дўсти мўйқаламидан чиқкан ишларнинг хийла ўртамиёналиги, истеъод ёлқинларидан бебаҳралиги ташвишлантирас ва ҳатто ранжитарди ҳам.

– Ҳа-а... назаримда бугунги кун сизга бироз ноҳушроқ бошланганга ўхшайди, – деди чол, оталарча меҳрибонлик илиа жилмайиб.

– Биласизми, мен ҳам сиз каби яшашни ва бутун умр айнан сиз қилған иш билан шуғуланишни истардим... Агар шундай бўлганда эди, ҳозиргидек ижара учун пулни қаердан топсан экан, деб бошимни қотириб ўтирамсадим. Мана, пулни тўлаш муддати ҳам келди, чўнтағимда эса ҳемири йўқ, – деди унга жавобан рассом истехзоли кулиб.

– Бугунги кунда тасвирий санъат асарлари билан савдо қилиш – ҳалол кишининг иши бўлмай қолди, – деди жаноб Леир ўта жиддий оҳангда. – Бу ишлар бизнинг давримизда тамоман бошқача эди! Тўғри, бизнинг ҳам ўзимизга яраша хасислигимиз бор эди. Лекин ҳалол ўйнап эдик, зинҳор фирибгарлик, кўзбўямачилик қилмаганмиз. Энди, бугун-чи... ҳамма ишлар ими-жимида, боз устига ўта ғирромлик билан амалга оширилади. Дуч келган жойда, деярли ҳар қадамингда панд еб қолишинг ҳеч гап эмас.

– Қайси пулингга кун кўришингни ҳам билмайсан киши, – деда дийдиёсини давом эттиарди ёш рассом. – Эртага мен хонам ижараси учун

¹ Монмáрт – Париж шимолидаги баландлиги 130 метрли тепалик, қадимги Рим манзилгоҳидир. 1860 йилдан у Париж шаҳри таркибига киритилиб, шу ном остида шаҳарнинг 18 та муниципал округини қамраб олган. Шунингдек, Монмартр тепалиги Парижнинг энг баланд нуқтаси саналади.

нақд уч юз франкни куртдек санашим керак, менда эса шунча пул тугул, бир сантим ҳам йўқ. Ҳатто нон олгани ҳам сариқ чақам қолмади. Манави чизган картиналаримнинг ҳам бирорга кераги йўқ.

Жаноб Леир навқирон дўстига ачиниш билан қараб қўйди-ю, бироқ лом-мим демади. Чарли бўлса камин устидаги токчага, чиройли гардишга солинган хушрўйгина қиз портретига қараганча, сўзида давом этарди:

– Эрталаб Розадан мактуб келди. Унинг ота-онаси Роза мендан воз ке-чишини талаб қилишаётган экан. Уларнинг фикрича, менинг қачондир ўз кунимни кўриш учун пул топа олишимга ишониш – мутлақо бемаънилик, тўғрироғи, аҳмоқлик эмиш.

– Хўш, қаллифингиз нима деяпти, ота-онасининг гапига кўнибдими?

– Йўқ, кўнмаган, албатта, – деди қатъий ишонч билан Чарли. – У менга содик. Аммо бу – бизлар тағин кутишимиз, бир умр кутишимиз лозим дегани эмасми? Бу ахволда, гулдек ёшлик йилларимиз ҳам ўтиб кетади, чоғи. Очифини айтсам, нима қилишни ҳам билмай қолдим.

Рассом йигит чуқур хўрсинди-да, яна маҳзун ўй-хаёлларига берилди. Чол эса ҳамон унга ажаб бир самимият ва ачиниш билан, индамай тикилиб турарди. Лекин бироз ўтгач, кутилмаганда шундай савол берди:

– Хўш, Розанинг отаси қизини сизга бериш учун қандай шарт қўйган ўзи?

– Биласизми, Розанинг банк ҳисоб рақамида беш минг франкча пули бор. Шунинг учун ҳам қизнинг отаси токи менинг ҳам ўз шахсий ҳисобимда айнан шунча миқдордаги пулим бўлмагунча, ёки йиллик даромадларим икки юз эллик франкка етмагунича, бизнинг никоҳимизга розилик бер-маслигини маълум қилган. Энг ёмони шуки, унинг бу гапларида жон бор. Мен ҳам қиз отасининг фикри жўяли ва ҳақлигига аминман. Ахир Роза мени деб бор-буудидан айрилишини ва ўзим каби қашшоқ бўлиб қолишини истамайман-ку.

– Билмадим, хабарингиз борми-йўқми, – дея гап бошлади жаноб Леир бироз сукутдан сўнг, – менинг куёвим Нью-Йоркда антиквар буюмлар ва тасвирий санъат асарлари савдоши билан шуғулланади. Менинг ўзим, нафақага чиққанимдан сўнг, бу ёғига сираям картиналар олди-соттиси билан шуғулланмайман, деган қарорга келгандим. Аммо, сиз – навқирон дўстим, менга жудаям маъқулсиз, сизга айрича меҳрим бор, шу важдан, сизга ёрдам бермоқчиман. Қани, менга асарларингизни кўрсатинг-чи. Мен уларни куёвим Рудольфга жўнатаман; ким билади дейсиз, балки Рудольф уларни Америкада сотишга муваффақ бўлар.

– О, мсье, сиз бағоят саховатпеша ва меҳрибонсиз! – ҳайқириб юборди Чарли.

Чол оромкурсига жойлашиброқ ўтириб олди, ёш рассом эса бирма-бир ишларини мольберт устига келтириб қўя бошлади. Уларнинг сони ўн-ўн беш чоғли эди. Жаноб Леир уларнинг ҳар бирига ўта жиддий бир тарзда, зийраклик билан тикиларди. У гўё яна, маълум муддатга бўлса-да, тасвирий санъат асарлари билан савдо қиладиган ва ҳеч қачон кўнглида кечеётган ҳис-туйғуларини сиртига чиқармайдиган тужжорга айлангандек эди. Шу топда унинг мубҳам юз-кўзига қараб, ҳеч ким бу чолнинг у ёки бу суратга нисбатан аниқ фикрини уқиб, билиб ололмасди.

– Балки, шунинг ўзи етар, – деди Чарли энг сўнгги асарини намойиш қилар экан. – Сиз нима деб ўйлайсиз, менинг картиналарим америкалик-

ларга маъқул келармикан? Бундан уйланиш учун етарли пул топа олармикинман?

– Хов, анави ердаги нима? – сўради чол, хона бурчагида юзи деворга қаратиб қўйилган, бироқ негадир Чарли унга кўрсатишни лозим топмаган картина га ишора қилиб.

Рассом индамай асарни олиб келди-да, мольберт устига ўрнатди. Жаноб Леир унга қўзи тушар-тушмас, нимадандир сескангандек қалқиб тушди, кейин унинг чехрасидаги мубҳамлик бир зумда ғойиб бўлди.

– Ўх-ҳўй-ӯ, бу Ватто¹нинг иши-ку! – деда хайқирди у. – Бу картина сизга қаердан келиб қолди? Буни қаранг-а, уйингизга кимсан Ваттонинг асарини бекитиб олиб, тағин ўзингизни ночор ва қашшоқ кўрсатиб, ҳаётдан нолиб ўтирибсиз-а! Мен бу картинани уйланишингиз учун керак бўладиган пулдан икки баравар қимматига сотиб беришни ўз бўйнимга оламан.

– Йўқ, илтимос, шошилманг, мсье... Сиз бу ишга яна бирқур синчковлик или қаранг, – деда кулимсиради Чарли.

Чол ўрнидан турди, мольберт ёнига келди-да, гуё картина матосини нигоҳлари билан тешиб юборгудек тикилиб қолди. Унинг қароқларини ажаб бир завқ, ҳайрат ва мафтунлик ҳислари порлатиб юборди.

Тасвир туширилган матода ажойиб кўл ва унинг соҳилида бири-биридан башанг кийинган кишилар гурухи, хусусан, юксак дид ва жозиба билан кийинган хонимларнинг ўз даврасига худди узукка кўз қўйгандек муносиб, ёрқин кийимлардаги хушбичим ва барно йигитлар билан ноз-карашма ила сухбат қилишаётгани акс эттирилганди. Суратга боқсан киши беихтиёр: “Ким билсин, бу масрур издиҳом иштирокчилари эҳтимол Расин²нинг шеърлари ҳақида, ё бўлмасам Мадам де Севинье³нинг мактублари борасида қизғин сухбат қилишаётганикан?” – деда ўйлаши мумкин эди.

Ложувард кўлнинг ойнадек сокин сатҳида самони оҳиста кезиб юрган паға-паға оппоқ булуларнинг акси кўриниб турибди. Дов-дараҳтларнинг қизгиш-қўнғир шоҳ-бутоқлари эса куз яқинлашиб қолганидан дарак беради. Ҳали батамом сарғайиб улгурмаган ўрмон четида баҳайбат эманлар ҳамда қайрағочлар тўпи кўзга ташланади. Картина даги қизғиш ва яшил ранглар жилоси ниҳоятда жонли бўлиб, уларнинг ёрқинлиги ва бўёқдорлиги ҳар қандай томошабинни ўзига ром қилиб қўярди.

– Ваттонинг имзоси қўйилган, мана шундайベンазир асарларини кўриш менга унча кўп ҳам насиб этмаган, – деди чол.

– Сизнинг бу сўзларингиз мени жуда мамнун қилди, жаноб, – деда кулимсираб қўйди Чарли. – Ахир бу...бу – бор-йўғи кўчирма нусха, холос. Унинг асл нусхаси мен Англиядада танишиб қолганим – бир кекса инглиз хонимнинг шахсий коллекциясида бўлган. Англиядада ниҳоятда серёмғир кечган ўтган йилги ёз мавсумида мен ўша асилзода хонимницида меҳмон бўлдим. Шунда сурат эгасининг руҳсати билан Ваттонинг ушбу асаридан кўчирма қилгандим. Менимча, ишим ёмон чиқмаган шекилли.

– Э, ҳа, ҳали бу кўчирма нусха денг? – қичқириб юбораёзди. – Демак, кўчирма нусха? Унда асарнинг асл нусхаси ҳозир қаерда? Балки уни сотишига рози бўлишар?

¹ Жан Антуан Ватто (1684–1721 йилларда яшаган) – XVIII аср бошларидағи Франциядаги энг иирик мусавирилардан бири.

² Жан Батист Расин – 1639–1699 йилларда яшаб ўтган таникли француз драматурги. Франциянинг XVII асрдаги уч буюк драматурги деб эътироф этилгувчилар (Корнел, Мольвер ва Расин)дан бири. “Андромаха”, “Британик” каби оламга машҳур трагедиялар муаллифи.

³ Мадам де Севинье – 1626–1696 йиллар оралиғида яшаб ижод қилган француз адабаси. У мактублар жанрида самарали қалам тебратган.

– Ҳалиям эски одатларингизни ташламабсиз-да, мсье, – очиқчасига кулиб юборди рассом. – Афсуски, мен шу асадан кўчирма олганимдан сўнг орадан бир ой ўтиб, кампирнинг уйида ёнғин содир бўлган ва унинг бутун коллекцияси ёниб кул бўлган.

Жаноб Леир чуқур хўрсинди-да, бир муддат хаёл суриб қолди, кейин кутилмаганда, шоша-пиша Чарлига синовчан назар ташлади.

– Янглишмасам, ҳали сизижара ҳақи учун уч юз франк зарурлигини айтгандингиз, – деди. – Демак, мен мана шу кўчирма нусхангизни ўша нарҳда сотиб оламан.

– Ие, нималар деяпсиз, мсье! Бошқа қиласиган ишингиз йўқми? Уни сизга текинга бераман. Ахир сиз ҳамиша менга меҳр кўрсатиб, ғамхўрлик қилиб келгансиз...

– Эҳ, азизим, ҳалиям ёш болаларнинг гапини гапирасиз-а! Яххиси сиз қоғоз-қалам олинг-да, ушбу асар учун мендан пул олганингиз тўғрисида тилхат ёзиб беринг, – деди чол қайсаарлик билан. У шу гапларни айтатуриб, ён чўнтағидан учта яхлит юз франклик қоғоз пулни чиқарди-да, стол устига қўйди.

Чарли бирлаҳза иккиланиб турди, кейин бу пуллар айни пайтда ўзига сув билан ҳаводек зарурлигини ўйлади. Ахири, наилож дегандек елкасини қисди ва стол ёнига ўтириб, тилхат ёзишга киришди. У тилхатни ёзар экан, ҳаёлига бир ҳавотир оралади:

– Мсье Леир, айтинг-чи, ишқилиб сиз менинг бу кўчирма нусхам билан бирор фирибгарликни режалаштирмаяпсизми? Йўқса, ушбу асарни асл нусха сифатида тақдим этмасликка сўз бермагунингизча уни сизга сотолмайман, – деди тажрибали савдогарлардек.

Жаноб Леир истехзоли кулди:

– Модомики, шундан ташвиш тортаётган бўлсангиз, марҳамат, унда Ваттонинг имзосига бўёқ чапланг-да, устидан ўз исми шарифингизни ёзиб қўя қолинг.

Чарли у айтгандек қилди.

– Тағин сиз Чарли менга ишонмас экан, деган ҳаёлга бориб юрманг, – деди у қарияга тилхатни тутқазар экан, – шунчаки, бу ишимиз айрим иродаси бўш, тўғрироғи, инсофисиз савдогарларнинг нафсини ҳакалак оттириб юбормасин, дейман-да.

Жаноб Леир қах-қах отиб кулиб юборди, кейин Чарли ёзган тилхатни чўнтағига жойлаб, мольбертдан Ватто асарининг кўчирма нусхасини олди.

– Мен бу асарингизни ҳозирнинг ўзидаёқ олиб кетаман, қолгандари учун эса хизматкор аёлни юбораман, – деди чол; кейин, эшик олдида тўхтаб, кўшиб қўйди: – Ишларингиз менга жуда ёқди. Мен бу ҳақда куёвим Рудольфни хабардор қиласиган. Имоним комилки, менинг фикримга у беътибор қарамайди. Бас, шундай экан, орадан муайян фурсат, айтайлик, бирор ой ўтгач, мен сизнинг устахонангизга келиб, азизим, энди сиз бемалол уйланишингиз мумкин, бунинг учун имкониятингиз бор, дейдиган бўлсам, зинхор ҳайрон бўлиб юрманг.

Қария пастки қаватдаги уйига тушиб, кўчирма нусхани ўз қўллари билан почта жўнатмасига хос тарзда ўраб, ўша кунинг ўзидаёқ Нью-Йоркка, куёвига жўнатиб юборди. Жўнатмага илова қилинган мухтасаргина хатида, у мактубни олувчига, сотиб бериш учун картина юбораётганини ҳамда сотилажак картина баҳосидан ўзи неча фоиз улуш олишини маълум қилди. Коронги тушиб қолгани боис, чол ҳар кунги одатига кўра, кечки

овқат олдидан бир қадаҳ ўткиргина ичимлик ичиб олгани тамаддихонага кирди. Кейин, нимадандир хурсанд бўлиб, ҳингир-ҳингир кулганича, яна бир нома ёзди, уни ҳам тезкор почта билан ўша куниёқ жўнатиб юборди. Ушбу мактубнинг мазмуни кўйидагича эди:

“Нью-Йорк шаҳри божхонаси бошлигига.

Муҳтарам сэр!

Яқин кунлар ичида айнан Сизнинг божхонангиз орқали машҳур рассом Ваттонинг асл нусхадаги асарини Чарльз Бартл томонидан амалга оширилган кўчирма ниқоби остида олиб ўтишга уринии юз берииши мумкинлиги ҳақида Сиз зоти муҳтарамларини огоҳлантирмоқчиман.

Агар асадаги Бартлнинг исми шариfini сидириб ташласангиз, унинг остида асл муаллиф, яъни буюк француз мусаввирининг ҳақиқий имзосини кўришингиз мумкин. Ушбу мудҳии жиноятнинг олдини олии учун ўзингиз лозим топган ҳар қандай чорани қўллашга ҳақлисиз.

Камоли ҳурмат ила

хизматингизга доим камарбаста –

Софдил одам”.

Ушбу мактубни олувчилик масъул лавозимда ишлайдиган кишиларни бу каби ҳатлар табиийки беътибор қолдирмайди. Улар бундай огоҳлантиришдан сўнг ўз ишларида юз чандон сергак тортиб, қулоқлари динг, кўзлари дурбин бўлиб кетадилар. Шу сабабли ҳам Рудольф Кюн ўзига юборилган картинани олиш учун божхона идорасига келганида ҳамма унга шубҳаланиб қараётганини сезди. У божхоначиларни ўзига келган картина зинҳор асл нусха эмаслиги, бор-йўғи ундан олинган кўчирма эканлигига ишонтиришга қанчалар уринмасин, бари бехуда кетди. У ҳатто жаноб Леир ҳар эҳтимолга қарши ҳатга илова қилиб юборган Чарли Бартлнинг тилхатини ҳам ўз фикрига далил сифатида кўрсатди. Божхоначилар ҳатто уни эшитишни ҳам исташмади, боз устига очиқчасига унинг устидан кулишиб, мазах қилишди. Зеро, улар бундай ҳолга илк бор дуч келмаётгандилар, антиквар буюмлар савдоси билан шуғулланувчи айрим учарларнинг давлат божини тўлашдан қочиб, ўйлаб топадиган турли ҳийла-найрангларини кўравериб, уларнинг кўзлари пишиб кетганди.

– Ўйлайманки, мен сизга бир сирни очсан, ҳайратдан ёқа тутиб қоласиз, жаноб, – деди божхоначи Рудольфга худди “биз ҳам анойилардан эмасмиз” деган оҳангда. Кейин эса: – Бизга келиб тушган маълумотларга кўра бу картинада шахсан Антуан Ваттонинг имзоси қўйилган, – деди истеҳзоли жилмайиб.

– Нималар деяпсиз... жаноб... агар чиндан ҳам сиз айтгандек бўлиб чиқса, мен ёқамни тутибгина қолмасдан, ҳатто ҳайратдан тилимни йўқотсан керак, деб ўйлайман, – Рудольф Кюн ушбу сўзларни айни божхоначининг оҳангиди, ўзгача киноя ва аламзадалик билан айтди.

Божхоначи лом-мим демасдан сурат бурчагидаги “Чарльз Бартл” деган имзони миттигина пичноқча билан оҳиста қиртишлай бошлади, орадан унча кўп ўтмай, унинг остидан машҳур француз рассомининг фамилияси кўринди.

– Хўш, энди бунга нима дейсиз? – голибона овозда сўради божхона ходими.

Рудольф Кюннинг кўзларида ғалати учқун порлади. Аммо уддабурон тижоратчи гарчанд, айни лаҳзаларда қайнотасининг айёrona ҳийласини англаб етган бўлса-да, ўз ҳиссиётларини божхоначиларига ошкор қилишни

истамади; аксинча ўзини ушбу воқеадан ҳангу манг қолгандек ёхуд ноқулай аҳволга тушгандек тутиб, қўлларини икки томонга ёйди.

Кейин эса жуда катта микдордаги давлат божини, шунингдек, божхона ходимларини алдашга уринганлиги учун сезиларли микдорда жарима пулини тўлаб, суратни ўзи билан олиб кетди. Картинани уйига олиб борганида Рудольф Кюн ниҳоятда хурсандлигидан беихтиёр рафиқасининг юзларидан ўпа кетди. Илгари эрининг ҳечам бундай одати йўқлигини билган аёли анграйганча унга қулиб қараб турарди.

– Рэйчел, азизам, биласанми... отанг ҳечам ўзгармабди, у ҳалиям Европадаги энг учар савдоргарлардан бири! – деди Рудольф ҳаяжондан ҳайқириб, кейин хотинининг белидан маҳкам қучди.

Хотини ундан нега отаси ҳақда бундай деяётганини сўради, бироқ омадли тужжор унга жавоб қилишни лозим топмай, бошини масрур лиқиллатганча, кулимсираб қўя қолди.

Аввалдан кутилганидек, бу янгилик нью-йорклик газетачиларга тезда маълум бўлди. Ва воқеа юз берган куннинг эртасига ёқ, оммавий ахборот воситалари сахифалари ушбу шов-шувли ҳодисанинг турлича талқинлари ва унга бағишланган мақолалар сарлавҳаси билан тўлиб кетди. Уларнинг аксариятида антиквар буюмлар савдоси билан шуғулланувчи ҳаммага яхши таниш бўлган Рудольф Кюн машхур француз мусаввири Ваттонинг мўйқаламига мансуб дурдона картиналардан бирини “кўчирма нусха” ниқоби остида божхонадан ўтказаётганида шармандаларча қўлга тушгани ҳақида ёзилганди. Ушбу ҳодиса кўпгина мақолаларда “айёр олибсотарнинг пухта ишланган фирибгарлигини фош этишга муваффақ бўлган божхона хизмати ходимларининг навбатдаги ва энг салмоқли ютукларидан бири” сифатида тақдим этилганди.

Газеталарнинг қўтарган шов-шувлари натижасида бирпасда картинага харидор ҳам топила қолди. Бу жаноб эски мусаввирларнинг картиналарини сотиб олишга муккасидан кетган бир миллионер бўлиб, у рўзномалар сахифасида ушбу воқеа тўғрисида ўқиши биланоқ, Рудольф Кюннинг дўконига қараб шошганди. Харидорга картинани кўрсатишганида, у момақалдириқдек овози билан хохолаб юборди.

– Э-э-эй, жасоратингизга қойилман-эй! – деди у кулгисидан нафаси тикилгудай бўлиб. – Шундай асарни “кўчирма нусха” деб ўтказишига қандай журъят қилдингиз-а?! Э-э-э... офарин... қойил сизга-ей...

– Мен божхоначиларга ушбу ишни амалга оширган рассомнинг шахсан ўз қўли билан битилган тилхатини ҳам кўрсатдим, – деда елка қисиб, кулимсираганча эътиroz билдириди Рудольф Кюн. – Шундай экан, бу асл нусха эмас, балки асарнинг кўчирма нусхаси, холос. Буни Париждаги эгаси ҳам кўчирма сифатида харид қилган.

Шунда миллионер харидор худди “биз ҳам ул-бул нарсанинг фарқига борамиз” дегандек, айёrona жилмайib, Рудольфга тикилди.

– Биласизми, мен учун Сэм тоғам¹ божхонасининг ўзиёқ энг ишончли кафолат ҳисобланади. Картинаңизга эллик минг доллар бераман.

– Олтмиш минг, – деда савдога аниқлик киритди совуққонлик билан тужжор Кюн.

– Ҳа, сиз айтгандек “кўчирма нусха” учун бу ёмон нарх эмас, – истехзоли жилмайди миллионер. – Лекин, майли... барибир уни сотиб оламан.

¹ Сэм тоға – аксарият ҳолларда, асосан, бадиий адабиётда Америка Қўшма Штатларига нисбатан ишлатиладиган ибора.

Картина уни божхонадан “кўчирма нусха” ниқоби остида олиб ўтишга уринганлиги учун Рудольф Кюн жарима тўлагани тўғрисидаги ҳисоб қофози, шунингдек, ундан давлат божи ундирилгани ҳақидаги гувоҳнома билан бирга сотилди. Бас, шундай экан, бу каби ишончли далиллар бўлгач, мазкур асарнинг чиндан ҳам Ваттонинг қаламига мансуб умроқий санъат дурдонаси эканлигига ҳеч ким шубҳа билдира олмасди.

Орадан бир-икки ҳафта ўтгач, жаноб Леир, чиндан ҳам ёш рассомни йўқлаб, унинг уйига ташриф буюрди. У хона ўртасига бориб, индамасдан, у ердаги стол устига нақд элликта юз фунтлик пулни қўйди.

– О-о... жин урсин... тағин нималар қилиб юрибсиз, мсье? Бу пуллар қаердан келди?.. Нега уларни бу ерга сочиб ташлаяпсиз? – ҳайқирди Чарли. Аммо унинг пулларга кўзи тушиши биланқ, ҳаяжондан кўз олди коронfilaшиб кетгандек бўлди.

– Бу ерда роппа-роса беш минг фунт пул турибди, – деди қария. – Мен йирик қофоз пулларни сиз ҳам бир кўринг, кўзингиз қувонсин, хурсанд бўлинг, деган ният билан атайлаб, майдалаттирдим.

– Бу нима деганингиз, мсье?.. Гапингизни тушунмадим?

– Ҳозир тушуниб оласиз. Сабаби оддий... Бу пулларни мен сизнинг картиналарни учун олдим. Ана, энди сиз бемалол уйланишингиз мумкин. Агар хоҳласангиз, албатта.

Чарли ҳанг-манг бўлганча қарияга тикилиб қолди. Ишқилиб, чол унинг устидан кулмаётганимкин? Бироқ мсье Леир ҳар доимгидек навқирон дўстига очиқ чехра билан, меҳр-ла боқиб турарди. Кейин у ёш рассомнинг нақадар ҳайратга тушаётганигидан айрича завқ туйиб, ўз ишидан мамнун ҳолда қўлларини бир-бирига ишқаб қўйди. Нихоят, чол бўлган воқеаларнинг ҳаммасини бир бошдан, оқизмай-томизмай Чарлига сўзлаб берди.

Чарли, калифорниялик аллақандай пулдор бойвачча унинг асарларидан ҳайратга тушиб, азбаройи ёқтириб қолганидан биттасини ҳам қолдирмай сотиб олганини эшитганида, ҳойнаҳой туш кўраётган бўлсан керак, деган хаёлга ҳам борди. Чарлининг миясида пайдо бўлган эзгу ниятлардан яна бири: асарларимга муҳлис бўлиб қолган ўша ғаройиб саховатпешага, валломат пулдорга албатта, миннатдорлик хати битишим керак, деган ўй бўлди. Бироқ, мсье Леирнинг айтишича, бунинг иложи йўқ экан. Сабаби картиналарни харид қилган миллионер ўз манзилини сир сақлашни маъқул кўрганмиш. Қолаверса, америкалик миллионерлар айнан шунаقا ғаройиб ишлари билан ҳам машхур эмишлар.

– Қадрдоним... азиз дўстим, сиз фурсатни бой бермай, бу пулларни олинг-да, зудлик билан банкка топширинг, – дея буйруқ оҳангига ўз сўзларини тутатди қария. – Ҳа-я, дарвоҳе... Яна... бир хонимга шошилинч телеграмма юборишингиз кераклигини ҳам унутманг...

Леир шу сўзларни айтар экан, стол устига териб чиқилган пулларни бирма-бир йиғиштириб, ёш рассомнинг чўнтақларига солиб қўйди. Шундан сўнг улар икковлашиб уйдан чиқдилар.

Чарли кўча бўйлаб борар экан, худди эсдан оғиб қолган одамдек каловланарди. Чол уни кўз кири билан кузатиб қолар экан, рассом дўсти чиндан ҳам банк томонга қараб кетаётганигига ишонч ҳосил қилди, шундан сўнг яна ўз уйига кўтарилди.

У шкаф эшигини оҳистагина очиб, у ердан Чарли Бартл чизган картиналарни олди. Чол уларни бирма-бир бежирим безак билан ишланган ёғоч

гардишларидан чиқариб, ловуллаб ёнаётган камин ичига улоқтирди. Ёш мусаввир дўстининг асарлари оловга тушгач, қандай буришиб, тиришиб бораётганлигини, “қисир-қисир, висир-висир” овоз чиқариб ёнаётганлигини кўриб, мийифида қулиб қўйди. Кейин чол қўлига болта олиб, картиналарнинг ёғоч гардишларини авайлаб қисмларга ажратди-да, худди ўтин саржинларидек камин ёнига тахлаб қўйди.

– Бу тахтачалар ҳам энди каминни иситиш учун аскотади, – дея ўзига ўзи қулиб қўйди у ва хонани тартибга келтириш учун хизматкор аёлни чақирди.

Жаноб Леир шу топда ёғоч гардишларни ўтин қилиб ёкиш орқали ҳам бир неча сантимни иқтисод қилганлигини ўйлаб, ўзидан мамнун бўлиб қўлларини артди. Аммо у бундан бир неча дақиқа аввал ўз ихтиёри билан нақд беш минг фунт пулнинг баҳридан ўтганини мутлақо эсидан чиқариб юборганди.

ТАЙПАН¹

Унинг нақадар эътиборли ва нуфузли шахс эканлиги ҳаммадан ҳам кўра ўзига яхши аён эди. Бинобарин, у кимсан – Англияга қарашли қудратли фирманинг бутун Хитойдаги энг йирик шоҳобчасида биринчи раҳбар эди. Қолаверса, бу каби обрӯ ва мансаб пиллапояларига фақат ва факат ўз иқтидори, қобилияти орқали эришди. Мана, ҳозир, шу топда у бундан ўттиз ўйлар муқаддам илк бор Хитойга кетган пайтлари, ҳали она сути оғзидан кетмаган ўсмир – клерк² бўлган чоғларини мийифида қулимсираб эсга олди.

Унинг хотирасида ўзи туғилиб ўсган, қизил ғиштдан курилган кичкинагина, ота-онасининг камтарона уйи қад ростлади. Уларнинг уйи шаҳарнинг Барнс деб аталгувчи мавзесида, худди ўзларини каби ғиштин иморатларнинг узун қаторида турарди. Гарчи бу мавзедагилар шаҳарнинг асилзодалари яшайдиган ҳудудлари билан беллашишга ҳарчанд чиранишмасин, барибир, бундаги иморатлар марказдагилардек маҳобатли ва кўркам салобат касб эта олмас, алланечук файзсиз ва зерикарли бўлиб туюлаверарди.

У ўша болаликдаги уйларини ҳозирги дабдабали мармар кошонаси билан хаёлан таққослади: ҳозирги уйи бир нечта марта кенг ва ёруғ айвонга, яна ўн чоғли каттагина хоналарга эга бўлиб, хоналарининг баззиларида фирма идоралари фаолият юритса, бошқалари унга шахсий қароргоҳ бўлиб хизмат қиласди. Хаёлан бўлса-да, қилинган бу муқояса унда такаббуона бир истеҳзони уйғотди.

Ха, ўшандан буён қанча сувлар оқиб ўтмади, дейсиз... У ўзининг коллеждаги ўқишидан қайтгач (дарвоҷе, бу авлиё Павел номидаги колледж эди), отаси, онаси ҳамда икки синглиси билан бақамти дастурхон теграсида ўтириб қилинадиган тўйимли кечки овқатдан кейинги чойхўрликларини хотирлади. Ўшанда уларнинг чой дастурхонида, албатта, бир бўлак молнинг бикин гўштидан тайёрланадиган яхна овқат бўларди, ундан ташқари – нон, сариёғ... албатта, сариёғдан қисинишмасди... уни хоҳлаганча танновул қилиш мумкин эди; чойга сутни ҳам аяб ўтиришмасди. Энди-чи, у мутлақо бошқача тушликларга ўрганган. Тушлик олдидан у ҳамиша кийимларини алмаштиради. Ёлғиз ўзи тамадди қиласдими, ёки меҳмонлари

¹ Тайпан – қишлоқ ҳокими.

² Клерк – баъзи мамлакатларда майда ёзув-чизув ишларини олиб борувчи кичик идора ходими.

билан биргами, бундан қатъи назар, доим унинг дастурхони атрофида учта хизматкор парвона. Уларнинг ичидағи “Биринчи рақамли” хизматкор ўз хўжайинининг барча соҳадаги диди ва таъбини мукаммал ўрганганд, шу боисдан у хўжалик юритиш борасидаги майда-чуйда ишларга ортиқча бош суқиб ўтирумасди. У жуда мириқиб, иштаҳа билан овқатланишни хуш кўрарди, унинг дастурхонига тушликка ҳамиша аччиқ газаклар, шўрва, балиқ, сабзавотлар, қовурдоқ, кетидан ширинлик тортишарди. Бас, шундай бўлгач, у агар ўзи истаб қолса, хоҳлаган пайтда, ҳатто тушликни дастурхонга келтириш пайтида ҳам бирортасини бемалол меҳмонга таклиф қилиши мумкин эди. У турли тансик таомлардан лаззатланишни, чин маънода роҳатланишни хуш кўрарди. У ўзича “нега энди мен ўзим ёлғиз овқатланганимда, меҳмондорчилик вақтидагидек еб-ичмаслигим керак экан?” – деган фикрда эди.

Ҳа, чиндан ҳам у мансабу мартаба борасида ажойиб ютуқларга эришиди. Шу важдан ҳам ўз ватанига қайтишни у қадар хоҳламасди. Англияда бўлмаганига ҳам ўн йиллардан ошиб кетди; меҳнат таътилларини одатда ўзининг Хитой соҳилларида орттирган эски дўстларини, ҳамкасларини учратиб қолиш эҳтимоли мутлақо бўлмаган Япониядами ёки Ванкувердами ўтказарди. Айни пайтда ота-онаси нима билан машғул эканликлари ҳам унга қоронги.

Сингиллари ҳам аллақачон ўз доирасидаги кишиларга турмушга чиқиб кетишган, уларнинг эрлари ҳам, фарзандлари ҳам турли идораларда оддий хизматчи-клерк даражасида фаолият юритишарди. Унинг бу одамлар билан ҳеч бир умумий жиҳатлари йўқлигидан, улар билан мулокот қилишни ўзи учун мутлақо зерикарли иш деб биларди. У яқинлари билан қариндошлиқ муносабатларини, фақат Рождество байрами арафасида уларга бир-икки кийимлик чиройлик ипак матоми, ёки бўлмасам, нозик қилиб қўлда тўқилган аломат тарздаги кашталарними ҳадя этиш, ёхуд бир катта кутидаги чойни юбориш орқали сақлаб турарди. Уни албатта, мутлақо ҳасис деб ҳам бўлмасди, илло, у онаси тириклигига мунтазам равишда волидасига моддий кўмак бериб келди.

Бироқ, нафақага чиқиши вақти етиб, энди шунча қилган хизматларининг роҳатини кўриш муддати етганида ҳам, Англияга қайтиши ҳакидаги фикр унинг хаёлига келмаганди. Зеро, жуда қўп танишлари шундай йўл тутганида, барисининг ишлари чаппасига кетиб, охири вой бўлганидан у хабардор эди. У ўзига Шанхайдан, турли от пойгалари бот-бот ўтказилиб тургувчи ипподромга яқинроқ жойдан ихчамроқ бир уйни сотиб олишни режалаштириб қўйганди. Ана шундай қилган тақдирда, ўзи севган бридж, гольф каби эрмаклари, қолаверса, зотдор тулпорлари-ю, понилари унинг қолган умрини роҳат-фароғатда ўтказиши учун аскотиши тайин, деб ўйларди.

Афсуски, унинг хали-бери хордикка чиқиши имконияти йўқ. Чунки, орадан беш-олти йил ўтгач, унинг раҳбари Хиггинс ўз ватанига жўнаб кетади, шунда у ўз-ўзидан Шанхайдаги шохобчанинг биринчи раҳбарига айланиши керак. Ҳозирча у ўзининг эгаллаб турган мавқеидан рози – бу ерда истаганча пул топиши, жамғариши, ҳаётдан тўйгунича баҳра олиши мумкин, эртага – Шанхайга кўчиб ўтгундек бўлса, бундай имкониятлар қаёқда дейсиз...

Унинг ҳозирги пайтдаги яшаш жойининг яна бир устувор жиҳати бўлиб, у бу ерда округдаги энг биринчи шахс – яъни тайпан хисобланарди. Тайпан-

нинг гапи эса – бу ерликлар учун қонун мақомида. Ҳатто давлат консули ҳам у билан ҳисоблашиб муомала қилар, дўстона муносабатларини бузиб кўйишдан чўчиб, унинг раъига қараб иш тутарди. Бир гал нимадир сабаб билан унинг фикри консулнинг айтган гапларига мос келмай қолди, шунда ҳам у эмас, айнан консул ўз фикридан қайтиб, унинг олдида тилёғламалик билан думини ликиллатишига мажбур бўлганди-ку. У ҳозир ҳам ўша воқеани эсларкан, беихтиёр ғазабнок бир алпозда пастки жағини олдинга чиқариб, тишлирини ғижирлатиб қўйди.

Аммо, тайпан шу лаҳзанинг ўзидаёқ беихтиёр кулиб қўйди – сабаби бугун унинг кайфияти аъло, димоғи ҳар доимгидан ҳам чоғ эди. Зеро, у ҳозиргина Гонконг-Шанхай банки томонидан уюштирилган ажойиб тушлик зиёфатидан чиқиб келганди. У ердагилар тайпанни жуда катта иззат-икром билан сийлашди. Таомларнинг ҳаммаси шоҳона бўлиб, ичимликларнинг ҳам сархилларини қалаштириб ташлашди. У дастлаб бир-икки қадаҳ коктейлдан бошлаб, кейин ажойиб винодан сипкорди, охирида – икки стакан қора портер пивосидан ва узоқ сақланган ўткир брендидан баҳраманд бўлди; у шу топда ўзини жуда яхши ҳис қилар, кайфияти аълодан аълороқ эди.

Кўчага чиқар экан, у шу пайтгача деярли ҳеч қачон қилмайдиган бир ишни, яъни уйига пиёда қайтишни ихтиёр этди. Унинг ортидан эргашиб юрган иккита хизматкор-ҳаммол ҳар эҳтимолга қарши унинг қўчма ўриндиғи деймизми, ёки тахтиравонини десакмикин, кўлтиқлаб боришар, агар хўжайнлари уларнинг хизматини истаб қолса, ўриндиқ билан кўшиб, унинг ўзини ҳам кўтаришга шай эдилар; бироқ, тайпан пиёда қилаётган сайдидан хузурланиб, масрур одимлаб бораради. Аслини олганда, у ўзини жисмоний ишлар билан кўпам зўриқтиравермасди. Айни пайтда анчагина семириб, вазни ҳам тобора ошиб бораётганидан отда юролмас, лекин, баъзан: нега энди минишим бироз осонроқ бўлган пони отларидан фойдаланмаяпман? – дея ўйлаб қоларди.

Отхонадан келаётган гўнг ва чириган хашакнинг аралашган ўзига хос ачимсиқ ҳидини туряр экан, у беихтиёр баҳорги пойгаларни эслади. Унинг бир жуфт ёшгина чопафон тойлари бўлиб, у келажакда ана шу отларининг пойгаларда ғолиб чиқишидан умидвор эди. Қолаверса, идорасида ишлайдиган клерклардан бири туппа-тузук чавандоз чиқиб қолди. (Дарвоқе, уни Шанхайга, чол Хаггинснинг ихтиёрига оғдириб кетишмаса бўлгани, бундан албатта, кўз-кулоқ бўлиб туриш лозим, негаки, у қари туллак ёш чавандоз учун унча-мунча пулнинг юзига қараб ўтирамайди.)

Ха, чавандозига бир-иккита мусобақада иштирок этиш имконияти яратиб берилса, яхши бўларди. Тайпан ўзининг отхонаси шаҳардаги энг зўри эканлигини ўйлаб, ич-ичидан фуурланиб қўйди. Кейин худди зотдор капитарлар каби кўкрагини ғоз ўдайтириб керишди. Қандай ажойиб кун-а! Шундай мунаввар ва фаровон ҳаётда яшаш қанчалар яхши!

Инглизлар қабристони ёнига келганда у тўхтаб, нафасини ростлади. Қабристоннинг батартиб ва ораста ҳолатда сақланиши ҳам бу ердаги инглизлар жамоасининг ўзига хос тинч-хотиржамлиги, фаровонлигидан нишона эди. Ҳар гал қабристонга келганида, тайпанни ажабтовур бир фуур ҳисси чулғаб оларди. Ҳа, инглиз бўлиш нақадар яхши! – дея ўйларди у. Қабристон тушган худуд бир пайтлар арзимаган пул эвазига сотиб олинган

бўлиб; энди, шаҳарнинг кўрку чиройи, ободлиги тобора ошиб бораётган айни кунларда бу ерларнинг нархи ҳам ўн чандон ошиб кетди.

Шу сабабли кимлардир қабристондаги мархумларнинг хоки-турбатини бошқа жойга кўчириб, бу ерларни янги курилишлар учун сотишни таклиф қилишди, аммо жамоатчилик бу фикрга қарши чиқди. Тайпанга айни пайтда марҳум инглизларнинг жасади ҳам шаҳардаги энг қимматли ердан қўним топганини ўйлаш ёқимли эди. Буларнинг бариси унинг учун гўё бу дунёда пулдан ҳам муҳимроқ нарсалар борлигини исботловчи далилдек туюларди. Пул нима ўзи... у бугун бор, эртага йўқ бўлиши мумкин... Агар, дунёдаги ҳар нарсанинг асл моҳиятини англаб етсанг (дарвоҷе, бу гап унинг энг севимли ибораси эди), пул – бу ҳамма нарсадан муҳим, дегани эмаслигини тушуниб қоларкансан киши.

У уйига қабристон орқали, тўғридан-тўғри кесиб чиқишга қарор қилди. Йўл-йўлакай саф тортган қабрларни бир-бир кўздан кечириб борди. Ҳар бир қабрнинг ҳолати намунали тарзда, улар орасидаги йўлаклар ўт-ўланлардан тозаланган эди. Бундаги ҳамма нарса ораста ва файзли эди. Тайпан қабртошлар ёнидан ўтар экан, улардаги битикларни ўқиб кўрарди. Мана бирданига учта қабр – унда “Мэри Бакстер” номли йирик елканли кема дарғаси ва унинг икки нафар ёрдамчиси дағн этилган; уларнинг учласи ҳам 1908 йилда юз берган кучли тўфон оқибатида ҳалок бўлганди.

Бу фожиани у жуда яхши эслайди. Улардан сал нарида учта миссионернинг хотинлари ҳамда болалари билан кўмилган қабрлари. Улар боксчилар исёни чоғида ўлдирилгандилар. Ҳа, бу жудаям шармандали иш бўлганди! Йўқ, у бу фикрларни, азбаройи бегуноҳ қурбон бўлган миссионерларнинг оиласарига ачинганидан айтмаётганди, шунчаки, у лъяннати хитойликларга инглизлардан шу тариқа ўч олишларига йўл кўйиб берилганини сира ҳазм қила олмасди!

Шундан кейин тайпан бир исм ёзилган хочнинг ёнига яқинлашди. Илло хочга битилган исм эгаси унга таниш эди. Ҳа, бу Эдуард Маллок деганлари чиндан-да, жуда азamat йигит эди. Бироқ, ичқиликка муккасидан кетиб, бор-йўғи йигирма беш ёшидаёқ ўлиб кетди, шўрлик. Тайпан бу каби қисмат жуда кўпчиликнинг бошига тушганини яхши биларди. Маллокнинг исми ёзилган хочнинг ёнгинасида у яна уч-тўртта хочга эътиборини қаратди; уларда ҳам кимларнингdir номи, туғилган ва вафот этган саналари ёзиб кўйилганди. Уларнинг ҳаммаси ҳам йигирма беш, йигирма етти ёшлар атрофидағи бўз йигитлар эди...

Бу йигитларнинг деярли ҳаммасининг ҳам тақдири бир хил кечган: улар Хитойга келиб, ўз ватанларида етти ухлаб тушига ҳам кирмаган пулларни топишган; ҳаммаси ҳам жуда одамшавонда, кайф-сафони хуш кўрадиган улфатижон йигитлар бўлганидан, ким улфатчиликни таклиф қилса, ўша билан тап тортмай ичиб кетаверишган. Бирортасининг таклифини рад этиш учун уларда на ирова кучи ва на қатъият етишмаган. Мана, оқибатда, уларнинг ҳаммаси, гул ёшида хазон бўлиб, гўристонда ётишибди. Аслида Хитойдек нозик мамлакат аҳли билан ош-қатиқ бўлиш, улар билан улфатчилик қилиб, ичқиликбозлиқда беллашмоқ учун нафақат мустаҳкам соғлиқ, балки аввало, одамнинг елкасида шунчаки калла эмас, боши ҳам бўлиши керак-да.

Бу ўй-хаёлларнинг бариси жуда аламли ва алланечук ёқимсиз эди; лекин тайпан, мана шу ерда ётган неча-неча йигитлар билан бирга ички-

ликбозлиқ қилиб, алалоқибатда улар каби ичкиликнинг домига буткул тушиб кетмаганидан, балки бундай қисматни ўзи кучи, ақли билан енгиб чиққанлигидан, бир сўз билан айтганда, уларнинг ёнида бевақт қабрга тушмаганидан ғуурланиб, кулимсираб қўйди. Улар эса, ана, бари дорулбақода, шоввозлар. Дарвоке, улардан бирининг бевақт вафоти тайпанга жуда қўл келганди ҳам. Ўша йигит тайпан билан битта идорада ишлар, ёши тайпандан каттароқ бўлиши билан бирга, ақл бобида ҳам ундан хийла устунроқ эди. Агар у ёшлигига ўлиб кетмаганида, Худо билади ҳозир ким тайпанлик мақомида бўларди. Ҳа, ҳақиқатан ҳам Худонинг ишини бандаси ҳеч қачон олдиндан била олмайди!

Ие, ана, назокатли, кичкина Тёрнер хоним ҳам шу ерда эканлар-ку, Вайолет Тёрнер. О, нақадар ажойиб, оғатижон қиз эди у. Тайпан бир вақтлар унга ошиқи бекарор бўлиб, қанча изтироблар чекмаганди-я. Ҳа, ҳамон эсида, севгилисинг вафоти туфайли ўшанда ғам-ғуссага тушиб, сал қолса, эс-хушидан айрилаётганди. У қабртошдан хонимнинг таваллуд санасини ўқиди. Ҳа, агар ҳаёт бўлганида, анча ёшга кирган бўларкан...

Тайпан нарига дунёга риҳлат қилган мана шу одамларнинг ҳар бири тўғрисида ўйлар экан, кўнглида алланечук бир қоникиш ҳиссини турди. Илло, унинг наздида: ўзи уларнинг ҳамасини оргда қолдиргандек, яшаш илмида улардан устунроқ эканлигини исботлагандек бўларди. “Уларнинг бариси марҳум, ёруғ дунёни тарқ этишган, мен-чи, мен тирикман! Яшаб юрибман давримни суриб! Ҳа, Худо ҳаққи, чиндан ҳам мен уларнинг ҳамасини доғда қолдирдим”, – дея ўйларди у. Тайпан бу ердаги барча қабрларга бир-бир кўз ташлар экан, унинг лабларида яна истехзоли табассум пайдо бўлди. Кейин у ҳатто, алланарсадан хурсанд бўлгандек, қўлларини бирбирига завқ билан ишқаб ҳам қўиди.

– Мени ҳеч ким, ҳеч қачон аҳмоқ дея олмаган, – бироз овозини чиқариб минғирлади у.

Сабабини англамаса-да, лекин у бундаги марҳумларнинг барисига нисбатан ўзида такаббурона бир нописандликни турди.

Тайпан йўлак бўйлаб тобора ичкарилаб борар экан, дафъатан бир четда гўр кавлаётган икки нафар жулдуровоқи кули¹га рўпара келди. У бундан ҳанг-манг бўлиб қолди, чунки, унинг билишича, жамоасидаги инглизлардан яқин кунлар орасида ҳеч ким вафот этмаганди.

– Бунда нима қилиб юрибсизлар? Нимага бу ерда гўр кавляяпсизлар?
– баланд овозда сўради у.

Мардикорлар унга ҳатто қайрилиб ҳам қарамадилар; улар кавлаш ишларини тўхтатмасдан, чуқур хандақда туриб, юқорига оғир тупроқ уюмларини отишда давом этардилар. Тайпан гарчи узоқ йиллардан буён Хитойда яшаса-да, бу ерликларнинг тилини билмасди. Ўша пайтларда бу лаънати тилни ўрганишнинг хожати ҳам йўқдек эди. Тайпан мардикорлардан яна инглиз тилида, улар кимга гўр кавлаётгандиларини сўради. Гўрковлар тайпаннинг сўзларидан ҳеч нима тушунмай, ўз тилларида нималардир деб жавоб қайтаришди. Шундан сўнг тайпан: “каллаварам, аҳмоқлар”, – дея сўкиниб, улардан узоқлашди. У миссис Брумнинг ёш боласи оғир касал эканини эшитганди. Балки ўша болакай нобуд бўлгандир? Аммо... у ҳолда, ўзини бундан албатта хабардор қилишарди-ку; бундан ташқари кавланаётган қабр ҳам ёш бола учун эмас, катта одамга, тағин йирик

¹ Кули – мардикор, айрим Осиё мамлакатларида камбағал ёлланма ишчиларни шундай атасади.

гавдали эркак киши учунлиги шундокқина кўриниб турибди. Ушбу фикрдан тайпаннинг бадани жимирлаб кетди. У энди уйига қабристон оралаб юрмоқчи бўлганидан афсуслана бошлади. Тезроқ бу ердан катта кўчага чиқиши истагида у ўзининг кўчма тахтиравонини ортмоқлаб олган икки хизматкорини ёнига чакирди. Энди тайпаннинг аъло кайфиятидан асар ҳам қолмаган, юзи эса тобора хунук тарзда тундлашиб борарди. У идорасига қайтиши биланоқ, “иккинчи рақамли” малайини ёнига чакирди.

– Қани, Питерс, менга айт-чи, бугун шахримизда ким оламдан ўтди?

Аммо Питерс ҳам ҳеч нарсадан бехабар эди. Тайпан бундан янада ҳайратга тушди. У хитой миллатига мансуб клеркларидан бирини чақирдида, қабристонга бориб, ўша лаънати мардикор кулилардан нима гаплигини, улар кимга қабр ковлаётганликларини аниқлаб келишини буюрди. Ўзи бўлса кун давомида йиғилиб қолган хат-хужжатларга имзо чекишга киришди. Хитой клерк тез орада қабристондан қайтиб келиб, у ергаги жулдуровки кулилар аллақачон кетиб бўлишгани ва нима гап эканини била олмаганигини маълум қилди. Тайпаннинг бу гапдан баттар ғазаби кўзгади: илло, у ҳеч қачон бирон-бир ишнинг ўзидан бекитиқча амалга оширилишига чидай олмасди. Аммо, у ўзича, ҳойнаҳой, “биринчи рақамли” малайим ҳамма нарсанни билса керак, негаки, у ҳар доим ҳамма нарсадан воқиф бўлади, дея ўйлади. Тайпан “биринчи рақамли”ни чақиртирди, лекин аксига олиб: у ҳам шаҳарда кимдир ўлгани ҳакида ҳеч гапдан хабари йўқлигини, ким ўлганини билмаслигини айтди.

– Биламан, галварс, ҳеч ким ўлмаган, – ўшқирди тайпан. – Аммо қазилаётган гўр ким учун, ахир?!

Кейин у малайини чақириб, секин қабристонга боришни ва у ерда назоратчилик қиласидиган хитойликдан, нима сабабдан ҳеч ким ўлмаган бўлса-да, янги қабр кавлашга буйруқ берганини билиб келишини тайинлади.

– Аввал менга сув қўшилган виски келтириб бер, кейин жўнайверасан, – деди у, эшик олдига етган малайни ортига қайтишга мажбур қилиб.

Тайпан шу топда ўша қабрнинг кўриниши нима сабабдан ўзини бунчалик безовта, бехаловат қилиб қўйганлигини сира тушуна олмаётганди. У ўз хаёлидан бу каби фикрларни имкон қадар тезроқ чиқариб ташлашга тиришарди. Виски ичганидан сўнг унинг аҳволи бироз яхшиланди. Айни пайтга келиб, у идорасидаги бугунги барча қоғозларини саранжомлаб, ёзув-чизув ишларини ҳам ниҳоясига етказди. Кейин ётоқхонасига ўтиб, аллақандай китобни қўлига олганча, лоқайдлик билан варақлашга тушди.

Ҳа, яхшиси, у яна бир неча дақиқадан сўнг клубга чиқади, тушликкача қартабоз улфатлари даврасида бир-икки қур бридж ўйнайди. Аммо нағисиламбрини айтганда, уни ҳозир қабристонга юборган малай нима гап топиб келиши ҳамма нарсадан кўра кўпроқ қизиқтираётганди. Малайнинг жавобидан кейин зора, кўнглидаги номаълум хавотири ариса. Шу важдан у малайнинг қайтишини илҳақ кута бошлади. Чиндан ҳам тез орада малай қайтиб келди, у ўзи билан ўша – қабристон назоратчиси бўлиб ишлайдиган хитойликни ҳам бошлаб келганди.

– Хўш, нимага қабристонда янги қабр ковладинглар? – дангалига қўчди тайпан дағдағали оҳангда. – Ахир ҳеч ким ўлгани йўқ-ку?!

– Ми-ин ка-абр кавла-аа-гани йуқма-аа-ан, – жавоб берди назоратчи хитой инлизча сўзларни ҳижжалаб.

– Жин урсин, бу тағин нимаси бўлди? Ахир, бугун айни чошгоҳ вақтида у ерда иккита исқирт, жулдуровки кули қабр қазиётганди-ку!

Икки хитойлик, бир-бирига ҳайрон бўлиб қараб қўйди. Кейин малай тилга кириб, улар назоратчи билан бутун қабристонни бошдан-оёқ айланаб чиқишгани ва бирорта янги қабрга кўзлари тушмаганини баён қилди.

Тайпан шу топда тилининг учида турган бир талай сўкиш сўзларини ва: “Бу қандай бемаънилик! Ахир мен ўша қабрни ўз кўзим билан кўрдим-ку!” – деган ҳайқиригини ҳам бир амаллаб бўғзида тутиб қолди. Уларни нимагадир сиртига чиқармади. Шу гапларни ичига ютди-ю, беихтиёр ўзи ҳам охиригача англаб етмаётган ғазаб ҳиссисдан ранги рўйи кип-қизариб кетди. Хитойликлар эса ҳамон унга ҳиссиз бакрайиб туришарди. Тайпаннинг бир лаҳзага нафаси буғилиб, кўз олди қоронгилашди.

– Ҳа, майли, даф бўлларинг, – ўдағайлади у.

Бироқ улар хонадан чиқиши биланоқ, яна малайини чакирди, тепса-тебранмас хизматкор имиллаб кириб келар экан, тайпан унга яна виски келтиришни тайинлади. Кейин у терлаб кетган юзларини рўмолчаси билан артди-да, қўллари қалтираганча, малай келтирган виски тўла стаканни лабларига олиб борди. Майли, бу ярамаслар истаган гапларини валаклайверсин, лекин ўз кўзи билан ўша лаънати қабрни кўргани аниқ, ахир. Қолаверса, унинг кулоқлари остида ҳалигача, ўша лаънати гўрковлар қабрдан ташқарига отаётган тупроқ уюмларининг гурсиллаган товуши жаранглаб туради! Бу нима бўлди экан, тафин? У кутилмагандага кўксидаги юраги гурсуллаб ура бошлаганини хис қилди. Тайпаннинг бутунлай авзойи бузилиб, мазаси қочди; лекин шундай бўлса ҳам у зўр бериб, ўзини қўлга олишга тиришарди. Ҳаммаси арзимас нарсалар. Ортиқча хавотирга ҳам, бош оғритишга ҳам ҳожат йўқ. Агар, чиндан ҳам у ерда қабр бўлмаса, демак, булар шунчаки унинг кўзига кўрининган холос. Ҳозир энг оқилона иш – бу клубга чиқиб бироз чалғиши, дам олиш, агар у ерда докторни учратса, ундан бирйўла ўзини кўриб қўйишини ҳам сўрашди.

Клубда эса ҳамон ўша-ўша манзара: унга таниш одамлар, худди аввалгидек чақчақлашиб, доимий эрмаклари билан машғул эдилар. Тайпан шу топда нима учун “улар бугун бошқачароқ бўлиши керак”, – деб ўйлаганини ўзи ҳам англаёлмай, ҳайрону лол эди. Лекин, нима бўлганда ҳам, атрофдагиларнинг худди аввалгидай эканликлари унинг кўнглини хотиржам қилди. Бу ердаги кишиларнинг бариси, аллақачон бири-бирига ҳам, ўзаро мулоқотларига ҳам кўнишиб, ўрганиб кетишган эди; уларнинг бундаги турмуш тарзи гўё олдиндан белгилаб қўйилган аниқ ва равон йўлдан бораётгандек бир текис кетмоқда; бундаги ҳар бир кишининг ўзига хос феъл-атвори, хатти-ҳаракатлари ҳам бўлиб, уларни ҳам улфатлари беш қўлдай билишарди. Масалан, кимdir қарта ўйнаётганда доим қайсиdir куйни минғирлаб ўтиrsa, яна бири пивони коктейль ичиладиган найчада симиришни хуш кўради. Улфатларининг бу каби хурмача қиликлари шу пайтга қадар унинг асабига тегиб, фашини келтирган бўлса-да, бугун нимагадир улар тайпан учун ўзига хос халоскорлик омилларига айлангандек эди. “Ҳаммаси аввалгидек, ҳеч нима ўзгармаган, қандай яхши-я!” – ўйларди у. Айни пайтда у худди шундай мададга, айнан шундай халоскорона хиссиётга ниҳоятда муҳтоҷ эди. Чунки унинг кўз ўнгидан ҳалигача ўша ўзи гувоҳи бўлган қабрнинг ғариб кўриниши сираям нари кетмаётганди. Қартани ҳам бу гал жуда ёмон ўйнади, шу боис шериги у йўл қўяётган қўпол хатолари учун тинмай танбех берар, бундан тайпаннинг бадтар жаҳли чиқарди. Унинг наздига нафақат шериги, балки бунда йиғилган

ҳамма одамлар ўзига аллақандай шубҳа, мавхум бир ишончсизлик билан қараётгандек туйиларди. Қизиқ, улар бугун тайпанда қанақа нотабиий жиҳатни, ғайриодатийликни пайқашди экан?

У бирдан энди бу ёғига клубда қола олмаслигини ҳис қилди. Чиқиш йўлагида, кўлида “Таймс” газетасини тутиб турган докторга рўпара келди, бироқ, унинг ёнига боришга журъат қила олмади.

Шу пайт унда қабристонга шахсан ўзи бориб, ўша лаънати қабр бор, ёки йўқлигини текшириш истаги пайдо бўлди. У ўзининг портшези, яъни, кўчма тахтиравонига ўтириб, икки ҳаммолини чақирди-да, уни қабристонга олиб боришлиарни буюрди. У ўзича, “галлюцинациялар ҳеч қачон икки маротаба такорорланмайди”, – дея ўйларди. Бундан ташқари, у ўзи билан бирга қабристон назоратчисини ҳам эргаштириб олади. Агар чиндан ҳам у ерда қабр бўлмаса, борганлар шунчаки уни кўришмайди: агар тайпан айтганидек, у ерда янги қабр кавланган бўлиб чиқса, у ҳолда мунофиқ назоратчининг шундай таъзирини берсинки, у буни бир умрга эслаб юрсин...

Аксига назоратчи ҳам ўз жойида йўқ экан, қаёққадир зарур юмуш билан кетган эмиш; бу ҳам етмагандек, қабристон дарвозалари қалитини ҳам олиб кетибди. Қабристонга кира олмаслигига ишонч ҳосил қилгач, тайпаннинг танаси бўшашиб, кутилмаганда у ўзини жуда беҳол ҳис қилди. Кейин эса тағин тахтиравонга ўтириб, ҳаммолларига уйига элтиб қўйишларини буюрди. Аслида у тушлиқдан аввал, доимий одатига мувофиқ, ҳеч курса яrim соатча ётиб дам олиши керак эди... Аммо бугун ўша тартиби бузилди. Бор гап шу. Ўлгудай чарчаганидан ҳолсизланиб боряпти, холос. Айтишлари-ча, ўта чарчаган, зўриқкан кишиларда галлюцинация юз бериб, уларнинг кўзига ҳар балолар кўринадиган бўлиб қолармиш.

Хизматкори тушлик олдидан кийим алмаштиришига кўмаклашиш мақсадида ётоқхонасига кириб келганида, тайпан ўзини мажбурлагандек, зўрга ўрнидан қўзгалди. Унинг хаёлидан бир лаҳза бўлса-да нимагадир: “буғун кийимимни алмаштирмасам-чи”, – деган ўй кечди, лекин тайпан ҳар галгидек, ўзидаги бу эринчоқликни, қатъият билан енга олди: овқат олдидан рисоладагидек кийиниши – бу унинг доимий одати эди, тайпан бу ишни ҳар куни, қарийб йигирма йилдан бўён изчил бажариб келарди. Шунча йиллик таомилни, устувор қоидани бузиш асло ярамайди.

Тушликка у бир шиша шампань виноси келтиришни буюрди, винодан сўнг у бироз тетиклашди. Кейин хизматкорга энг кучли брендидан олиб келишни айтди. У икки қадаҳ бренди ичиб, яна авалги, доимгидек ҳолатига қайтганини түйди. Жин урсин, қуриб кетсин ўша бари галлюцинациялари-ю, вос-вослари! Тайпан бильярдхонасига ўтиб, жуда кийин бўлган бир-иккита зарбаларни машқ қилиб кўрди. Кўзининг чамалаш қобилияти уни алдамади: демак, ҳаммаси жойида. Шундан сўнг тайпан ётоқхонасига кириб, юмшоқ ўринга чўзилди-ю, қаттиқ уйкуга кетди.

Аммо кутилмаганда уйғониб кетди. Унинг тушига яна ўша, жулдуурвоқи гўрковлар эринчоқлик билан кавлаётган очиқлаҳад кирганди. У ҳали ҳам ўша гўрковларни кўрганига ишончи комил эди. Буни шунчаки вос-вос, ёки галлюцинация деб ўйлашнинг ўзи фирт бемаънилик, ахир у буларнинг ҳаммасини ўз кўзи билан кўрди-ку! Тайпан шу пайт ташқаридаги тунги коровуллар кўлида тутган шақилдоқнинг шақир-шуқурини эшигиди. Бу товуш ўзининг ёқимсиз жарангি билан тунги сукунатни бузиб юборгани-

дан, алланечук ваҳима босиб, тайпаннинг танасида чумоли ўрмалагандек бўлди ва вужудини даҳшат қоплади.

Кўнглидаги ададсиз қўркув, ваҳима уни хаёлан хитой шаҳарчаларига хос бўлган тор-танқис, илонизи жинқўчаларга бошлаб кетди. Бу ердаги ички деворлари турли-туман даҳшатли қиёфалардаги жин-ажиналарнинг тасвирига тўлиб ётган ибодатхоналарнинг қиялама томларида ҳам алланечук ваҳшат, қўркинч яшириндек эди. У ердан тараладиган ҳид ҳам жуда бадбўй, кўнгилни айнитадиган даражада ёқимсиз эди. Қолаверса, бундаги одамлар, одамлар-чи... Сон-саноқсиз, кўк кўйлакли, жулдуровки кулилар, сасиб, бижғиб кетган рўдапо латталарга бурканган гадойлар, узун қора ридо кийиб юрадиган тужжорлар ва амалдорлар, олдингда лаганбардорлик билан айёrona тиржайишиб, орtingдан эса билганини қиладиган мунофиқ каслар-чи... Ҳа, уларнинг ҳаммаси, шу топда тайпанга бирваракай ҳамла қилишаётгандек, унинг руҳиятига таъсир этиб, қалбини парчалаб ташлаётгандек бўларди. У шу топда ўзи учун бир нарсани тўла англаб етдики, аслида унинг Хитой аталмиш бу мамлакатни кўргани кўзи йўқ экан. Нимага ҳам келди ўзи бу юртга? Энди уни тамоман ваҳима босди. Бу ердан эси борида жуфтакни ростлаб қолиши керак! Энди бунда бир йил тугул, ҳатто бир ой ҳам ортиқча қололмайди. Шанхай эмиш... Шанхайи ҳам унга керакмас, ҳаммаси... ҳаммаси ордона қолаверсин!

– Эй, худойим! – ҳайқирди у. – Ишқилиб, омон-эсон Англияга қайтиб бора олсам, бас!

Нихоят, энди у бутун қалби, вужуди билан ўз ватанига талпина бошлади.

Агар,чиндан ҳам ажали етиб ўладиган бўлса, майли, ажал чангали уни Англияда тутақолсин. Ахир, у ўзининг жасадини, мана шу сариқтанли, қийиккўзлилар, доим айёrona тиржайган одамчалар орасига кўмилиши ҳақидаги ўйга қандай кўниксин, бунга қандай чидасин?! Йўқ, у ўз хоки туробининг жонажон ватанига қўйилишини истайди, зинҳор бугун кўргани-очиқ лаҳадга эмас! Агар шундай ҳол юз берса, унинг руҳи ўлимидан кейин ҳам ҳаловат топмайди. Бунга зинҳор йўл қўйиб бўлмайди! Атрофидаги одамларнинг гап-сўзлари нима бўпти... улар билганини гапиравермайдиларми... бунинг нима аҳамияти бор... улар билганича ўйлашсин, билганича фийбат қилаверишсин... кимнинг нима иши бор?! Мухими... мухими, кеч бўлмасидан бу ердан туёкни шиқиллатиб қолиш, жуфтакни ростлаш...

Тайпан тўшакдан туриб, фирма раҳбарига ўзининг жуда оғир касалга чалингани аён бўлганлиги ҳақида хат ёзди. Ва шу сабабли унга истеъро беришларини сўради. “Мен, фирма билан тузилган шартномаларнинг бекор қилиниши учун зарур бўладиган кундан бир кун ҳам ортиқ ишлай олмайман. Зудлик билан ватанимга қайтишим лозим” – деган сўзлар билан тутатди у ўз мактубини.

Эртаси куни тайпаннинг ушбу мактубини, ғижимланган ҳолда унинг кўлларидан олишди. У ёзув столи ва оромкурси оралиғида юзтубан йиқилиб ўлиб ётарди. Жасади эса аллақачон совиб, қотиб ҳам ултурганди.

Иброҳим ҲАҚҚУЛ, Шаҳноза НАЗАРОВА

ШОИРЛИК – ИЛОҲИЙ ҚИСМАТ

Шаҳноза Назарова: Ҳар йили Навоий таваллудини зўр муҳаббат билан нишонлаймиз. Бу кун шахсан менда катта ифтихор, шунингдек, катта қарздорлик ва согинч ҳиссини уйғотади. Гуё у табаррук даргоҳлардан узоқлашиб, қалъадан ташқарида қолиб кетгандекмиз. Олим, шоир, ёзувчилардан ҳеч бири “мен Навоийни тушунмай қолдим” ёки “тушунолмадим”, деб очиқ айтмайди. Ташқаридан уларнинг ҳар бирининг кўнглида ўз Навоийси бордек. Бироқ жуда қизиқтирадики, улар бир-бираига қанчалар ўҳшайди ва қачон бир бутун бўлиб бирлашиб кетар экан? Устоз, биз нега Навоийдан узоқлашиб кетдик?! Бунинг тарихий, ижтимоий, иқтисодий, фаний, руҳий омиллари нимада?

Иброҳим Ҳаққул: Сизнинг бу саволингизга жавоб бериш учун “Кейинги бир асрдан ортиқ вақт мобайнида биз қачон Навоийга яқин бўлганмиз?” деган саволга жавоб қайтариш лозим. Ваҳоланки, нисбатан яқинлик ва қизиқиши айтмаса, ҳеч пайт тўла яқинлик ва иштиёқ бўлмаган. Агар шундай маънавий-рухий ҳодиса юзага келганида жафокаш халқимиз XX асрда ўзининг миллий шуури, дини, тарихи ва мумтоз адабиётидан афсусланарли даражада йироқлаштирилмаган бўлурди. Биласизми, мумтоз шоирлар асарларини руҳоний, ирфоний, фалсафий тамалидан ажратиб ўқишини жорий этиш кўрнинг қўлига ҳасса эмас, қилич тутқазишдай бир гап эди. Бадиий сўзнинг таъсир йўли бузилиб, моҳияти жўнлашгач, қизиқиши ва завқ нимага арзиди, дейсиз? Навоийдай шоирларнинг ижодига йўл топишнинг биринчи шарти уларнинг Рух ва Ҳол оламига эркин кириб бора олишдир. Бу, албатта, соф моҳият ва изтиробни теран мушоҳада қилиш орқали амалга ошади. Зеро, жаҳон адабиётининг энг виждонли, энг ҳақгўй санъаткорлари кундалик турмуш ташвиши ва моддий манфаатлардан йироқ моҳият, ақл ва ироданинг қўшилувидан туғилган изтироб атрофида бирлашишган. Шахс сифатида шаклланмаган ҳеч бир киши бу ҳақиқатни чуқур тушунмайди. Демак, Навоийни англаш биринчи галда бизнинг ўзимизни нечоғлик билишимиз, маънавий “Мен” лигимизни накадар бойитиб, юксалтира олишимизга боғлик. Шу маънода биз нимага эришдик ва қанчалик улғайдик? Менинг назаримда, кейинги йигирма йил мобайнида элимиизда журъят, жасорат, эркинлик ва ҳақгўйлик ҳисси олдингига қараганда ҳам анча пасайди. Оддий одамларни-ку қўяверинг, ижодкорлар ҳам зулм, адолатсизлик, қарамлик,

* Иброҳим Ҳаққул – филология фанлари доктори.

Шаҳноза Назарова – филология фанлари бўйича фалсафа доктори.



алдов ва маддоҳликка қарши аёвсиз курашган Навоийга ҳолдошлиқ нелигини ҳатто хаёлга ҳам келтиришмади. Воқеликка Навоийнинг нигоҳи билан қарапаш, олам ҳодисотларини навоиёна дард тўлқинлари ила идрок этмоқ учун Навоий дунёқараши сир-асорини ўзлаштиришга қайта-қайта уриниш зарур.

Мана, бир мулоҳаза. Шарқ тафаккурини Ғарбникидан ажратиб турган томонлардан бири, балки энг асосийси, фано ҳоли ва ломакон ишончидир. Бир-бири билан бевосита алоқадор шу икки жиҳатни пухтароқ билмасдан тасаввуф адабиётидаги вақт ва замон, макон ва келажак, ҳолиқ ва халқ орасидаги алоқалар тўғрисида асосли фикр билдириш қийин. Навоий шеъриятида фирор – дунёга нуқул нафсоний манфаат кўзи билан қарайдиган тама бандаларидан қочиши, инзиво – маънавий ҳузур-ҳаловат гўшасига чекиниш ҳолатлари нихоятда таъсирли оҳангларда дарж этилган. Булар зарур зайлда қалбга нақшланмас экан, Навоийнинг фазовий хаёл ва самовий ҳислар тасвиридаги бекиёс ютуқлари қўл етмас юлдуз бўлиб қолаверади.

Хуллас, Навоий адабий меросини зоҳирий томондан тадқиқ ва таҳлил қилишда тўғри ва нотўғри, мақбул ё номақбул фикр ва мулоҳазалар керагидан ҳам ортиқ миқдорда эълон қилинди. Бироқ унинг турли жанрларда битилган ижод намуналарининг ботинини кўрсатиш, маънавий-руҳий мазмунини очишга бағишланган тадқиқотлар йўқ ҳисоби. Ҳолбуки, Навоийнинг ўзи “Ўн саккиз минг олам ичра ҳар не бор, Ким қилурлар аҳли маъни эътибор”, дея кўрсатма бериб қўйган. Эски даврларда яратилган “Вужуднома” номли асарларда таъкидланишича, ушбу ўн саккиз минг оламнинг асосий ва ғаройиб қисми инсоннинг сийратига тегишили. Демак, “Овоз-ку бор, лекин ўзим қани?” деган саволга аниқ жавоб бера олгувчилар сони қанча кўпайса, юртимизда навоийхонлик ҳам ўшанча тарақкий топади. Аммо бу натижага эришгунча, ҳали қўп иш қилиниши керак. Аҳли ирфоннинг ҳукмига кўра, “Ҳақ билан инсон орасидаги энг қалин парда илм”дир. Бунда, албатта, руҳий завқ, илҳом ва кашфдан маҳрум зоҳирий илм назарда тутилган. Оврупо адабиётшунослиги қонун-қоидалари заминида шаклланган навоийшуносликни тубдан янгилаш эса янада қийинроқ вазифадир.

Ш.Н.: Навоий ва бугунги умуминсоний ҳамда миллий сиёсий жараёнларни қандай боғлаши мумкин?

И.Х.: Алишер Навоий адабий ва илмий меросини ўрганиш – юртни юрт, ҳалқни ҳалқ қиласидиган ҳақиқатларни ўрганиш ва ўзлаштириш демак. Навоийни билиш Одам бўлиш сирларини эгаллашдир. Навоийнинг миллий маслаги қай даражада юксак бўлса, башарий ҳиссиёти ҳам ўшанча кучлидир. Навоий куйлаган ишқ – ҳаётни, тириклик ва дунёни ўзида музжассамлаштирган ишқ. Бу ишқ ҳақиқат ва гўзаллик манбаи. Унда адабий файз мавжуд. Ана шу файз нури хоҳ миллий, хоҳ умуминсоний, хоҳ сиёсий, хоҳ ахлоқий бўлсин, ҳар қандай жараённи кундай равshanлаштиради. Ана шунда дунёниг асл қиёфаси қандай бўлса, уни шундайлигича кўрасиз, улкан ёлғон, бешафқат ҳийла ва найранг бўронлари оддий одамлар бошига қаёндан ёғилиб келиши-ю, башариятнинг гумроҳлик, қашшоқлик, қуллик ва шафқатсизлик тўқайзорларида адашиш сабабларини аниқ илгайсиз. Навоийнинг дарду қайғулари ҳамма давр одамлари учун шифобахш ва халоскордир. Чунки улар энг оддий, энг хоксор

ва меҳнаткаш инсонга меҳр-муҳаббатдан пайдо бўлган Ҳақ ҳадясиdir. Ким ҳақиқат қаршисида довдирамаса, ким майдалик ва майдакашликдан сақлана билса, ким хушомад ва ялтоқланишлардан жирканса, Навоийнинг сўзларидан ўша одам, албатта, куч ва илҳом олади. Шоир қитъаларидан бирида банданинг ўзи каби бир ожиз бандага тобелиги, қуллуқкорлиги ва хушомадгўйлигини қоралаб:

*Кимки маҳлук хизматига камар,
Чуст этар, яхшироқ ушалса бели.
Кўл қовушитургунга бу авлодур,
Ки анинг чиқса эгни, синса эли.
Чун хушомад демакни бошлиса коши
Ким, тутулса дами, кесилса тили,*

дейди. Қарийб қарғиш даражасидаги ушбу танқид ва танбех сўзлардан бир хулоса чиқаролмаган кимсаларни одам қаторига қўшиш мумкинми?! Демак, одамдаги бузилиш ва тубанлик тўхтамаса, оламдаги бузилиш ва тубанликларга чек қўйиб бўлмайди. Навоийнинг одамшунослиги оламнинг ҳар турли ёмонликлардан тозаланишига хизмат қилиши билан ҳам умидбахшdir.

Ш.Н.: *Навоий ва бугунги руҳий эврилишларни қанчалар боғлаши мумкин, Навоий асарларида тарбиялаб, вояга етказган комил инсон билан бўйлашганда, биз унинг тўтиги ёки тиззасигача ета оламизми? Ҳазрат ижодида фақат хаёлдагина яшаб қолувчи туманли идеал инсонни эмас, чинакам тирик инсонни қаҳрамон қилиб олади. Биз ўша тирик одамга тириклигимиз билан ўхшаймизми, қанчалар ўхшаймиз? Аксинча бўлса, бунга нима халақит беради?*

И.Х.: Сиз назарда тутган ўша одамга ҳам ўхшаймиз, ҳам ўхшамаймиз. Ўхшашлигимиз зоҳирий, яъни сувратда. Аммо сийрат ва маънавиятда монандлик анча кам. Инсоният ҳамма даврларда у ёки бу зайлда алданиб яшаган. Лекин ўзини ўзи алдаш, шу алдов жафоларини тортиш миқёси XX асрда беҳад кенгайиб кетган. Ўзи ўзидан бегона, ўзининг асл аҳволидан бехабар кимсаларнинг сони ҳам шу асрда кўпайган. Инсонлик моҳиятини кашф қилиш, ҳар қандай вазиятда ҳам ўзига таяниш ҳоли бизда ҳам шаклланмаган. Кўпчиликни ташқаридан белгилаган мақсад ва муштарак таассуротлар бошқарган. Шунинг учун бир неча авлод фикрий якранглик, ижтимоий турғунлик ва оммавий тақлидга кўнигирилган. Мустақил ва бутун Шахс ҳақида ўйлашга айтарли хожат қолдирилмаган. Манаман деган бугунги зиёлидан Навоийнинг “Ўз вужудингга тафаккур айлагил, Ҳар не истарсен ўзингдин истагил” байтини шарҳлашни сўранг. Ҳар ким ўзича нималардир дейди, албатта. Бироқ уларининг аксарияти тахминий ёки уйдирма гаплар бўлади. “Вужуд тафаккури” аслида бир илм тармоғи. Унда аввал тана, кейин бирин-кетин ахлоқ, нафс, руҳ, хаёл сирлари ўрганилади. Умуман айтганда, Навоийни ўқиб англаш, англаб муҳокама юритишнинг ҳикмати кўп:

биринчидан, инсон ўзини маънан начор, афтода ҳис қилмаганидек, ҳаётга ҳеч вақт бадбин, ишончсиз нигоҳ билан боқмайди;

иккинчидан, ўз тақдирини тили, дини, тарихи, миллати ва юртидан айри ҳолда тасаввур этмайди;

учинчидан, моддиётни деб маънавиятни, зоҳирий борлиқлар шавқига берилиб, ботиний мавжудликларни унутмайди. Тўртингидан, дунё ва ахли дунё ахволига шоир, мутафаккир, мутасаввиф Навоий кўзи билан қарашга интилиб, фанони бақодан фарқлашга бир қадар малака ҳосил қиласи. Бу эса энг муҳими. Чунки ростни ёлғондан, ҳақни ноҳақдан, муқимни муваққатдан ажратолмаслик инсонни тақлидчилик гирдобига ташлайди. Тақлид – фикрий меҳнатни рано кўрмаслик, кимгадир эргашиш, кимгадир ўхшащдан нарига ўтолмаслик дегани. Маълумки, коинот ҳеч қачон тўхташ ва турғунликни тан олмайди – тинимсиз равишда эврилиб, янгиланиб бораверади. Шунинг учун ҳар бир нарса ё мавжудлик бошқа бир шакл, ўзга ранг ва руҳга кириши муқаррар. Инсоннинг ҳис, туйғу, тасаввур ва хаёллари ҳам ўзгаради ҳамда бойийди. Мана шу янгиланиш “нуқта”сида ҳар ким ўзича ижодкор, ўзича шоир ё мусаввир бўлмоғи керак. Яъни Навоий айтмоқчи, “Кўнгил ичра дарду ғам аввалигарга ўҳшамас”лигини билмоғи лозим. Афсуски, турмуш ва ижтимоий муҳит кўпинча бунга имкон бермайди. Айни шу кемтиклик даҳо ижодкорлар асарларини ҳис қилиш, англаш ва талқин қилишда ҳар турли тўсиқ ёки чалғишлиарни юзага келтиради. Навоий ижодиётининг маънозмазмунини зарур даражада мушоҳада этилмаслигининг бир сабаби мана шудир.

Ш.Н.: Шекспир инглиз, Гёте олмон адабиётини ҳаракатга келтиргани каби Навоий ҳам ҳозирги давр ўзбек адабиётини ҳаракатга келтириши, ҳар бир янги адабий оқим, янги адабий йўналиш, янги шакл ичига ўзига хос тарзда ҳар гал янги нафас билан кириб бориши керак эди. Устоз, Сиз бугунги адабий жараён ва Навоий сиймосини қандай умумий манзарада тасаввур қиласиз?

И.Х.: Навоийнинг шахсияти томонидан ҳам, шоирлик маҳорати нуқтаи назаридан ҳам хусусан бугунги адабий жараёнда наинки ворислиқ, собит бир издошлиқ ҳам кўзга ташланмайди. Инглиз ижодкорлари Шекспир, немислар Гёте, рус адиблари Пушкин мактабидан таълим олмасликни ноқисликмас, эҳтимол, гуноҳ ҳисоблашар. Бизда бундай эмас: Яссавийни, Навоий ё Оғаҳийни ўқиб-ўрганмасдан ҳам шоир бўлдик деб ўйловчиларга ҳар қадамда дуч келишимиз мумкин. Улар Навоийни номига мақтаб, умумий “урф”га кўра унга сиртдан эҳтиром кўрсатишдан асло хижолат чекишилади. Бирор бирор марта Навоийнинг тафаккур ва руҳ водийсида сайр айлаш учун тил, тарих, дин, тасаввув ва фалсафа билан бирга турк ҳамда форс тилидаги мумтоз адабиётни билиш зарур, деган гапни хаёлдан ҳам ўтказишмаган. Навоий ижодиётининг туб илдизи Шарқ тамаддуни заминида – Ғарбникида эмас. Бир мутафаккир ижодкор “Одам ё шарқлик бўлади, ё ғарблиқ”, дейди. Бу фикрга тепадан туриб эътиroz билдириш нотўғри. Негаки, инсон айни бир пайтда ҳам насрориий, ҳам мусулмон бўлолмайди. Бу ҳақиқатни тушунган қалам соҳиби гарб кишисининг фикр-қарashi ва психологиясини “миллийлаштириш”га сира куч сарфламайди. Демокчимизки, Яссавий, Аттор, Румий, Жомий ва Навоийни четлаб эришилган ижодий янгилик қурбу қувватдан маҳрум янгилик бўлиб қолаверади. Кўз тегмасин, неча замонлардан кейин халқимиз энди эркин нафас олиб, таҳлика ва қўркувни унута бошлади. Хушомад ва тилёғламалик ўйинлари тўхтатилиб, маддоҳлик овозлари ҳозирча бир қадар тинди. Бизнинг ўйлашимизча, Оллоҳ хоҳласа, бундан

буёғига халқнинг ўзи Навоийни ҳаққоний ҳис этиш ва англашга йўл излайди, қандай бўлмасин шеърият сultonига маънан яқин боради. Навоий беназир тилшунос, адабиётшунос, тарихчи олим. Буни ҳамма билади. Навоий дин дарғаси, дили ёниқ мутасаввиф, беназир файласуф, сиёsat ва давлат арбоби... Кўпчилик буни ҳам яхши англайди. Аммо буларнинг ҳеч бири Навоийнинг шоирлигидан олдинги мавқега қўтарилиган эмас. Навоий учун шоирлик юрак ва руҳоният шавқи, номус ва қисмат мashaққати эди. Навоийга дунёning пасту баланд, мақбулу номақбул ишлари бир ён, шоирлик бир ён эди. Шоир бўлиш, шоир бўлганда ҳам тенгсиз санъаткор бўлиш учун дунёга келганини у ҳамма нарсадан ортиқ аниқ ҳис қиласарди. Шоирлик илҳоми, шоирлик изтироби, шоирлик шарафи Навоий шахсиятининг ёлқинини акс эттиради. Албатта, унинг қўнгил осмонида ой ҳам, турфа-турфа порлоқ юлдузлар ҳам бўлган. Бироқ шоирлик, ошиқлик Навоий сийратининг офтобидир. Акс ҳолда у жунун мақомига юксалолмас ва:

*To тутди жунун йўлин Навоий,
Ким бўлди ватанга раҳнамойи,*

дёёлмасди. Навоий шеъриятидан атайин ижтимоий, сиёсий, ахлоқий, дидактик ёки диний-тасаввуфий мазмун ахтармаслик, алламбало тарғиботлар юзасидан уни уни ҳар ким ўзига манзур бир қиёфада кўрсатишга уринмаслиги керак. Навоий ҳам дунё, ҳам охират, ҳам шодлик, ҳам қайғу, ҳам умид, ҳам армон, ҳам баҳт, ҳам баҳтсизлик, ҳам висол, ҳам ҳижрон, ҳам ўтмиш, ҳам замон шоири. Унинг сўз, туйғу, фикр, хаёл ва ҳолатларини қундалик турмушнинг тор, биқиқ, ўткинчи талабу манфаатларига мувофиқлаштириб бўлмаганидек, бешафқат ҳаётнинг ёлғон, алдов, риё, ҳийла-найрангларига хизмат эттиришдан ҳам тийилиш лозим. Чунки Навоий шеърларида ҳар бир маъни, рамз, белги ва ишорат софлик, гўзаллик, илоҳийлик ёғдусидан сайқал топган.

Ш.Н.: Навоийшуносликнинг бугунги ҳолати қандай? Бизда янги давр навоийшунослиги қачон шаклланади? Уларнинг мақсад ва вазифалари нималардан иборат бўлиши керак? Хориж навоийшунослиги билан қиёслаганда ўзбек навоийшунослигининг ўрни, нуфузи қандай?

И.Х.: Ижтимоий-гуманитар фанларнинг аҳволи қандай бўлса, навоийшуносликники ҳам қарийб шундай. Албатта, бу жабҳада ҳам маълум ютуқ, эътиборга молик натижалар қўлга киритилган. Хорижий ўлкаларда Навоий мавзусида анча-мунча тадқиқотлар яратилган. Лекин истаймизми, истамаймизми, навоийшуносликнинг пойтахти – Ўзбекистондир. Чунки навоийшуносликнинг мashaққат ва масъулияти ўзбек олимларининг зими масида. Шундан келиб чиқиб таъкидлайдиган бўлсанк, навоийшунослик ёш ва талантли тадқиқотчilarни камолга етказиб, тубдан ислоҳ этишга жуда-жуда муҳтождир. Сўнгти вақтларда навоийшуносликда сохта, ғайриилмий тамойил мавқе қозона бошлади. Бу ҳам тасодифий уриниш ёки уюшиш эмас, албатта. Ўзбекистон Президенти Ш.М.Мирзиёев Олий Мажлисга йўллаган Мурожаатномасида илм-фannинг аҳволига холис баҳо бериб, “Биз йигирма беш йил илм билан шуғулланмадик. Бор илмни йўқ қилдик”, деган эди. Қанчалик аччиқ бўлмасин, бу фикр – ҳақиқат. Саёзлик, лаганбардорлик кўнилмаси, балки, буни тан олишга монелик этар. Бироқ масалага тарихан ёндашилса, эътиrozга асло ўрин қолмайди.

Навоийнинг олисни кўриши ва башоратига фақат ҳайрон қоласан киши. Улуғ шоир беш юз эллик йил муқаддам “Илмни ким воситай жоҳ этар, Ўзинию халқни гумроҳ этар” деб, илмдан мол-мулк, бойлик, мансаб, мавқе воситаси ўлароқ фойдаланиш фожиасига диққатни тортган эди. Биз ҳатто шу огоҳлантириш, ҳушёрликка чорлашга ҳам амал этолмадик. Охир-оқибатда рост сўзга оғиз жуфтлаш ҳам ёқимсиз, умумий қўникмага қарши уринишга ўхшаб қолди.

Ш.Н.: *Устоз, сұхбатларимиздан бирида Навоийни бир неча босқичда ўқувчилар оммасига тақдим қилиши керак дегандингиз.*

И.Х.: Ҳозир ҳам шундай фикрдаман. “Занжирбанд шер қошида”, “Камол эт қасбким” китобларим ёш ва ўспирин йигит-қизларга мўлжаллаб ёзилган. Навоий инсон умрини тўрт фаслга ажратиб номлаганидек, турли ёшдаги ўқувчиларни назарда тутиб, навоийшунослар ҳам тили содда, услуби жонли ва равон рисолаю китоблар ёзиши керак. Айтайлик, болалар учун ёзилган асарда болалик талаби, ҳолати ва эҳтиёжлари иnobatga олинса, Навоийни ўшларга танитишда нисбатан бошқача мақсад ва усулда қалам тебратилади. Навоий ижоди босқичма-босқич ўрганилиб, қарабсизки, навоийхонлик ўз-ўзидан тармоқланиб кенг қулоч ёзиб бора-веради.

Ш.Н.: *Устоз, Сиз меҳнат қилаётган ЎзР ФА Ўзбек тили, адабиёти ва фольклори институтида бир неча йиллардан буён Навоий ижодига бағишланган тадқиқот лойиҳалари устида иши олиб борилади. Бизни амалий натижалар қизиқтирияти.*

И.Х.: Мақсадингизни англадим. “Навоий қомуси” тўғрисида сўрамоқчисиз. Икки жилдга мўлжалланган “Қомус”нинг қўлёзмаси уч жилдан ҳам зиёдроқ ҳажмда ёзиб тугалланди. Энди ҳамма гап уни кўнгилдагидай таҳрир қилиб, сифатли нашр эта билишда. Унга киритиладиган мақолаларнинг маълум бир қисми журнал, тўплам ва китобларимизда эълон қилинди. Қомус яратиш осон эмаслигини ким билмайди дейсиз? Бу ишнинг ҳам ўз қонун-қоида ва шартлари бор. Биз, албатта, уларга риоя қилиш ва ижодий ёндашишга уринганмиз. Лекин охир-оқибатда нашр тақдирини барibir маблағ ҳал этади. Навоийнинг муబорак номи ва буюк шарафи қархисида ҳеч қанақа моддий нарса тўсик бўлиб қололмайди, деб умид билдирамиз.



Султонмурод ОЛИМ

ТАРЖИМАВИЙЛИК ВА НАЗИРАВИЙЛИК

(“Лисон ут-тайр” – форсий-туркий шеърият синтези сифатида)

Адабиётшунослик илмида минг йиллик форсий ва туркий ёзма сўз санъати равнақини яхлит адабий жараён сифатида қараш тамойили мавжуд. Бу бежиз эмас. Буни биргина буюк ўзбек шоири ва мутафаккири Алишер Навоий ижоди мисолида ҳам тўла исботлаш мумкин.

Навоий қаламига мансуб олти достон (“Хамса”даги “Хайрат ул-абор”, “Фарҳод ва Ширин”, “Лайли ва Мажнун”, “Сабъаи сайёр”, “Садди Искандарий” ҳамда “Лисон ут-тайр”) нинг ҳар бири эски ўзбек тилида форс адабиётидаги муайян муаллиф достонига назира-жавобия тарзида битилган.

Навоий достонларининг назиравий хусусиятларини ўрганиш улардаги типик ўзига хосликларни илмий аниқлаштиришни осонлаштиради. Бироқ бундан энди иккинчи бир масала ҳам келиб чиқади: Навоий достонлари татаббуъ белгилари жиҳатидан айнан бир хилми? Хусусан, “Хамса” достонларининг назиравий жиҳати билан “Лисон ут-тайр”нинг жавобия табиатида кескин тафовут йўқми? Бўлса, улар айнан нималардан иборат?

Бунда ўта муҳим уч жиҳатни қўздан қочирмаслик керак.

Биринчидан, Навоий “Хамса”ни 42-44 ёшлар орасида ёзib тугатди. Бундай ёшдаги ижодкорда, табиий равишда, салафлар билан беллашишга мойиллик ўта кучли бўлади. Қандай бўлмасин, салоҳиятини тўлалигича намоён этгиси, халқона айтганда, имкон қадар кўпроқ янгилик яратгиси, оҳорли, навоиёна атама билан ифодалаганда, “тарҳи (лойиҳаси) тоза” асар бунёд этгиси келаверади. “Лисон ут-тайр”ни у олтмиш ёшга яқинлашганида қоғозга туширди. Бу киши анча босилиб қолган, мулоҳазакорлик кучайган, жўшқинлик ўрнини фалсафийликка мойиллик эгаллаган бир ёш хисобланади.

Иккинчидан, муаллифнинг “Хамса” ёзишдан қўзлаган мақсади билан “Лисон ут-тайр”ни яратишдан кўзлаган нияти ўртасида кескин фарқ бор. “Лисон ут-тайр”да Фаридиддин Аттор олдидаги ижодий қарздорлик ҳисси устунлик қиласди.

Учинчидан, “Хамса”га жавоб қайтариш анъанаси Навоийгача ҳам шаклланган эди. Унинг асосий тажрибалари моҳиятида, иложи борича, кўпроқ янгиликка интилиш ётар эди. Улуғ ўзбек шоири шу анъаналарга суюниши шарт эди. “Мантиқ ут-тайр”га дастлабки жавоб битган шоир – ҳозирча Навоий. Бу

* Султонмурод Олим – филология фанлари номзоди.

қандай бўлиши лозимлигини шоирнинг ўзи белгилаган. XVIII асрга келиб хоразмлик ўзбек шоири Мавлоно Ризоий Пайвандий Атторнинг “Мантиқ ут-тайр”ига жавобан “Куш тили” достонини битди. Энди Пайвандийда Навоийнинг айни достонга назира битиш анъанаисига суяниш имкони бор эди. Шу асослардан келиб чикиб айтиш мумкинки, назирилик даражаси сифатида “Хамса” достонлари – бошқа, “Лисон ут-тайр” – бошқа мақомда туради. Бу илмий даъвони биринчи галда шоирнинг “Хамса” достонларидаги ҳамда “Лисон ут-тайр”даги ўз салафларига муносабатидан келиб чикибгина исботлаш мумкин.

Кўплар Навоий “Хамса”сини Низомий Ганжавий “Хамса”сига жавоб деб хисоблайди. Бу – жуда умумий тасаввур маҳсули. Юзаки қарагандагина шундай, холос. Яъни, Навоий ҳам худди Низомий “Хамса”сидаги тартиб асосида беш достон битди ва бу достонларнинг табиати ҳам сюжет чизиги ҳам – ўша-ўша. Бирок, аслида, Навоий фақат “Ҳайрат ул-аброр”нигина Низомий “Махзан ул-асрор”ига жавоб тарзида ёзган. “Хамса”даги қолган тўрт достониннинг ҳар бири – бошқа-бошқа шоирлар маснавийларига жавобдир. Аниқроғи, “Фарҳод ва Ширин” – Хусрав Дехлавийнинг “Ширин ва Хусрав”ига, “Лайли ва Мажнун” – Хожу Кирмонийнинг “Лайли ва Мажнун”ига, “Сабъай сайёр” – Ашраф Марагойнинг “Ҳафт авранг”ига, “Садди Искандарий” – Абдураҳмон Жомийнинг “Искандарнома”сига назира. Бу ҳақда “Муҳокамат ул-луғатайн” рисоласида Навоийнинг ўзи айтади: “Бу тўрт девон (“Хазойин ул-маоний” девонлари – С.О.) овозасин чун рубъи маскунга еткурупмен, “Хамса” панжасига панжса урупмен. Аввалким, “Ҳайрат ул-аброр” боғида табъим гуллар очибдор, Шайх Низомий руҳи “Махзан ул-асрор”идин бошимга дурлар сочибдор. Яна чун “Фарҳод ва Ширин” шабистонига хаёлим юз тутубдор, Мир Хусрав (Дехлавий – С.О.) дами “Ширин ва Хусрав” ўтидин чароғимни ёрутубдор. Яна чун “Лайли ва Мажнун” водисида ишқим пўя уруб, Хожсу (Кирмоний – С.О.) ҳиммати “Гавҳарнома”сида нисоримга гавҳарлар еткуруптур. Яна чун “Сабъайи сайёр” расадин замирим боғлабдор, Ашраф (Марагой – С.О.) “Ҳафт пайкар”ининг етти ҳурвашин пешкашимга яроғлабдор. Яна чун “Садди Искандарий” асосин хотирим муҳандиси солибдор, ҳазрати Махдум (Абдураҳмон Жомий – С.О.) “Хираднома”сидин кўси ислоҳ ва имдоҳ чолибдор”.

“Лисон ут-тайр”даги муаллифнинг Атторга ва бевосита унинг “Мантиқ ут-тайр”ига бўлган муносабатиданоқ кўп нарсалар ойдинлашади.

“Лисон ут-тайр”ни шоир “Фоний” тахаллуси билан битди. Ҳолбуки, унгача “Фоний” шоирнинг фақат форсий шеърларида қўллаган тахаллуси эди. Достон – жами 192 бобдан иборат. Шундан олти бобда муаллиф бевосита Аттор ва унинг “Мантиқ ут-тайр”ига муносабатини билдириб ўтади. Саволлар туғилади. Аввало, бу қайси боблар? Қолаверса, улар асарда қандай ўрин тутади? Бундан ташқари, нега шоир бу гапларини жамлаб, бир бобда айтиб қўя қолмаган? Буларга жавоб топмай туриб масаланинг моҳиятига етиш қийин.

“Лисон ут-тайр”нинг¹ Аттор ва “Мантиқ ут-тайр”га муносабат билдирилган боблари қўйидагилар: 13-боб – “Қудват ул аҳрор ва қиблат ул-аброр Шайх Фариидиддин Аттор қаддасаллоҳу руҳаҳуға мадҳу сано оғози ва ўз арзи ниёзи”; 169-боб – “Қушиларнинг фано ҳусулидин бақо вусулига

¹ Алишер Навоий. МАТ. 20 жилдлик. 12-жилд. – Т.: “Фан” нашриёти. 1996.

еткони”; 173-боб – “Шайх авсофию ўзининг анга пайравлигда иттисофи”; 174-боб – “Ўзининг Шайх руҳи мададидин анга татаббуъ қилғонга қақнус тамсили”; 189-боб – “Бу китоб назмида ўз муносабатининг тақриби”; 191-боб – “Бу китобда тахаллус тағиригининг узри”.

Қиёс сифатида эслатиб ўтиш керакки, “Хамса” достонларида салаф учун бунчалик кўп боб ажратилмаган. Шунинг ўзиёқ муаллифнинг салафга муносабати “Лисон ут-тайр”да “Хамса” достонларидагидан кескин фарқ қилишини кўрсатиб турибди.

Бу бобларда, дастлаб, шоирнинг Фаридиддин Атторни қандай сўзлар билан таърифлаганини кўриб чиқиш лозим. Шулардан ҳам халафнинг салафга айрича меҳри маълум бўлади. Бу таърифларга мисол келтирадиган бўлсак: “қудват ул-аҳрор” (хур, яъни озод кишиларнинг пешвоси), “қиблат ул-аброр” (яхшиларнинг қибласи), “ваҳдат асрорини тафсир айлаган” (Оллоҳнинг ягоналиги сирини шарҳлаган зот), “ҳодийи комил” (камолотга етган йўлбошчи), “жумлайи қушлар тили доноси”, “муршиди атвор” (ҳол пири, яъни йўл бошловчиси), “кутби авлиё” (авлиёлар кутби, яъни раҳбари), “кашфи асрори ҳақойиқда фарид” (ҳақиқат (Аллоҳ) сирларини кашф этишда ягона), “аҳли ирфон солики атвори” (феъл-атвори билан Худони таниш йўлидаги (сўфий)ларнинг намунаси) каби.

Навоий наздида устоз шоҳлик, ўзи қуллик мақомида: “ул шаҳи олий-сифат, мен банда – қул”. Булар Аттор таърифидаги сўз ва сўз бириклиарининг ҳаммаси эмас. Аммо шу бобларнинггина мағзини чаққанда ҳам, Навоий Атторга қанчалар шогирдона самимият билан муносабатда бўлгани ойдинлашади. Энг мухими, бу бобларнинг бирор ерида “Мантиқ ут-тайр” танқиди йўқ. Эҳтимол, Навоийда бу достонга нисбатан ҳам озми-кўпми танқидий муносабат бўлгандир. Айтайлик, “Мантиқ ут-тайр”даги кўпсўзликми, бир назарий масала иллюстрацияси учун бир неча ҳикоятни кетма-кет келтиришми, маъқул тушмагандирки, “Лисон ут-тайр”да бунга асло йўл қўйилмаган. Лекин халаф (Навоий) салафи (Аттор)га нисбатан туғилган бу ички муносабатини ҳеч ерда китобхонга билдирмайди. Бу ҳам – бир қатъият. Бу ҳам – бир одоб. Бу ҳам – бир маданият.

Бунга сабаб ҳам йўқ эмас. “Хамса”ни ёзишда салаф билан халаф ўртасидаги муносабатлар устоз-шогирд муносабатларини эслатади (ҳатто “Искандарнома” ва “Садди Искандарий” асарлари ўртасидаги муносабатлар ҳам бундан мустасно эмас), чунки бу ерда факат адабий устоз-шогирдлик мавжуд. Бироқ “Мантиқ ут-тайр” ва “Лисон ут-тайр” муаллифлари ўртасидаги муносабатлар факат адабий доира билан чегараланмайди: бу ерда устоз-шогирдликдан ташқари, тасаввуфий маънодаги бевосита пир-муридлик муносабатлари ҳам юзага чикади. Демак, “Хамса” достонларининг назиравий табиатига, асосан, адабий ҳодиса сифатида қарасак, “Лисон ут-тайр”нинг назиравий табиатига ҳам адабий, ҳам тасаввуфий ҳодиса сифатида қарашимизга тўғри келади.

“Лисон ут-тайр”нинг лиро-эпиклик даражаси, ҳатто, “Ҳайрат ул-аброр”даги лиро-эпиклик даражасидан ҳам юқори. Сабаби – ана шу олтинчи достонида муаллиф бевосита ички инсоний, яъни бандаликка хос; сўфиёна, яъни тасаввуфона шахсий ҳис-туйғулари, нозик ва олий истак-муддаоларини барча маснавийларидагидан кўра кўпроқ, хўброк ва ошкорроқ тарзда ифодалаган.

Бунинг исботи учун “Лисон ут-тайр”нинг “Қушларнинг фано ҳусулидин бақо вусулига еткони” деган 159-бобини кўриб чиқиш жуда муҳим.

Фоний қуш тилидан сўзланган бу асар моҳиятида бошқа теран маънолар ётиши ҳақида сўзлай туриб, буни ҳар ким ҳам тушунмаслигини айтади. Кутимаганда бир шарт кўяди:

*Шарт бүким, онглагон шарҳ этмагай,
То тилидин бошқа оғат этмагай.*

Яъни: *бу асар моҳиятини тушунган одам уни шарҳламасин, чунки хато қилиб қўймасин-да*. Шунда муаллиф Аллоҳ олдида истиғфор қилиб, айтмас сўзларни айтиб қўйгани учун Унинг ўзидан паноҳ излайди:

*Мен деб, истиғфор қилдим, ё Илоҳ,
Айтмас сўздин санга қилдим паноҳ.*

Лекин бу ерда бир нозик жихат бор – Фоний ўзидан ҳеч нарса қўшмаган, факат Аттор сирларини шарҳлаган, холос:

*Ўз қошимдин солмадим бу навъ тарҳ,
Айладим Аттор асрорини шарҳ.*

Шунинг учун, дейди шоир, кимга пайравлик қилганимни назора айлагил. Достоннинг лирик қаҳрамони “ҳимояланиш”нинг яхши йўлини топади, яъни барча “гуноҳ”ни Атторга тўнкаб қўя қолади, мен хато қилган бўлсам ҳам, У хато қилмайди, чунки кўп қалам суриб, камолга етган зот ҳисобланади, менинг хатомни ҳам ундан деб билинглар, дейди:

*Мен галат қилсам анга йўқтур галат, –
Ким камол авроқига кўп сурди хат.
Сўзда табъим гар галатқа қилди майл,
Ходийи комил сўзига қил туфайл.*

Достоннинг “Шайх авсофию ўзининг анга пайравлигда имтисофи” деб номланган 173-бобида муаллиф яна Атторнинг устозлиқ қилгани масала-сига қайтади. Ёзу қиши Аттор дўйконидан шакар олмоқ ниятида юрар эдим, дейди у, унинг муқаддас руҳи ариш бозидан келиб, худди сўзлай оладиган қуши каби қуши тили мушкилларини ечишида йўл кўрсатди, бу борада мени устодга айлантириди-ю, мен туркий тилда достон битдим...

Навоий ўз “Хамса”си достонларининг бирортаси ҳақида “таржима” атамасини ишлатмаган. Аксинча, уларда имкон қадар охорийлик ҳақида сўз боради. Масалан, “Фарҳод ва Ширин”да, бу достон воқеасини шарҳлашиб ўзгача бир тарҳ (лойиха) чизишим керак, деб хисоблайди:

*Заруратким, солиб бир ўзгача тарҳ,
Бу меҳнатномани қилгумдуурур шарҳ.*

Бундан ташқари, “Фарҳод ва Ширин”да шоир салафларини танқид остига олади. Мақсади – янги, уларнига кам ўхшаган, улардан кескин ажralиб турадиган асар яратиш. Достоннинг 9-бобида буни исботлайдиган далил

етарли. Муаллиф ўз олдига бир дастурий вазифа қўяди. Мақоламиз мақсади йўлида жуда зарур бўлгани учун каттароқ бўлса ҳам, парча келтирамиз:

*Ки чун бу уйда қилғунг нақши дебо,
Керак уй тарҳи дөги бўлса зебо.
Агарчи назми дилкаш тушса масмұъ,
Анинг афсонаси ҳам бўлса матбұъ.
Бурун жам эт неким бўлгай таворих,
Борида иста бу фархунда торих.
Топилгай шояд андог бир неча сўз,
Сўз айтур элга ул ён тушмаган кўз.
Ани назм этки, тарҳинг тоза бўлгай,
Улусқа майли беандоза бўлгай.*

Яъни, бир уйга нақш солиш учун, аввало, уйнинг тарҳи ҳам чиройли бўлиши керак; назми қулокқа хуш ёкишидан ташқари, унинг афсонаси (сюжети) таъбга ўтирадиган бўлиши лозим; бунинг учун аввал шу мавзудаги ўтмишда ёзилган асарларни ўрганиб чиқиш зарур; шунда, шоядки, сўз айтувчиларнинг кўзи тушмаган тоза (янги) сўз топилса; чунки шундай нарсани ёзки, тарҳинг тоза бўлсин, халқ уни беандоза (чексиз) майл билан (интилиб, қизиқиб) ўқисин.

Шоир, мабодо, шундай бўлмаса, нима бўлиши мумкинлиги ҳақидаги саволга биратўла жавоб бериб кетишни ҳам унутмаган:

*Йўқ эрса назм қилғонни халойиқ,
Мукаррар айламак сендин не лойиқ?
Хүш эрмас эл сўнгинча рахи сурмак,
Йўликим, эл югурмештур, югурмак.
Бирақвим бир чаманда сойир эрди,
Нечаким гул очилғон кўрди, терди.
Ҳамул ерда эмас гул истамак хўб,
Бу бўстон сахнида гул кўп, чаман кўп.*

XX асрнинг 20-йилларида йирик шарқшунос Е.Э Бертельс Навоийнинг тенг хукукли охорий (оригинал) шоир эканини илман исботлаб кўрсатиш учун айнан “Лисон ут-тайр”ни танлагани бежиз эмас эди. Бу билан олим, ҳатто, Навоийнинг олти достони орасидаги доминант (*таъсир этаётган*) асарга нисбатан энг яқини ҳисобланган “Лисон ут-тайр” ҳам мустақил ижод намунаси бўлган охорий бадиий ижод намунаси, демоқчи бўлган.

Бироқ бундан қарийб бир аср илгари ёзилган мазкур тадқиқотда муаллифнинг мақсади кўпроқ Аттор ва Фоний асарлари ўртасидаги фарқтафовутларни бўрттириб кўрсатишдан иборат бўлиб қолган. Адабиёт-шунослик, жумладан, таржимашуносликнинг эндиги вазифаси эса Аттор ва Фоний достонлари ўртасидаги ялпи вобасталикни тўла-тўқис, яъни ҳар тарафлама очиб беришдан иборат бўлиши лозим. Ана шунда “Лисон ут-тайр”да форсий-туркий адабиёт, борингки, форсий-туркий тамаддун уйғунлигини бир ялпи ҳодиса сифатида тўлиқ кўра оламиз. Айни шу мақсад йўлидаги тадқиқотлар давом этаётиби.

Юқорида кўриб ўтганимиздек, Низомийнинг “Хусрав ва Ширин”и билан Навоийнинг “Фарҳод ва Ширин”и, табиийки, бир сайёр сюжет асосида яратилган достонлар ҳисобланади. Аммо “Фарҳод ва Ширин” достони бевосита “Хусрав ва Ширин”га назира эмас. Кўриб ўтганимиздек, Навоий достони Хусрав Дехлавийнинг “Ширин ва Хусрав”ига назира тарзида битилган. Демак, Низомий “Хусрав ва Ширин”и билан Навоий “Фарҳод ва Ширин”и ўртасида сайёр сюжет ҳодисаси мавжуд, бироқ Дехлавий “Ширин ва Хусрав”и билан Навоий “Фарҳод ва Ширин”и ўртасида эса ҳам сайёр сюжетлилик ҳодисаси, ҳам бевосита назиравийлик ҳодисаси бор.

“Лисон ут-тайр”га шу мезонлар билан ёндашилса, маълум бўладики, Атторнинг “Мантиқ ут-тайр”и билан Фонийнинг “Лисон ут-тайр”и ўртасида ҳам сайёр сюжетлилик, ҳам назиравийлик ва ҳам таржимавийлик ҳодисаси кузатилади.

Албатта, Хусрав Дехлавийнинг “Ширин ва Хусрав”и – Низомий Ганжавийнинг “Хусрав ва Ширин”ига назира. Демак, Навоийнинг достони, ўртада Дехлавий асари тургани учун, Низомий маснавийсига бевосита эмас, балки билвосита татаббуъ, холос. Хуллас, назиранинг бир қатъий талаби бор – у муайян бир асарга ўхшатма бўлиши шарт, қандайдир бир сюжетдаги бир неча асарга эмас.

Алишер Навоий “Хамса”сидаги беш достон айнан қайси асарларга назира тарзида ёзилганини шоирнинг ўзига суюнган ҳолда қайд этдик. Бироқ ўзбек адабиётшунослигидаги шу пайтгача Навоий “Хамса”си достонларини қиёсий ўрганишга бағишлиланган тадқиқотларда мукоясалар қуидаги тартиб бўйича олиб борилган: “Ҳайрат ул-аброр” – Дехлавий достонига; “Фарҳод ва Ширин” – Низомий достонига; “Лайли ва Мажнун” – асосан, Низомий, қисман, Дехлавий ва Жомий достонига; “Сабъаи сайёр” – Низомий, Дехлавий достонларига; “Садди Искандарий” – Низомий, Дехлавий ва Жомий достонларига қиёслаб тадқиқ этилган.

Бундай тадқиқотлар олиб боришга ҳеч ким қарши эмас. Бир сюжет чизифидаги бир вазнда битилган ҳар қандай икки асарни қиёсий ўрганиш, ҳатто типологик таҳлил этиш мумкин ва бу ҳам илм учун жуда керак. *Лекин бирламчи вазифа асарни айнан қайси достонга назира қилинган бўлса, ўшинга қиёслашдан иборат бўлиши лозим, чунки илм учун шу бирламчироқ, аҳамиятлироқ, демокчимиз, холос.*

Бир асарга ёзилган татаббуъга нисбатан “жавобия”, “назира”, “ўхшатма” атамаларини ишлатса, бўлаверар, эҳтимол. Масалан, Хусрав Дехлавий “Хамса”сига кирган достонлар Низомий Ганжавий “Хамса”сидаги достонларга жавоб тарзида битилган. Бироқ Абдураҳмон Жомий достонлари ҳам Низомий, ҳам Дехлавий достонларига, Навоий достонлари эса ҳам Низомий, ҳам Дехлавий, ҳам Ашраф Фарағой, ҳам Жомий достонларига назира. Чунки уларда назирага назира ёзиш жараёни ҳам бирга кечган.

Кўриниб турибдики, бу иккаласи бир хил жараён ёки айнан ўхшаш ҳодиса эмас. Илмда бир мавзу ва сюжетдаги бир асарга жавобия билан бир мавзу ва сюжетдаги икки ёки уч асарга жавобия ўртасида муайян фарқлар борлиги кўрсатиб берилиши лозим. Бунинг устига, Навоийда ўзга тил масаласи ҳам ўртага тушади. Бир асарга ўша тилда жавобия айтиш – бошқа масала, бир асарга ўзга тилда назира айтиш – бутунлай бошқа масала.

Бу фикримизни тушуниб, моҳиятига етиш янада чуқурроқ таҳлилни талаб қилади. Низомийнинг “Хусрав ва Ширин” достонида Хусрав билан Фарҳоднинг мунозараси мавжуд. Бу – жуда машхур савол-жавоб. Достонга назира ёзганлар асарнинг бу кульминацион нуқтасига бефарқ қарашмаган. Жами 26 байтдан иборат бу парчада Низомий Хусрав билан Фарҳоднинг фикрларини бир мисрада “бигуфт” (“деди”) ё “бигуфто” (“дедики”) тарзида келтиради.

Ана энди достонга татаббуъ битаётган Хусрав Дехлавийни бу ўринда нима қийнаши мумкин? Факат ва фақат Низомийга айнан ўхшаб қолмаслик. Лекин савол-жавобни “бигуфт” ёки “бигуфто” деб бошлиш форсий тилдаги асарга форсий тилда жавоб ёзаётган қаламкаш учун ҳеч қандай муаммо туғдирмайди. Шунинг учун ижод жараёни форсий тилдаги асарга туркӣ тилда жавоб ёзаётган шоирдагига нисбатан анча осон кечади.

Келинг, Низомий ва Дехлавий достонларидағи ана шу мунозаранинг дастлабки беш байтини ўзаро қиёслайлик. Низомийнинг 26 байтли савол-жавобига Дехлавий 25 байтли мунозара битади. “Ширин ва Хусрав” муаллифи, ўзига хослик бўлсин учун, “бигуфто” ўрнига баъзан “бигуфташ” шаклини ҳам ишлатади.

Ана энди форсий достонга туркӣ назира боғлаётган Навоий олдидағи муаммони кўз олдимиизга келтирайлик. Биринчидан, ҳинд-европа тиллари оиласининг форсий гурухига мансуб форс-тожик тилида аввал “деди” деб туриб, кейин сўзловчининг фикрини келтириш мумкин. Бу тилнинг синтаксиси учун шу – табиий. Олтой тиллари оиласининг туркӣ тиллар гурухига кирадиган ўзбек тилида эса бунинг тескариси: аввал сўзловчининг фикри келтирилиб, кейин “деди” дейилади. Иккинчидан, “Хусрав ва Ширин” арузнинг “мафоийлун мафоийлун фаулун (ёки мафоийл)” тарзидаги ҳазажи мусаддаси маҳзуф (ёки мақсур) вазнида битилган. Туркӣзабон шоир айнан “бигуфт” ёки “бигуфто”га вазнан мос келадиган сўз топиши шарт.

Ана шу икки масалани ҳал этиш шоирни худди таржимада кечадигандагидек ижодий жараёнга олиб киради. Навоий бунинг иложини топган. Биринчидан, аввал “деди”ни ишлатиб, кейин сўзловчининг фикрини келтириш орқали бу масалани форсий тил фойдасига ҳал этган. Инверсия бунга имкон беради. Иккинчидан, шоир қўллаган “деди” ва “дедики” сўзлари вазнан “бигуфт” ҳамда “бигуфто” калималариға мос келади¹.

Худди шу таржимавий муаммога Низомий “Хусрав ва Ширин”ини 1340 йили эски ўзбек тилига ўгираётганда Қутб ҳам дуч келган эди. У достондаги 26 байтли парчани 21 байт қилиб, яъни, жуда кам қисқартириш билан, деярли тўлиқ таржима қилган. “Бигуфт” ҳамда “бигуфто” сўзларини, биринчидан, форсий грамматика талабига биноан, сатр бошида келтирган, иккинчидан, ўзбек тилидан вазн бошига мос келадиган ифода топган. Мана, унинг дастлабки байти:

Бурун сўрди: “Не ерликсан тею сан?”
Айиттиким: “Ошиқлар шаҳридинман”.

¹ “Дедики” сўзи “бигуфто”га айнан мос келади. Бироқ “бигуфт” билан “деди” тенг вазнданаги сўзлар эмас. Чунки “деди”нинг иккичи бўгини (“-ди”) достонда чўзиқ ҳижо бўлиб келади. “Бигуфт”нинг иккичи бўгини (“-гуфт”) эса – ўта чўзиқ ҳижо. Аммо Низомий Ганжавийда ҳам, Хусрав Дехлавийда ҳам у ўзидан кейинги сўзнинг унли товуш билан бошланишини талаб этган ва шу тариқа “-гуфт” бўгинидаги “т” товуши амалда ўзидан кейинги сўзга кўшиб талаффуз этилади (муаллиф изоҳи).

Навоий “Фарҳод ва Ширин”да, худди Деҳлавийнинг “Ширин ва Ҳусрав”идаги каби, бу мунозарага 25 байт бағишлайди. Муайян даражада тасаввур пайдо бўлиши учун унинг дастлабки икки байтини келтирамиз:

Деди: “Қайдинсен, эй мажнуни гумраҳ?”

Деди: “Мажнун ватандин қайда огаҳ!”

Деди: “Недур санга оламда пеша?”

Деди: “Ишқ ичра мажнунлук ҳамеша!”

Шу таҳлилу мулоҳазалардан кейин бир нозик масалага аниқлик киритиб олайлик. Албатта, Навоий Низомий “Ҳусрав ва Ширин”и ҳамда Деҳлавий “Ширин ва Ҳусрав”и вазни ва мавзусида янги, оҳорий асар яратган, лекин Қутб Низомий достонини таржима қилган. Орада фарқ – катта. Бу икки ижодий ҳосиласи бир ҳодиса эмаслиги ҳам – “Икки карра икки – тўрт”, – дегандек аниқ. Лекин Қутб олдида ҳам, Навоий олдида ҳам форсий тилдаги матннинг айrim ҳусусиятларини иккинчи тилда ифодалаш вазифаси турган эди. Ана шу нозик нуқтада Навоий достонининг ўзига хос ҳусусияти намоён бўлади ва биз шунигина кўзда тутяпмиз.

Хуллас, “Мантиқ ут-тайр” ва “Лисон ут-тайр” қиёси бир йўла форсий-туркий шеърият вобасталигини кўрсатишишга, шеърият равнақида тасаввуфнинг ўрнини ойдинлаштиришишга, Аттор ва Фоний муносабатларини ёритишишга, адабиётлараро уйғунлик (синтез) қонуниятларини белгилашшга, назираларнинг турларини аниқлаштиришишга, назиравийлик ва таржимавийлик ҳусусиятларини муайянлаштиришишга, *таржсима-назира* деган форсий-туркий адабиётлараро ўзига хос ижодий ҳодисани таҳлил этишга хизмат қиласи.



NAVOIY SABOQLARI

Зухра МАМАДАЛИЕВА

РУХ МАНЗИЛЛАРИ

“Ҳайрат ул-аброр” достонида йигирма бир бобдан иборат муқаддима бор. Ундаги уч боб – уч ҳайрат кўнгилнинг саёхати тўғрисида бўлиб, бир қараганда, достонга алоқаси камдай туюлган ўзига хос боблар ҳисобланади. Биз ушбу мақолада мана шу ўзига хослик тарихига бир назар ташламоқчимиз.

Рухнинг сайру саёхатга чиқиши мотиви пайғамбар меъројига нисбатан яратилганлиги ҳақида илмда бир мунча қарашлар мавжуд. Бу мотивнинг адабиётга илк бор татбиқ этилиши ватандошимиз Абу Али ибн Сино ижоди билан боғлиқ. Алломанинг “Ҳайй ибн Яқзон” қиссасининг тили, услуби жуда оғир. Бунинг сабабини Фарб олимларидан Мехрон “Ибн Сино бу рисолаларни ўзининг энг яқин шогирдлари учун ёзган”, деб изоҳлади (*Ибн Сино Абу Али. Саломон ва Ибсол. – Тошкент: Адабиёт ва санъат, 1980. – Б.13.*). Ушбу қиссада асарнинг бош қаҳрамонлари муаллиф ва унинг сухбатдоши – Ҳайй ибн Яқзон – юонон мутафаккирлари фикри бўйича, коинотдаги илк яратиқ – логосдир. Мусулмон Шарқи фалсафасига Ақли аввал, Рухи Аввал тарзида сингган бу яратиқни Ибн Сино ўзининг ушбу фалсафий асарига бош қаҳрамон этиб танлайди ва уни Уйғоқ ўғли Тириқ, Ақли фаол номлари билан атайди.

Асарда муаллиф Ҳайй ибн Яқзонни “бир нуроний, ёши ҳам анчага бориб картайиб қолган, лекин ўзи ҳали бараваста, тетик, суюклари ҳам сусаймаган, ҳеч бир аъзоси бўшашибмаган ва хуллас, соч оқаришидан бошқа ҳеч қандай карилик нишонаси бўлмаган бир чол” деб таърифлайди. У ўзининг саёхатчи эканлиги, хунари дунё кезиш бўлганини айтади ва муаллифга бир қанча маслаҳатлар беради. Жумладан, унинг биринчи маслаҳати фаросат (мантиқ) илмини эгаллаш ва бу илмнинг фойдасини нақд илмлардан дея баҳолаш бўлади. Ҳайй ибн Яқзоннинг бу маслаҳати асарда ўқ чизикдай ўтган. Қиссада муаллиф мантиқ илмини ҳаёт чашмасига ҳам ўхшатиб, унинг сувидан ичган зот Баҳри муҳитда чўқмайди, жазирамада куймайди, музликларда қотмайди, дейди. Бу фикри билан Ибн Сино ўз фалсафий қарашларида мантиқни (рационал билишни) биринчи ўринга қўйишини кўрсатмоқда.

Ҳайй ибн Яқзон муаллифга ўзи билган нарсаларни ҳикоя қилиб беради. Бу ҳикояни Ибн Сино ўз ўқувчисига образли тил билан баён қиласи. Жумладан, коинот жисмлари ва қаватлари мамлакатларга, иқлим, денгиз ва дарёларга, инсон руҳиятидаги ҳолатлар ҳайвон ва афсонавий жонзотларга ўхшатилган. Одам руҳиятидаги сезгилар турли лавозимдаги ходимларга қиёсланган (кейинчалик бундай қиёс Абу Ҳомид Газзолийнинг “Кимиёи саодат” асарида ҳам қўлланилганини кўрамиз).

* Зухра Мамадалиева – филология фанлари номзоди.

Жумладан, асардаги “Оlam тузилиши баёнида” фаслидаги қуидаги сатрларга эътибор берайлик: “Кавокиб ва табойиъ (табиат) ва фалакул кавокибнинг буржлариким, тақсим этилгандур ўн икки қисмға. Ва Аршким, булардан муғайирроқдур (бошқача, ғаройибрөқ), мисоли подшоҳнинг хужраи хоси бўлғайким, вазир ул хужрада ўлтургай. Ва бул хужранинг атрофида равоқи бўлғайким ва ҳар тоқида ул вазирнинг ноиби ўлтургай. Ва етти нақибсувор бу ўн икки токнинг атрофидан айлангай. Бу нақиблар (раҳбарга яқинлар) вазирнинг ноиблари фармонидадур. Ва тўрт пиёда камонандоз бу етти нақибдан йирокроқ мунтазир туурларки, ҳазрат подшоҳдан нечук фармон еткусидур. Ва тўрт каманд – арқонни бу тўрт пиёдаға берибдурлар, токим фармон тақозоси бирла баъзисини подшоҳ даргохига тортарлар ва баъзисини йироқ қилурлар” (*Ғаззолий Абу Ҳомид. Кимиёи саодат. – Тошкент: Адолат, 2005 - Б.80.*). Кўрганимиздек, Ғаззолий бу ерда Аршни – подшоҳнинг хужраи хоси, осмон буржларини – ўн икки равоқда ўтиргувчи вазирнинг ноиблари, осмоннинг етти қаватини – етти нақибсувор, тўрт унсурни – тўрт камонандоз тимсолида тасвирлаган. Яна ушбу асарда инсон вужудини – бир мамлакатга, дилни – унинг подшоҳига, қолган аъзоларни унинг аъён ва мулозимларига қиёс қилса, одам баданидаги шахватни – тўнғизга, газабни – итга, ақлни фаришталарга ўхшатади. Бу фикрлар юкорида кўриб ўтганимиз Ибн Синонинг “Ҳайй Ибн Яқзон” рисоласидаги тасвирларга оҳангдош.

Қисса охирида Ҳайй ибн Яқзон барча яратиқнинг подшоҳини таърифлаб, уни ҳеч кимга ўхшамайдиган, ҳеч нарсага эҳтиёжи йўқ, власфини баён этишга тиллар ожиз бўлган зот деб таърифлайди. Асар “Истасанг, менга эргаш, сени унга олиб борайин” деган жумла билан яқунланади. Кўринадики, бу ерда гап Тангри ҳақида бормоқда, демак, пирнинг муаллифни бошлаб сайр қилдириши, унга таълим бериши, атрофдаги нарсалар ва мавжудотларни рамзий тил билан таништириши анъанаси адабиётимизга Ибн Синонинг “Ҳайй Ибн Яқзон” рисоласи билан кириб келган экан.

Профессор Е.Э.Бертельс тасаввуфий ҳикоятчилик тарихини Абу Ҳасан Ҳараконийдан бошлайди. Унинг “Нур ул-улум” рисоласида рамзий тил билан баён қилинган Мусо, капитар ва лочин ҳақидаги ҳикоятни шарҳлайди. Ҳараконийнинг шогирди “пири Хуросон” номи билан машҳур шайх, факих ва муҳадис олим Абдуллоҳ Анзорийдир. “Табақот ас-суфийа”, “Манозил ус-сойирин” ҳамда “Муножот” каби асарларни унга нисбат берадилар. “Манозил ус-сойирин” асарида рухнинг тўрт манзили, унга бўлган саёҳат ҳақида сўз боради.

Абдуллоҳ Анзорийнинг шогирди Ҳаким Саноий тасаввуф адабиётининг форс тилидаги дастлабки ижодкорларидандир. Унинг “Ҳадиқат ул-ҳақойик” (“Ҳақиқат боғчалари”) асарининг сўфийлик адабиётининг дидактика, яъни хираднома йўналиши ривожидаги ўрни аҳамиятлидир. Ушбу асарда мистик “йўл”нинг биз Ибн Синода кўриб ўтганимиз каби бир қанча манзиллари рамзий-аллегорик йўналишда тасвирланган. Унда ҳам худди Ақли аввал каби пир муаллифни руҳан саёҳат қилдиради ҳамда юқорилаш ва қайтиш йўллари билан таништиради. Ҳаким Саноий бу асарда мавзуга мос кичик-кичик ҳикоятлар киритиши билан асарнинг бадиий кучини янада оширган.

Низомий Ганжавийнинг “Маҳзан ул-асрор” достони Ҳаким Саноийнинг асарига жавоб тарзида битилган бу йўналишдаги илк назмий асар саналади. Анъанага содик қолган Низомий рухнинг юқорилаш боскичларини тасвирлайди ва уларни “хилват” деб атайди. Асарда иккита хилват ва иккита хилват самараси ҳақидаги боб мавжуд. Биринчи хилватда сокин ва

соҳир бир тунда Хўжа шоирнинг қўлидан тутиб, йўлга бошлагани ҳақида айтилади. Биринчи хилватда у табиат гўзалликларидан сархуш бўлади, ҳайратга тушади. Биринчи хилват самарасида у фикру тафаккурга чўмади. Бу гўзалликлар унинг ақлини зое, кўнглини хомуш қиласди.

Иккинчи хилватда эса устоз – Хўжа бир неча улфатлари билан базм тузади. Унда шоир бир гўзални кўради ва унинг ҳусну жамолидан ҳайратга тушади. Иккинчи хилват самарасида эса унинг кўнглига ишқ жойланиши, унинг бу ишқ таъсиридаги нолаю фарёди акс этади.

Амир Хусрав Дехлавий “Матлаъ ул-анвор” достонида хилватлар сонини учтага етказади ва унинг “самаралари”ни олиб ташлайди.

Биринчи хилватда шоирнинг танаси ерда қолиб, руҳи осмону фалакка кўтариғланлиги ҳикоя қилинади. Унда шоир Дил билан учрашади. Бу ҳолни олим М.Муҳиддинов қуйидагича шарҳлайди: “у (ўзлигини англаб етмаган руҳ – изоҳ бизники – З.М.) Дил хузурига бориб, у билан сирлашади. Дил унга дунёвий кишанлардан ўзни кутқазиш, бандалик ибодатига астойдил берилиб, шайтон бўйинни синдиришни маслаҳат беради” (*Муҳиддинов М. Комил инсон – адабиёт идеали. – Тошкент: Маънавият, 2005. – Б. 55.*). Иккинчи хилватда кундуз таърифи, табиат тасвири ва ошиқнинг бу ҳолатдан наво – ҳайрат туйгани ифодаланади.

Учинчи хилватда шоир Хожа – пирнинг хузурига боради ва ўзидаги бу ҳолатлар сирини сўрайди. Хожа шоирга руҳий кўтарилиш сирини англатади ва бу ҳолатни рўё эмас, ҳақиқатда рўй берганини таъкидлайди.

Жомий “Тухфат ул-ахрор”да бу анъанадан шаклан чекингандай туюлади. У кўнгил таърифидан кейин уч пирнинг сұхбатини келтиради. Биринчи сұхбат – илмул яқин, иккинчиси – айнул яқин, учинчиси эса – ҳаққул яқин тўғрисида бўлади. Сұхбатларни эшитган кўнгил камолотга эришиб бораверади. Бу ўринда гарчи шаклан уруж – кўтарилиш тўғрисида сўз бормаса ҳам, маънавий жиҳатдан юксалиш борасида гап кетмоқда. Бунинг сабаби илмул яқин – юзаки билим, айнул яқин – тажриба асосида англаб билиш ва ҳаққул яқин – қалбан ҳис этиш ҳамда шак-шубҳасиз билиш эканлигини ҳисобга олсан, Жомий ҳам моҳиятан салафларига эргашганини англаб етамиш.

“Ҳайрат ул-аброр”да саёҳатга раҳбарлик қилувчи шахс образи йўқ. Унда Хожа номи билан аталган кўнгил илоҳий даъват билан сайрга чикади. Достонда у уч бор саёҳат қиласди ва бундан беҳад ҳайратга тушиши тасвирланади.

Кўнгил таърифидаги бобдан сўнг дастлабки саёҳат малак оламига бўлади. Малак оламини Навоий гўзал табиат тасвирида ифодалайди. Қизифи шундаки, бу оламдаги ҳар бир гул, ҳар бир қуш Яратганга сано айтарди:

*Фоҳтадин қумрию булбулгача,
Балки шајжар яфрогидин гулгача,*

*Барчаси қайюмига зокир эди,
Ҳар бир анинг шукрига шокир эди.*

Бу ҳолатни кўрган Хожа чексиз ҳайратга тушади. Иккинчи саёҳат малакут оламига бўлади. Бу оламни Навоий осмони фалак тасвирида ифодалайди. Хожа етти сайёра ва ўн икки бурждаги турғун юлдузларни кўради:

*Мунча гаройибгаки қилди гузар,
Айлади ибрат кўзи бирла назар.*

*Борчасида зикру сужуд англади,
Маърифатуллоҳга шуҳуд англади¹.*

Бунда ҳам ҳар бир мавжудот саждаю қиёмда эканлигини кўрган Хожанинг бир ҳайрати ўнга етади. Ҳайратдан бехуд бўлади.

Учинчи сайр бадан шаҳристонига бўлади. Иккита устун устига қурилган бу салтанат қаттиқ тартиб асосида ҳаракатланарди. Унинг подшоси, вазири, сарбозлари бор эди:

*Шоҳ ани ўз мулкида дастур этиб,
Мулкини ул адл ила маъмур этиб,*

*Юққориги қаср уза фаррух вазир,
Сокину эл амира фармонпазир.*

Бу мамлакатда ҳам ҳамма Яратганга ибодат қилиш, Унинг зикрини айтиш билан шуғулланади. Буни кўрган Хожани ҳайрат узра ҳайрат қамраб олади ва у фано – ўзини йўқотиш даражасига етади:

*Чунки бу ҳайрат аро ранжу ано,
Фоний этиб хожсани балким фано².*

Шундан сўнг у Яратганинг ҳалфаси даражасига кўтарилди. Достонда Навоий салафлари ижодидаги анъанавийликни умумлаштириб, уларга ўз муносабатини билдиради. Унинг анъанавийлик ичida янгилик яратиш маҳорати ушбу бобларда ҳам яққол намоён бўлади.

Жумладан, ҳайратларда, худди хилватлардаги каби сафар ва саёҳат амалга оширилади. Барча сафарларда қаҳрамон гўзалликдан ҳайратланади. Бироқ Навоийнинг Хожаси нафақат гўзалликдан, балки уларнинг маънавий томонидан, яъни ҳамма мавжудот ва неъматларнинг Яратган зикрига машғул эканлигидан ҳам ҳайратланади. Бу аввалги хирадномаларда эътибор берилмаган жиҳат бўлиб, Навоийнинг ўзига хос топилмаси саналади.

Табиат тасвири барча достонларда мавжуд эди, аммо коинот тасвири, сайёра ва юлдузлар манзараси ҳам Навоийнинг ўзига хос ёндашуви маҳсулидир. Бу унинг Самарқанддаги Улуғбек мактабида олган аъло дараҷадаги астрономик билими таъсирида юзага келган, десак янгишмаймиз.

Учинчи ҳайратдаги саёҳат ҳам Навоийнинг хаёлоти меваси бўлиб, тахминимизча, Фаззолийнинг “Кимиёи саодат” асари таъсирида яратилган.

Аҳамиятли ўзгаришлардан яна бири Хожанинг ҳайратлар натижасида камолотга етишидир. Бу ҳам улуғ шоир ижодининг ўзига хослиги ифодаси бўлиб, бошқа хирадномаларда ҳайратлар натижасига бу даражада эътибор қаратилмаган. Натижа Навоийнинг “Қандай асосга кўра Одам Ато яратилганданоқ Яратганинг ҳалфаси даражасига етди?” деган шахсий мулоҳазасига жавоб тарзида вужудга келган бўлса керак.

Муҳими, Навоий достонда инсон кўнглини Хожа – соҳиб деб эъзозлайди ва уни Яратганинг ҳалфаси (ўринбосари) деб улуғлайди. Бу айни пайтда инсонни улуғлаш ва эъзозлаш бўлиб, улуғ мутафаккирнинг асосий ижодий тамойилларидан саналади.

¹ Алишер Навоий. Ҳайрат ул-аббор. МАТ 7-том. Тошкент: Фан, 1991. – Б. 79.

² Ўша асар. – Б. 73.

NAVOIY SABOQLARI

Каримбай ҚУРАМБОЕВ

АЛИШЕР НАВОЙ ВА ҚОРАҚАЛПОҚ АДАБИЁТИ

Шундай шоирлар бўладики, ўз миллати доирасидан чиқиб, ўзга халқлар ва адабиётларнинг ҳам ардоқли фарзандига айланади. Умумбашарий ва умуминсоний аҳамиятга молик асарлари адабиёт муҳлисларини эзгу тоялар руҳида тарбиялашда мактаб вазифасини ўтайди. Буюк шоир ва муттафаккир Алишер Навоий шундай салоҳиятга эга, шахси ҳам, мероси ҳам абадийликка муҳрланган сиймолардан бири. Шарқ адабиётида, хусусан, туркий халқлар адабиётида шоир ижоди юксак қадрланади. Асрлар давомида ёнма-ён яшаб келаётган туркман, тожик, қозоқ, қирғиз ва қорақалпоқ шоирлари Навоийни ўз устозлари деб билишади. Жўмладан, қорақалпоқ адабиётида шоирга эҳтиром алоҳида. Кунхўжа, Ажиниёз, Бердақ, Ўтеш, Умар, Аяпберган Мусаев сингари шоирлар, кейинроқ Аббаз Дабилов, Содик Нуримбетов, Ибройим Юсуповлар Навоий ижод чашмасидан баҳраманд бўлганини кўп бора таъкидлашган. XIX аср қорақалпоқ адабиётининг йирик сиймоларидан бири Бердақ Қарғабой ўғли “Иzlар эдим” шеърида ёзган эди:

*Наўайыдан саўат аштым,
Физуўлыдан дурлер шаштым,
Дилуарларды излер едим¹.*

Шоир С.Нурумбетовнинг “Навоий ҳақида шеър”идан бўлса мана бундай мисраларни ўқиймиз:

*Уллы шайыр көркем сөздин ўстасы,
“Ләйли-Мәжнун”, “Фарҳад-Ширин” нусқасы,
Сизден бизге мийрас қалды Наўайы,
Қыз жигиттиң суйип оқыр қыссасы.*

Ўтмишда ҳозирги Қорақалпоғистон ҳудудида Навоий асарлари тарқагани, мадрасаларда ўқитилгани тўғрисида маълумотлар бор. Маърифатпарвар мударислар Фирдавсий, Ҳофиз, Саъдий, Фузулий, Бедил, Махтумкулилар қаторида толибларга Навоийдан ҳам сабоқ берганлар. Бердақнинг “Навоийдан савод очдим”, деб ёзгани бежиз эмас. Қорақалпоғистондаги олий ўқув юртлари учун нашр қилинган “Қорақалпоқ адабиёти тарихи” дарслигида бу фикр янада ойдинлаштирилган. “Қарақалпақ мектеплеринде, –

* Каримбай Қурамбоев – филология фанлари доктори.

¹ Бердақ. Сайланды шығармалары. – Некис, 1997. – Б.42.

дайилган китобда – Шығыс поэзиясынин уллы ўәкиллери Наўайы, Ҳафызы, Саадий, Физулий, Бедил сыйқылар көркем сөз усталарының шығармалары оқытыла баслады. Бул әжайып шығармалардан тәсирленген қарақалпак классиклеринин шығармаларында дунъяга көзқарас ҳәм реал мотивлер өткірлесе баслады”¹.

Навоий шеъларининг Бердақ лирикасига таъсирини жанр ўхшашлигидан эмас, ғоявий мотив талқини, мавзу танлаш, давр муаммоларига муносабатдаги фаол нұқтаи назардан изланса, түғрироқ бўлар. Бердақ қишлоғининг эски мактабларида завод чиқарган. Шоирнинг марказий мадрасаларда таҳсил олгани ҳақида маълумотлар учрамайди. Маълумки, мадрасаларда Шарқ мумтоз адабиётининг нодир асарлари мактабларга нисбатан кенг, кўпроқ маҳорат аспектида ўргатилган, мумтоз шеърият назариясидан бे-риладиган билим ҳам мадраса мақоми даражасида бўлган. Кўп шоирлар бу имкониятдан фойдаланиб, мумтоз шеърий шаклларда ижод қилиш қоидаларини ўзлаштирган. Бердақ меросида мумтоз шеърий шакл (ғазал, мухаммас, мусаддас ва б.) намуналари йўқ. У бармоқ вазнида ёзган. Бу ҳолатни қорақалпоқ адабиётшунос олимлари шоирни мадраса таълимини олмагани билан изоҳлайди.

Лекин бу фикр Бердақ ижодининг умум аҳамиятини асло пасайтира олмайди. Чунки шоир асарлари жанри, вазнидан қатыи назар, асрларга татигулик. Шарқ адабиётига ихлос кўйиб, ундан завод очган шоир, гарчи арузда қалам тёбратмаган бўлса-да, оригинал достонлари, бекиёс шеърияти билан қорақалпоқ адабиёти тарихида янги сахифа очди, унинг асосчилидан бирига айланди.

Бердақ халқчиллик, ватанпарварлик мавзуларини куйлашни ижодининг бош мақсади деб билди. Адолатни ҳимоя қилиб, адалотсизликка қарши курашди. Ибратли одоб-ахлоққа қанчалик хайриҳоҳ бўлса, маънавий тубанликка шу даражада муросасиз бўлди. Бу ғояларга хизмат қилишда Навоий тажрибалари, баъзи асарларининг лейтмотиви Бердақ учун ибрат бўлган деб ўйлаймиз. Бердақ ижодида халқ манфаатига хизмат қилиш асосий йўналишлардан бири. Шоирнинг биргина “Халқ учун”, “Яхшироқ” шеърларини эсланг. Ҳар бирида шоирнинг эл-юрти, халқи билан бир тан-бир жон эканлиги гоҳ насиҳат, гоҳида даъват, чақириқ оҳангидага янграйди.

*Жигит болсаң арысландай туўйлган,
Хызмет еткил удайына халық ушины...*

Ёки:

*Жўмыс исле, туўйлган соң ел ушинын,
Жаныңды аяма елде ер ушинын,
Өлип кеткениңше хызмет жақсырақ –*

каби шеърий парчаларни ўқиганда, шоирнинг ўз ватани, халқи тақдирига нақадар дахлдор эканлиги тўғрисидаги фикр кўнгилдан ўтади. Ва бу мисралар бизга беихтиёр Алишер Навоийнинг:

*Одами эрсанг демагил одами,
Ониким йўқ халқ гамидин ғами –*

¹ Қарақалпақ әдебияты тарийхы. – Нөкис, 1983. – Б.101.

деган машхур байтини эслатади. Ва Бердақ ҳам ҳаётга, одамларга муносабатда, қалами билан халққа хизмат қилишда навоиёна йўлни танладимикан деган фикр хаёлимизга келди. Чунки, “Навоийдан савод очган” шоир кўп масалаларда устозига эргашиши мумкин. Гарчи, Бердақ Навоийнинг шеър ёзиш санъати поэтикамидан бироз узокроқ бўлса-да, ижтимоий-сиёсий, маънавий-ахлоқий масалалар талқинидаги тажрибасидан, қарашларидан таъсиrlанган бўлса ажабмас. Шоир қатор достонлар туркумини ижод этгани маълум. Унинг “Омонгелди”, “Ойдўсбобо”, “Ерназарбий”, “Равшан”, “Ахмоқ подшо”, “Шежере”, “Хоразм” каби поэма ва достонлари XIX аср қорақалпоқ адабиётининг гўзал намуналари. Бу асарлар бевосита Навоий таъсирида ёзилган демоқчи эмасмиз. Лекин Бердақ достон жанрига ўтища, фольклордан фойдаланиш, уларни достон сюжетига мослаштириб, асар тоясига бўйсундириш, образларни индивидуал қиёфада кўрсатишда озми-кўпми Навоийнинг достончилик тажрибасига таянган. Зоро, “Навоийдан савод очган” шоир ҳақида шундай хулоса чиқарсан, мантиқсизлик бўлмас.

Алишер Навоий анъаналарини қорақалпоқ адабиётида давом эттириб, мумтоз шеърий шаклларда бой адабий мерос қолдирган шоирлардан бири Ажиниёз Қўсибояй ўғлидир. Ажиниёз XIX аср қорақалпоқ адабиётида лирик шоир сифатида танилди. Унинг қорақалпоқ адабиётидаги буюк хизматларидан бири, шоир ўз адабиётига илк маротаба фазал, мухаммас жанрларни олиб кирди. Иқтидорини бу мураккаб жанрлар ҳамда вазнларда синаб кўришда Навоий поэтик тажрибаларидан фойдаланган деган фикрдамиз. Тўғри, Ажиниёз шеърларида Навоийни устоз тимсолида икрор этган мисралар учрамайди. Лекин шоирнинг “Бордур” радифли шеърида мана бундай сатрлар бор:

*Хожса Ҳафыз Наўайыдан сабағын,
Алан нешиш алым, кәтиби барды.*

Шоир шеърда ўз элинин, миллати ва уруғларини, қиз-йигитлари, табиатини, боғу бўстонларини, қишлоғу шаҳарларини таърифлайди. Агар эътибор берган бўлсангиз, юқоридаги икки мисрада Ажиниёз: айтилганлардан ташқари, менинг юртимда Хўжа Ҳофиз, Навоийдан сабоқ олган қатор олимлар, котиблар ҳам бор, демокда. Мантиқан ўйлаб қаралса, устоз шоирлардан сабоқ олганлар орасида Ажиниёз ҳам бор бўлган. Демак, бу фикр Ажиниёз Навоий ижодидан хабардор эди ва ундан ўргангандейишга асос беради.

Ажиниёзни Алишер Навоий ижодига яқинлаштирадиган яна бир омил бор. Маълумки, Ажиниёз Хива мадрасаларида таҳсил олган. Қадим мадрасаларда Шарқ адабиёти дурдоналари дарслик, ўкув қўлланма ўрнида фойдаланилган. Фирдавсий, Жомий, Саъдий, Фузулий, Навоий, Бедилдек даҳоларнинг асарлари шу вазифани бажарган, толиблар учун ҳам назарий, ҳам амалий аҳамият касб этган. Ажиниёзда арузда ёзиш малакаси мадрасада шаклланган. Мумтоз шеъриятга хос ифода унсурлари (бадиий тасвир қуроллари), шеърий санъатларни қўллашда салафларнинг бадиий-эстетик тажрибалари ёрдам берган. Жумладан, Навоий лирикаси Ажиниёз учун кўпроқ улги бўлди. Шоирнинг “Кўзларим”, “Бери кел”, “Уйғон”, “Чикди жон”, “Ай алиф”, “Киз Ораз” мухаммасларининг ифода кўриниши, поэтик талқин, мажозийлик хусусиятлари Навоий ғазалларини ёдга солади. Баъзи мисолларни қиёслаб кўрайлик. Ажиниёзнинг “Кўзларим” радифи

мухаммаси қуидаги банд билан бошланади:

*Хақ мени инсан жараттың наў бәхәрим көзлерим,
Аниша бағлар сәйир еткен, гули ўзарым көзлерим,
Махсудум барынша гездим, ықтыйярым көзлерим,
Тәннен соңыра барадур, сақла мазарым көзлерим,
Истеген йерге йеткерген илгир нәзерим көзлерим...¹*

Банд Навоийнинг “Кўзим” радиифидаги бир неча ғазалига оҳангдош. Мана, мисоллар:

*Лоладек юзунг хаёлидин тўла қондур кўзум,
Балки лола жомидек қон ичра пинҳондир кўзум...*

Ёки:

*Юзинг гамидин эрур абри навбаҳор кўзум,
Не айб, ер юзини қиласа лолазор кўзум...*

Алишер Навоийнинг “Хазойин ул-маоний” девонидаги “Кўзум” радиифли ғазалнинг матлаъси ва мақтаъси билан танишинг:

*To ўюлди ханжари ҳажринг била гирён кўзум,
Ул танур ўлдики, зоҳир айлади тўфон кўзум...*

*Эй Навоий, йўқ ҳадим ул шўхни кўрмакка, лек –
Ҳар қаён азм этса, асрор халқдин пинҳон кўзум.*

Мисолларни қиёслашдан мақсад, Ажиниёз “Кўзларим” мухаммасини айнан Навоийнинг “Кўзум” радиифли ғазаллар туркуми таъсирида ёзган деган фикрни илгари суриш эмас. Туркий шеъриятда бу радифда ғазаллар кўп ёзилган. Ажиниёзга балки улар ҳам таниш бўлгандир. Лекин, бари бир, тахминимизча, мадраса таълимими олган Ажиниёз учун бошқалардан кўра Навоийга эргашиш енгилроқ бўлгани эҳтимолга жуда яқин. Шу фикрдан келиб чиқсақ, Ажиниёз лирикасидаги Навоий ғазалларига шаклий ўхшашлик тасодифий эмасдек туюлади бизга. Бироқ шеърларнинг ифода шаклидаги муштарақлик мазмуннинг оригиналлигига халақит бермаган. Ҳар бирида фикр – индивидуал, туйғулар талқини ҳам ўзига хос. Ажиниёз мухаммаси соддалиги тасвирнинг жарангдорлиги, куй ва қўшиқбоплиги билан ажralиб туради. Шоирнинг севги-садоқатни худди шундай оҳангда, ўта гўзал ифодалаганига бошқа бир мухаммасидан яна бир банд:

*Ныспы шәм келдим қашыңа, назлы жәнаным оян,
Шам-шыраг яқтым башыңа, нуўры әнўарым оян,
Көзлеримниң рәўшаны, ол маҳы табаным оян,
Йолында зар эйлеген, эй мисли әфганым оян,
Мен сениң, келдим қашыңга рәҳим ет, жсаным, оян...*

Ишқ-муҳаббатнинг бундай сеҳрли талқини, жозибасида хоҳланг-хоҳламанг, Навоийнинг “Келмади”, “Ўлтиргуси”, “Айт”, “Ўн саккиз минг олам ошуби...” каби ғазалларидаги лирик қаҳрамоннинг ҳам қувончи, ҳам изтиробини эслайсиз. Шундай экан, қорақалпоқ шоирининг кўнгил

¹ Бердақ. Сайланды шығармалары. – Нөкис, 1997. – Б.42.

кечинмалари ифодасида навоиёна талқинга яқинлик бор деб хисоблаймиз. Зеро, Навойдек буюк даҳолар шеъриятидан баҳраманд бўлган шоиргина муҳаббатни шу хилда гўзал, юксак савияда куйлай олади.

Замонавий қорақалпоқ адабиётида ҳам Алишер Навоий ғоят қадрланади. Буни шоирдан илҳомланиб шеърлар, ғазаллар битган адилар тимсолида кўрамиз. Ўзбекистон Қаҳрамони, Ўзбекистон ва Қорақалпоғистон халқ шоири Ибройим Юсупов шундай ижодкорлардан бири. У XX асрнинг иккинчи ярмида ижодга кириб келиб, ранг-баранг асарлари билан қорақалпоқ адабиётига улкан ҳисса кўшиди. Шарқ мумтоз сўз санъати, айниқса, Навоий ижоди шоир қалбини сехрлаганди. Шеърларидан бирида шоир меросига эҳтиромини қуидагича ифодалагани бежиз эмас.

*Саҳра гулларин шашайин устиче,
Наўайыны суйген қарақалпақ болып.
Ибраіым дер, уллы руўхиң алдында,
Бас ийейин шәкиртиң Бердақ болып.*

Бу, шунчаки, айтилган гап эмас. И.Юсупов бу қалб ҳақиқатини, шоирга чексиз ҳурматини ғазалларига ёзган назирлари орқали ҳам ифодалади. “Хазойин ул-маоний”нинг иккинчи “Наводир уш-шабоб” девонида “Уйғот” радифли бир ғазал бор. Матлаъси шундай бошланади:

*Шўх икки кўзингни ноз уйқусидан уйғот
То уйқулари кетсун гулзор ичида уйғот...*

И.Юсупов ушбу ғазалга назира боғлайди. Назира етти байт, аруз вазнида. Унда назира боғлаш санъати талаблари тўла сақланган.

*Яр, оян наз уйқидан, таң сәҳар болып қалды,
Және Эмиў бойында наёубәҳэр болып қалды...
Кийиклер куралаилап Үстурт шөллигинде,
Саманбай тогайында бәҳэр болып қалды.
Бәҳэр шыксын деп аязда көн қойдың Аязийди,
Енди мине Ибраіымга бәҳэр болып қалды¹.*

Ғазаллар мазмунни тубдан фарқ қиласи. И.Юсупов ғазалида замон ва макон талқини конкрет. У қорақалпоқ ҳаёти ҳақида. Колорит ҳам шунга монанд. Ўлканинг табиати, фасллари, чўлу даштлари, ҳайвонот олами, шаҳару қишлоқлари тасвири ғазалнинг ички мазмунини ташкил этади. Баҳор фаслида шоир юртида юз берадиган ҳар бир ўзгариш, уйғониш жараёнлари чинакам миллий руҳда бадиий гавдалантирилади. Муаллиф бу ҳаёт манзарасини чизицда Навоий ғазали шаклидан фойдаланган.

И.Юсупов “Баҳор ва сен” номли ғазаллар мажмуасини яратди. Туркум бағишлов характеристида бўлиб, ўн етти ғазалдан иборат. Ҳар бири Ҳофиз, Лутфий, Навоий, Фузулий, Машраб, Нодира, Фурқат каби шоирларга бағишланган. Шоирнинг “Ўзбек сози”, “Кўрдим” ғазалларида ҳам Навоий шеъриятини қадрлаш мазмунидаги қўйма сатрлар мавжуд. И.Юсупов Навоийнинг бир неча ғазалларини қорақалпоқ тилига таржима ҳам қилган.

Хозирги қорақалпоқ адабиётида И.Юсуповдан кейин Шарқ мумтоз шеъ-

¹ Қарақалпақ әдебияты тарийхы. – Нөкис, 1983. – Б.101.

рияти оҳангида, шарқона лирика руҳида, турли жанрларда энг кўп шеърлар ёзган шоир бу – Абулқосим Ўтепбергенов десам муболаға бўлмас. Бу масалада Абулқосим билан беллаша оладиган бошқа бирор шоир борлиги, очиғи, менга маълум эмас. Шоирнинг ҳар бир шеърий тўпламида, айтайлик, “Мангу булоқлар”, “Агар кўнглимни шод этса”, “Шарқ оҳанглари”да Шарқ адабиёти машхурлари ғазалларига боғланган мухаммас, назираларни ўқиб, шундай хулосага келдим. Муаллифнинг бирор шеърий китоби йўқки, унда ғазал ёки мухаммас намунаси учрамаган бўлсин. Ҳатто, шоир “Сайланмалари”нинг бешинчи жилди “Шоҳ шоирлар билан” деб аталади ва китобнинг ярмидан кўпи ғазал ва мухаммаслардан иборат. Мазкур “Сайланмалар”нинг “Боғи эрам бизларда” (2015) деб номланган олтинчи жилдига эса шоирнинг факат рубойлари жамланган. Улар орасида Навоий таърифига бағишланганлари ҳам бор. Мана, шулардан бир намуна:

*“Жук аўырын нар көтерер” деген гәп бар әзелден,
Галактика жараттың сен дәстан менен ғәзелден.
Шах қазнасы басынданда эй Элийшер Наўайы,
“Халқым” дейип, ўаз кешитиң – аў әйши- әшрет ҳәм зерден.*

Абулқосим мухаммас боғлаш ёки назира ёзиш учун Шарқнинг донишманд шоирларини танлаган. Яссавий, Низомий, Румий, Дехлавий, Насими, Жомий, Фузулий, Махтумқули ғазалларига боғланган мухаммаслар шулар жумласидандир. Айниқса, унинг Навоий, Бобур, Зебунисо, Машраб, Оғаҳий, Фурқат ғазалларига боғланган мухаммаслари поэтик оҳангি, романтик пафоси, нафосати, янги замонга мослиги билан диққатга сазовор.

Айтайлик, Алишер Навоий ғазалларига боғланган мухаммаслардаги бадиийлик даражаси, оҳорли сўзлар қўллаш маҳорати, лирик қаҳрамон туйғуларини Навоийга хос талант йўналишида беришга интилгани муаллиф ютуғидир. Бир шоирнинг бошқа бир шоирга мухаммас боғлаши ёки бирон ғазалига назира ёзиши, бу ҳам ижодий баҳс, мусобақанинг бир кўриниши. Лекин бу фикрни А. Ўтепбергенов мухаммас боғлашда Навоий билан мусобақалашди, унга тенглашди ёки ундан ўтиб кетди, деган маънода қабул қиласлигинизни истардим. Адабиёт тарихида Навоийга ижодий эргашиб назиралар, мухаммаслар ёзган ижодкорлар жуда кўп. Бироқ улар орасида шеъриятда буюк истеъод соҳиби эгаллаган чўққига чиққани йўқ хисоби. Абулқосим ҳам Навоий ғазалларига бадиий маҳоратини синаш, чиниқтириш, тажриба орттириш мақсадида ёндашган. Улуғ шоир мурожаат этган мавзулардан, бадиий санъатлардан фойдаланишда, лирик қаҳрамоннинг руҳияти иқлиmlаридағи ранг-барангликни беришда Навоий кашф этган ғоявий-эстетик концепцияларга эргашган. Ижодий хис қилиб, фаолиятида фойдаланди. У Навоийнинг йигирмадан ортиқ ғазалига мухаммас боғлади. Баъзиларида “Абулқосим”, айримларида “Жайхун”ни тахаллус ўрнида қўллайди. Шоир ғазалларидан бирида ёзади:

*Тәзим ет сен Эбилқасым Элишер Наўайыга,
Поэзия атлы сулыўдың басында жыға еди ол¹.*

Бошқа бир ғазали шундай яқунланади:

¹ Ўтепбергенов А. Шах шайърлар менен. – Нөқис, 2014. – Б.11.

«Наўайы болмаганды Жайхун сен-шие боларма един?»
Дегенлерге «ҳаслан, ҳаслан, яқ, яқ,» деп айтып журмен.

Икки байтда ҳам шоирнинг Навоий даҳосига ихлоси, эҳтироми, энг муҳими шоирлик тақдиррида буюк Навоийнинг ўрни мамнунлик руҳида айтилган. Бу муҳлислик, Навоийга бир дарё меҳр шоир мухаммасларида янада гўзал, янада таъсири ифодаланади. “Келмади” радифли ғазал Навоий лирикасининг бетакрор намуналаридан бири. Ғазал кўп шоирларга илҳом берди. Унга ўнлаб мухаммаслар боғланди, назиралар ёзилди. Куйлар басталаниб, хонандалар репертуаридан жой олди. Ажиниёз бу ғазал таъсирида бир ажойиб шеър ёзганига юкорида гувоҳ бўлдингиз. Ғазал Абулқосимни ҳам бефарқ қолдирмади, ғазалга мухаммас боғлаш истагини уйғотди. Ва етти байтлик яхши бир мухаммас яратилди.

*Жайхун ашиқ болсаң егер, азаб уқыбаттан қашма,
Аңсатлықта яр дийдары, шийрин поса йоқдур хасла,
«Чар деуан»ды қолга алып, айралық қосығын басла,
Эй Наўайы, шарап ишип, өз кеўлиңди өзиң хошила,
Сениң-ақ, баҳтыңың бир, утыры, пайты. Келмеди.*

Навоий ғазали севги мавзусида. Ошиқнинг ёр висолига интизорлиги, маъшуқанинг бевафолигидан норозилиги, шикоят руҳи ғазалда устувор. Бу ғоя мухаммасда ҳам яхши очилган. Мухаммас мисралари ғазал байтларига мантиқан пайвандланган. Бироқ мухаммасдаги кечинмалар, ғазалдаги лирик қаҳрамон тўйгуларининг такори эмас, балки иккинчи бир лирик қаҳрамоннинг ҳижрони, алами ва изтиробидир. А.Ўтепбергенов ғазалдаги ошиқ ва ёр образларини, ички кечинмаларини ўзича ёрита олган. Навоийнинг “Бўлмагай”, “Кўринг”, “Бўлган эмас”, “Найлайн”, “Кўрдим”, “Гўзал ёрга” радифли ғазалларига ёзилган мухаммаслар ҳам ўкувчини қониқтириши мумкин. Масалан, муаллифнинг “Бўлмагай” радифли мухаммасида Навоий ғазалидаги лирик қаҳрамоннинг руҳий ҳолати, ошиқ, ёр рамзлари, севги-садоқат мавзуси Абулқосим қаламида индивидуал мазмун ва оҳангда берилиб, шоирнинг бадиий-эстетик тафаккури даражасида талқин этилади.

Алишер Навоий ва қорақалпоқ адабиёти ҳақида гапирганда шоир асарларининг таржималарига ҳам тўхтаб ўтиш лозим. Қорақалпоқ халқининг Навоий мероси билан таниша бошлаган йиллари октябрь тўнтаришидан анча илгариги даврга тўғри келади. Бердақнинг “Навоийдан савод очдим” деб ёзганига қараганда ёки Ажиниёзнинг Навоий лирикаси таъсирида мухаммаслар битганини назарда тутсак, Навоий асарлари анча илгари ҳозирги Қорақалпоғистон ҳудудида дастлаб кўллэзма шаклида тарқаган, эски мактаб-мадрасаларга шу шаклда кириб борган. Ўтган асрнинг ўттизинчи йилларидан эътиборан, шоир шеърларини расман қорақалпоқ тилида жамоатчиликка етказишга киришилган. Қорақалпоқ олимлари берган маълумотларга асослансан, 1937-1940 йилларда М.Дарибоев, А. Шомуратов, Ж.Аймирзаев, Н.Жапақовлар шоирнинг бир неча ғазалларини, “Фарҳод ва Ширин” дostonидан парчаларни қорақалпоқ тилида матбуотда эълон қилдилар. 1968 йилда Навоийнинг “Лайли ва Мажнун” достони қорақалпоқ саҳнасида кўрсатилгани ҳақида ўша даврнинг матбуоти ёзиб чиқди. 1939 йилда эса шоирнинг “Чор девон”идан туркум ғазаллар, “Фарҳод ва Ширин”, “Лайли

ва Мажнун” достонининг баъзи боблари китоб шаклида босилди. Алишер Навоийнинг 500 йиллик юбилейи Қорақалпоғистонда ҳам нишонланди. Шу муносабат билан шоирнинг ғазаллари, “Ҳайрат ул-аброр” достонидан намуналар Б.Қайпназаров таржимасида нашр этилди.

Алишер Навоий мероси билан қорақалпоқ китобхонларини танишитиришнинг кейинги босқичи 1960-1970 йилларга тўғри келади. Бу даврда янги таржимонлар авлоди етишди. М.Матназаров таржимасида “Сабъаи сайдер” достони босилди. 1977 йилда Навоийнинг бир даста ғазалларини Д.Айтмуротов қорақалпоқчалаштиргди. 1991 йилда таржимон ушбу китобни янги таржималар билан тўлдириб, кайта чоп эттириди. Навоийнинг бир юз ўттизга яқин ғазаллари, ҳикматларидан намуналар, шунингдек, “Ҳайрат-ул аброр”, “Лайли ва Мажнун” достонларидан боблар таржимаси ҳам ушбу тўпламга киритилган. “Сайланма” китоб Навоийнинг ҳозиргача қорақалпоқ тилида эълон қилинган таржималарининг нисбатан тўлиқроғи. 1991 йилда Тошкент нашриётларидан бирида, шоир таваллуди муносабати билан яна бир таржима китоб – “Бақо гули” нашр этилди. Тўплам Навоийнинг дунёнинг бир неча тилларига ўгирилган ғазалларидан иборат. Китобдаги шоирнинг ўнта ғазалининг қорақалпоқча таржимаси таникли шоир Ш.Аяпов қаламига мансуб.

Шоир меросига қизиқиш ўтган асрнинг 20-30 йилларидан бошланган. Таникли олимлар, ҳатто шоир ва ёзувчilar ҳам бу мавзу билан шуғулланган. Мақолалари билан матбуотда қатнашиб турган. Ж.Аймирзаев, А.Бегимов, Н.Давқараев, М.Дарибаев, Н.Жапақовдек атоқли олимлар ва адилларнинг Алишер Навоий ижодига бағишиланган, матбуотда босилган мақолалари ўз даврида адабиёт ихлосмандларини шоир ижоди билан таниширишда кўприк бўлди. Адабиётшунос олимларнинг кейинги авлоди ҳам Навоий меросини ўрганиш анъанасини тўхтатгани йўқ. Туркум мақолалар, илмий ишлар юзага келди. Биз бу ўринда И.Софитов, А.Муртазаев, Қ.Мақсетов, К.Мамбетов, Ҳ.Хамидов, Қ.Жаримбетов каби олимларнинг Қорақалпоғистоннинг газета-журналларида турли йилларда босилган мақолалари, нашриётларда чоп этилган рисолаларини назарда тутмоқдамиз. Ҳозир қорақалпоқ на воийшунослиги алоҳида йўналиш сифатида шаклланиб бормоқда десак, хато бўлмас. Профессор К.Мамбетовнинг Шарқ адабиёти, жумладан, Алишер Навоий ижодини қорақалпоқ адабиёти билан киёсий ўрганган қатор мақолалари, “Навоий ва қорақалпоқ адабиёти” (1991), “Ўзбек ва қорақалпоқ адабий алоқалари” (1992) рисолалари ва бошқа олимларнинг тадқиқотлари шундай хуносага келишга асос беради. Ушбу сатрлар муаллифи ҳам Ўзбекистон ва Қорақалпоғистон матбуотида мавзуга доир бир неча илмий мақолалар эълон қилди. “Кўнгил бермиш сўзимга” (1992) номли монографиямнинг бир боби шу мавзу таҳлилига бағишиланган.

Фикримизга хуроса қиладиган бўлсанк, қорақалпоқ шоир ва ёзувчilari, олимлари, таржимонлари Алишер Навоийни юксак қадрлайди, ижодини меҳр билан ўрганади, асарларини таржима қилишни улкан мартаба деб билишади. Бу анъана асрлар оша давом этиши, шубҳасиз. Чунки, қудратли шеърияти, оламшумул гуманистик ғоялари билан бир эмас, бир неча адабиётларга бекиёс ҳисса қўшган бундай сиймоларгина мана шундай эъзозга муносиб кўрилади.

NAVOIY SABOQLARI

Фаррухбек ОЛИМ

МУТОЛАА МАКТАБИ

Болалигимизда ҳар биримизни кучли таъсирлантирган, ажойиб фантазия ва хаёлот оламига чорлаган китоблар бўлган. Кимдир Ойбекнинг “Болалик”, Гафур Гуломнинг “Шум бола”асарлари билан улгайган бўлса, яна бирор Марк Твен қаламига мансуб “Том Сойернинг саргузаштлари”, Жонатан Свифтнинг “Гулливернинг саёҳатлари”ни мутолаа қилиб вояга етган. Энг муҳими, болалигимизда ўқиганларимиз бизнинг тасаввур оламимизни шакллантириб, муреак қалбимизни тарбиялаган. Шунинг учун ҳам болаликда ошно бўлган китобларимизнинг мазмуни, сюжети ва қаҳрамонлари ҳеч қачон эсимиздан чиқмайди.

Улуғ бобокалонимиз Алишер Навоийнинг ҳам кичиклигига Фаридуддин Атторнинг “Мантиқ ут-тайр” (“Қуш тили”) асарига жуда қаттиқ меҳр қўйгани, уни ёд олганини яхши биламиз. Муҳими, шоир ўлимидан икки йилча олдин, 1499 или шу асарга жавоб тариқасида “Лисон ут-тайр” (“Қуш тили”) достонини қофозга туширишга улгурган. Демак, қалам соҳибини болаликда мафтун этган асар таъсири бутун умрга татиган. “Мантиқ ут-тайр” – Навоий бадиий олами шаклланишининг тамал тоши. Бироқ шоирнинг етук мутафаккир ва мутасаввиф бўлиб етишишига омил бўлган бошқа талай асарлар ҳам бор. Тан олиш керак, уларнинг кўпчилигидан хабаримиз йўқ. Ҳазрат Навоий қайси китобларни ўқиган экан? Албатта, бу саволга жавобни уларнинг ўзидан қидирамиз.

Навоий устози Абдураҳмон Жомий вафотидан икки йил ўтиб, яъни 1494 или у ҳақда маҳсус “Хамсат ул-мутаҳайирин” асарини яратди. Асар таркибий жиҳатдан “Муқаддима”, уч мақолат ва “Хотима”дан, жами беш қисмдан иборат¹. “Хотима”да муаллиф Жомий хузурида ўқиб, таълим олган китоблари рўйхатини бирма-бир келтиради: Жомийнинг “Қофия”, “Аruz”, “Лавоен”, “Лавомеъ”, “Ашиъ” рисолалари, “Шархи рубоиёт”и, “Нафаҳот ул-унс...”, “Шавоҳид ун-нубувват” асарлари; Ҳожа Мухаммад Порсонинг “Қудсия” рисоласи, Ироқийнинг “Ламаъот” асари, Ҳазрати Ҳожа Убайдуллоҳнинг отаси тавсияси билан ёзган асари² ҳамда Ҳожа Абдуллоҳ Ансорийнинг “Илоҳийнома”си.

* Фаррухбек Олим – тадқиқотчи.

¹ Алишер Навоий. Муқаммал асарлар тўплами. 20 жилдлик. 15-жилд. Хамсат ул-мутаҳайирин. – Тошкент, Фан, 1999.

² “Хамсат ул-мутаҳайирин”нинг Суйима Фаниева нашрга тайёрлаган табдил матнида бу асар Ҳожа Ахрорнинг “Волидия” рисоласи экани айтилган. Қаранг: А. Навоий. “Хамсат ул-мутаҳайирин”. – Тошкент, ТошДШИ нашриёти, 2004. – Б.69.

Бундан ташқари, Навоий Ҳазрати Жомий “Хамса” билан “Ҳафт авранг”ни қиёслаш йўли орқали овоз чиқариб ўқиганида тинглаганини, шунингдек, баъзи рисолалар улар олдида ўқилмаган бўлса ҳам, улардаги айrim мураккаб жойларни устоздан сўраб турганини ёзади.

Келтирилган рўйхатга эътибор берилса, Навоий ўрганган китоб ва рисолаларнинг аксарияти бевосита Жомийнинг ўзи ёзган асарлар экани маълум бўлади. Бу Жомийнинг Навоийга қай дараражадаги муаллим, мударрис, йўлбошчи ва устоз эканини кўрсатади. Албатта, Навоийдек серқирра ижодкор жуда кўп мутолаа қилмаслиги мумкин эмас. Унинг бошқа қалам соҳиблари асарлари билан ҳам яқиндан танишиб чиққани аниқ. Аммо устозидан ўқиб-ўрганганларининг аҳамиятини кўрсатиб бериш учун ҳам муаллиф бу асарларни эринмай санаб чиқади.

“Хамсат ул-мутахайирин”даги “Аввалги мақолат”нинг биринчи ҳикоятида мутолаа билан боғлиқ ғаройиб бир воқеа тилга олинади. Кунлардан бир куни Шайх Абдуллоҳ котиб Хожа Абдуллоҳ Ансорийнинг “Илоҳийнома”га қарашли “Муножот” рисоласини Навоийга келтиради. Шоир аввалига асарнинг бир-икки сахифасинигина шунчаки варақлаб кўрмокчи бўлади. Бироқ “сўзниг хўблуг ва равонлигидин” икки жуздан ортиқроқ бу асарни бошлаганича бир ўтиришда охирига қадар ўқиб чиқади. Бунга гувоҳ бўлғанлар каттагина ҳажмдаги асарни бир зарб билан бошдан оёқ мутолаа қилган шоирга қойил қолишади. Эртаси куни Жомий Навоийнинг уйига ташриф бу юрганида кечаги гувоҳлар бу ғаройиб воқеани пири комилга гапириб беришади. Шунда у мулоим табассум билан: “Ажаб амри имтиифоқий бизнинг ва сизнинг оралиқда воқеъ бўлғон эрмиши: икки ё уч кун бурунроқ Мавлоно Шайх Абдуллоҳ ушибу рисолани бизнинг қошимизга келтуруб эрди, биз доди аввалдин бунёд қилдук, охирига дегинча ҳеч ерда турмоқ бўлмай туганди”, – дейди. Эртасига эрталаб котиб китобни ёки унинг пулинни олиб кетиш учун Навоийнига келганида, одамлар унга шоир китобни бир ўтиришда тўхтамай ўқиб чиққанини айтиб беришади. У таажжуб билан Жомий ҳам китобни қўлига олган заҳоти мутолаага киришиб, бир бошлаш билан ўқиб тугатганини айтади. Бу мисолдан устоз ва шогирднинг бадиий дид ва савиялари, мутолаа маданияти жуда яқин бўлганини билиб олиш қийин эмас.

Жомий Навоийга ўзи ўқиган форсийдаги тасаввуфий китоб ва рисолалардан сабоқ беради. Бинобарин, “Хамсат ул-мутахайирин”нинг “Учинчи мақолат”ида шундай дейилади: “Ул вақтдаким, фақир алар хизматида суфия рамузу ишорот ва алфозу иборот истилоҳин ўткарур эрдим, ҳазрати қутб ус-соликин Шайх Фахруддин Ироқий қуодисса сирриҳунинг “Ламаъот”и орзуси хаёлга кўп эврулур эрди. Бир кун тақриб била бу маънини изҳор қилдим. Алар дедиларким: “Тариқат машойихининг форсий кутуб ва расоили оз мутолаа қилилибдур, аммо чун ҳавасинг бор, андоқ бўлсун”. То улким, ул шариф китобни фақирга сабақ айтурга муртакиб бўлдилар, ҳар кун сабақда хушхол бўлуб, таъриф қитулрлар эрди”.

Юқоридагилардан маълум бўладики, Навоий Жомийдан ҳақиқий маънода, содда қилиб айтганда, юзма-юз ўтириб таълим олган. Ўрганилган асарларнинг баъзилари бадиий, айримлари илмий бўлгани ҳолда, уларнинг аксарияти тасаввуф масалаларига бағишлиланган эди. Пир муридига кўпроқ

ана шундай асарлардан таълим беради. Турли шарҳларга мурожаат қилади. Бу талқинлардан кўнгли тўлмаса, Жомийнинг ўзи уларга маҳсус шарҳлар битади.

Ҳатто, Навоий мусиқа илмини эгаллашни ният қилганида Жомий шогирди учун шу соҳага доир асар ҳам ёзиб беради. Буни у шундай ифодалайди: “*Ул ердинким, аларнинг бу фақир сори иноят ва илтифотлари бор эрди, мусиқий ва адвор рисоласин битидиларким, бу фанда андоқ мунаққаҳ ва муғифид рисола йўқтур*”.

Янги-янги асарлар мутолааси ҳақидаги сұхбатлар, уларнинг мазмун-моҳияти тўғрисидаги муҳокамалар икки қаламкашни янада завқ-шавқ билан ижод қилишга чорлаган. Ўзаро адабий таъсир натижасида эса иккала қалам соҳиби тарафидан ҳам тенгсиз бадиий ва илмий дурдоналар яратилди. Куйидаги ҳикоят ҳам фикримизга асосли далил бўла олади.

Кунларнинг бирида устоз хузурида Мир Хусрав Дехлавийнинг “Дарёйи аброр” қасидаси ҳақида сўз боради. Навоий бу асарни ҳаяжон билан мақтайди. У шунча гапиради-ю, устоз хеч муносабат билдирамайди. Шогирд бу жимлиқдан хижолатга тушиб: “Қасида шунча мақтовга лойиқ бўлса ҳамки, улуг зот олдида уни хаддан зиёд таърифлаб, ошириб юбордиммикан?” – деган хаёлга боради. Орадан бироз вақт ўтгач, Навоий сафарга отлана туриб, устозидан фотиха олишга борганида, Жомий кутилмаганда унга ўзининг “Дарёйи аброр” жавобида битилган “Лужжат ул-асрор” қасидасини беради. Бояги сукутнинг сири энди очилади. Навоий сафарда от устида қасидани ўқиб, беҳад хурсанд бўлади. Шунда илҳомланган шоир хаёлига “Тухфат ул-афкор” асарининг матлаъси келади. Манзилга етгач, шогирд матлаъни қофозга тушириб: “Агар асар тугатишга лойиқ, деб топилса, яъни устозга маъкул бўлса, уни давом эттираман”, – деган мазмунда хат ёзиб, бир бекдан жўнатади. Жомийдан эса: “Албатта, тугатсун”, – деган жавоб келади. Бу ривоятдан устоз-шогирднинг яна бир асар яратилишига сабабчи бўлганлари аён бўлади. Аслида, Жомий ниманики ёзса, унинг биринчи ўқувчиси Навоий бўлган. Навоий ниманики қофозга туширса, у билан биринчи Жомий танишган. “Хамсат ул-мутаҳайирин”нинг “Учинчи мақолат”идан сўзимизга исбот бўладиган қўплаб мисоллар топишими мумкин. Бу мақолатда Навоий ёзилишига ўзи бевосита сабабчи бўлган Жомий асарлари ҳақида батафсил тўхталади.

Хожа Абдуллоҳ Анзорий сўфий шайхларни беш табақага бўлиб, уларнинг ҳар йигирма нафарини бир табақа қилиб, “Табақоти машойихи сўфия” (“Сўфий шайхлар табақалари”) деган тазкира ёзади. Үнда жами юз киши тилга олинади. Шу ўйлда Шайх Фаридуддин Атторнинг “Тазкират ул-авлиё”, Шайх Абу Абдураҳмон Сулламийнинг “Табақоти Сулламий” асарлари битилди. Бироқ Навоий улардан кейинги тўрт юз-беш юз йил ичida яшаган авлиё зотлар ҳақида батафсил бир китоб йўқлигидан афсус чекиб, бундай улуғ ишни факат Жомий ҳазратларигина амалга ошириши мумкинлигини тушунади. Қайта-қайта ўйлаб, минг хижолат билан ўз таклифини устозига айтади. Қизифи, устоз ҳам аллақачон шу фикрда бўлиб, факат ишни турли сабаблар туфайли пайсалга солиб юрган бўлади. Шогирднинг турткиси билан қисқа муддатда “Нафаҳот ул-унс мин ҳазарот ул-кудс” деб номланган катта ҳажмли тазкирасини ёзиб тугатади. Жомий

асарнинг ҳар бир битган қисмини Навоийга беради ва улар биргаликда матнни кўриб чиқишиади.

Кейинроқ Навоийнинг таклифи билан Жомий “Шавоҳид ун-нубувват ли тақвияти якини ахл ил-футувват” (“Пайғамбарлик шоҳидлари, эътиқод аҳлининг художўйлиги”) китобини ёзди. Бу мавзуда ҳам бир китоб таълиф этиш аввалдан Жомийнинг режасида бўлган. Бироқ шогирднинг даъвати билангина у бу улуғ ишга киришган. Энг муҳими, устоз ва шогирд жамият учун қандай китоб зарурлигини англашган ва улар шу бўшлиқни биргаликда тўлдиришга интилган.

Алишер Навоийни етукликка йўллаган манба ҳам айнан у мутолаа қилган китоб ва рисолалар эди. Буюк Шогирд ўзидан аввалги ва ўзи мансуб бўлган адабий давр ижодкорларини ўрганиш асносида ўз иродасини шакллантирди, тарбиялади. Шунинг учун ҳам Навоий салафлари Низомий Ганжавий, Хусрав Дехлавий, Абдураҳмон Жомий ва бошқа шоирлар таърифига ўз асарларида алоҳида ўринлар ажратиб, уларни мадҳ этишдан ҳеч чарчамайди.

Абдураҳмон Жомий ва Алишер Навоий номи, аввало, китоб номи билан боғлангандир. Орзуимиз – биз ҳам китоб мутолаасида уларга издошлиқ қиласак.



Шуҳрат ҲАЙИТОВ

ТУРКИЙ ХАЛҚЛАР АДАБИЁТИДА БОБУР ИЖОДИ

Шоҳ ва шоир Захириддин Мұхаммад Бобур яшаган давр, унинг ҳаёт ҳамда ижод йўли ҳақидаги дастлабки маълумотлар ўша замон ва ундан кейинги йилларда ёзилган манбаларда учраса-да, ижодини илмий томондан тадқиқ этиш, асарларини нашр эттириш ишлари, асосан, XX аср бошлиридан амалга оширила бошланган.

Захириддин Мұхаммад Бобур яшаган давр ва ўша пайтдаги ижтимоий-сиёсий вазиятнинг туркй халқлар адабиётида ифода этилиши ҳақида сўз юритилганда, даставвал, Сайфи Чалабий (1582-1583 йилларда вафот этган) “Саёҳатнома”сини қайд этиш лозим. Ҳиндистон, Хитой бўйлаб қилган сафар таассуротлари асосида битилган “Саёҳатнома” Туркия сultonни Мурод III га бағишилаган. Асарда, асосан, XVI асрнинг биринчи ярмида Бобур ва Шайбонийлар ўртасида кечган уруш ҳаракатлари, шунингдек, Бобурнинг Шайбоний Убайдуллахонга йўллаган мактуби ҳамда унинг Ҳиндистонни эгаллашидан то Ҳумоюн давригача бўлган Ҳиндистон тарихи тасвирланади. Аммо Бобур ижоди ҳақида “Саёҳатнома”да фикр юритилмайди.

Қардош халқлар адабиётида Захириддин Мұхаммад Бобур асарларини ўрганиш, илмий академик ва оммавий нашрларини эълон қилиш 1915 йилларга тўғри келади. Шундай қилиб туркй халқлар адабиёти тарихида Бобур Мирзо ижодига доир дастлабки илмий ноширлик ишлари туркиялик олим Ф.Кўпрулу томонидан амалга оширилган. Истанбулда шоир асарлари қўллэзма нусхасини топишга мушарраф бўлган олим бу қўллэзма ҳақида маълумот беради, шу асосда 1915 йилда “Миллий татаббулар” мажмуасининг 2, 3 ва 5-сонларида “Бобуршоҳнинг шеърлари” номи билан шоирнинг айни даврга қадар маълум бўлмаган шеърларини чоп эттириб, Туркияда бобуршунослик илмига асос солади. Ф.Кўпрулунинг ушбу ишлари бобуршунослик тарихида инглиз шарқшуноси Д.Росснинг шоир шеърияти борасида амалга оширган илк изланишларидан кейинги ўзига хос тадқиқот ҳисобланади.

Ф.Кўпрулу Истанбулда топилган Бобур куллиётида “Рисолай волидия” асари, шунингдек, ўзбек, форс тилида ёзилган шеърлар тўплами, ўзбек тилида наср ва назмда битилган бир мактуб, форс тилида ёзилган мактубдан парча ҳамда “Аruz risolasi” борлигини қайд этади. У Бобур шеъриятини Ҳусайн Бойқаро ижоди билан қиёслаш орқали устунлик жиҳатини

* Шуҳрат Ҳайитов – тадқиқотчи.

хам кўрсатиб ўтишга ҳаракат қиласди. Бу ҳақда эса олмониялик олим А.Шиммел “Бобуршоҳ ва оилавий истеъдод ҳақида” номли тадқиқотида тўхталади.

Ф.Қўпрулу Бобур шеърияти, шунингдек, “Бобурнома”, “Аruz рисоласи”, “Мубайин” каби асарларига доир ҳам чуқур илмий изланишлар олиб борган. Олимнинг Бобур ва унинг бетакрор ижоди борасида амалга оширган катта ҳажмдаги илмий асарлари шоир адабий меросини ўрганишдаги дастлабки қадамлардан саналади ва ушбу тадқиқотлар кейинчалик юртдошлари Ю.Билол, Т.Сейҳан, А.Билкан, А.Алпарслон каби туркиялик олимлар томонидан давом эттирилди. Аммо у шоир шеъриятининг бадиий хусусиятлари ва ундаги бадиий санъатлар ҳақида у қадар тўхталмайди. Айни хулоса кейинги туркиялик бобуршуносларга ҳам тегишилди. Улар асарларнинг кўпроқ матн хусусиятига, тилига эътибор қаратиб, Бобуршоҳнинг изтиробли армонларга тўла маҳзун сиймосини гавдалантиришга ҳаракат қиласди.

Ф.Қўпрулунинг издоши бўлган яна бир туркиялик олим Ризо Нур томонидан давом эттирилди. 1925 йилда Анқарада чоп этилган “Турк юрти” журналида “Бобур” номли тадқиқот эълон қилинган. Унда Бобурнинг ҳаёти ва ижоди, асарлари, хусусан, “Бобурнома”га оид маълумотлар китобхонлар эътиборига ҳавола қилинади.

Туркий халқлар адабиётида шоир асарлари, жумладан, “Бобурнома”га оид навбатдаги тадқиқотлар Ўзбекистонда профессор А.Фитрат томонидан давом эттирилди. 1928 йилда асардан айрим парчалар эълон қилинди. Бир сўз билан айтганда, Ф.Қўпрулу, Р.Нур ва А.Фитрат томонидан олиб борилган тадқиқотлар туркий халқлар адабиётида Бобур ижодига доир изланишларнинг ilk дебочаси саналади. Улардан то бугунги кунга қадар эса Бобурнинг кўп қиррали шахсияти, “Бобурнома” ва бошқа асарларига оид кўплаб илмий нашрлар юзага келди. Турк, қозоқ, озарбайжон, туркман, уйғур каби қардош халқлар вакиллари томонидан Бобурнинг “Бобурнома”, “Бобур девони”, “Мубайин”, “Рисолаи волидия” асарлари таржима нашрлари тайёрланиб чоп этилди. Масалан, туркиялик олимлар Южел Билол “Бобур девони”ни (1995), Танжу Сейҳан “Мубайин”ни (2004), Али Фуот Билкан “Рисолаи волидия”ни (2001) туркчага таржима қилишган бўлса, туркманистонлик олим Раҳиммамат Кўринов “Бобур девони”ни ва “Рисолаи волидия”ни (2005) туркманчага, озарбайжонлик профессор Рамиз Аскер “Бобурнома”ва “Бобур девони”ни (2011) озарбайжон тилига ўғирди.

Туркий халқлар адабиётида Бобур асарларининг таржима нашрларидан ташқари турли йилларда шоир асарлари, хусусан, “Бобурнома”нинг соҳалар ривожи, фанлар тараққиётидаги ўрни борасида ҳам қатор илмий асарлар, диссертация ва рисолалар ёзилди. Уларда Бобурнинг илмий, адабий мероси ва жаҳон маданияти тараққиётига қўшган беқиёс ҳиссаси борасида кенг мушоҳадалар юритилди. Жумладан, Али Алп Арслоннинг “Хатти Бобурий ва унда ёзилган Қуръон”(1976), Масъуд Шеннинг “Бобурнома”нинг Кобул ва Ҳиндистон бўлимларига оид” (1993), Воҳид Туркнинг “Бобур девонининг тил хусусиятлари”(2012), Неъмат Жейланнинг “Бобур асарларида қўшма сўзлар” (2007) мавзуларидағи диссертациялари, Меҳмет Тургутнинг “Бобурнома”да ҳайвонлар ва овчилик” (2008), Мурат Юрдакўннинг “Бобурнинг тиббиётга оид қарашлари” (2008), Ҳусайн Байдемирнинг “Бобурнома”да фольклоризм ва этнографик унсурлар”

(2010) номли монографиялари, Мунавват Текжаннинг “Туркияда Бобур ижодининг ўрганилишига доир” (2012), Олмос Улвининг “Бобур ижоди ва унинг озарбайжон адабиётида ўрганилишига доир” (2012), Ислом Жеминий ва Абдулла Аскарийнинг “Бобурниң жаҳон маданиятига қўшган ҳиссаси” (2011), Асилбек Алиевнинг “Бобур ва унинг фарзандлари хусусида” (2012) каби қатор тадқиқотлари яратилди.

Маълумки, қардош халқлар адабиётида “Бобурнома”ни илк бор туркиялик олим Рашид Раҳмати Арат таржима қилди ва илмий матнини тайёрлайди (олим “Қутадғу билиг”, “Ҳибат ул-ҳақойиқ” асарлари таржимони ҳамдир). У пайт асарнинг ўзбек тилидаги биринчи нашри ҳали дунё юзини кўрмаган эди. Таржимон асарни “Вақоे” (Бобур хотироти) номи билан 1943–1946 йилларда икки жилд ҳолида нашр эттиради ва “Сўзбоши” қисмида шундай ёзади: “Тилимизга таржима қилинаётган ушбу асар туркий адабиёт тарихида ўзининг етук бадиий асар эканлиги билан ўзига хос ўрин тутади. Унинг услуби оддий ва мардона, жонли ва образли. Шу жиҳатдан бу асар Осиёда ягона, чинакам тарихий тасвир намунасиdir”. Бу сатрлар ватандошимизга бўлган юксак ҳурмат-эътибор намунасиdir.

Р.Арат томонидан амалга оширилган ушбу таржимага профессор Ҳикмат Бойир сўзбоши ёзган. Унда “Бобурнома”нинг ўрганилиши, таржималари тўғрисида муҳтасар маълумот берилади. Олим, шунингдек, асар номланиши хусусида ҳам баҳс юритади. Бу борада ўзигача билдирилган фикрларни таҳлил этади. Асар номининг турк тилига “Вақойи” номи билан таржима қилинишини қўллаб-қувватлайди ва асарнинг асл номи “Вақойи” эканлигини исботловчи далилларни келтиради. Бобур асарнинг икки ўрнида “Вақойи” сўзини қўллаганини айтиб, қуидаги мулоҳазаларни ёzáди: “Қўлимиздаги қадимий нусхаларда асарнинг номи ёзилмаган. Бобурга оид бўлганлиги сабаб “Бобурнома” деб юритилади. Ушбу асарга берилган турли номлар А.С.Бевериж хоним нашри сўзбошисида қаламга олинган. Тилимизга ўғирилаётган асарга Бобурниң ўзи ва Мирзо Ҳайдар Маҳмуд қўллаган “Вақойи” номини қўйишни энг тўғри деб билдиқ”. Ҳ.Бойир Бобурниң Ҳиндиистондаги фаолиятига доир ҳам маълумотлар келтириб, “Бобурнома” воқеаларининг узилиб қолган даврларига ҳам дикқат қаратади. У бунинг асосий сабабини айни ўша йилларда кечган ҳодисалардан излайди. Унингча, ҳижрий 908–909 (милодий 1503–1504) йил воқеалари ҳақиқатдан ҳам ёзилмаган, бунга жангу жадаллар билан банд бўлган Бобурниң вақти бўлмагани сабаб қилиб келтирилади. 1509 йилнинг майидан 1519 йилнинг иккинчи ярмига қадар кечган воқеалар ёзилган бўлиши керак, фақат турли сабаблар билан бизгача етиб келмаган, деган фикрни илгари суриш баробарида Ҳ.Мирзо, А.Бевериж ва Д.Росс фикрларидан иқтибослар келтиради. Олим 1520–1525 йил тарихи “Бобурнома”да тўла акс этмаган, буни тўлдириш лозим, деган хulosага келади. 1529–1530 йиллар орасида кечган ўн олти ойлик воқеалар Бобуршоҳнинг касаллиги туфайли ёзилмай қолиб кетган, деган фикр ҳам Ҳикмат Бойирга тегишилди. Ҳ.Бойир томонидан билдирилган бу изоҳлар кейинчалик туркий халқлар адабиётидаги бобуршуносликка оид қатор ишларда ҳам учрайди. Ҳ.Бойирнинг бобуршунослик илмига қўшган ҳиссаси таржима сўзбошиси ҳамда “Тарихий маълумотлар” бобини ёзганлиги билан баҳоланади. У айни бобда Амир Темур сулоласи, хусусан, бобурийлар давлати, уларниң фан ва адабиёт соҳасида тутган

ўрни ҳақида тўхталади. Бунда олим “Бобурнома”нинг Ҳайдаробод нусхаси ҳамда “Акбарнома” ва “Ҳумоюннома” асарларига таянади. Олимнинг Бобур ҳаёти ва ижодига доир берган маълумотлари асар таржимасининг икки юз саҳифадан кўпроғини ташкил этади.

Маълумки, “Бобурнома”нинг илмий нашрлари 1857 йилда Н.Ильминский томонидан эълон қилинган Қозон босмаси (Кир кўлёзмаси) ҳамда 1905 йилда А.Бевериж томонидан чоп қилинган Лондон нашри (Ҳайдаробод кўлёзмаси) асосида тайёрланган. Таъкидланганидек, Ўзбекистондаги илк нашр профессор Фитрат томонидан 1928 йил асардан парчалар эълон қилиш орқали бажарилган. Ундан сўнг “Бобурнома”нинг ўзбек тилидаги биринчи нашри билан С.Мирзаев, П.Шамсиев ва Я.Ғуломовлар шуғулланишди.

Шубҳасиз, Бобур асарлари ичida “Бобурнома” кенг ўрганилган. Асанни Мирзахон ибн Байрамхон форс тилига (1586;айни пайтда асарнинг форс тилидаги таржималари қўлёзма нусхалари сони 20 тани ташкил этди), Витсен голланд тилига(1705), Ж.Лейден, В.Эрскин ва А.Бевериж, У.Тэкстон инглиз тилига (1826; 1922; 1996), Паве де Куртейл, Жон Луи Бакие Граммон француз тилига (1871; 1980), Мирзо Ҳайдар Қўрагоний, Рашид Аттор Навдий урдучага (1924,1962; 1965,1991), Рашит Раҳмати Арат туркчага (1946), Михаил Салье русчага (1958), Йугжит Навалпурий ҳиндий тилига (1974) таржима қилганлар. Асар кейинчалик япон, хитой, араб тилларига ҳам ўгирилди.

Бугунги кундаги мукаммал илмий-танқидий матнлар япониялик олим Э.Мано (1995) ва С.Ҳасанов (2002) нашрлари ҳисобланади. “Бобурнома”нинг таржима ва қўлёзмалари ҳақида “Бобур энциклопедияси”да аниқ ва батафсил маълумотлар келтирилади. Унга кўра асарнинг бугунги кунда ўн еттита қўлёзмаси мавжуд бўлиб, асар шу кунга қадар ўн еттита тилга таржима қилинган (ваҳоланки, бошқа кўплаб манбаларда бу борада турли туман чалкаш маълумотлар келтирилган). Таржималарнинг эса турли йилларда қайта-қайта нашрлари амалга оширилган. Масалан, асарнинг биргина туркча нашри шу кунга қадар ўн мартараб қайта чоп этилган, охирги нашрлар жузъий тузатишлар билан эълон қилинган.

Бобур ижодига оид айрим тадқиқотларга алоҳида тўхталиб ўтсак. Бунда Али Фуад Билкан тадқиқотлари ҳам эътиборга молик. Олим Бобур шеърияти ҳақида тадқиқот олиб борган, шунингдек, “Рисолайи волидия”ни турк тилига (2001) таржима қилган. А.Ф.Билкан Ҳиндистон кутубхоналарида туркча қўлёзмалар каталогини тайёрлаган. Унинг шоир шеърияти ҳақидаги қарашлари “Бобур девони” ва “Бобурнома”да Ҳиндистон ҳаётининг ифодаланиши”, “Ҳиндистондан келтирилган турк адабиёти” (1998), “Бобурнинг “Рисолайи волидия” асари” (1999) номли мақолаларида ўз ифодасини топган. Яна бир турк олими А.Кабакли томонидан тайёрланган “Турк адабиёти” хрестоматиясининг 2002 йилдаги нашрида ўзбек мумтоз адабиётининг йирик намояндаларидан Лутфий, Алишер Навоий, Заҳириддин Муҳаммад Бобур ҳамда Абулғози Баҳодирхон ҳаёти ва ижодига доир маълумотлар берилади. Айтиш мумкинки, ушбу тадқиқотнинг юзага келишида Ф.Кўпрулу, Р.Арат тадқиқотларининг аҳамияти катта бўлган.

Юқоридаги таржима ва тадқиқотлар орасида туркманистонлик олим Р.Куриновнинг ҳам алоҳида ўрни бор. Таржима Туркманистоннинг ўша

пайтдаги Президенти – Сапармурат туркманбошининг бевосита ташаббуси билан Туркманистон миллий маданияти “Мерос” маркази ва Туркманистон миллий қўллэзмалар институти кўмагида олим Р.Куринов тамонидан 2005 йилда амалга оширилган. “Девон”нинг таржима нашридан туркманбошининг кириш сўзи, “Девон”, “Рисолаи волидия” ҳамда таржимоннинг Бобурнинг адабий мероси ҳақида маълумотлари ва Луғат бўлими ўрин олган.

Таржимон Бобурнинг адабий мероси ҳақида тўхталар экан, XIII-XV асрдаги сиёсий аҳвол, ижтимоий ҳаёт, Бобуршоҳ замонига оид муҳим тарихий воқеалар, Бобур ҳаёти ва ижоди, шажараси, ижтимоий-сиёсий фаолиятига доир жиҳатлар ҳақида тўхталади. Бобур Мирзонинг сиёсий маҳорати, динга муносабати, тил ва адабиёт соҳасидаги юксак билими ни эътироф этади. Буюк саркарданинг Мовароуннахр, Афғонистон ва Ҳиндистон ўлкаларидағи фаолияти ҳақида қисқача баён қиласди. “Бобурнома”, “Аruz рисоласи”, “Мубайин”, “Рисолаи волидия”, “Бобур Девони” ва уларнинг нашри, туркий халқлар адабиётидаги ўрни, ўрганилиш тарихи; шоир “Девон”ининг ёзилиш тарихи ҳамда қўллэзма нусхалари, шунингдек, шоир куллиётининг Истанбул, Париж, Рампур, Техрон қўллэзма нусхалари ҳақида маълумотлар келтиради.

Юқоридаги фикрлардан маълум бўлдики, туркий халқлар адабиётида Бобур ҳаёти ва ижодининг ўрганилиши бобуршунослик илмida муҳим ўринни эгалайди. Амалга оширилган тадқиқотларда ҳар томонлама ёндашиш амалиёти кузатилади. Бу каби ишлар келгусидаги тадқиқотларда катта аҳамият касб этади, албатта. Назаримизда, бугунги кунда Бобур Мирзо ижоди юзасидан қилинган бу каби ишларни бир тизимга солиб таҳлил ва тавсиф этиш бобуршунослик илмидагидолзарб масалалардан ҳисобланади.



YODNOMA

МАНГУЛИК ЖАМОЛИНИНГ ЖИЛВАСИ

Бутун умрини поклик, соф ақида ва амал билан кечирган Алишер Навоий ҳазратларининг

*Исёни кўп Навоийнинг ўйқ ўётиким,
Истар етишиса мунча хижсолат била санга –*

байти мазмунида ўзи-ўзидан қониқмаслик, камтарлик, хоксорлик, муттасил камолотга интилиш ҳиссининг олий намунасини қўрамиз. Назаримда, ушбу байт билан Матназар Абдулҳакимнинг

*Нўноқ назмим учун ағв эт, ҳалқим,
На олим, на фозил, на сўз тириман –*

мисралари ўртасида қандайдир ўхшашлиқ, ҳамоҳанг ҳис, уларни юзага келтирган руҳий ҳолатда муштараклик бор. Сабаби, шоирнинг бутун ҳаёти ҳалқи олдида қарздорлик ҳисси билан кечди. Ана шу туйғу уни ижод қилишга, бадиий комил шеърлар, қатор таржималар, илмий тадқиқотларга ундади.

Матназар Абдулҳаким адабиётга “шоир бўлиш қийин, шоир бўлиш оғир” (Абдулла Орипов) бир пайтда кириб келди. Бу қийинчилик, бу оғирлик бир томондан, ўзбек адабиётининг кўзга кўриниб қолган вакиллари, адабиётда ўз овози, ўзгача сози бор замондошлар билан ҳамқадам бўлиш масъулияти; иккинчи томондан, инсоннинг ичкин туйғулари акс этган шеърият “аллақандай қўй-қўзилар” ҳақида гирялар сифатида баҳоланаётган давр ва давраларни забт этиш залвори эди. Ўша давр ижодкорлари олдида икки йўл: ё ижоднинг барча мashaққатларига бардош бериш орқали ҳақиқий санъат асарлари яратиш ёки сенга боқмаган замонга боқиб, шу вақтларда бошқалар ҳавас қиласидан моддий-маънавий мартабаларга эришиш туарди. Кимлардир ўзига берилган тенгсиз истеъодни “воситай жоҳ” қилгани ҳам бор гап. Халқимиз баҳтига биринчи йўлни танлаганлар кўп бўлиб, кейинчалик улар орасида Матназар Абдулҳаким алоҳида сажияси билан ажрала бошлади.

Ўттиз тўртта шеърдан иборат “Тиниқ тонглар”лар ўз номига яраша ўзбек адабиётининг бўлғуси йирик вакили ижоди субҳидан дарак бериб дунёга келди. Шундан сўнг шоирнинг шеърлар, таржималар, тадқиқотлардан иборат ўттиздан ортиқ китоби нашр этилди.

Матназар Абдулҳаким ўзбек адабиётида моҳир мутаржим сифатида ўчмас из қолдирди. Ҳар қандай шоирнинг таржима билан шуғулланиши унинг тийнатидаги муҳим жиҳат – бағрикенгликни намоён қиласиди. Чун-

ки таржима учун сарфланадиган ижодий қувват аслиятга кетган шундай кучдан кўпроқ бўлади.

Матназар Абдулҳаким форс тилидан Шайх Нажмиддин Кубро, Шайх Мажидиддин Бағдодий, Паҳлавон Маҳмуд, Абулафойи Хоразмий, Мирзо Абдулқодир Бедил, Шермуҳаммад Мунис, Муҳаммадизо Оғаҳий, Комил Хоразмий, Муҳаммад Юсуф Рожий, Аҳмад Табибийлар шеърларини ўгирди.

Шоир таржимон сифатида ўз ижодий ақидаларига содик эди. Бу ақидалар аслият лафзидан кўра маъносига эътибор каратиш, мазмуннинг шаклдан устуворлиги, таржимон эркини чекламаслик кабилар эди. У ҳар бир сатр, ҳар бир асар таржимасини маромга етказиши устидаги ишни энди аслиятни бошқача таржима қилиш мумкин эмас, деган қарорга келгунча давом эттиради. Масалан, Мирзо Бедилнинг

*Мурувват аз дили хубон мажсүид,
Фарангистон мусулмоний надорад –*

байти бир неча таҳрирдан кейингина

*Гўзаллардан мурувват истамангиз,
Фарангистон элин иймони йўқдур*

шаклини олган.

Тинимсиз меҳнат, изланиш натижасида юзага келган таржималардан иборат “Азизлар анжумани” шоирнинг бошқа асарлари каби номига монанд дунёга келган китобдир.

Матназар Абдулҳакимнинг Мирзо Бедил таржимасига қўл уриши дастлаб кўпчиликни ажаблантириди. Сабаби, Бедилнинг бунгача айrim шеърларини Faafur Fулом, Шоислом Шомуҳамедовлар таржима қилишган бўлса ҳам, кўпчиликнинг кўнглида ғазалларни таржима қилиш имконсиз деган қараш бор эди. Юртимизда бедилхонлик яқин-яқингача давом этгани, жумладан, унинг “Интизори дом охир мекашад нахжирро” (Тузоқнинг кўз тикмаги тортар охир ўз сайдини) мисрали байти шархида “Тұхфаи Ҳислат”дек ихчам баёзлар дунёга келгани маълум. Аввало, Матназар Абдулҳаким отаси Абдулҳаким маҳзум, Абдулқодир Маҳбубий, Янгибой ота Ҳудойберганов – Орзу каби ана шундай бедилхонлар даврасини кўрган, уларнинг тарбиясини олган инсон эди. Қолаверса, унда бундай юксак бадиий дурдоналар ўзбек тилида яратилиши лозим эди, деган қараш бор бўлса, эҳтимол. Қатор даврий нашрларда бериб борилиб, дастлаб “Хоразм” нашриётининг ilk маҳсулси сифатида дунёга келган “Табаррук ташрифлар”дан жой олган Бедил ғазаллари таржимаси 1995 йилда “Такаллум” номи билан “Қорақалпоғистон” нашриётида тўлдирилиб, босмадан чиқди. Унга мутаржимнинг ўзи сўзбоши ёзиб, жумладан, қуйидагиларни битадики, булар юқоридаги мулоҳазаларимизни бир қадар асослайди: “Мирзо Абдулқодир Бедил ғазалиётида олис сафарга кетаётган карвон ҳақида талай ёниқ мисралар мавжуд. Бу шеъриятда соғинч оҳанглари, айтиш мумкинки, етакчи оҳанглардан биридир... бу хол шоирнинг ёд-хаёли Туркистандан бир лахза бўлсин узилмаганини кўрсатади”.

Унинг Оғаҳий форсий меросидан қилган таржималари дастлаб “Кўнгил кўзлари” номи билан 1999 йили “Хоразм” нашриётида “Муҳаммад Ризо

Огаҳийнинг 190 йиллигига бағишлайман” тақдими билан нашр қилинди. Бу мўъжаз китоб “Таъвиз ул-ошиқин”нинг “Ашъори форсий” қисми таржимасидан иборат бўлиб, шарқшунос Абдула Аҳмедовнинг “Олмос истеъдод қирраси” сарлавҳали сўзбошиси билан очилади.

Мутаржим сифатида Матназар Абдулҳаким Огаҳийнинг тарихий асарларидағи форсийда битилган тарихларини жамлаб, таржима қилиб “Ой кетди, офтоб келди” (2002 йил) китобини бунёдга келтирди. Таржима жараёни мутаржимни илмий тадқиқотларга ҳам етаклади. Ушбу тарихларнинг илмий мулоҳаза ва хуносаларга бой бадиҳалар тарзидағи талқини Матназар Абдулҳакимни олим, таржимон, шоир сифатида истеъдодини баробар намоён қила олган қатор мақолалари яратилишига туртки бўлди. Бу мақолаларнинг аксари “Хоразм Маъмун академияси Ахборотномаси”, “Илм сарчашмалари” журналларида нашр қилиниб, Республика илм аҳлини буюк шоир сарчашмаларидан баҳраманд қилиб борди.

У рус тилидан Михаил Дудин, Николай Рубцов, Расул Ҳамзатов, Имант Зиедонис, Евгений Евтушенко, Николай Дмитриев шеърларини моҳирлик билан ўгириди.

Туркман тилидан Омондурди Аннадурдиев, Гўзал Зарипова, Итолмас Худойберганов, Ойтуғди Назаров, Маматназар Бобоназаров, Қиличмурод Қақабоев, Оқмурод Муҳадов шеърларини таржима қилиб, қардошлиқ ришталарини янада мустаҳкамлашга хизмат қилди.

Эътибор берсак, Матназар Абдулҳаким томонидан рус ва туркман тилларидан қилинган таржималари, асосан, мутаржим ўзи шахсан билган, кўпчилиги билан эса дўстона муносабатда бўлган ижодкорлардир. Бунинг ҳам ўзига хос сабабларидан бири шуки, биринчидан, Матназар Абдулҳаким аслият муаллифини тўла англамай асарини таржима қилиш мумкин эмас, деб ҳисобларди. Устоз “Борис Пастернакни таржима қилиш учун ўтирган қарағай тўнкасида ўтириб кўриш керак”, – дегани ёдимиизда.

Матназар Абдулҳаким ижодида ўзбек адабиётида камёб бир жиҳат – она тилидан хорижий тилга, яъни ўзбек тилидан рус тилига таржималар ҳам алоҳида жиҳат саналади. “Алоҳида жиҳат” дея таъкидлашимиз боиси шуки, бадиий таржималар, одатда, хорижий тилдан она тилига амалга оширилади. Она тилидан хорижий тилга бадиий, хусусан, шеърий таржима қила олиш мутаржимлик маҳорати камолоти мезони бўлса керак. Аслида ёш ўзбек шоирларининг нуғузли илмий даргоҳда таҳсил олишига амалий ёрдам сифатида қилинган бу таржималар мутаржим учун айни пайтда яхшигина синовдан ўтиш вазифасини адо этди. Шу тариқа Маҳмуд Ражаб, Болтабой Бегматов, Гўзал Бегим, Даврон Ражаб шеърлари Матназар Абдулҳаким таржимасида рус адабиётшуносларининг таҳсинига сазовор бўлди.

Ҳассос шоир, моҳир таржимон бўлиб шаклланган Матназар Абдулҳаким “Иймон тухфаси”, “Ялдони ёритган тун”, “Ҳақ файзи”, “Иккинчи муаллим сабоклари”, “Таржимон талқинлари”, “Тафаккур чорраҳаларида” асарларида ўзининг нигоҳи теран тадқиқотчи сифатидаги салоҳиятини намоён қилади.

...Шоир шеърларидан бирида ҳар қандай умрнинг бениҳоя қисқалигини бетимсол бир тарзда

*Умрdir беомон, умри дақиқа,
Замин узра замон умри – дақиқа...*

дека ифодалаган эди.

Лекин меҳрибон Яратган Ўзи мукаррам тутган инсонга ҳаётидаги эзгу амаллари эвазига қиёматга қадар мангулик имконини ҳам бериб қўйибди. Матназар Абдулҳаким ана шу имкониятдан ҳавас қилгудек даражада ўз ўрнида фойдалана олди. Унинг ижоди ҳалқимиз қалбида мангу из қолдириди. Етмишга етмай дунёни тарқ этган инсон ўз сўзи, эзгу амаллари билан бугун ҳам биз билан ҳамнафас. Ўтган қисқа муддат ичидаги кўрдикки, ҳижрон йиллари бизни Матназар Абдулҳакимга тобора яқинлаштириб, унинг мусаффо ҳислари, бебаҳо сўзларини англаш баҳтига элтмоқда. Шунинг ўзи шоир назидаги мангулик жамоли жилваларидан бири бўлса, ажабмас.

Шоир таваллудининг 70 йиллиги муносабати билан унинг ҳали эълон қилинмаган таржималарини эътиборингизга ҳавола этамиз.

*Абдулла ЎРОЗБОЕВ,
филология фанлари номзоди*

Шайх Нажмиддин КУБРО

(1145–1221)

* * *

*Огоҳ бўл ҳамиша, бу жаҳондир бор-йўқ,
Ҳеч нарса йўқ унда, кемтиги зинҳор йўқ,
Йўқ десалар, бор деб уни қил исбот,
Бор десалар, айла дадил инкор “йўқ”!*

* * *

*Эй гўзали қоши камон, ёй элнинг,
Орзу, умнӣ, азобисан, ой, элнинг.
Ҳолимавой эл каби севсам гар мен,
Гар мен каби севса, ҳолигавой элнинг.*

* * *

*Дил шу қадар мафтуну фарзона бизим,
Тарқ этмас ани дилбари жсанона бизим.
Оҳ, ҳаммага ишқ майи қуюлган вақтда
Дил қонига ботқизилди паймона бизим.*

* * *

*Банд бўлса агар йил бўйи бир зиндонга
Оч ётса мудом тўйғунича то жонга,
Нонга битиб ибодатимни берсам,
Жирканиб ит тиши урмагай ул нонга.*

* * *

*Юрмак учун ҳақ йўлига етмак шарт,
Боишқасидан кўзни юмиб кетмак шарт.
Элга шифо баҳиш эту, оч кўзларини,
Оlam ҳама — Ул... Ўнга назар этмак шарт.*

Паҳлавон МАҲМУД

(1247–1326)

* * *

Ҳақ дўст дея ким тортса фигон дўст – чин дўст,
Қилгувчи ибодатни ниҳон дўст – чин дўст.
Кўз-кўзлама ҳеч бергану олғон нонинг,
Нон дўсти эмас, аслида, жон дўст – чин дўст.

* * *

Дейман мени асра ҳар нафас зор, эй дил,
Йўқ мени бор эт, то ўзинг бор, эй дил.
Билмаса гар Ҳақни, ахийр, олгай тан,
Ҳақ таниганга бўлса ким ёр, эй дил.

* * *

Нафсингни енгиб, сен унга шоҳ бўл – мардсан,
Кимсаси йўқларга паноҳ бўл – мардсан.
Номард тепибон ўтар йиқилгонларни,
Мискин ва гарибга пойигоҳ бўл – мардсан.

* * *

Умрнинг маъниси не, менга де, – дедим,
Ё шаъм, ё чақмоқ ёки парвона, – деди.
Дунёга умид боғласа кимки, не, – дедим,
Ё маст, ё аҳмоқ ёки девона, – деди.

Мирзо Абдулқодир БЕДИЛ

(1644–1721)

* * *

Пирпираб, дилларни зир титратгувчи мужсони бор,
Тим қаро ҳар толалардан кўзда гүж-гуж кони бор.

Чекмангиз гам. Чин саодат – ёр учун бўлдим ҳалок,
Шул сабабдан тупрогим ҳар заррасининг жони бор.

Ожизу парвоз талабмен, маъно йўқ учмогима,
Гар қанотим куйса, майли, ишиқининг осмони бор.

Навбаҳор завқ-шавқларин йўқ тоти кўп вақтдан бери
Диляроман... кулса, туз сепгувчи лаъл туздони бор.

Чархфалак шифти бало ёғдургувси қай вақтгача,
Кўп ёвуз мезбон бу уй, ҳар лаҳза минг меҳмони бор.

Икки дунё аҳли ҳайрон, қилса ноз кўзгу олиб,
Авжланур ҳолбуки нози, токи бир ҳайрони бор.

Эй чаман, даҳшатлисан, ҳар ғунача бир қонлиг юрак,
Гулларингнинг хул сабаб гулбарг тўкиб, гирёни бор.

Кўп қийин киприк кўтмармак кўргали рухсорини,
Кўз деган зимдан ҳалок қилгувчи жуфт посбони бор.

Гарчи Бедил ҳар юракдин ҳайдалиб мискин, гадо,
Муҳташамдир руҳи, чунки дил деган вайрони бор.

Николай ГАЦУНАЕВ

(1933 йилда туғилган)

ХИВА

Қани ибтидонг?	балки
Қай асрдансан?	шундан номинг
Олис кечмишингни	тарихга жодир?
Илгайман аранг.	Хотира
Шартми	Ўртаниб чекади нола.
Аниқ билмоқ –	Қадим лаҗжаларни
Қандай сирдансан?	илгаймиз аранг.
Хива.	“Хива”
Бир сўз.	Дер эканмиз
Шу бас.	Бизга ҳавола.
Басдир шу жаранг.	Бу сирли пичирлаши,
Сарсон	Сирли бу жаранг
Ва саргардон	Нишионлардан нишион
Бирор...	Етгандир бизга.
Аллаким...	Мафтунмиз
Карвондан қолгандир	Билганларки билганнинг
Қийнаб дард,	Дейлик,
Фироқ.	Қандай қилиб
Номингни мангуга	Тарҳини чизган
Таратган,	қадимги муҳандис
Балки,	Қўйқирилганнинг?
Шу карвондан	Кўпминг йил муқаддам
Тушиб қолган	Номаълум кулол
Қўнгироқ.	Ясад кетган
Балки қучиб -кезиб	оддий кўзанинг нақши
Кезмоқдан безиб,	ўзга сайёрадан
Бу қумларда	олинган мисол –
Қутлуғ бир ҳикмат сезиб.	шу қадар сехрли!
Бунда қурган	Шу қадар яхши!
собиқ кўчманчи чодир,	Шеър

мардлик
фаромуши бўлурми сира,
нахлавон Маҳмудми
ҳеч унумилар?
Кумда
Тўлқин-тўлқин
Барханлар узра
Кезиб юрар
Карвон-карвон булутлар...

Нур таралар
Ҳар бир мовий минордан
Ҳар гумбаз – мангалик
Дараҳтдан мева
Ўзимни топишга
Сен бердинг ёрдам.
Олдингда абадий
қарздорман
Хива!

Николай Михайлович РУБЦОВ

(1936–1971)

* * *

Борлиқ заъфар сасларга тўлди
Янграганда андуҳ навоси.
Қулогимга келгандек бўлди
Видо айтган аёл овози.

Бу маконлар омонат чоқда
Улардан ҳам кечиб бўлмас воз.
Кулранг осмон, муҳаббат ҳақда
Торлар мунграб айтишиади роз.

Ёғиб кулранг осмондан қор,
Кузнинг оловлари ўчилар.
Офтобсиз кун кўрмоғи душвор
Турналар ҳам бир-бир кўчдилар.

Ва барибири ўшал мунглиг роз
Билан ўтар яқин-йироқлар.
Эшитилиб суюкли овоз,
Шитирлайди заъфар япроқлар.

Хоргин юрак қон бўлиб кетди
Сўнган севги бергач зарбалар.
Ахир, англаш фурсати етди,
Қаттиқ севганларим шарпалар.

Мангуликка даҳлдор бу дам,
Йўқотмоққа имкон йўқ вақтда.
Маҳзун наво янграганида
Очмангиз гап ҳеч нима ҳақда.

* * *

Гира-шира ёриган арча,
Түн қаърида ўқтин-ўқтин сас.
Дил ёзсайдим. Қолганман чарчаб,
Лекин хона совуқ ва бекас.

Алаҳсираи устма уст фикр,
Хотиралар тўёда кўланка.
Аниқ товуши ҳамда аниқ нур
Базўр етиб келади онгга.

Қизиқ... вақтни қилмаяпман фарқ,
Гўё кечмиши ичра кезяпман.
Мен ўзимни қачонлардир гарқ
Бўлган кема ичра сезяпман.

Ўй-хаёллар, беҳуда гулу
Диққатвозлик жонга тегарлар...
Шодлик ўрнин босади қўрқув,
Ором ўрнин азоб эгаллар.

Бир кун арча қаршиисида тек
Турганимча мени ҳойнаҳой
Уйқу босиб қоладигандек,
Чулгагандек чаланг ёки лой.

Омондурди АННАДУРДИЕВ

(1941 йилда туғилган)

* * *

*Отам айтган: “Ўзни зўр, чандаст тутинг,
Баландни баланду, пастни паст тутинг”,
Эл сизга фаррошлик мансабин берса,
Супургини доим муқаддас тутинг.*

* * *

*Бу гулларнинг аросинда ўларман,
Қаро кўзинг қаросинда ўларман.
Дилингни мен яро этдим ўринсиз,
Дилингнинг мен яросинда ўларман.*

* * *

*Сенсан юрагимнинг сеҳри, фахри ҳам,
Сенсан юрагимнинг меҳри, қаҳри ҳам,
Фақат асалимас асаларининг,
Жонга дармон, ахир, нииши, заҳри ҳам.*

* * *

*Ғижжак бир покланди, най бир покланди,
Йиллар бир покланди, ой бир покланди,
Тўйга кириб келдинг, охукўз дилдор,
Давра бир покланди, тўй бир покланди.*

* * *

*Демайман, юракнинг дөги тингланмас,
Лек қалбнинг қалбаки оҳи тикланмас.
Булбул наво қилган сокин маъво бу,
Бундан ҳеч бир зогнинг “қоғи” тикланмас.*

* * *

*Кимлар кўрди, кимлар кўрмади, кетди,
Хаёлга минг маъни ўрнади-кетди.
Тоғим! Ўз қаърингдан ковланган темир
Теша бўлиб юзинг тирнади-кетди.*

ADABIYOTSHUNOSLIK. FALSAFA

Абдулла УЛУГОВ

АРАСТУ АНГЛАТГАН АДАБИЁТ

Инсоният тарихидаги машхур мутафаккирлардан бири Арасту ҳам барча номдор ақл-идрок сохиблари сингари нафақат фавқулодда ўткир зехни, балки ўзининг ташқи кўриниши билан ҳам атрофдагиларнинг эътиборини тортган. Милоддан аввалги 384–322 йилларда яшаб ўтган бу юон донишманди, манбаларда маълум қилинишича, “калта сокол кўйиб, доим сочини пешонасига тушириб юрган”. Тасаввуримизда унинг соғломлик барқ уриб турган вужудидан, баланд қадди-қоматидан, ўтдай ёниб турадиган чиройли очик чехрасидан, чақнаган кўкиш кўзларидан, узун қилиб ўстирилган майин, жингалак соchlаридан, пайдор билакларидан, узун бармоқларидан, умуман, бақувват жисмининг ҳар бир узвидан унга рўпара келган ҳар қандай кишига ҳам жисман, ҳам руҳан таъсир қиласидан аллақандай салобат ёғилиб турган. Чунки номи асрлар оша ўчмасдан келаётган алломанинг сурати – ташқи кўриниши ҳам унинг сийрати – ички дунёси, ақлтафаккури сингари улуғвор, салобатли бўлган. Борлиқдаги барча нарсага мушоҳада юритиш манбаси сифатида қараган бу юон донишмандининг кишига синчковлик билан тикиладиган ўткир нигоҳларида кишилар билан сухбатлашаётган пайтида, шогирдларига ниманидир уқтираётган чоғида билинар-билинмас завқ ўйнаган. У мунозаралар чоғида қувноқ тийрак кўзларини сухбатдошига тикканча, сўзлари унга қандай таъсир қилаётганини кузатганча жилмайиб турган. Баҳслашувчиларнинг бемаъни фикрларидан жаҳли чиққанида ёки бўлак бир сабабдан асабийлашганида эса шошиб, тез-тез гапира бошлаган. Ўшанда унинг овози дагал, ҳам бир оз баландроқ чиққан.

Истеъдодли кишилар ҳам ҳаммага ўхшаган бир одам бўлади-ю, лекин улар қайсиdir жиҳатлари билан бошқалардан бироз ажralиб ҳам туради. Бу тафовут уларнинг бўй-басти, юз-кўзи, хатти-ҳаракати, сўзлаш тарзи, ҳодисаларга ёндашиши ва яна бошқа жиҳатларида сезилади.

Истеъдодли инсонларнинг қадри, кўпинча, улар дунёдан ўтганидан кейин билинади. Улар ҳаётлик чоғида кўрмаган ҳурмат-эътиборга вафот этганидан кейин эришади. Тўғрироги, кишилар уларнинг истеъдоди, қобилиятини ҳаётлигига эмас, бу дунёдан ўтганидан кейин тан олишади. Инсониятнинг кўхна тарихи ҳам, яқин ўтган давр ҳам, ҳозирги замон ҳам истеъдодли кишиларга ҳасад “ўқ”ига нишон бўлиб қийналиш, машакқатли меҳнат билан изланиб яшаш, сарсон-саргардон кун кечириб, бошқалар мусассар бўлмаган муваффақиятларга эришиш қисмат қилиб белгиланганидан далолат беради. Истеъдодли инсонларга Яратгувчи атрофдагиларнинг диққатини тортадиган қиёфа, нозик феъл-атвор, юксак дид, фавқулодда

* Абдулла Улуғов – филология фанлари номзоди.

ўткир зеҳн, талай замонлар одамлар учун жумбок бўлиб қоладиган ғаройиб қисмат ва яна кўп ажойиб хусусияту хислатлар ато этади...

Ўзини Аристокль (эрамиздан аввалги 428–347 йиллар)нинг шогирди санаган, дунёнинг кўп мамлакатларини забт этган машхур саркарда Александр Македонский (эрамиздан аввалги 356–323 йиллар)га устозлик қилган Аристотель Шарқда “Арасту” номи билан шуҳрат қозонган. Унинг устози Аристокль эса “Афлотун” деб улуғланган. Афлотун ҳам, Арасту ҳам улардан кейинги алломалар ҳам “устоз” деб эъзозлаган Сократ (эрамиздан аввалги 470 – 399 йиллар) бўлса, “Сукрот” деб шарафланган. Гарбликлар ҳам Шарқ алломалари исмига худди шу тарзда “таҳрир” киритиб, уларни ўзиники қилиб олишган. Европада Ибн Сино (980–1037 йиллар) “Авиценна”, Ибн Рушд (1126–1198) “Аверроэс”, Абу Аббос Аҳмад Фарғоний (вафоти 860 йил) “Алфраганус” ва х.к. Мухаммад ибн Мусо Хоразмий (780–850) “Алгорезмус” деб улуғланган. Ибн Сино асарлари ўқув юртларида тиббиёт бўйича таянч манба сифатида ўқитилган бўлса, Ибн Рушднинг диний ва фалсафий қарашлари асосида Фарбий Европада “аверроизм” деган фалсафий-эстетик таълимот вужудга келган.

Арасту салкам икки юзта асар ёзгани, улардан ўттиз биттасигина бизгача етиб келгани қайд этилади (“Тафаккур” журнали, 2016 йил, 2-сон. Б.27-28-бетлар). Мана шу далилнинг ўзиёқ “мантиқ илми асосчиси”, “этика илмининг бошловчиси” дея улуғланадиган Арасту буюк қомусий олим, улуғ мутафаккир эканидан далолат беради. Борлиқни кузатиб, унинг ҳодисалари ҳақида мушоҳада юритишдан завқланган ва уни эзгуликка эришиш манбаи деб қараган бу юонон донишманди адабиётшунослик фанининг ҳам тамал тошини қўйган. У ўзининг “Поэтика” асарида биринчи бўлиб адабиётшунослик негизида бадиий асарларни таҳлил қилиш туришини, бу фан тилшунослик ва мантиқ, тарих ва санъатшунослик, эстетика ва этика, фалсафа ва сиёsat каби ижтимоий фанлар билан чамбарчас боғлиқлигини кўрсатиб берган. Теран илмий-назарий таҳлилга асосланган “Поэтика” ҳам, олимнинг бошқа асарлари ҳам шу боис алоҳида таълимот сифатида эътибор қозонган. Арасту таълимоти, унинг асарларида илгари сурилган ғоя ва қарашлар хусусида баҳслар Гарбда ҳам, Шарқда ҳам асрлар бўйи тўхтамасдан давом этган. Жумладан, Ибн Сино Арастунинг “Осмон ҳақида” ва “Физика” асарлари хусусида мулоҳаза юритиб, шогирди Баҳманёр билан шу хусусда ёзишмалар қилгани манбаларда кўрсатилади.

“Поэтика”, “Ахлоқи кабир” асарларининг эътиборли жиҳати шундаки, Арасту ҳеч бир ўринда ўқувчига ўзининг фикр ва хулосаларини ўтказишга уринмайди. Аллома бошқа асарларида ҳам кишиларга бирор бир масала хусусида сабоқ беришга киришиб кетмайди. Аммо у табиат ва жамият ҳодисалари, инсон дунёси мураккабликлари хусусида шундай теран мушоҳада юритадики, ҳар қандай ўқувчи беихтиёр унинг фикрига қўшилади.

Арасту: “Тарихчи ва шоир бир-биридан шу жиҳатдан фарқ қиласиди, улардан бири ҳақиқатда бўлган, иккинчиси эса бўлиши мумкин бўлган воқеа ҳақида сўзлайди. Шунинг учун поэзия тарихга қараганда фалсафийроқ ва жиддийроқ; поэзия кўпроқ умумий, тарих эса алоҳида воқеаларни тасвирлайди” дейди. Бу фикр дарслик, қўлланмаларда кўп такрорланганидан уни ҳамма билади. Аммо ҳозир барчага аён ана шу фикрни дастлаб Арасту айтганини ҳамма ҳам хаёлига келтирмайди. Янги техника воситалари,

дори-дармон ва ҳоказоларни ўйлаб топиш “ихтиро” дейилади-ю, кимдир биринчи бўлиб айтган юқоридагига ўхшаш фикрлар хусусида бундай дейилмайди. Аслида айни хилдаги мулоҳазалар ҳам кашфдир. Чунки Арастудан аввал шу фикрни ҳеч ким айтмаган. Ваҳлонки, ҳар қандай одам янги ускуна, асбоб ишлаб чиқаролмагани сингари янги фикр, янги foяни ҳам ҳамма айттолмайди.

Янги фикр, янги foя кўнгилда кутилмагандан, тўсатдан пайдо бўлади. Тўғрироғи, Худо уни кимнингдир кўнглига солади. У узоқ вакт кузатиш, ўйлаш, таққослаш, таҳлил қилиш, изланишнинг “мева”си сифатида ўсиб чиқади. Шу боис “Инсоний комедия” муаллифи Оноре де Бальзак “XIX аср француз ёзувчиларига мактуб”ида: “Фикрни Худо беради ва у Худога қайтади, фикр қуроллардан юқорироқ туради, фикр уларнинг бошига тож бўлиб қўнмоғи ва уларни тождан маҳрум этмоғи мумкин” дейди (Жаҳон адиблари адабиёти ҳақида. – Тошкент, Маънавият, 2010. – Б.216.). Ҳозир адабиёт ва санъат ҳақида кўпчилик биладиган, барчага аён, ҳамманинг мулкига айланган талай фикрлар аслида дастлаб Арасту асарларида баён қилинган. Аллома “Поэтика”, “Ахлоқи кабир” ва бошқа асарларида илгари сурган, аникроғи, унга Худо берган қараашларини шогирдлари билан муҳокама қилган. Улар эса устозларининг мулоҳазаларини ёзиб олиб, бошқаларга етказган.

Милоддан аввалги замонда яшаган бу донишманднинг: “Ҳақиқатни излаш ҳам осон, ҳам мушкул. Чунки ҳеч ким унга тўлиқ эришолмайди. Шунинг баробарида, ҳеч ким уни умуман пайқамаслиги ҳам мумкин эмас. Аммо ҳар бир одам табиатни англашимиз учун озгина бўлса-да, ўз ҳиссасини қўшади. Ушбу улушлар йигилиб эса улуғвор манзарани ҳосил қиласди”, деган сўзлари Вашингтондаги Миллий фанлар академияси биноси пештоқига ёзиб қўйилган (Ҳақиқат манзаралари. 96 мумтоз файласуф. – Тошкент, Янги аср авлоди, 2002. Б.98.).

Арасту Фракиядаги Стагира шаҳрида туғилган. Унинг отаси Никомах Македония ҳукмдори Аминт II нинг шахсий табиби бўлган. Шу боис Арасту болалигига Македониянинг бўлғуси ҳукмдори Филипп билан бирга улғайган. Арасту 17 ёшидан 37 ёшигача (367–347 йиллар) – йигирма йил Афлотуннинг Академиясида таҳсил олган. Афлотунни устози Суқрот “Платон” деб чақирган. “Платон” сўзи “кенг елкали, гавдали” маъносини билдиради. Аристокль – Афлотуннинг кўриниши, қадди-қомати ҳақиқатан шундай бўлган. Унинг мунозаралар пайтида давра ўртасига чиқиб келиши яғриндор елкалари билан илмнинг оғир юкини кўтариш учун дунёга келган паҳлавон эканини билдириб турган. Донишмандлик рамзи саналган Афлотун жуда кўп асарлар битган бўлса-да, бизгача унинг шеърий йўлда битилган 25 тача миниатюра-эпиграммаси етиб келган. Шунингдек, 23 та асл нусхадаги ва 11 та унинг қаламига мансуб деб тахмин қилинадиган сухбати, “Суқрот мадҳи” деб номланган нутқи ҳамда 13 та мактуби маълум.

Ўзини Афлотуннинг шогирди санаган Арасту Шарқда “Искандар Мақдунли” номи машҳур Александр Македонскийга мураббийлик қилиб, унга фалсафа, математика, тарих каби фанлардан ва ўша замонда ғоят қадрланган жисмоний тарбия, камондан отиш, кураш каби жанг санъатларидан сабоқ берган. Арасту ҳам худди устози Афлотун сингари тиришқоқ, интилувчан шогирдларига меҳр ва хайриҳоҳлик билан қараб, уларнинг фикрларини қадрлаган ҳамда бошқаларнинг ўз қарашини эркин, bemalol

айтишига йўл берган. Александр Македонский ҳукмдор бўлгач, устозининг ҳайкалини ясаттириб, унинг пойига: “Александр Македонский ушбу ёдгорликни Никомахнинг ўғли, улуғ донишманд ва авлиё Аристу хотирасига ўрнатди” деб ёздирган.

Суқрот, Афлотун, Арасту яшаган даврда Юнонистонда маданият юксак даражада ривожланган ва санъатнинг кўпгина турлари: театр, мусиқа, ҳайкалтарошлиқ, меъморчилик, шеърият, драматургия равнақ топган. Ўша замонда одамларни хаётдаги турли фожиалардан, инсон тақдири жумбокларидан огоҳлантирувчи трагедия, жамиятдаги ижтимоий иллатларни, кишиларнинг ахлоқсизликларини фош этувчи комедия, адолатли давлат тузумини, инсонпарварлик қонунларини ҳимоя қилувчи воизлик санъати (риторика) жамиятнинг ижтимоий-сиёсий, маънавий ҳаётида муҳим ўрин эгаллаган. Юнон донишмандлари ўз замонасининг ижтимоий-сиёсий муаммолари, инсон табиати мураккабликлари, унинг феъл-авторидаги жумбок жиҳатлар, кишилараро муносабатлардаги мантиқ қолипларига сифмайдиган чигалликлар, борлик, табиат ҳодисалари, давлатни бошқариш, таълим ва тарбия масалалари, рух ва тана, адолат, ҳалоллик хусусида мулоҳаза юритиб, мунозара қилишган ва бунда ҳамиша Ҳомернинг “Илиада”, “Одиссея” достонларига, Софокл, Эврипид ва бошқа улут шоирларнинг асарларига мурожаат этишган. Улар инсон руҳи, дин аҳкомлари, давлат қонунлари, ҳукмдор ва тобе одам муносабати, бу дунё ва нариги дунё ҳамда бошқалар хусусида баҳслашиб асосида ҳақиқатни аниқламоқчи бўлишган. Масалан, Афлотуннинг “Давлат” асари иккинчи китобида қайд қилинишича, сухбатларнинг бирида Главкон Суқротга: “Адолатсиз ишлар қилишни ҳамма яхши кўради. Одамлар факат давлат қонунларидан ва жамоатчилик фикридан қўрқани учун ўзларини ноҳақ ишлардан тийиб туришади. Инсон кулагай имконият топиши билан ноҳақ ишлар ёрдамида мол-дунё, мансаб, обрў топишга киришади” дея эътиroz билдирган ва бу фикрини асослаш учун Эсхилнинг “Фивага қарши еттовлон” драмасидан: “Одамзот ўзини адолатли қилиб кўрсатиши керак эмас, балки чиндан ҳам одил бўлиши керак” деган фикрини келтирган. Шунда донишманд Суқрот Главконнинг бу мулоҳазаларини мақтаган (Болтабоев Х., Маҳкамов М. Адабий-эстетик тафаккур тарихи. 1-жилд. – Тошкент, Мумтоз сўз, 2013. – Б.146.).

Арасту инсоният ҳанузгача улуг донишманд сифатида шарафлаб келаетган Суқрот, Афлотун сингари мутафаккирларнинг теран, пурмъино мулоҳазаларидан таъсирланиб, ақлий, маънавий камолотга интилган. У шу тариқа ўзигача бўлган даврда юони илм-фани эришган билимларни ўзлаштирган ҳамда “Поэтика”, “Риторика”, “Физика”, “Методика”, “Метафизика”, “Жон ҳақида”, “Осмон ҳақида”, “Севги ҳақида”, “Уйқу ва бедорлик ҳақида” сингари асарлар ёзган. Арасту ҳаёт воқелигини қиёслашга асосланган теран мантиқий мулоҳазалари, кенг қамровли, чукур умумлашмага эга хулосалари билан табиат, жамият ва инсон тўғрисидаги мавжуд билимларни ривожлантирган. Жумладан, “Поэтика”, “Ахлоқи кабир”, “Риторика” асарларида Суқрот, Афлотуннинг қарашларини баъзан маъқуллаб, баъзан инкор қилиб, кенгайтириб чуқурлаштирган.

Арастунинг “Поэтика” асари эрамиздан аввалги 336–332 йилларда ёзилган. Мутафаккирнинг ҳаёт тажрибаси ортиб, ақл-тафаккури камолга етган бир пайтда – тахминан эллик ёшга яқинлашган чоғида битган бу китоби то ҳозиргача мўътабар манба сифатида қадрланади ва у кўпгина тилларга

таржима қилиниб, унга неча замонлардан бери шархлар битилади. Жумладан, ушбу асар IX асрда сурёний тилига, тахминан 930 йилда эса сурёний тилидан араб тилига ўгирилган. Шарқ мутафаккири Абу Наср Форобий (873–950) Арастунинг ана шу асари таъсирида “Шеър санъати қонунлари ҳақида рисола”сини ёзган ҳамда “Поэтика”га шарх битиб, бу асарнинг мазмуни ва моҳиятини изоҳлаган. Ибн Сино (980–1037), Ибн Рӯшд (1126–1198) каби олимлар ҳам Арастуни ардоқлаб, унинг “Поэтика”си хусусида эҳтиром билан мулоҳаза билдирган. Шарқда Арастунинг бошқа асарларига ҳам катта қизиқиш билан қаралган. Абу Наср Форобий Шарқда “устози аввал” дея таърифланган Арастунинг асарларига шархлар битиб, уларни кенг оммага тушунарли тарзда баён қилгани боис “муалими соний” – “иккинчи муаллим” деб улуғланган.

Ал Форобий ат-Туркий юонон мутафаккири илмий меросига бенихоя меҳр қўйиб, унинг барча асарларини чексиз қизиқиш ва иштиёқ билан мутолаа қилган. Бу хусусдаги маълумотлар эса, рости кишини ҳайратга солади. Манбаларда қайд қилинишича, бу улуғ аждодимиз Арастунинг “Жон ҳақида” асарининг четига ўз қўли билан “Мен бу асарни 200 марта ўқидим” деб ёзиб қўйган экан. Форобий юонон донишмандининг “Риторика” асарини 200 марта, “Табиий уйғунлик” асарини эса 40 бор ўқигани қайд қилинади.

Арастунинг асарлари эса ўқувчисига завқ-шавқ берадиган, унинг туйғуларини тўлқинлантириб, ҳиссиётларини жўштирадиган ўткир сюжетли асар эмас. Сукрот, Афлотун, Арасту асарларини мутолаа қилиш учун чидам, қунтдан ташқари, кишида илмга бўлган ихлос талаб этилади.

Нақл қилинишича, Ибн Сино ҳам юонон мутафаккирининг “Метафизика”сини қирқ марта ўқиган, аммо унчалик тушунолмаган, орадан анча вақт ўтиб, Форобийнинг шарҳи билан танишганидан кейингина ушбу асар мазмун-моҳиятини англаган экан (Арасту. Поэтика (Поэзия санъати ҳақида). Ахлоқи кабир. –Тошкент, Янги аср авлоди, 2004. –Б.81.). Бизга ривоят, муболаға бўлиб туюладиган ушбу далил ҳам аждодларимизнинг илмга иштиёқи баланд бўлганини билдиради.

Арастунинг “адабиётшуносликка оид дастлабки тадқиқот” дея эътироф этиладиган “Поэтика” асари, афсуски, бизгача тўлиқ етиб келмаган. Унинг сақланиб қолган айрим қисмларигина шунчалик эътибор қозониб, минг йиллардан бери адабиётшунослик, санъатшунослик ва бошқа соҳалар учун мўътабар манба бўлиб келаётгани даҳоларнинг мулоҳазалари барча замонларга бирдай даҳлдорлиги, уларнинг қарашлари, асрлар ошса-да, эскирмаслигидан далолат беради. “Поэтика” тўғрисида Форобий, Ибн Сино сингари қадимги замон мутафаккирларигина эмас, XX–XXI аср файласуфлари, адабиётшунослари ҳам мароқ билан мулоҳаза юритишаётгани бу ҳақиқатни яна бир бор тасдиқлайди. Арастунинг илмий меросига бағишлиланган тадқиқотлар орасида А.Ф.Лосев, Ф.А.Петровский, А.С.Ахманов сингари рус олимларининг асарлари алоҳида ажralиб туради. “Поэтика”ни ўзбекчага ўгирилган нашрига уларнинг айрим мақолалари таржима қилиниб киритилган. Улар Арасту асари мазмунини яхшиrok тушуниб, унинг илмий-эстетик тафаккур тарихидаги бекиёс ўрнини английда ўқувчига яқиндан кўмаклашади. Арасту “Поэтика”си бизда дастлаб 1980 йилда Маҳкам Махмудов ва Уммат Тўйчиев таржимасида, тузатилган иккинчи нашри эса 2004 йилда чоп қилинган. Заҳматкаш адабиётшунос, таржимон, адабиётшинос, адиб Маҳкам Махмудов ана шу нашрга юонон алломасининг

“Ахлоқи кабир” асари ва унга шарҳларни ҳам таржима қилиб киритган.

Арасту замонида, ундан аввалги ва кейинги даврда Ғарбда бадиий адабиёт “поэзия” дейилган. Ҳозирги тушунчадаги бадиий адабиётни “поэзия” деб аташ Пушкин яшаган пайтдан бошлаб таомилга кирган. Шунинг учун В.Г.Белинский (1811–1848) адабиёт ва унинг ижтимоий ҳётдаги ўрни, рус ва жаҳон адабиёти тарихининг ёрқин саҳифаларига бағишиланган салмоқли тадқиқотини “Поэзиянинг хил ва турларга бўлиниши” (1841) деб номлаган. (улуг рус танқидчисининг ушбу асарини Ойбек ўзбек тилига таржима қилган).

“Поэтика”га қавс ичида “поэзия санъати ҳақида” деб изоҳ берилган ва бу асарга бағишиланган тадқиқотларда Арасту бадиий адабиётни “поэзия” деб атагани таъкидланган. Юнон мутафаккирининг неча замонлардан буён адабиётни англаш алифбоси бўлиб келаётган ушбу асари ҳажман кичкина бўлиб, яхлит ҳолда бўлган. Мазкур асарни юончадан русчага ўгирган М.Л.Гаспаров уни кичик сарлавҳали қисмларга бўлиб чиқкан. Арастунинг ушбу асари ўзбекчага В.Г.Аппельрот ҳамда М.Л.Гаспаровнинг русча таржимаси асосида ўгирилган. Маҳкам Махмудовнинг қайд этишича, “Поэтика”ни XII асрда Ибн Рушд араб тилига таржима қилган. 1256 йилда Г.Аллеман ана шу таржима асосида уни лотин тилига ўгирган. 1508 йилда венециялик Г.Валла “Поэтика”ни юончадан лотин тилига ўтказган. Рус тилига эса уни турли вақтларда В.К.Тредиаковский, С.П.Шевирев, Б.И.Ординский, В.Г.Аппельрот, М.Л.Гаспаров ва бошқалар ҳам таржима қилишган. “Поэтика”нинг рус тилидаги таржималари орасида В.Г.Аппельротнинг 1893 йилда амалга оширган ўгирмаси ва М.Л.Гаспаровнинг 1978 йилда Москвадаги “Наука” нашриётида босилиб чиқкан таржимаси ўзининг аниқлиги билан алоҳида ажralиб туриши таъкидланади. Эрамиздан аввал битилган ушбу асарни ўқувчилар тушунишини осонлаштириш мақсадида М.Л.Гаспаров матнга юқоридаги шартли сарлавҳаларни киритган.

“Жаҳондаги биринчи адабиёт назарияси” дея эътироф қилинадиган мазкур тадқиқот соф илмий академик услубда ёзилган ва унда поэзия, яъни бадиий адабиётнинг асосида ҳаёт туриши, шоир ундаги ҳодисаларнинг ўхшашини ижод қилиши ёки уларни қайтадан гавдалантириши уқтирилган. Арастунинг ушбу асари: “Биз умуман, поэтик санъат тўғрисида, шунингдек, унинг алоҳида кўринишлари ва улардан ҳар бирининг имкониятлари, поэтик асарнинг яхши чиқиши учун ривоят (мифос) қандай тузилмоғи лозимлиги тўғрисида сўзлаймиз. Бундан ташқари, асарнинг нечта ва қандай қисмлардан иборат бўлиши, шу билан бирга, бу тадқиқотга тегишли бўлган ҳамма бошқа масалаларга тўхталиб ўтамиз”, деб бошланган. Асар билан танишиб чиқилгач эса юон донишмандининг “бу тадқиқотга тегишли бўлган ҳамма бошқа масалалар” хусусидаги мулоҳазалари бизгача етиб келмагани аниқ аён бўлади. Лекин замонлар оша адабиётнинг моҳиятини англашда муҳим манба бўлиб келаётган “Поэтика”нинг сақланиб қолган қисми ҳам Арасту имкон борича унга қалб қўрини тўkkанини билдиради.

Арасту мазкур асарида “поэзия – ўхшатиш санъати” деган қарашни илгари сурган ва унинг пайдо бўлиши хусусида фикр билдириб, поэтик санъат иккита сабабга кўра: гавдалантириш ҳамда ўхшатиш хусусияти асосида юзага келишини қайд этган. У ўзининг ушбу мулоҳазаларини асослаш учун: “Ўхшатиш – инсонга болалиқдан хос хусусият. Инсон бошқа

мавжудотлардан ўхшатиш қобилиятига эга эканлиги билан ҳам фарқланади, ҳатто, дастлабки билимларини у ўхшатишдан олади ва бу жараён самаралари барчага хузур бағишлийди... Биз ҳақиқатда ёқимсиз кўринган нарсаларга, масалан, жирканч жонивор ва мурдалар тасвирига завқ билан боқамиз. Бунинг сабаби шундаки, билим олиш факат файласуфларга эмас, балки бошқа кишиларга ҳам жуда ёқади. Фарқ шундаки, оддий одамлар билиш учун томоша қилмайдилар. Улар тасвирга завқланиб қарайдилар. Чунки унга боқиб, “мана бу нарса бундай экан” деб мулоҳаза юритишини ўрганадилар. Агар ўхшаши тасвирланган нарсани аввал кўрмаган бўлса, ўхшатишдан эмас, балки бичим, бўёқ ёки шунга ўхшаш бошқа нарсадан завқ туядилар” деган (Арасту. Поэтика (Поэзия санъати ҳақида). Ахлоқи кабир. –Тошкент, Янги аср авлоди, 2004. – Б.23-24.). Арастунинг эндиликда барчанини бўлиб қолган бу фикри мантиқан асосли эканлиги боис минг йиллар ўтса-да, эскирмасдан келади. “Адабиёт – ҳаёт вокелигининг бадиий акси” деган кенг тарқалган қараш заминида Арастунинг ана шу мулоҳазаси туради. Унинг айни фикри “адабиёт қандай пайдо бўлган?” деган саволга энг асосли жавоб бўла олади. Адабиётнинг моҳиятини англаш эса у қандай пайдо бўлганини билишдан бошланади. Бундан Арасту инсониятга адабиёт аслида нима эканлигини биринчи бўлиб тушунтирган, башариятга сўз санъати моҳиятини англашган даҳо экани аёнлашади.

Ҳаётнинг сирли, жумбоқ бўлиб келаётган жаҳатларидан бири шундаки, Худо неъматларининг қадрини барча бандаларига бирданига билдирамайди. У ҳамиша айрим бандаларигагина неъматларининг қадри, аҳамиятини англайдиган ўткир ақл-тафаккур беради ҳамда улар орқали ўзининг чексиз мўъжизаларини маълум қиласди. Арастунинг адабиёт моҳиятини аён этувчи мулоҳазалари ҳам Оллоҳ уни бошқалардан зукко қилиб яратганидан далолат баради. Шу боис қанча замон ўтса-да, унинг қарашлари санъатнинг ижтимоий ҳаётдаги ўрни, адабиётнинг ўзига хос хусусиятларини англашда таянч асос бўлиб келади. Адабиётни европача андозада англаш Арастунинг “Поэтика”сидан бошланади. Форобийнинг ушбу асарга ёзган шарҳидан, Ибн Синонинг “Ёруғланиш” асаридаги Арасту қарашларига муносабатидан эса юонон донишмандининг “Поэтика”си ва бошқа асарлари Шарқда ҳам ҳаёт ва унинг сўздаги акси – адабиётнинг моҳиятини англаш, инсон жумбоғини тушунишда ўзига хос эътиборли манба бўлганини билдиради.

Арастунинг шеър навлари, шоирларнинг бир-биридан фарқи, ўхшатиш, трагедия, комедия, драманинг пайдо бўлиши ва уларнинг ўзига хос хусусиятлари ҳақидаги мулоҳазалари ҳозир ҳам эскирмаган. Унинг трагедия, комедия, драманинг хусусиятлари тўғрисидаги фикрлари адабиётшуносликда аллақачон ўзлашиб, дарслик, қўлланма, лугатлардан мустаҳкам ўрин олган. Арасту, жумладан, трагедияни: “У шеърнинг маълум бир нави бўлиб, унинг ўқилаётганини эшитган ёки ўзи овозини чиқариб ўқиган киши хузур қиласди. Трагедияларда бировларга мисол (ўрнак) бўла оладиган яхшиликлар ва мақтаниладиган феъл-атворлар зикр қилинади; бу вазнда шаҳарни бошқарувчи хукмдорлар мадҳ этилади”, деб изоҳлайди. Арасту трагедия ва комедиянинг пайдо бўлишини қўшиқ билан боғлайди. Қўшиқларнинг ўзи эса бадиҳагўйлик – импровизациядан келиб чиққанини таъкидлайди. У трагедия, комедия, драма адабий жанр сифатида шаклланиши жараёнида кўп ўзгаришларга учраганига эътибор қаратади ва бу ўзгаришлар уларнинг театр томошаси сифатида намойиш қилиниши билан боғлиқлигини қайд этади. Арасту адабий жанрлар манзарасидаги ўзгаришларни, биринчи нав-

батда, унда инсон образини гавдалантиришда кўради. “Эсхил битта актёр ўрнига иккита киритди, хор қисмини озайтириди ва диалогни биринчи ўринга кўйди. Софокл эса актёларни учтага етказди ва декорациялар киритди” дейди. Бундан трагедиялар театр томошаси сифатида намойиш қилингандек даврларда сахнада, асосан, битта актёр харакат қилгани ва у кўпроқ монолог ўқигани аёнлашади. Арастунинг адабиёт манзарасини, жанрдаги ўзгаришлар даражасини белгилашда адабий қаҳрамон образини таянч мезон қилиб олгани адабиётшунослик учун кейинчалик ҳам муҳим асос бўлиб қолди. Чунки ҳар қандай асардан асосий мақсад инсон образини – унинг ҳаётдаги қиёфаси, ҳолатини кўрсатишдир. Сахнада бир ярим-икки соат намойиш қилинадиган, китобда етмиш-юз саҳифани ташкил этадиган трагедияда ҳам, икки мисра – саноқли сўзлардан иборат фардда ҳам инсоннинг муайян ҳолати, кайфияти ифодаланади. Шунинг учун адабиёт тарихига баҳо берилигинида, жорий адабий жараён хусусида сўз юритилганида, албатта, асосий эътибор аввало адабий қаҳрамон образига қаратилади. “Поэтика”да Эсхил ва Софоклнинг трагедия жанри камолотига кўшган хиссаси, сўз санъатига киритган янгилиги, юқоридаги иқтибосдан кўринадики, аниқ айтилади. Бундан адабиёт тарихи ва адабий жараёнга баҳо беришда, биринчи навбатда, адабий қаҳрамон образини эътиборга олиш зарурлиги англашилади. Аёнки, “Поэтика”да асосий объект қилиб олинганд трагедия, комедия, драма жанрига мансуб асарларда эмас, ҳикоя, қисса, роман, достонларда ҳам феъл-атвори, дунёкараши бир-биридан тамоман фарқ қиласиган қаҳрамонлар образи гавдалантирилади. Уларда хукмдорлар, савдогарлар, зодагонлар, чўпонлар, дехқонлар, қосиблар, қароқчилар ва бошқаларнинг портрети чизилиб, уларнинг ҳаёт тарзи кўрсатилади. Муаллиф асарида турли табака кишиларининг образини гавдалантиради. Ёзувчи, шоир, драматург бир-бири билан мурасиз кураш олиб бораётган персонажларнинг ўй-кечинмаларини ўзининг ички дунёси асосида очиб беради.

Форобий “Поэтика”ни шарҳлар экан: “Айрим шоирлар туғма қобилиятли ва шеър битишига тайёр табиатли кишилар бўлади ва улар ташбех ва тамсилга лаёқатли бўладилар... Бир хил шоирлар шеър санъатидан етарлича хабардор бўлишавермайди, балки улар туғма қобилияtlарининг яхшилиги билангина қаноат ҳосил қиласилар. Улар ўзларининг истеъдод даражаларига кўра иш тутадилар. Бундай шоирлар чинакам мусалжис – мулоҳазакор шоирлардан саналмайдилар. Чунки уларда шеър санъатини ўзлаштириб олиш учун камолот етишмайди ва бу санъатда турғунлик бўлмайди. Кимки ундай одамнинг шеърини кўриб, у қобилиятли одам экан, деб ўйлаган бўлса, бу шунинг учунки, унинг феъл-атворида шоирларга хос бўлган турқ-кўриниш мавжудлигидангина шундай мулоҳазага келинганд. Ё бўлмаса, бу хил одамлар чинакамига шоирлар санъатини эгаллаган бўлишади, ҳатто, шеър ижодига хос бўлган хусусиятлардан бирортаси ҳам, у қайси шеър турига алоқадор бўлмасин, барибир, бу қонун-қоидалар ундан қочиб кутулолмайди. Улар шеърият санъатида қўлланадиган ташбех ва тамсилларни жуда ҳам маҳорат билан ишлатадилар. Бу хил шоирлар чиндан ҳам “қобилиятли шоирлар” дейишга сазовордирлар. Ана шу икки табака шоирлар (туғма қобилиятли шоир ҳамда шеър ёзиш қонун-қоидаларини ўрганиб, ўзлаштиришда укувли шоир – А.У.) га ва уларнинг феълларига тақлид қилувчилар бўлади. Булар ўша икки табака шоирлар йўли – ижодини ёдлайдилар. Улар ўзларида туғма шоирлик табиати бўлмагани ҳолда, шеърий санъат қонун-қоидаларидан хабардор бўлиб туриб, ташбех – ўхшатиш ва тамсил – метафораларнинг

кетидан юрадилар. Йўлдан адашадиган ва тоядиган шоирларнинг кўпчилиги худди мана шу табақа шоирлар ичидан чиқади”, дейди.

Арастунинг бошқа фикрлари, хусусан, адабиётнинг пайдо бўлиши ва унинг аҳамияти, адабий турлар ва жанрлар ҳакидаги фикрлари ҳам қанча асрлар ўтса-да, жиддий тарзда ўзгармасдан, адабиётнинг моҳиятини англашнинг алифбоси бўлиб, кишиларнинг фикрини ёришириб келади. Шу боис Михаил Бахтин: “Жанрларнинг назарияси бизнинг замонимизгача ҳам Аристотель қолдириб кетган назарияга ҳеч қандай муҳим янгилик қўшолган эмас. Унинг “Поэтика”си жанрлар назариясининг мустаҳкам пойдевори бўлиб қолаверади. Факат бу пойдевор гоҳида шу қадар чуқурликка ўрнашадики, уни кўришнинг ўзи амри маҳол бўлиб қолади” дейди (Бахтин М.М. Литературно-критические статьи. – М., Худож. лит., 1986. – С.396.). Бу улуг рус адабиётшуноси “Эпос ва роман” тадқиқотида роман жанрининг ўзига хос жиҳатлари тўғрисида мулоҳаза юритиш асносида адабиётшуносликнинг назарий муаммоларига ҳам эътибор қаратиб: “Ўтмишнинг йирик ва тугал поэтикалари – Аристотель, Гораций ва Буало поэтикалари адабиётнинг яхлитлигини ва бу яхлитлик ичida барча жанрларнинг мукаммал уйғунлик ҳосил қилишини чуқур ҳис этиш руҳи билан сугорилган. Улар мазкур жанрлар уйғунлигини гўё аён эшитиб турадилар. Бу поэтикаларнинг кучи, бетакрор яхлитлик сифатидаги мукаммаллиги ва тугаллиги шунда”, деб таъкидлайди.

“Поэтика”да, асосан, трагедия, комедия, драманинг ўзига хос хусусиятлари тавсифланган ва улар ҳакида баён қилинган мулоҳазалар замонавий адабиётшуносликда ҳам деярли ўзгаришсиз тақрорланади. Чунки Арасту ушбу жанрларга мансуб асарларнинг моҳиятини аниқ баён қилган. Масалан: “Трагедия муайян ҳажмли, турли қисмлари турлича сайқалланган тил ёрдамида, баён воситасида эмас, балки хатти-ҳаракат орқали кўрсатиладиган ва изтироб билан инсон рухини покловчи ва тугал воқеа тасвиридир”, деган ҳамда ушбу таърифдаги “сайқалланган тил” ҳамда “турли қисмлари турлича сайқалланган” деган ўринларни: “Сайқалланган тил” деганда мен ритм, гармония ва мусиқийликка эга бўлган тилни назарда тутаман. “Турли қисмлари турлича сайқалланган” деганда эса баъзи қисмлари фақат вазн билан, бошқа қисмлари ҳам вазн, ҳам мусиқийлик билан безалган нутқангашлилади” деб изоҳлаган. Мазкур рисолада “Трагедия хатти-ҳаракат тасвири бўлиб, ундаги хатти-ҳаракатлар муайян характер ва фикрлаш тарзига эга қаҳрамонлар томонидан амалга оширилади” дейилган ҳамда трагедия олтида унсур: ҳаракат ва манзара, мусиқа, нутқ, характер, фикр ва ғоя ҳамда томошадан таркиб топиши таъкидланган. Энг муҳими, “Поэтика”да “Трагедиянинг қаҳрамони ким?” деган саволга: “Трагедия биздан кўра яхшироқ одамларни гавдалантиради”; “Трагедияларда бировга мисол (ўрнак) бўла оладиган яхшиликлар ва мақтаниладиган феъл-атворлар зикр қилинади; бу вазнда шаҳарни бошқарувчи хукмдорлар мадҳ этилади”, деб аниқ жавоб берилган. Арасту “биздан кўра яхшироқ одамлар” деганда хукмрон табақа вакиллари – шоҳлар, вазирлар ва уларнинг атрофидагиларни назарда тутган. Чунки одамлар ўтмишда хукмрон табақа вакилларини ўзидан устун, деб қарашган ва худо бу бандаларига бўлакча марҳамат кўрсатиб, уларни ҳар жиҳатдан бошқалардан баланд қилиб қўйган, деб ўйлашган. Бундай қараш Софокл, Арасту замонида хозирги даврдагига қиёслаганда анча мустаҳкам ва кенг ёйилган. Чунончи одамлар шоҳнинг олдида тиз чўкиб, таъзим қилишни ўzlари учун юксак шараф деб билишган. Бундай

эҳтиром заминида эса ҳукмдорни улуғлаш, уни ҳаммадан устун, ҳаммадан кўра яхши, деб тан олиш туради. Нафақат қадимги юонон драматурглари асарлари ёки Шекспир трагедияларида, балки бошқа ҳалқлар жумладан, Шарқ ҳалқлари фольклори ва ёзма адабиётида ҳам қадимдан ҳукмдорлар асосий қаҳрамон сифатида гавдалантирилган ва улар, албатта, қайсиdir жиҳатлари билан атрофдагилардан устун экани кўрсатилган. Ҳозир ҳам мушоҳада юритадиган ўқувчи, томошабин ўзини шоҳ Эдип, Абулфайзхон, Мирзо Улуғбекдан ақлли, афзал деб ҳисобламайди. Қолаверса, ўзини бундай баланд тутишга кишининг ички маданияти йўл бермайди. Ушбу трагедияларнинг бошқа асарлардан афзал, фарқли жиҳати шундаки, улардаги қаҳрамонлар тақдири кишиларда турли зиддиятли ҳиссиётлар уйғотади. Мазкур асарларни ўқиши, саҳнада томоша қилиш чоғида кишида бир вақтнинг ўзида турли қарама-қарши фикрлар, бир-бирига зид ҳиссиётлар, кимгадир нисбатан ачиниш, кимгадир нисбатан нафрат хислари пайдо бўлади. Эътибор қилинса, трагедиялардаги асосий қаҳрамонларнинг ҳеч бири лоқайд, бефарқ одамлар эмас. Уларнинг барчаси эҳтироси баланд, шиддаткор, жўшқин табиатли кишилардир. Софокл, Шекспир трагедияларида ҳам, “Абулфайзхон”, “Мирзо Улуғбек”да ҳам бу аниқ сезилади.

“Поэтика”да илгари сурилган мулоҳазалардан аён бўлишича, бадиий асарда, у қайси жанрга мунсублигидан қатъи назар, кишиларнинг муайян воқеа-ҳодисалар таъсирида туғиладиган турли кечинма ва ҳолатлари маълум бир ғоя асосида умумлаштириб ифодаланади. Арасту шеър, трагедия, комедия, драма жанрига хос хусусиятлар, улардаги қаҳрамонлар ҳакида сўз юритганида аввало шунга алоҳида ургу беради. Юонон мутафаккири адабий-бадиий асарларнинг умумий ва фарқли хусусиятларини кўрсатишида, жанрини белгилашда уларда инсон образи қайси жиҳатдан гавдалантирилганига алоҳида диққат қиласи. У трагедия, комедия ва драмага таъриф берганида айни асарда инсон фаолиятининг қайси жиҳати тасвири етакчилик қиласи, деган саволни кўндаланг қўяди ва улар худди хусусиятларига кўра трагедия, комедия ёки драма саналади, деб таъкидлайди. Арасту бадиий асарларининг санъат ҳодисаси сифатидаги хусусияти, аввало, уларда инсон рухиятининг акс эттирилишида намоён бўлишини қайд қиласи. Ҳақиқатан, мусаввирнинг маҳорати табиат манзараси, одамларнинг қиёфасини чизишида кўринса, шоир, адабнинг ижодкорлиг унинг инсон образини гавдалантириши, персонажлар руҳий дунёсини ёритишида намоён бўлади. Адабиётнинг инсоншунослик моҳияти ҳам, муаллифнинг инсон дунёси жумбоқларини англашдаги изланишлари самараси ҳам қаҳрамонлар ички кечинмасини очиб беришда кўринади. Арастунинг адабиёт ва тарих ўртасидаги тафовут, ижодкорларнинг истеъоди даражаси ҳакидаги фикрлари асл адабиёт қандай бўлиши ҳакида аниқ тасаввур уйғотади. Улар Форобийдан аввалги ва кейинги давр кишилари учун адабиёт моҳиятини англашда дастуруламал бўлганидек, бизнинг замондошларимиз ва келгуси авлодлар учун ҳам бу борада мустаҳкам таянч бўла олади...

(Давоми келгуси сонда)



ЁН, ЁНАВЕР, МЕНИНГ ЮЛДУЗИМ!

“Анна Герман ҳақида сўз кетганида, даставвал, чинакам истеъодоли санъаткор, дея таъриф берилган бўлса, эндилликда бу таъриф давомида руҳий қудрат, улкан иродада соҳибаси, матонатли инсон сифатларини ҳам келтирмоқ жоиз”.

Татьяна БЕЛЯЕВА

Инсон овози... У кўнгил ичидаги туғёнларнинг зоҳири, тўлқин ва ҳовурининг садоси эмасми? Қўшиқ эса инсон овозида туғилади. Ҳавога илохий нақшлар чизувчи созлар эса бундай овозга жўр бўлмоқ истайди. Ўтган асрлардан таралиб, ҳануз халқлар қалби билан дўст тутинган неча булбулнафасларнинг овози бунга далилдир. Улар орасида эса Анна Германнинг ноласи бўлакча. Анна Герман дейилса, барча миллат уни ўзига яқин олиб эслайди. Бугун, айни дамда ўзи билан ҳамнафас яшаётган замондошидек, қадрдонидек хис этади. Икки аср орасидаги ахли инсоннинг миллати, тилига қарамай, мустаҳкам ришталарни боғлаган унинг ўлмас қўшиқлари, соҳир овози, маҳзун нолалариридир. Унинг қалбидан яралган куйлар бугун ҳам қалбларни янглишмай топиб келади. У тараннум этган севги, ҳаёт, инсоний хислар ширин хотираларимизни ёдга солади. Умрини куйлаб ўтказган бу поляк қизи не сабабдан барча миллатлар ардоғида қолган экан? Бу саволга жавоб топмоқ учун унинг чақиндек қисқа, бирок мазмунли кечган ҳаёт йўлига бир қур назар ташламоқ кифоя.

Анна Герман 1936 йил 14 февралда хушловозлар диёри бўлмиш Хоразмда таваллуд топди.

Анна бошланғич таълимни қирғиз юртида олди. Онаси Ирма Мартенс ўқитувчилик қилган Талас вилоятининг Оқтепа шаҳарчасидаги мактабда учинчи синфга қадар савод чиқарди. Кейин эса Қозоғистоннинг Жамбулида таҳсилини давом эттирди. Бу саргардонликнинг сабаби оила боши Евгений Германнинг 1937 йил, қатағон авж олган даврда айғоқчиликда айбланиб, ўн йилга қамоқ жазосига хукм этилиши ва маҳфий равишда Тошкентда отиб ташланиши билан боғлиқ эди. Узоқ саргардонликдан сўнг Анна онаси ва бувиси билан Польшанинг Вроцлав шаҳрига кўчиб келишди. Ирма шу ердаги қишлоқ хўялалиги коллежида дарс бера бошлади. Анна эса шу ердаги лицейни тугатиб, Вроцлав университетининг геология факультетида ўқишини давом эттирди. Талабалик йилларида университетда ўтказилган кечаларда иштирок этиб, санъатга бўлган ихлосини намоён этиб борди. Илк қўшигини эса яқин дугонасининг тўйида, омма олдида

куйлади. Хор билан айтилган қўшиқ – “Аве Мария” Аннанинг хуш овозида яна ҳам гўзал янгради. Аннанинг вужудида санъаткорлик қудрати бор эди, аммо у қай шаклда намоён бўлишини унинг ўзи ҳам билмасди. Шундан бўлса керак, у “Калумпур” номли талабалар театрида ўзини актриса сифатида синаб кўрди. Аммо Анна ўзини бу соҳада топа олмаслигини илк саҳнасидаёқ пайқаб, қайта бу ишга уринмади. Уни куй-қўшиқ ўзига тортар эди. 1961 йилда эстрада хонандалиги бўйича имтиҳон топшириб, ундан муваффақиятли ўтди ва Италияning махсус стипендиясини қўлга киритиб, бир неча ойдан сўнг Рим сари йўл олди. У ерда актёр ва режиссёр Юлиан Квишканинг ижодий труппасига кириб, унинг кўмагида Сопот халқаро қўшиқ фестивалида Адриано Челентано, Дайон Уорвик, Сонни ва Шер, Далида каби хонандалар сафида иштирок этди ва “Бу мен учун шунчалар қийин” қўшиғи билан иккинчи даражали мукофотни қўлга киритди. Бу унинг профессионал хонандаликда эришган илк ютуғи эди. Аммо у чинакам шон-шуҳратни йигирма саккиз ёшида, “Рақс тушаётган Эвридика” қўшиғи билан қарши олди. Поляк қўшиқлари II фестивали ва Сопот халқаро фестивалида куйлаган ушбу қўшиғи уни бутун Европага танидди. Шундан сўнг, гўзал қўшиқлару улар эътироф этилган фестивалларнинг саноғи бўлмади. Унинг қўшиқларидағи бетакрор, ёқимли овози қаърида инсон қалбининг нафаси уфуриб турарди. У тинимсиз гастроллар уюштирар, альбомлари гулдаста мисол халқлар орасида тарқалиб борарди. Шундай даврда бир бахтсиз воқеа Анна Германнинг ижодий шиддатига дахл қилди. Италияга сафари чоғида у автоҳалокатга учраб, оғир тан жароҳати олади. Хонанданинг саҳналардаги жўшқин наволарининг ўрнини узоқ йиллик ингроклар эгаллайди. У йиллаб тўшакка михланиб қолади. Унинг учун кечаги ҳаёти тушга ўхшаб туюлар, ўтган гўзал дамларини соғинар, яна куйлашни истарди. Шу изтироблар ортидан хонанданинг “Соррентога қайтаманми?” номли биографик китоби дунёга келди. Шундай қийин пайтда унинг ҳаётида Збигнев Тухольский пайдо бўлди. У муҳандис бўлса ҳам, санъатни жуда яхши тушунар, Аннани узоқ йиллардан буён севарди. Шу сабабдан, у Аннани то оёққа тургунича парвариш қилди. Омади чопганидан эмас, қийин кунларида ёнида бўлган инсоннинг муҳаббатини Анна ҳам қадрлади. Улар 1973 йилда оила куришди.

Хонанда олти йиллик танаффусдан сўнг яна саҳнага қайтди. Уни соғиниб, интиқ кутаётган муҳлислари учун Варшавада катта концерт уюштиради. Биргина “Инсон тақдир” қўшиғини куйлабоқ, яна бутун зални ўзига маҳлиё этади. Бу тарона унинг ўзи томонидан басталанган, дилида туғилган қўшиқ эди.

Анна ватанидан ташқарида ҳам уни соғинишиларини биларди. Шунинг учун “Анна Герман тақдим этади” номи остида бутун ҳамдўстлик мамлакати бўйлаб гастроль ўтказади. “У менга ёқади”, “Севги садоси”, “Шопен мактуби”, “Боғлар гуллаганда”, “Ён, ёнавер, менинг юлдузим”, “Бошқача бўлолмайман”, “Умид”, “Тасодиф”, “Мен баҳорни кутаман”, “Мовий осмон”, “Ошиқлар шахри” сингари юзлаб қўшиқларида ўзининг нақадар ноёб санъаткор эканлигини намоён этди. Унинг барча қўшиқлари муҳаббат мадҳиясига айланди.

Хонанданинг овози лирик сопрано бўлиб, юқори тембрга эга эди. Рангбаранг оҳангдорликда баланд пардаларини ҳам оларди. Унинг табиатидаги артистизм овозининг образлилиги, мусиқийлиги орқали акс этарди.

Анна Германнинг ижодий йўналишида черков қўшиқларининг сентиментал оҳанглари ва эски рус эстрадасининг жозибали романтикаси уйғунилиги бор. Украиналик хонанда София Ротару уни шундай хотирлайди: “*Анна Герман ниҳоятда оқкўнгил ва яшовчан инсон эди. Ҳам нафис, ҳам кучли. Унинг овозидаги самимият ва тиниқлик бошқа ҳеч кимнинг овозида учрамасди*”.

Анна Герман санъат осмонида ёрқин юлдуз бўлиб нур сочганида ҳам инсоний вазифаларини унутмади. Кўплаб ёш хонандаларни кашф этилишига йўл очди, янги овозларни концертларига олиб чиқиб, оммага таниширишни унутмади. Шон-шуҳрат ортидан қувмади, қалби амр этган бурчни адо этишга бор кучи, бор умрини сарфлади.


Маълумотларга қараганда, Анна машҳур бўлса ҳам, давлатманд бўлмаган. Оиласи билан жуда оддий ва камтар ҳаёт кечирган. Айниқса, автоҳалокатдан кейинги асоратлар умр бўйи уни тарк этмайди. Бироқ, у ижод учун, оила учун ҳамиша куч топади.

Анна Герман бор-йўғи қирқ олти йил умр кўрган бўлса-да, ҳам инсон, ҳам санъаткор сифатида гўзал яшаб ўтди. Сўнгги нафасигача куйлаб, 1982 йилда Варшавада бу оламни тарк этди.

Одатда, санъат юлдузлари бир чараклайдилару ҳар доим ҳам ўша ёникликни бардавом тутиб қололмайдилар. Аммо, Анна Герман бутун дунёдаги мухлисларининг меҳрини асраб қолишни яхши уддалайди. У муҳибларининг ўз тилида қалбига кириб бормоқ йўлини тутганди. Хонанданинг поляқ, рус, итальян, француз тилларида куйлаган қўшиқларида умумбашариятга хос муштарак рух, изтироб ва туғён мужассам эди. Қолаверса, ҳамфиркининг бўлиши истеъдоддан муҳимроқ, дейдилар. Зотан, Анна Герман бундай баҳтга ҳам мушарраф бўлганди. У Владимир Шаинский, Ян Френкель, Евгений Мартинов, Георгий Мовсесян, Александра Пахмутова сингари жаҳоннинг қирқдан ортиқ энг яхши замондош бастакорлари билан ижодий ҳамкорлик қилди. Ўзи ҳам элликка яқин қўшиқларида куй басталаган. Агар эътибор берилса, унинг қўшиқларидағи сўзлар ҳам бадиий юксаклиги билан кишини ром этади. Бунда хонанданинг шеъриятни теран тушунишини, нозик дид соҳибаси эканлигини илғаш мумкин. Унинг шоирлари Евгений Евтушенко, Расул Ҳамзатов, Роберт Рождественский, Александр Жигаров ва улар сингари нафис ижод вакиллари эди.

Анна Германнинг қўшиқларини, мусиқий альбомларию эришган ютуқларини санамоқ билан уларнинг салмоғини ўлчамоқ қийин. Аммо бир мезон борки, унда ижодкор умрининг асл қиймати яққол кўринади. Бу мезон – умрбоқийлик мезонидир. Анна Герман бу – қўшиқ, унинг манзили эса қалблардадир. Санъаткор ўз қўшиқларида замонлар оша яшаб келаётган экан, унинг юлдизи сира сўнмайди. Биз, унинг соҳир санъатидан баҳра олганлар, тинглаганлар, унга қўшилиб куйлаганлар эса шундай деймиз: “Ён, ёнавер, менинг юлдузим!”

Севара РАЖАБОВА,
ЎЗДСМИ ўқитувчиси



КАЗИМИР МАЛЕВИЧ

Дунёга машхур “Қора квадрат” асарининг муаллифи, атоқлы рассом Казимир Малевич феномени ўз даврида ҳам, ҳозирда ҳам санъатшунослар орасида кизғин баҳсларга мавзу бўлиб келмоқда. Маълумки, XX аср дунёда рангтасвир санъатида янги оқимлар, экспериментал тажрибалар, модернистик қарашлар кенг ривожланган давр саналади. Импрессионизм, кубизм, футуризм каби янги ижодий оқимлар, улар замирида ундан-да янги усуллар шаклланиб, мусаввирлар анъанавийликдан йироқлашиб, янги ифодаларни топишга эришди. Кубизмнинг Пикассо, импрессионизм Мане, абстракционизм Кандинский ижодига боғлиқликда шаклланган бўлса, супрематизм йўналишининг юзага келишида мусаввир Малевич қарашлари асос бўлди.

Келиб чиқиши польяк бўлган Казимир Северинович Малевич 1879 йилнинг 11 февралида Украина нинг Киев шахрида, оддий ишчи оиласида таваллуд топган. Отаси Северин Малиевич шакар заводи ходими, онаси Людвиг Александровна уй бекаси бўлган. Малевичлар оиласи катта бўлиб, Казимир тўққиз фарзанднинг тўнгичи эди. У тасвирий санъатга болалигидан ихлос қўйиб, турли расмлардан нусхалар кўчиришни хўш кўрарди. Казимирнинг қизиқишлирига бефарқ бўлмаган ота-онаси уни Киевдаги Николай Мурашко мактабига беришади. Рассомнинг хотирлашича, унинг илк ижод маҳсули “Ойли оқшом” деб номланган манзара бўлган.

1896 йилда оиласининг Курск шаҳрига кўчиб ўтиши сабабли Казимир бу мактабни тарқ этишига тўғри келади. Оиладаги этишмовчиликка қарши курашиш ота-она билан бирга тўнгич ўғилнинг ҳам гарданидаги вазифа эди. Казимир Москва-Курск темир йўлига чизмакаш бўлиб ишга киради. Аммо уларни ўша даврда этишмовчиликдан ташқари, польяк бўлганликлари учун маҳаллийчилик масаласи ҳам қўйнарди. Шунга қарамай, Казимир бор кучини ижодга йўналтиради, украин тилида санъатга оид турли мақолалар ёза бошлади.

Шу даврда ёш рассом оила қуриб, фарзанд кўргач, бир тарафдан оила боқиши масъулияти, иккинчи томондан эса ижодий эҳтиёжлари тобора ортиб борарди. У ҳам моддий, ҳам маънавий эҳтиёжларига чора излаб, 1904 йилда Москвага жўнайди. Коллекционерлар Морозов ва Шукинлар томонидан ўтказилган замонавий санъат кўргазмасида бўлиб, Клод Моне, Поль Сезанн, Пабло Пикассо, Анри Матисс каби рассомларнинг асарларига маҳлиё бўлади. Уларнинг асарларидаги услугуб ва мавзулар ёш рассомнинг ижодий қарашларини буткул ўзгартириб юборган эди. Аммо Москва тасвирий санъат мактабига киришга уринишлари бесамар кетиб, яна Курскка қайтади. Орадан икки йил ўтгач, бутун оила Москвага кўчиб келади. Шундан сўнг Казимир Малевич ижоди учун имконият эшиклари бир-бир очила бошлади.

У 1907-1910 йилларда Фёдор Рерберг ижодий студиясига катнаб, импресионистик йўналишда ижод қила бошлади. Шу йилларда Библия сюжетлари

асосида ишлаган туркум асарлари билан “Пушти атиргул” номли рус символистлари ва “Москва рассомлари дўстлиги” XVI қўргазмаларида иштирок этади. Унинг ижоди юксалган сари асарлари нафакат Россия, балки хорижий мамлакатлардаги санъат кўргазмаларида ҳам иштирок эта бошлади.

У замонавий тасвирий санъат имкониятларини ижодида амалий намоён қилишдан ташқари, назария билан ҳам жиддий шуғулланади. “Кубизмдан супрематизмга. Янги рангтасвир реализми” манифести, “Санъатнинг янги шакли хусусида”, “Тасвирий санъатнинг қўшимча элементлари ҳақида” каби мақолаларида унинг илмий қарашлари акс этиб, супрематизмнинг ўзига хос хусусиятлари, бадиий ва ғоявий жиҳатлари асослаб берилган.

У 1915 йилда “Қора квадрат” картинаси ва шу ном остидаги туркум асарларини омма эътиборига такдим қиласди. Жумладан, “Футуристик картиналар” кўргазмасига қўйилган “супрематик рангтасвир” номи остидаги 39 та асари катта шов-шувга сабаб бўлди. Ижод ахли ўртасида бу йўналишга қизиқиш ортиб бораверади. 1916 йилда Малевич “Супремус” жамияти ва шу номдаги журнални ташкил этиб, жамиятга аъзо бўлган рассомларнинг асарларини ва супрематизмга оид мақолаларни эълон қилиб боради. Рассомнинг ижоди рус санъати муҳитида ижобий баҳоланиб, катта нуфузга эга бўлади.

Унинг “Қора квадрат” туркумiga оид “Оқ квадрат”, “Қизил квадрат”, “Қора доира”, “Қора хоч”, “Автопортрет”, “Челак тутган аёл”, “Атлетикачилар”, “Чархчи”, “Қизил отликлар юриши”, “Махзунлик. Сариқ либосли фигура” сингари қўплаб асарлари супрематизмнинг ёрқин намуналари сифатида Россиядан ташқари Италия, Украина, Франция, Германия ва бошқа хорижий давлатларда кўргазмаларга қўйилиб, юксак эътирофларга сазовор бўлади.

Рассом фаолияти давомида рангтасвирнинг бошқа турлари, хусусан, архитектура, театр сценографияси ва ҳайкалтарошлик билан ҳам шуғулланган. Малевичнинг ўз соҳаси тарихи ва келажагини ҳаққоний таҳлил эта олувчи файласуф, новатор рассом, назариётчи сифатидаги шуҳрати Россиядан ташқари ҳудудларда ортиб борди. У 1917 йилда Москва рассомлар уюшмасига қабул қилинади. Петроградда яшаб, режиссёр Мейерхольд ва шоир Маяковскийлар билан ижодий ҳамкорлик қиласди. Сўнгра Марк Шагал раҳбарлигидаги халқ санъат мактабида дарс беради, турли институт ва музейларда раҳбар бўлиб хизмат қиласди.

30-йилларга келиб, мамлакатда санъат устидан сиёсий назорат ортиб, социалистик реализм ягона йўлга айланиб боради. Бадииятнинг чексиз сарҳадларида янгилик изловчи, тафаккур озодлиги билан яшовчи рассомга бу муҳит тор кела бошлади ва 1927 йилда Германияга кетади. У ердан Украинага қайтиб, Киев Бадиий институтида педагоглик фаолияти билан шуғулланади. Кўп ўтмай, қандайдир шубҳалар билан ишдан бўшатилади ва 1930 йилда “немис айфокчиси” деган айблов остида қамоққа олинади. Хайриятки, ижодкор дўстларининг саъй-харакатлари билан бир неча ойдан сўнг озод этилади.

Рассом ижодининг сўнгги йилларида анъанавий реалистик услугга қайтиб, асосан портрет жанрида асарлар ишлади. “Аёл портрети”, “Автопортрет”, “Ишчи”, “Уч портрет” картиналари шулар жумласидандир.

Казимир Малевич 1935 йилда вафот этади.

*Феруза КАРАЕВА,
ЎзДСМИ магистранти*

БАШАРИЯТГА ДАХЛДОР ДАХО

Февраль ойи юртимизда навоийхонлик, бобурхонлик кечалари илму урфон учқунларини қалбларга жо этиши билан қадрлидир. Бу йилги на-воийхонлик тадбирларини мутафаккир номи билан аталадиган вилоят бошлаб берди. 6–7-февраль кунлари Навоий шаҳрида “Алишер Навоий ижодий меросининг умумбашарият маънавий-маърифий тараққиётидаги ўрни” мавзусида анъанавий халқаро илмий-амалий анжуман бўлиб ўтди.

Халқаро анжуманда Россия, Туркия, Эрон, Мўгулистон, Озарбайжон, Тожикистон, Афғонистон, Украина, Қозогистон, Туркманистон каби давлатлардан ташриф буюрган навоийшунос олимлар билан бирга, мамлакатимиздаги таниқли академиклар, профессор олимлар, ижодкор зиёлилар, маънавий соҳа мутахассислари, тарғиботчилар, ўкувчи-ёшлар ҳамда ёш олимлар иштирок этдилар.

Ўзбекистоннинг Украинандаги фавқулодда ва муҳтор элчиси Алишер Абдуалиев ҳам мазкур тадбирда қатнашиб, Украинада Ўзбекистон Қаҳрамони Суйима Фаниева иштироқида ўтказилган навоийхонлик кечаси украиналикларда катта қизикиш уйғотганлигини алоҳида эътироф этди. Элчи билан бирга украиналик таниқли таржимон Игор Шпак Алишер Навоийнинг “Фарҳод ва Ширин” достонининг украин тилига қилинган таржима нусхасини тақдим этдилар.

Анжуман ялпи мажлиси давомида юртимиздаги ва хорижлик меҳмонлар Навоий ҳаёти ва ижоди хусусида маъруза қилдилар. Жумладан, академик Наим Каримов Ойбекнинг “Навоий” романининг яратилиши, филология фанлари доктори Иброҳим Ҳакқул мутафаккир ижодида “адам ва вужуд” фалсафаси, Халқаро Бобур фонди раҳбари Зокиржон Машрабов шоирнинг Ҳиротдаги қабри ва унинг обод қилиниши ҳақида фикр билдиришган бўлса, хорижий олимлардан Тарбияти мударрис университети профессори Иброҳим Худоёр (Эрон), профессор Фикрет Туркман (Туркия), филология фанлари номзоди Алексей Пылев (Россия), профессор Абдусалом Абдуқодиров (Тожикистон), профессор Исмоил Доган (Туркия), профессор Рамиз Аскар (Озарбайжон), доктор А.Алимаа (Мўгулистон), профессор Олмос Улви (Озарбайжон), профессор Азамат Ақбар (Қозогистон), Фейзия Аррал Ҳабиби (Афғонистон), академик Мухсун Нагисойлу (Озарбайжон) ва бошқалар мутафаккир ижоди ҳақида қизикарли чиқишлар қилдилар.

Мазкур илмий анжуманда ҳозирги глобаллашув даврида миллӣ ўзликни англаш, аждодларимиз яратган бетакрор илмий-ижодий меросни чукур ўрганиш, уни халқимиз, айникса, ёшлар онгига сингдириш муҳим аҳамиятга молик эканлиги алоҳида таъкидланди. Конференция маърузалари алоҳида тўплам ҳолда чоп этилди.

Илмий анжуманнинг бадиий қисми “Фарҳод” маданият саройида бўлиб ўтди. Тантанали тадбир бошида вилоят миқёсида ҳар йил мактаб ўкувчилари ўртасида ўтказиб келинаётган “Навоийлик ёш навоийхонлар” кўрик-

танловининг вилоят босқичи ғолибларини тақдирлаш маросими бўлиб ўтди.

Ғолибларни тақдирлаш учун саҳнага чет эллик меҳмонлар таклиф этилди. Танловнинг учинчи ўрин ғолиблари замонавий ноутбук билан, иккинчи ўрин соҳиблари компьютер жамламалари билан, танловнинг мутлақ ғолиблигини қўлга киритган Кармана туманидаги 4-умумий ўрта таълим мактаби ўқувчиси Иброҳим Гаффоровга эса вилоят ҳокими Қобилжон Турсунов Президентимиз совғаси – “Spark”автомобилини тақдим этди.

Шунингдек, хорижлик меҳмонларга вилоят ҳокими томонидан эсдалиқ совғалари ва гулдасталар топширилди. Шаҳар ҳокимлиги томонидан эса улар “Навоий шаҳрининг фахрий фуқароси” нишонлари билан тақдирланди.

8 февраль. Навоий ижодий меросини ўрганиш борасидаги мулоқотлар Тошкентда давом этирилди. Ўзбекистон Республикаси Фанлар академияси Ўзбек тили, адабиёти ва фольклори институтида тожикистонлик навоийшунос олимлар – академик Б.Гафуров номидаги Хўжанд давлат университети профессори Абдусалом Абдуқодиров ҳамда филология фанлари номзоди, доцент Бахтиёр Файзулоевлар билан учрашув бўлиб ўтди. Меҳмонлар самимий қабул учун миннатдорлик изҳор этиб, Тожикистонда, жумладан, Хўжандда ҳам ўзбек тили, адабиёти ва фольклорига оид материаллар, манбалар борлиги, уларни тадқиқ этиш лозимлигини таъкидлашди. “Илмий-адабий алоқаларнинг тикланиши, – дейди А.Абдуқодиров, – икки давлат илм-фанининг ривожига сезиларли ҳисса қўшиши тайин. Ўзбек ва тожик адабиётини боғловчи ришталар ниҳоятда кўпdir. Шахсан менинг ўзим номзодлик диссертациямни ҳам, докторлик диссертациямни ҳам айнан Тошкентда, жонажон илм даргоҳи Ўзбек тили, адабиёти ва фольклори институтида ҳимоя қилганман”.

9 февраль. ЎзР ФА Ўзбек тили, адабиёти ва фольклори институтида Алишер Навоий адабий ва илмий меросини ўрганиш масалаларига бағишлиланган анъанавий илмий анжуман бўлиб ўтди. Унда республиканизмин турли илмий муассасалари ва қардош Туркия ҳамда Тожикистон давлатларидан ташриф буюрган навоийшунос олимлар шоир ижоди теграсидаги масалалар ҳақида маъруза қилишди.

Мазкур илмий анжуманларда Навоий ижодидаги маъно, мавзу, диний ва тасаввуфий қатламлар, шоирнинг давлатчилик ва раҳбар маънавияти ҳақидаги қарашлари ҳамда шоир ижодининг чет элда ўрганилиши каби муҳим масалалар академик ва профессорлар томонидан муҳокама қилинди.

Ушбу маърузаларда Навоийнинг турли миллат вакиллари қалбидаги сиймоси айнан, унинг обрўси, унга бўлган ҳурмат, эътиқод, Навоий асарларининг умумбашарият маънавий-маърифий тараққиётидаги ўрни, хусусан, уларда ватанпарварлик, мардлик, матонат, бағрикенглик, инсонийлик, меҳр ва муҳаббат, миллий маънавий қадриятлар ардоғи мутлақо тақрорланмас қирралари билан намоён бўлиши хусусида тўхталиб ўтилди.

Мазкур илмий-амалий анжуманлар ҳар жиҳатдан юксак савияда ташкил этилган бўлиб, Навоий вилояти ҳокимияти ва бошқа мутасадди ташкилотлар бу тадбирга сидқидилдан, Ҳазрат шахси ва ижодига ўзгача ҳурмат билан тайёргарлик кўрганлари сезилиб турди.

Биз ушбу йиғинда хорижлик навоийшунослар томонидан Навоий ижодига нисбатан билдирилган айрим фикр-мулоҳаза, эътирофларни эътиборингизга ҳавола этишни жоиз деб билдик.

“Қайси юрт фуқароси бўлишдан қатъи назар, ҳар бир инсон Алишер Навоий асарларини ўқиши, унга ошно тутиниши зарур деб ўйлайман. Чунки у башарият шоиридир. Бу улуг зотниң асарлари Озарбайжон шоирлари учун ҳам илҳом манбаи бўлиб келган. Чунончи, XIX асрда Озарбайжонинг Шемахи, Ордубада, Дербент каби шаҳарларида яшаб ижод этган шоирлари адабий меросида Алишер Навоий шеъриятининг улкан таъсирини кузатши мумкин”.

Фикрет ТУРКМАН,
профессор (Туркия)

“Алишер Навоий даҳоси барча туркий халқлар орасида машҳур. У яшаган давр нафақат ўзбек адабиётининг, балки туркий халқлар адабиётининг “Олтин даври” ҳисобланади”.

Иброҳим ХУДОЁР,
профессор (Эрон)

“Навоий, яъни Фоний “Девони Фоний”си билан форсий шоирлар орасида ҳам юксак эътибор қозона олган. Зуллисонайн шоир туркийда бўлгани каби форсийда ҳам ўзининг ширали тили ва ноёб услубига эгадир”.

А. АЛИМАА,
доктор (Мўғилистон)

“Гарчи Навоий Чигатой туркийсининг эски даврига тегишилидек кўринса-да, у Чигатой туркийси ва Чигатой адабиётининг асосчиси ҳисобланади. Чигатой туркийсининг бир ёзув шаклида юзага келиши ва ривожланишига сабаб бўлган киши фақатгина Ҳазрат Навоийдирки, бу давр адабиёти унинг хизмати билан юксалган. Шу сабабдан бу давр тили ва адабиёти “Навоий тили ва адабиёти”, ёки “Навоий туркийси” деб ҳам юритилади”.

Рамиз АСКАР,
профессор (Озарбайжон)

“Улуг ўзбек мутафаккири ва шоири Мир Алишер Навоийнинг ёрқин ижоди Озарбайжон халқининг қалbidан чуқур жой олган. Унинг номи ҳаётлигидәёқ озарбайжонликлар орасида машҳур эди”.

Абдусалом АБДУҚОДИРОВ,
профессор (Тоҷикистон)

“Мен Навоий шаҳридаги бундай таобирда биринчи марта қатнашияпман. Ўзбекистон Республикаси Президенти Шавкат Мирзиёев жаноби олийла-рининг ташаббуси билан ташкил этилган буюк шоир ижодига бағишиланган

халқаро конференцияга таклиф этилганимиз бизни ниҳоятда мамнун этди. Навоий зуллisonайн шоир сифатида Тоҷикистонда жуда машҳур. Асарлари шу қадар қадрланадики, унинг түгилган куни бизда ҳам ҳар ийл муносаби нишонланади, қатор халқаро анжуманлар, мушоиралар, учрашувлар ўтказилади, мақолалар чоп этилади. Навоийнинг ҳаёти ва ижоди юртимиздаги барча мактаб ва олий ўқув юртларида кенг ўрганилада. Булар буюк зотга бўлган меҳр ва муҳаббатимизни ифодалайди”.

**Игор ШПАК,
ношир (Украина)**

“Алишер Навоий асарлари сеҳрли оҳанг каби миллат ва тил танламайди. Улар қанчалик миллий бўлса, шунчалик умумбашарий ва инсониятнинг бебаҳо маънавий бойлигиdir”.

**Мунисжон ҲАҚИМОВ,
ЎзРФА ўзбек тили, адабиёти, фольклори
институти илмий тадқиқотчиси**

ЎЗБЕК АДАБИЁТИНИНГ ОЗАРБАЙЖОНДАГИ ДЎСТИ

Ўзбек адабиётининг Озарбайжондаги энг фаол тарғиботчиси, таржи-мони Рамиз Аскар буюк ўзбек шоири ва мутафаккири Алишер Навоий таваллудининг 577 йиллиги муносабати билан юртимизга ташриф буюрди. Олим 1954 йили Арманистоннинг Амася овулида оддий ўқитувчи оиласида туғилган. 1978 йилда Москва университетини тамомлаб, мамлакатнинг қатор газета-журналларида, кейинчалик Боку давлат университетининг туркиёт кафедрасида мудир, профессор лавозимларида фаолият юритган.

Рамиз Аскар чорак асрдан бўён замонавий ўзбек шоирларининг энг сара намуналарини таржима қилиб, Озарбайжон матбуотида давомли суратда чоп эттириб келмокда. Айниқса, шоҳ ва шоир Бобур ижодига бўлган қизиқиши кучайиб, улкан мақсадга айланди. Олим 2011 йилда “Бобурнома”ни озарбайжон тилига таржима қилиб, нашр этдирди.

“Аудиторияга кирганимда талабаларга доимо туркий тилда ижод қилган энг буюк шоир ким?”, деган саволни ўртага ташлайман. Яъни, ҳамма ҳар хил жавоб беради. Мен талабаларимга туркий халқнинг буюк шоири Алишер Навоий эканлигини уқдириб, унинг ғазалларини ёд олдираман. Низомий, Фузулий, Насимиylар ўзбек халқига қанчалик қадрли бўлса, озар халқи учун Навоий, Бобур, Машраблар ҳам шунчалик азиздир”, – дейди олим ўзаро мулоқтлар чоғида.

Олим умумтуркий халқлар тили ва адабиёти, тарихи ва маданиятига оид 200 дан ортиқ илмий, 1500 га яқин публицистик мақола, 20 та монография, 45 та таржима китоб муаллифи ҳисобланади.

Рамиз Аскар ўз фаолиятини дастлаб “Озарбайжон овози” радиосида муҳаррирликдан бошлаган. Сўнгра бир қанча маҳаллий ва хориж газета-журналларида, жумладан, лотин, кирилл ва араб алифболарида нашр этиладиган “Одлар юрди” газетасида бош муҳаррир сифатида фаолият юрит-

ган. Унинг илмий ишлари, айниқса, “Девону луғотит турк” асари билан боғлиқ яхлит тадқиқотлари ва докторлик диссертацияси билан танишиб, асли касби журналист бўлган бу инсон тийнатида журналистликдан кўра олимлик устунроқ эканига амин бўламиз. Олим умр бўйи туркий халқлар адабиёти ва маданиятининг ривожи учун хизмат қилмоқда. У бу хизматлари учун Озарбайжон, Туркия, Туркманистон, Қозоғистон, Татаристон ҳамда Ўзбекистоннинг бир қанча нуфузли мукофотларига лойик деб топилган.

“Мен газета-журналларда ишлаган вақтимдан буён таржима билан шуғулланаман. Айнан ўзбек адабиётидан қилган таржималарим эса университетда ишлаган давримдан бошланган. У ерда ишлаётган вақтимда туркий халқлар адабиёти, жумладан, айрим ўзбек адибларининг асарлари озарбайжон тилига жуда кам таржима қилингандигини англадим. Шу бойисдан қилиниши зарур бўлган таржималарни режалаштиридим. “XX аср ўзбек шеърияти антологияси” бу борадаги биринчи ишим эди. Сўнгра Ҳусайн Бойқаро девонини, Бобурнинг танланган асарларини таржима қилдим. Ниҳоят, кўпдан бери орзу қилган асарим – “Бобурнома”ни озарбайжончага ўгирдим ва нашр қилдирдим. Бу хизматларимни Ўзбекистон ҳукумати муносиб тақдирлади. Ундан сўнг Ҳалқаро Бобур мукофотининг лауреати бўлдим. Махмуд Қошғарий, Юсуф Ҳос Ҳожиб асарларини таржима қилдим. Ҳозирда кун тартибимда Навоий асарлари таржимаси турибди”, – дейди бу ҳақда олимнинг ўзи.



Бобур асарларини шунчалар севиб, ўз тилига таржима қилган олимнинг “Бобурнома”га бўлган эътирофи жуда юксак. У Бобурни туркий ва ислом адабиёти билимдони сифатида қадрлаб, “Бобурнома”ни Ўрта Осиё, Эрон, Ҳиндистон, Афғонистон ва Озарбайжон тарихини бир машъала янглиғ ёритувчи, уларнинг тарихида мемуар

жанрида яратилган илк асар сифатида баҳолайди.

Олим Низомий номидаги Тошкент давлат педагогика университети профессор-ўқитувчилари ва талabalari, Ҳайдар Алиев номидаги озарбайжон маданият марказида бир гурух ёзувчи ва шоиrlар, адабиёт ихлосмандлари билан учрашди. Ушбу учрашувларда асосий мавзу ўзбек ва озарбайжон адабий алоқаларининг муштараклиги ва давомийлиги ҳақида бўлди. Ўшанда Рамиз Аскар даврада йигилганлар олдида кўпчиликни кувонтирадиган бир янгилик айтди, яъни, 2019 йилда бўладиган анъанавий ҳалқаро навоийхонлик конференциясига Алишер Навоий “Хамса”сининг илк достони “Ҳайратул абров” таржимаси билан келишга вайда берди. Шунингдек, Навоий вилояти ҳокимлиги томонидан олимга берилган “Навоий вилоятининг фахрий фуқароси” унвони олим зиммасига катта масъулият юклаганлигини таъкидлади.

*Гулноз САТТОРОВА,
филология фанлари номзоди*

ЖАҲОН АДАБИЁТИ ВА САНЬАТИ ҚИСҚАЧА ҚОМУСИ

АБАЙ УЙ-МУЗЕЙИ – 1940 йил 16 декабрда Қозоғистоннинг Семипалатинск шаҳрида улуғ қозоқ шоири Абай Қўйонбоев таваллудининг 95 йиллиги муносабати билан ташкил этилган. Бу уй дастлаб Анияр Молдабай ўғли исмли кишига тегишли бўлган. Абай 1854–1859 йилларда ўша ердаги Аҳмат Ризо мадрасасида таҳсил олган. Анияр Молдабай ўғлининг уйида Абай, Шакарим, Кокбай, Ақилбай, Абдураҳмон, Тўрағул, Қақитай сингари маърифатли кишилар тез-тез йиғилишиб турган. Кейинчалик уй адабий-мемориал музейга айлантирилгач, унга қозоқ адабиётшуноси Қаюм Муҳаммеджанов раҳбарлик қилган. Ҳозирда музей давлат муҳофазасига олинган бўлиб, уй биносининг асл кўриниши сақланиб қолган. Музей фондида ўн уч мингдан ортиқ экспонатлар сақланади. “Абай ва унинг даври”, “Абайнинг овулдаги ҳаёти”, “Абай ижоди манбалари”, “Абай ижоди”, “Абайшунослик”, “Қозоқ халқи буюк шоир хотирасини улуглайди” номли еттига мавзулаштирилган залда архив ҳужжатлари, шоирнинг кўлёзмалари, фото материаллар, ноёб китоблар, тасвирий санъат намуналари, абайшунослик асосчилиридан Мухтар Авезовнинг асарлари ва этнографик манбалар сақланмоқда.

АГИОГРАФИЯ – пайғамбарлар, авлиёлар ҳаёти хусусида ёзиладиган асарларнинг умумлашма номи. Агиография атамаси юононча сўздан келиб чиқкан, насронийлик шарҳларида “илоҳиёт ҳақида ёзаман” деган маънони англатади. Агиографик асарлар бадиий адабиётнинг катта қисмини ташкил этади. Илоҳиёт, черков, авлиё-анбиёлар ҳаёти тарихий, ижтимоий, маданий, адабий нуқтаи назардан ўрганилиши мумкин. Улар услубий жиҳатдан биографик, ривоят шаклида бўлади. Бундай турдаги асарлар Шарқ ва Ғарбда азалдан ривожланган.

“АКТЁР ҲАҚИДА ПАРАДОКС” – француз маърифатпарвар адиби Дени Дидронинг 1773 йилда ёзилган рисоласи. Унда актёрлик санъати масалалари таҳлил этилган бўлиб, илк бор 1830 йилда нашр этилган. Дидро ушбу асарида ўзига қадар бўлган назариётчilar орасида биринчи бўлиб кечинма санъати билан тақлидий санъат орасидаги тафовутларни аниқ ва қатъий тарзда изоҳлаб берган. У актёр ижросида ақл-идрок устуворлиги тарафдори бўлади, аммо актёр ижодидаги хис-туйғунинг аҳамиятини ҳам инкор этмайди. У фақат ҳис-туйғу ва ақл-идрок оралиғида мувозанат зарур деб билади. Актёрлик санъатида классицизмга хос “ясамаликдан” воз кечиш, “дабдабабозлик”ни пасайтиришни таклиф қилади. Дидронинг фикрича, тафаккур актёри совуккон, лекин уқувли бўлиб, қаҳрамонини теран ҳис қилаётгандек таассурот қолдиради, ўз навбатида томошабинни ҳам хаяжонга солади. Чинакам кечинма актёри эса аксинча, ўз ҳисларига

тарқ бўлиб, томошабинни ҳаяжонга сололмаслиги мумкин, деб ҳисоблайди. Лекин ҳиссиятнинг кучини ҳам инкор этмайди. Актёрлик санъатининг ана шундай парадоксиал жиҳатларини таҳлил этиб, уларни умумлаштириш тамойили хуносага айланади. Дидро олға сурган шундай тамойиллар саҳна санъатида реализмнинг ривожланишида муҳим омил бўлган.

АСҚАР ФАРҲОДИ – эрон кинорежиссёри. 1972 йилда Эроннинг Исфахон вилоятида таваллуд топган. 1996 йилда Техрон университетини тамомлаб, “Эрон Республикаси ислом овози” радиосида фаолият юритган. Кино соҳасига кириб келиши қисқа метражли фильмлардан бошланган. “Эрон ёш кинематографлари жамияти” га тақдим этган ўн олти дақиқалик илк фильм билан назарга тушган. Кинорежиссёр сифатида профессионал фаолиятини 2003 йилда “Тўзондаги рақс” тўлиқ метражли бадиий фильм билан бошлаган. Мазкур фильм билан миллий ва халқаро фестивалларда эътироф этилган. У бугунги кунга кадар “Ажойиб шаҳар”(2004), “Мушакбозлар орасида”(2006), “О, Элли”(2009), “Нодира ва Симиннинг ажрими”(2011), “Ўтмиш”(2013), “Коммевояжер”(2016) каби муаллифлик фильмларини суратга олган. “Нодира ва Симиннинг ажрими” фильмни учун Оскар, Канн, Бафта, Берлин каби нуфузли кинофестивалларда турли номинациялари бўйича ғолибликни қўлга киритган. Фильмлари дунёning бир неча тилларига таржима қилинган.

АТТИКА КОМЕДИЯСИ – янги аттика комедияси деб ҳам юритида. Юнонистонда пайдо бўлган драматургиянинг сўнгги жанри. Юнон театрида эрамиздан аввалги IV – I асрлар, яъни, эллинизм даврига келиб, драматургия, актёрлик, театр биноси меъморчилиги жиддий равишда ўзгаради. Эллинизм даври театри демократик Афина театридан кескин фарқ қиласди. Муаммонинг ўткирлиги, жиддий ижтимоий-сиёсий масалаларни ўртага қўйиш бу комедия учун хос эмас. Лекин характерларни ишлаш ва хатти-харакатларни кескинлаштириш борасида мазкур комедияда муайян силжишлар қилинган. Юнонистон ижтимоий-сиёсий ҳаётида юз берган ўзгаришлар бу комедияда ўзига хос акс эттирилган. Олам тартиботининг илоҳиятга боғлиқлиги ҳақидаги тасаввур ҳамда одиллик тантанасига ишонч ўрнини тасодиф қудратига ишонч эгаллади. Янги Аттика комедиясида ўзаро тўқнашувнинг туғилиши ҳам, ҳал этилиши ҳам тасодиф билан белгиланган. Бу комедиянинг вазифаси замонавий воқеаликни оилавий-маиший турмуш доирасида тасвирлашдан иборат эди. Унда севги-муҳаббат мавзуси асосий ўринда туради. Бу комедия тузилиши жиҳатдан ҳам қадимги сиёсий комедиялардан тубдан фарқ қилиб, унда парод, парабаза, хорнинг вазифаси йўқолган ва факат танаффус вақтидагина хор ижросидан фойдаланилган. Лекин хотин-қизлар ролларини, аввалгидек, эркаклар ўйнаган ва никоб ҳам сақланиб қолаверган. Ижрода эса пафосдан чекиниб, оддийликка қараб борилган. Аттика комедияси кўплаб драматурглар ижодида акс этган. Бироқ, улар орасида Менандр энг машҳури ҳисобланади. Унинг юздан ортиқ пьесаларидан жуда оз қисми бизгача етиб келган бўлиб, “Одамови” пьесаси Зохир Аълам томонидан ўзбек тилига таржима қилинган.

Мафтуна МУҲАММАДАМИНОВА
тайёрлади.

РЕЗЮМЕ

••• В феврале исполняется 577 лет со дня рождения выдающегося узбекского поэта, мыслителя, государственного деятеля Алишера Навои и 535-ая годовщина со дня рождения известного полководца, правителя и поэта Захириддина Мухаммада Бабура. В данном номере журнала представлен цикл статей, посвященных данным событиям, а также литературные беседы о творчестве, нравственно-философских взглядах великих гениев.

••• Роман “Пинбол-1973” – вторая часть культовой “Трилогии крысы” популярного японского прозаика Харуки Мураками. Это драма молодых людей, обосновавшихся в многолюдном городе, но так и не обретших свое место в суетном мире. Это история человека, оказавшегося совершенно одиноким в толпе...

••• Узбекские читатели знакомы с творчеством известного английского прозаика и драматурга Сомерсета Моэма. В своих произведениях писатель не раз обращался к теме духовного становления героя, самоценности таланта, проблемы отношений художника с обществом. В рассказах “Удачливый художник” и “Тайпан” автор остается верным своим идеям.

••• Турецкий поэт Раджаб Хифзи прожил в этом мире всего 25 лет. Но его поэзия, полная человечности, душевных эмоций, страданий и боли за нацию, будоражит умы и чувства читателей почти столетие. Представляем образцы стихотворений Хифзи, впервые переведенных на узбекский язык. Автор перевода – известный поэт Тахир Каххар.

••• Древнегреческий мыслитель Аристотель был первым, кто создал всестороннюю систему философии, охватившую многие сферы человеческого развития. Его научные доктрины до сих пор служат важной методологической основой в изучении ряда наук. В статье “Литература, растолкованная Аристотелем” ученый литературовед Абдулла Улугов обстоятельно рассуждает о жизни и творчестве мыслителя.

••• Польская певица и композитор Анна Герман и немецкий режиссер, талантливый критик Отто Брам внесли весомый вклад в развитие мировой культуры и искусства, явились основателями своеобразных творческих школ. Краткий экскурс в мир известных артистов читайте в рубрике “Персона из мира искусства”.

RESUME

••• This year is the 577th anniversary of birth of our great Uzbek poet representative Alisher Navoiy and 535 year to birth of king and poet Zakhiriddin Mokhammad Babur. In this regard we are representing various articles about their poetry, poetical and philosophical outlook and literary conversations in this number.


••• The famous Japanese writer Khariku Murakam in his novel “Pinball 1973” tells in new narrative style about the tragic life of a young guy who could not jump out stormy life of a metropolis and eventually lost himself.

••• The famous English writer Somerset Maugham is well acquainted with the Uzbek readers. In this number, stories of the writer with the various adventures “Lucky artistand “Taipan”are published.

••• The famous Turkish poet Rajab Hifziy lived only 25 years. But the human suffering of the poet, the grief of the nation and poetry embodied by feelings almost a century astonishes the wide the world.

••• Scientific direction created by the great scholars of Aristos serves as the main methodological origins in the history of mankind. Especially his work “Poetics” is the main source in literary studies. Scholar and literary critic Abdulla Ulugov in his article “Literature that enlightened by Aristos” tells in detail the life and works of the philosopher.

••• In the rubric “great in art” we will conduct an artistic excursion into the creative world of famous artists Anna Herman who brought a huge contribution to the development of culture and the art of the world.



Ўзбек адабиёти оғир жудоликка учради. Машъум ўлим устозимиз, ҳамкасбимиз, Ўзбекистонда хизмат кўрсатган маданият ходими, таниқли шоир ва таржимон Мирпўлат Мирзони 69 ёшида тўсатдан орамиздан олиб кетди.

Мирпўлат Мирзо 1949 йил 20 августда Чимкент вилоятининг Сайрам қишлоғида туғилди. 1965-1971 йилларда Тошкент Давлат университети (ҳозирги ЎзМУ)нинг журналистика факультетида таҳсил олди.

Меҳнат фаолиятини 1971 йилда ҳозирги “Янги аср авлоди” нашриётида бошлаган. У Ўзбекистон Ёзувчилар уюшмасида адабий маслаҳатчи, “Ёзувчи” нашриётида бош муҳаррир, Ёзувчилар уюшмасининг котиби вазифаларида хизмат қилди. 1997-2013 йилларда “Жаҳон адабиёти” журнали бош муҳаррирининг ўринбосари вазифасида самарали меҳнат қилди.

Мирпўлат Мирзонинг “Ишқ фасли” (1978), “Яхши кунлар” (1981), “Сунбула” (1985), “Мовий дарё” (1988), “Атиргул ва юлдузлар” (1990), “Сайланма” (2004), “Суур” (2009) мажмуаси, “Райҳон иси” (2011) каби қатор шеърий тўпламлари, бадиий-публицистик китоблари нашр этилди.

Таржимон сифатида Мирпўлат Мирзо Лессингнинг “Донишманд Натан”, Шекспирнинг “Ёз туни ғаройиботлари” асарлари ва дунё адабиётининг юзга яқин намояндадарининг турли жанрда яратилган кўплаб асарларини ўзбек тилига таржима қилди. “Сомон йўли чечаклари” (Жаҳон шеърияти антологияси, 2004), “Сайра, дўмбирам” (Қозоқ шеърияти антологияси, 2005), “Ложувард осмон” (ХХ аср шоирлари, 2008) китоби, “ХХ аср рус шеърияти” (2010) каби қатор таржима тўпламлари чоп этилган.

Шоирнинг серкирра ва самарали ижоди давлатимиз томонидан муносаб баҳоланиб, у “Ўзбекистонда хизмат кўрсатган маданият ходими” фахрий унвони (1999), “Меҳнат шухрати”(2017) ордени билан мукофотланди. Заҳматкаш ижодкор бадиий таржима ва халқаро адабий алоқаларни ривожлантиришдаги фаолияти учун Пастернак номидаги Россия (1998), “Алаш” номли Қозоғистон халқаро мукофотлари (2001) билан тақдирланди.

Дилкаш инсон, самимий устоз, фидойи ижодкор Мирпўлат Мирзо ёди қалбларимизда абадий яшайди.



2018 йил февраль сони

Навбатчи муҳаррир: Ш.НАЗАРОВА
Техник муҳаррир: О.СОБИР ўғли
Мусаххих: Д.АЛИЕВА
Компьютерда сахифаловчи: М.АЛИЕВА

ИНДЕКС 828, 829

2007 йилда №0252 рақами билан лицензия олинган.

Ўзбекистон Матбуот ва ахборот агентлигига рўйхатга олинган, №189.

Уч босма табоқ хажмгача бўлган кўлъёзмалар қайтарилимайди.
“Жаҳон адабиёти” журналида эълон қилинган асарларни кўчириб босишида
ва қайта нашр этишда таҳририятнинг ёзма розилиги олиниши шарт.

Таҳририят манзили:

100011, Тошкент, Алишер Навоий номидаги Миллий
бог ҳудудида жойлашган Адиллар хиёбони.

Телефонлар: (0371) 231-23-54, 231-23-56, 231-23-57.

Сайт: www.jahonadabiyoti.uz

E-mail: jahonadabiyoti@list.ru

Босишига руҳсат этилди 23.03.2018 й. Бичими 70x108 1/16. Офсет қоғози.

Офсет босма. Шартли босма табоқ 18,2. Нашриёт босма табоғи 20,0.

Адади 3820 нусха. 26 рақамли буюртма. Баҳоси шартнома асосида.

“Жаҳон адабиёти” журнали компьютер марказида терилиб, “Sharq” НМАҚда чоп этилди.

Босмахона манзили:

100000, Тошкент, Буюк Турон кўчаси, 41.

© Жаҳон адабиёти, 2018 й.